

# Salmos

## 1

*Tlajtlacolchihuani huan catli itztoque  
xitlahuaque iixpa Toteco*

- 1 Paqui nopa masehuali catli amo quitlacaquilía inincamanal amo cuajcualme, niyon amo quintoquilía tlajtlacolchihuani. Niyon amo mohuica inihuaya catli ica paquij TOTECO.
- 2 Nopa masehuali quipantía hueyi paquillistli pampa quichijtinemi catli quiijtohuaj itlanahuatilhua TOTECO, huan ipan nopa tlanahuatilme monejnehuili-jtinemi tonaya huan tlayohua.
- 3 Nopa masehuali itztoc quen se cuahuitl catli moscaltía nechca atentli, huan temaca itlajca quema ipohual huan amo quema xihuiyo tepehui. Nochi catli quichihua quisa cuali.
- 4 Pero amo quej nopa ica masehualme catli amo cuajcualme, pampa inijuanti itztoque quen tlasoli catli qui-huica ajacatl.
- 5 Yeca quema TOTECO tetlajtolsencahuas, nopa amo cuajcualme amo huelise quiijiyohuise, pampa yaya tlahuel chicahuac quintlatzacuiltis. Quena, ipan nopa tonal tlajtlacolchihuani ayacmo huelis mocahuase inihuaya masehualme catli itztoque xitlahuaque iixpa.

**6** Pampa TOTECO quimati nopa ojtli catli ipan nemij masehualme catli itztoque xitlahuaque, pero masehualme catli quichihuaj catli amo cuali, polihuise.

## 2

### *Quema tlanahuatis Icone TOTECO*

**1** Se huihuiyotl para tlanahuatiani huan ininmasehualhua catli amo quiiximati j TOTECO ma motlanananaca iixpa.

San tlaptic quisencahuase catli fiero quichihuase.

**2** Tlanahuatiani huan tlayacanca tequitini ipan tlaltipactli mosisinise, huan mocamanalhuise tlaque huelis quichihuilise TOTECO huan nopa Tlanahuatijquetl Catli Yaya Quitlapejpenijtoc.

**3** Tlahuejchihuase huan moijilhuise:

“Ma timoquixtilica nopa tepos cadena catli ica techilpitoc.

Ma timomanahuica para ayacmo huelis techinahuatis TOTECO.”

**4** Pero Toteco catli itztoc nepa ilhuicac huan quinahuatía nochí, san quínhuetzquilis.

Quena, san ininca paquis, pampa iixpa ya amo tleno ipati catli inijuanti quipilsencahuase.

**5** Teipa quema quiyolaxitise TOTECO, melahuac quinxcooilhuis.

Huan ica miyac cualantli quinmajmatis huan quijtos:

**6** “Ya nijtlalijtoc notlanahuatijca para tlanahuatis ipan altepetl Jerusalén.

Yaya mosehuis ipan isiya yejyectzi nepa ipan  
notepe tlatzejzeloltic catli itoca Sion.”

<sup>7</sup> Huan catli TOTECO quitlapejpenijtoc para it-  
lanahuatijca quiijtos:

Nitlayolmelahuas catli TOTECO nechilhuijtoc  
huan ya ni catli quiijto:

“Ta tiTlanahuatijquetl, tiNocone.

Ama nitlayolmelahua tlamiyacapa para na nimo-  
Tata.

<sup>8</sup> Techtlajtlani huan nimitzmacas nochí tlalme  
huan ininmasehualhua para moaxcahua.

Quena, tijselis hasta nochí tlaltipactli para  
moaxca.

<sup>9</sup> Xiquinnahuati chicahuac quen se tlanahuati-  
jquetl catli tlanahuatia ica tepostli imaco  
para ica tetlatzacultis.

Quena, xiquinomiyopojpostequi mosisiniica  
masehualme quen elisquíaj soqui  
chachapalme.”

(Quej nopa TOTECO quitequimacac itlanahuatijca  
ma quichihua.)

<sup>10</sup> Yeca, antlanahuatiani huan antequitini ipan  
tlaltipactli,

ximotlalnamictica huan ximomocuitlahuica ica  
catli anquichihuaj.

Ama xijtlacaquilica catli nimechilhuía quema  
noja anhuelij.

<sup>11</sup> Xijtequipanoca TOTECO pero nojquiya  
xiquimacasica huan xijtlepanitaca pampa  
anmomacaj cuenta ajqueya ya.

Xijhueyichihuaca TOTECO ica paquilibrium huan  
xiquimacasica anquichihuase catli amo  
quinamiqui.

<sup>12</sup> Ximotlancuaquetzaca iixpa Icone TOTECO ica majmajtli huan xijtzoponica.

Sintla amo, antlatocmiquise pampa nimantzi cualani.

Pero nelía paquij masehualme catli motemachíaj ipan ya para ma quinpalehui.

### 3

*Se netlatlajtili para Toteco Dios ma quipalehui*

<sup>1</sup> TOTECO, nelía momiyaquilíaj nocualancaitacahua.

Quena, nelmiyaqui motlananaj para nechhuilanase.

<sup>2</sup> Miyaqui quijjtohuaj para ta amo quema techpalehuis.

<sup>3</sup> Pero TOTECO, ta techyahualohua para techmanahuis.

Ta catli techhueyitlalía huan san ta catli tihueli techyolchicahua.

<sup>4</sup> Chicahuac nimitztzajtzili, TOTECO, para techpalehuis.

Huan ta technanquili hasta campa tionitztoc nepa ipan motepe catli tlatzejzeloltic.

<sup>5</sup> Yeca nimotejqui huan cuali nicochqui.

Huan quema niisac,

amo tleno nopantitoya pampa ta, TOTECO, techmocuitlahuía.

<sup>6</sup> Ama ayacmo nechmajmatise masque majtlactli mil nocualancaitacahua nechyahualose para nechhuilanase.

<sup>7</sup> Ximotlanana, TOTECO.

Techmaquixti, ta tinoTeco Dios.

Chicahuac xiquinmaquili nochí nocualancaitac-  
ahua ipan iniixayac.

Xiquintlanpojpostequi nopa mosisiniça mase-  
hualme,  
para tlamis nochí ininchicahualis huan amo tleno  
huelis nechchihuilise.

<sup>8</sup> San ta, TOTECO, hueli titemaquixtía.

Hueyi paquelistli quipiyaj nochí momasehualhua.

## 4

### *Monequi timotemachise ipan Toteco Dios*

<sup>1</sup> Toteco Dios, ta techchijtoc nixitlahuac moixpa,  
Se favor technanquili quema nimitznojnotza.  
Ta catli nochipa techpalehuía quema nitlaijiy-  
ohuía,  
ama sempa techtlaosjtlá huan xijcaqui quema ni-  
motlatlajtía.

<sup>2</sup> Huan Toteco quinanquilía.

“Anmasehualme, xijtlacaquilica ya ni:  
¿Hasta quema tlamis para annoca paquise na,  
catli más quinamiqui nijselis tlatlepanitacayotl?  
¿Hasta quema noja anquinhueyichihuase tlaix-  
copincayome catli amo neli ya Dios?  
¿Hasta quema noja anmocahuase ma ammechcay-  
ahuaca?”

<sup>3</sup> Anmasehualme, xijmatica ya ni.

TOTECO techiyocatlalijtoc para tiiaxcahua nochí  
tojuanti catli techcojtoc.

Huan yaya nechtlacaquilía quema nijnojnotza  
huan nechchihuilía catli nijtlajtlanía.

<sup>4</sup> Masque anhuihuipicaj ica cualantli,  
amo xitlajtlacolchihuaca.

Quema anmotectose ipan amotapech huan amo  
tleno molinía,  
ximonejnehuilica catli eltoc ipan amoyolo.

<sup>5</sup> Xijchihuaca catli quinequi TOTECO huan ya  
nopa elis quen anquimacasquíaj se tlacajc-  
ahualistli catli quipactía.  
Quena, ximotemachica ipan ya.

<sup>6</sup> Miyac quijtohuaj:  
“Amo aqui huelis techpalehuis.”  
Pero ta tihueli, TOTECO.  
Techcualita huan techtiochihua.  
<sup>7</sup> Ta tijtlalijtoc ipan noyolo más paquelistli,  
huan amo quen catli quipiyaj masehualme catli  
quipixcaj miyac trigo,  
o quipiyaj miyac xocomecatl iayo.  
<sup>8</sup> Yeca na nimotecas ica paquelistli ipan noyolo  
huan ica cuali nicochis,  
pampa nijmati san ta, TOTECO, techmanahuía  
huan amo aqui huelis tlen nechchihuilis.

## 5

### *Mojmostla cualca David motlatlajti*

<sup>1</sup> TOTECO, xijtlacaquili nocamanal.

Techchihuili cuenta quema nitlaayijhuía.

<sup>2</sup> Ta tinoTeco Dios catli tiitztoc tinotlanahuatijca,  
techtlacaquili quema nimitztlajtlanía tech-  
palehui,

pampa amo aqui seyoc nijtlajtlanía.

San nimotlatlajtía moca ta.

<sup>3</sup> Sese ijnaloc nelcualca nimitzpo huilía catli nech-  
pano, TOTECO.

Mojmostla nimitztlajtlanía catli monequi,

huan san nimochiya para technanquilis.

<sup>4</sup> Ta tiToteco Dios catli amo mitzpactía catli amo  
cuali.

Yeca amo tiquincahuilá amo cuajcualme ma itz-  
toca mohuaya.

<sup>5</sup> Catli mohueyimati amo hueli moquetzase  
moixpa.

Tiquincualancaita nochí catli quichihuaj catli  
amo cuali.

<sup>6</sup> Tiquintzontlamiltía masehualme catli istlacatij.  
Quena, TOTECO, amo tijnequi tiquinitas catli tla-  
cajcyahuaj huan temictíaj.

<sup>7</sup> Pero na, pampa hueyi motlaicnelijcayo,  
huelis nicalaquis mochaj.

Quena, huelis nimitzhueyichihuas ipan motlatze-  
jtzeloltijca tiopa,  
pampa nimitztlepanita huan nimajmahui para  
nimitzixpanos.

<sup>8</sup> TOTECO, techyacana quen nohuaya timocajtoc  
tijchihuas,

pampa itztoque nocualancaitacahua.

Technextili moojhui catli xitlahuac.

<sup>9</sup> Nocualancaitacahua amo quema quiijtohuaj  
catli melahuac.

Amo aqui hueli motemachía ipan inincamanal.

Ipan ininyolo san quinequij tetzontlamiltise.

Inincamac eltoc fiero quen quema quitlapohuaj  
se mijca ostotl.

Tecamanalhuiáj ica camanali catli yejectzi san  
para tlacajcayahuase.

<sup>10</sup> Xiquintlatzaculti, noTeco Dios.

Xiquinmasilti ica catli amo cuali moilhuijtoque  
quinchihuilise sequinoc.

Xiquinhuejcamajcahua pampa miyac inintlajtla-  
colhua.

Quena, xiquinhuejcamajcahua pampa mohuej-  
cachijtoque tlen ta.

<sup>11</sup> Pero ma paquica nochí catli motemachíaj ipan  
ta para xiquinpalehui.

Nochipa ma huicaca ica paquelistli pampa ta  
tiquinmanahuía.

Catli mitzicnelíaj paquij ipan ta.

<sup>12</sup> Pampa ta, TOTECO, tiquintiochihua catli quichi-  
huaj catli xitlahuac moixpa.

Motlaicnelijcayo quinyahualohua quen se te pos  
tzajcayotl catli quinmocuitlahuía.

## 6

*Quenicatza ma timotlatlajtica quema timote-  
quipachohuaj*

<sup>1</sup> TOTECO, amo techajhua quema ticualani.

Amo techtlatzaculti quema tlahuel ticualantoc.

<sup>2</sup> Techtlasojtla, pampa nimococohuia.

TOTECO, techchicahua, pampa tlahuel nechcoco-  
hua nochí notlacayo.

<sup>3</sup> Nihuihuipica ica majmajtli huan amo nijmati  
tlaque nijchihuas.

Huan ta TOTECO, ¿hasta quema tihualas para  
techtlananas?

<sup>4</sup> Xihuala, TOTECO, techmanahuiqui para amo  
nimiquis.

Techmaquixti pampa tlahuel techicnelíia.

<sup>5</sup> Amo aqui catli mictoc huelis mitzelnamiquis.

¿Ajqueya huelis mitzhueyichihuas sintla mictoc  
huan ya quitlalpachojoque?

<sup>6</sup> Ya tlanqui nofuerza ica choquistli.

Sesen yohuali nichoca miyac hasta nijt-lamixolonía notzonteto.

<sup>7</sup> Nichocatoc miyac hasta nechcocohua noixteyol huan ayacmo hueli nitlachiya.

Quena, nichoca quema nimoilhuía catli nocualancaitacahua nechchihuilijtoque.

<sup>8</sup> Techtlalcahuica, tlajtlacolchijca masehualme, pampa TOTECO quicactoc quen nichoca.

<sup>9</sup> Yaya quicactoc catli nijtlajtlanijtoc, huan quiselijtoc nonetlatlajtilis.

<sup>10</sup> Nochi nocualancaitacahua mopinahuase huan huetzise.

Ica se tlatoctzi TOTECO quincuepas ica pinahualistli.

## 7

### *TOTECO tetlajtolsencahua xitlahuac*

<sup>1</sup> TOTECO, ta catli tinoDios, ipan ta nimotemachía para techmanahuis. Techmaquixti ininmaco nochi catli nechtoquilitinemij.

<sup>2</sup> Nocualancaitacahua itztoque quen tecuanime huan sintla ta amo techmanahuis, nechcocototzase huan amo aqui nechmaquixtis.

<sup>3</sup> TOTECO, sintla nelía nijhuicasquía tlajtlacoli, quinamiqui ma nechcuálancaitaca.

<sup>4</sup> Sintla nijcuepilijtosquía ica catli amo cuali se nohuampox catli cuali itztoya nohuaya, huajca quena.

<sup>5</sup> Sintla quej nopa nijchijtosquía, huajca ma nechtepotztoca nocualancaitaca.

Ma nechajsiti huan ma nechhuahuatza,  
huan ma nechpinahualti,  
pero amo aqui quej nopa nijchihuilitoc.

<sup>6</sup> Ximotlanana, TOTECO, ica cualantli.

Xicualani miyac ica nocualancaitacahua quen in-  
ijuanti nechcualancaitaj.

Ximoquetza tlajco campa tojuanti,  
huan xiquinfuerzajhui ma nechchihuilica catli  
xitlahuac.

<sup>7</sup> Se tonal masehualme tlen nochi tlalme  
mitzyahualojtose,  
huan ta tiquintlajtolsencahuas campa timosehui-  
jtoc ipan mosiya yejyectzi nepa ilhuicac.

<sup>8</sup> Quena, TOTECO tiquintlajtolsencahuas nochi  
masehualme ipan nochi tlalme.

Huajca nojquiya techtlajtolsencahua na, TOTECO,  
ica catli cuali nijchijtinentoc.

Ta catli más tihueyi,  
technextijtoc iniixpa nochi masehualme para  
amo nijpiya tlajtlacoli.

<sup>9</sup> Ta, tiToteco Dios, catli titetlajtolsencahua xit-  
lahuac.

Xijtlachili inintlalnamiquilis masehualme huan  
xijyejyeco catli quipiyaj ipan ininyolo.

Xijtlamilti catli quichihuaj nopa amo cuajcualme,  
pero techchihua tielise titemachme tojuanti catli  
timonejnemiltíaj cuali moixpa.

<sup>10</sup> Toteco Dios nechyahualhua para  
nechmanahuis.

Quinmaquixtía catli quipiyaj ininyolo xitlahuac  
iixpa.

- 11** Toteco Dios yaya se juez catli tetlajtolsencahua xitlahuac.  
 Mojmostla cualani ica amo cuajcualme.
- 12** Sintla se masehuali amo moyolcuepas,  
 Toteco Dios quitentis imachete para quitzontlamiltis.  
 Huan quicualtlalis icuahuitol catli ica quimictis.
- 13** Ya quicualtlalijtoc itlahuilanca teposhua huan quinhualica imaco para temictis.  
 Quipixtoc miyac cuatlamintli catli lementoque para tetzontlamiltis sintla amo moyolcuepaj.
- 14** Se masehuali catli amo cuali san quinequi tecocos,  
 huan san moilhuía catli fiero hueli quichihuas huan teipa icamaco quisa san istlacatili.
- 15** Se catli quichihua se ostol para quimasiltis seyoc,  
 teipa ya huetzis campa tlaxajqui.
- 16** Quej nopa nojquiya ica catli fiero se masehuali quinchihuilá sequinoc,  
 teipa mocuepas ipan ya.
- 17** Pero na nijtlascamatis TOTECO pampa yaya xitlahuac.  
 Nihuicas tiohuicatl para nijhueyichihuas TOTECO, Yaya Catli Más Hueyi.

## 8

### *Masehualme huan ihueyitilis Toteco Dios*

- 1** ¡TOTECO, ta Catli Tijpiya Nochi Tlanahuatili!  
 Mohueyitilis quitemitía nochí tlaltipactli.  
 Huan motlatlanex quionpano ilhuicactli.  
 Nochi quimatij ta tlahuel tihueyi.

- <sup>2</sup> Tiquinnextilijtoc coneme huan pilconetzitzi catli  
noja chichij ma mitzpaquilismacaca.  
Mocualancaitacahua quiitase huan momacase  
cuenta para tlahuel pano hueyi mochic-  
ahualis huan yeca ayacmo molinise.
- <sup>3</sup> Quema niquita ilhuicactli catli tijsencajqui,  
huan nopa metztlí huan sitlalime catli tiquinchij-  
chijqui,
- <sup>4</sup> nimoyolilhuía:  
¿Ajqueya tojuanti timasehualme para ta timocua-  
totonía huan timoilhuía tlen tojuanti?  
Nelquentzi topati timasehualme para ta tech-  
mocuitlahuis.
- <sup>5</sup> Techchijtoc timasehualme más tihuejhueyi  
moixpa que nochí sequinoc.  
Techmacatoc tohueyitis moixpa huan tijsencaj-  
toc para nochí catli tijchijtoc ma techtlepan-  
itaca.  
San ta, TOTECO, tieltoc más tihueyi huan techtlani  
ica mohueyitis.
- <sup>6</sup> Techmacatoc timasehualme tlanahuatili ica  
nochí tlapiyalme catli tiquinchijtoc.  
Quena, techmacatoc timasehualme para ma ti-  
jpiyaca tequiticayotl ica nochí tlamantli.
- <sup>7</sup> Tiquinnahuatíaj nochí borregojme, huacaxme  
huan nochí tecuanime catli mosisiníaj.
- <sup>8</sup> Tijpiyaj tequiticayotl ica nochí tlamantli totome  
huan michime, huan ica nochí catli itz-  
toque ipan hueyi atl.
- <sup>9</sup> ¡TOTECO, ta Catli Tijpiya Nochi Tlanahuatili!  
Nochi masehualme campa hueli ipan nochí tlalti-  
pactli quimatiј ta tlahuel tihueyi.

## 9

*Timitzpaquilismacase Toteco Dios por nochicatli cuajcualtzi tijchijtoc*

<sup>1</sup>Nimitzpaquilismacas, TOTECO, ica nochí noyolo.  
Nitepohuilis nochí catli cuali tijchijtoc.

<sup>2</sup>Nijpiya hueyi paquilibrium por ta,  
huan yeca nihuicas huan nimitzpaquilismacas,  
Toteco, ta Catli Más tiHueyi.

<sup>3</sup>Nocualancaitacahua cholojtehuase.

Huetzise mictoque moixpa.

<sup>4</sup>Pampa ta tiquinpannextilijtoc masehualme para  
niitztoc xitlahuac moixpa.

Titenextilijtoc para nijchijtoc catli cuali.

Timosehuijtoc ipan mosiya catli yejyectzi huan  
titetlajtolsencahua xitlahuac.

<sup>5</sup>Tiquinajhuas nochí masehualme ipan nochí  
tlalme catli amo mitzneltocaj.

Tiquintzontlamiltis nochí inijuanti catli amo cua-  
jcualme.

Tiquinixpolos inintoca para nochipa.

<sup>6</sup>Nocualancaitacahua miquise,  
huan ininhuaya polihuise nochí inialtepehua.

Pampa ta tiquintzontlamiltasosolhuilis huan amo  
tleno mocahuas.

Amo aqui quinelhamiquis.

<sup>7</sup>Pero TOTECO tlanahtatis para nochipa.

Yaya mosehuía ipan isiya catli yejyectzi nepa il-  
huicac huan tetlajtolsencahua.

Catli yaya quichihua, ya nopa xitlahuac.

<sup>8</sup>Toteco quintlajtolsencahuas xitlahuac  
nochí tlalme ipan tlaltipactli huan  
inimasehualhua.

Yaya quintlatzacuiltis sese inijuanti quen quinamiqui por nopa tlajtlacoli catli quichijtoque.

<sup>9</sup> Nochi catli pilteicneltzitz huelis motemachise ipan TOTECO huan yaya quinmocuitlahuis. Huelis motlatise ipan ya quema tlaijiyohuáj.

<sup>10</sup> Quena, TOTECO, nochi catli mitziximatij motemachise ipan ta para tiquinpalehuis, pampa amo quema tiquintlahuelcahuas catli mitztemohuaj.

<sup>11</sup> Xihuicaca huan xijpaquilismacaca TOTECO, catli mosehuía ipan isiya yejectzi nepa ipan Jerusalén huan nochi quinahuatía.

Xiquinpohuilica nochi masehualme ipan tlaltipactli catli yaya quichijtoc.

<sup>12</sup> TOTECO quintzontlamiltis catli temictíaj pampa quej nopa quinamiqui quincuepilis.

Quinelnamiqui catli motequipachohuaj, quintlacaquilia quema masehualme catli tlaijyohuáj quitzajtzilíaj para ma quinpalehui.

<sup>13</sup> Techtlasoxtla, TOTECO.

Xiquita quen nitlaijiyohuía ica catli nechchihuilíaj inijuanti catli amo quinequij nechitase.

Techmanahui pampa quinequij nechmictise,

<sup>14</sup> huan na nimitzpaquilismacas iniixpa nochi masehualme.

Niquinpohuilis nochi catli mosentilíaj ipan altepetl Jerusalén catli techchihuilijtoc.

Nelía nipquis pampa techmaquixtijtos.

<sup>15</sup> Mosisinijca masehualme tlen nochi tlalme huetzise ipan nopa ostotl catli inijuanti quichijque.

Quitlatijtoque se tlaquetzli para ma masica sequinoc,  
pero inijuanti icxicuatacanise.

<sup>16</sup> TOTECO quichijtoc para nochi ma quimatica para yaya xitlahuac tetlajtolsencahua.

Yaya quichihua para ma huetzica ipan tlaquetzli catli ica ininmax quisencajtoque.

<sup>17</sup> Nochi amo cuajcualme yase mictla.

Quena, nepa ajsitij nochi masehualme catli amo quielnamiquij Toteco Dios.

<sup>18</sup> Pero Toteco amo quinelcahuas catli teicneltzitzti.

Yaya nochipa quinmacas catli quichiyaj para quiselise.

<sup>19</sup> Ximotlanana, TOTECO.

Amo xiquincahuili masehualme más ma quipiyaca chicahualistli.

Xiquintlajtolsencahua huan xiquintlatzacuulti nochi masehualme catli amo mitziximatij.

<sup>20</sup> Xijchihua ma majmahuica, TOTECO.

Ma momacaca cuenta nochi masehualme ipan nochi tlalme para inijuanti san panoni.

## 10

*Se netlatlajtili para quitlajtlanis TOTECO ma quipalehuiqui*

<sup>1</sup> TOTECO, ¿para tlen huejca tiitztoc huan timotlatía quema na nijpiya tequipacholi?

<sup>2</sup> ¡Xiquita, TOTECO!

Amo cuajcualme tlahuel mohueyimati j huan  
quintepotzto catinemi j catli teicneltzitzi  
para quincocose.

Ma masica ipan nopa tlaquetztlí catli inijuanti  
quisencajtoque para sequinoc.

<sup>3</sup> Nopa amo cuajcualme mohueyimati j ica nochí  
catli fiero quinequij quichihuase.

Huan masehualme catli quinequij san inijuanti  
quipiyase nochí tlamatli,  
quintelchihuaj nochí sequinoc hasta ta, TOTECO,  
mitztelchihuaj nojquiya.

<sup>4</sup> Nopa amo cuajcualme nel mohueyimati j huan  
amo mitztemohuaj, Toteco Dios.

Amo quema mitzelnamiquij pampamoilhuíaj  
amo tiaqui para ti quintlatzinto quilis tlaque  
quichihuaj.

<sup>5</sup> Ama quisa cuali nochí catli amo cuajcualme  
quichihuaj,

huan yeca san mohueyimati j,  
huan motlanahuatilhua amo quinchihuilíaj  
cuenta.

San quinhuetzquilíaj nochí inincualancaitacahua.

<sup>6</sup> Huanmoilhuíaj:

“Amo quema topantis se tlenijqui.

Nochipa tipactose huan amo quema techajsí  
tequipacholi.”

<sup>7</sup> ¡Xitlacaqui, TOTECO!

Quema camanalti j masehualme catli amo cuajcualme,

san quisa tlatelchihuali, istlacatili huan nochí  
catli ica tlacajcayahua.

¡Xiuita, TOTECO!

Nochipa tlacajcayahuaj huan quinyolcocohuaj se-  
quinoc para ma quipiyaca tequipacholi.

<sup>8</sup> Motlatíaj nechca pilaltepetzitzti para teojchiyase,  
huan quema amo aqui quinita,  
quimictíaj se catli amo tleno quichijtoc.

Quinichtacachiyaj catli teicneltzitzti huan quin-  
mictíaj san pampa quinequij.

<sup>9</sup> Quen se tecuani catli motlatijtoc campa tlacoyon-  
toc,  
masehualme catli fiero inintlalnamiquilis san  
quichixtoque para quipantise se catli amo  
quipiya fuerza para huetzise ipani.

Teipa quihuahuatatzase nopa teicneltzi campa  
amo aqui huelis quipalehuis.

<sup>10</sup> Catli quinitzquijque quipiyaj miyac chicahual-  
istli.

Yeca catli teicneltzitzti nimantzi huetzij iniixpa.

<sup>11</sup> Nopa amo cuajcualme moilhuíaj:

“Toteco Dios amo quielnamiqui catli tijchihuaj.  
Yaya moixtzactoc huan amo quema quiita tleno.”

<sup>12</sup> Ximotlanana, TOTECO Dios, ximomatlana.

Amo xiquinelcahua catli teicneltzitzti huan catli  
amo quipiyaj chicahualistli.

<sup>13</sup> Amo xiquincahuili amo cuajcualme ma  
mitzhuetzquilica.

Amo xiquincahuili ma moilhuica para ta amo  
tiquintlatzacuiltis.

<sup>14</sup> Toteco Dios, tiquitztoc catli quichijtinemij.

Timomacatoc cuenta sesen tlamantli catli amo  
cuali catli inijuanti quisencahuaj.

Xiquinsencahuili nopa tlatzacuiltyli catli  
quinamiqui.

Catli teicneltzitzi san motemachiyaj ipan ta para xiquinmanahui.

Ta tiinintlapalehuijca nochi catli icnotzitzi.

<sup>15</sup> Xiquinmapostequi nopa masehualme catli amo cuajcualme.

Xiquintlatzaculti por nochi catli fiero quichij-toque.

Xiquintlaxtlahui ica sesen tlamantli catli quichij-toque.

Amo xiquelcahua niyon se.

<sup>16</sup> TOTECO, ta tiTlanahuatijquetl catli titlanahatis para nochipa huan amo quema tlamis.

Tiquintzontlamiltis ipan motlal nochi masehualme catli amo mitziximati, injuanti san polihuise.

<sup>17</sup> TOTECO, ta tiquintlacaquilá catli mitztlajtlaníaj teicneltzitzi.

Tiquinfuerzajmaca huan tiquinpalehuía.

Tiquinchihuilá cuenta quema mittzajtzilíaj.

<sup>18</sup> Ta tiquinmanahuía icnotzitzi huan catli tlaijyohuíaj.

Quej nopa, masehualme catli san tlasencahualme ica soquitl ayacmo huelis quintemajmatise.

## 11

*Ma timotemachica ipan Toteco para techpale-huis*

<sup>1</sup> Amo techilhui:

“Ximochololti cuatitla huan ximomanahuiti quense tototl.”

Amo monequi nicholos pampa na nimotemachijtoc ipan TOTECO.

<sup>2</sup> Nuchi quiijtohuaj:

“Xiquita, nopa masehualme catli mosisiníaj  
quicualtlalíaj cuahuitoli huan cuatlamintli,  
huan onmotlatijtoque para quinmaquilise mase-  
hualme catli itztoque xitlahuaque.”

Masque quej nopa quijjtohuaj, amo melahuac.

<sup>3</sup> Masque quijjtohuaj:

“Ayacmo oncas leyes huan amo aqui tlanahuatis  
xitlahuac,  
huan huajca monequi masehualme catli  
cuali ininyolo ma choloca pampa amo  
aqui huelis quinmanahuis”, amo neli  
inincamanal.

<sup>4</sup> TOTECO noja itztoc ipan itiopa catli tlatze-  
jtzeloltic nepa ilhuicac.

Quena, yaya mosehuijtoc ipan isiya yejyectzi  
huan noja tlanahuatía.

Quiita nochí catli quichihuaj masehualme.

Quitlajtlachilía sese inemilis.

<sup>5</sup> TOTECO quinjejyecohua catli quichihuaj catli  
cuali,  
pero masehualme catli amo cuajcualme huan  
catli quinimpactía mosisiníaj, amo quinequi  
quinitas.

<sup>6</sup> TOTECO quichihuas ma huetzi tlicoli catli  
xahuantoc ininpani catli quichihuaj catli  
amo cuali.

Quena, quintitlanilis azufre catli lementoc para  
ma huetzi ininpani,

huan quintlatis ica se ajacatl catli tlahuel totonic.

<sup>7</sup> TOTECO, yaya nelcuali.

Quinicnelía catli nemij xitlahuac.

Huan masehualme catli xitlahuac ininyolo quiix-  
itase,

huan quimatisé para Toteco quicualita catli  
quichihuaj.

## 12

### *Techpalehui, TOTECO*

<sup>1</sup> Techpalehui, TOTECO,  
pampa ayacmo aqui catli nelía mitzneltoquilía.  
Ayacmo aquime masehualme catli quijtohuaj  
catli melahuac.

<sup>2</sup> Se ica seyoc moistlacahuíaj.  
Quipiyaj ome iniixayac quen nojquiya quipatlaj  
inincamanal.

<sup>3</sup> TOTECO quintzontlamiltis nochí catli quipiyaj  
ome iniixayac huan catli mohueyimati  
quema camanaltij.

<sup>4</sup> Quintzontlamiltis catli quijtohuaj:  
“San ica tocamanal titlatlanise.  
Sintla tijnequij tiistlacatise,  
tojuanti tijmatij.

Amo aqui huelis technahuatis.”

<sup>5</sup> Pero quej ni quijtojtoc TOTECO:  
“Inijuanti catli teicneltzitzí huan catli amo  
quipiyaj fuerza nechtzajtzilíaj por nopa  
fiero masehualme catli quintlaijyohuilitáj.

Yeca ama nimotlananas para niquinpalehuis.  
Niquinmaquixtis ininmaco catli quincualan-  
caitaj.”

<sup>6</sup> Nelía temachtli catli quijtohuaj TOTECO.  
Icamanal senquistoc melahuac.  
Quena, eltoc quen se cuali plata catli quinelicxiti-  
jtoque,

huan quipajpactoque miyac hueltas hasta sen-  
quistoc cuali.

<sup>7</sup> TOTECO, ta techmocuitlahuía.

Techmanahuis para nochipa ica masehualme  
catli amo cuajcualme quen ama itztoque.

<sup>8</sup> Quena, masque mosisinijca masehualme  
mooquichmajtinemij campa hueli huan  
nochi masehualme san quipatiitaj catli  
amo cuali,

Ta techmocuitlahuía.

## 13

*Se netlatlajtili para quitlajtlanis itlapalehuil  
TOTECO*

<sup>1</sup> TOTECO, ¿hasta quema techelcajtos?

¿Ayacmo quema techelnamiquis?

Nijmati techcuanetlatilía quema nimitztemohua.

<sup>2</sup> ¿Hasta quema njipiñas tequipacholi ipan noyolo  
huan noyoltzi tlaijiyohuijtinemis?

¿Hasta quema nocualancaitaca noja nechtlanis?

<sup>3</sup> Techtlachili huan technanquili, TOTECO.

¡NoTeco Dios!

Techmaca tlahuili para nitlachiyas ipan ni tzint-  
layohuilotl huan amo nimiquis.

<sup>4</sup> Amo xijcahuili nocualancaitaca ma quiijto  
nechtlanqui.

Amo techcahuili ma nihuetzi para ma amo noca  
huetzcaca inijuanti catli nechcualancaitaj.

<sup>5</sup> Na nimotemachijtoc ipan moteicnelijcayo catli  
huejcahua para nochipa.

Nipaqui ipan noyolo pampa techmaquixtijtoc.

<sup>6</sup> Nihuicas para ta, TOTECO,

pampa miyac catli cuali techchihuilijtoc.

## 14

*Se huihuiyotl catli quichihuaj tlajtlacolchijca masehualme*

<sup>1</sup> Nelía huihuitic nopa masehuali catli moilhuía amo aqui Dios.

Nochi catli quej nopa quiijtohuaj mocuapolojtoque huan amo cuajcualme.

Nochi inijuanti monenpolojoque huan ayacmo quichihuaj catli cuali.

<sup>2</sup> TOTECO haultlachixtoc tlen ilhuicac para quiitas sintla huelis quipantis se masehuali catli nelía tlalnamiqui,

se catli quitemohua huan quichihuasnequi ipaquilis.

<sup>3</sup> Pero amo aqui.

Nochi masehualme mocuapolojoque ipan se ojtili catli amo cuali.

Nochi monenpolojoque.

Amo aqui quichihua catli cuali.

¡Niyon se!

<sup>4</sup> Nopa tlajtlacolchijca masehualme amo quema tlamachilise,

pampa amo quema quielnamiquij TOTECO.

San quintzontlamiltíaj nomasehualhua quen se masehuali quitlamicua se pantzi.

<sup>5</sup> Pero teipa nochi nopa tlajtlacolchijca masehualme huihuipicase ica majmajtli,

pampa Toteco Dios amo itztoc inihuaya.

San itztoc inihuaya catli itztoque xitlahuaque iixpa.

- <sup>6</sup> TOTECO quinmanahuía teicneltzitzi pampa motemachíaj ipan ya quema tlajtlacolchijca masehualme quintlaijiyohuiltíaj.
- <sup>7</sup> Tojuanti tinelpaquisquíaj sintla ya ajsisquía nopa tonali, quema Totemaquixtijca hualas tlen tepetl Sion para quinmaquixtis israelitame. Ma huala nopa tonali quema TOTECO quinhualicas imasehualhua tlen campa hueli incualancaitacahua quinhuicatoque para tetequipanose. Ipan nopa tonali mopaquilismacase nochi israelitame. Quena, inijuanti catli iteipan ixhuihua Jacob tlahuel paquise.

## 15

*Nopa masehualme catli itztotij ipan itepe tlatzeloltic Toteco Dios*

- <sup>1</sup> TOTECO, ¿ajqueya huelis calaquis ipan mochaj campa ta timocahua ipan motepe catli tlatzeloltic?  
 ¿Ajqueya huelis mocahuas nepa para tijmocuitlahuis?
- <sup>2</sup> San calaquis ya catli amo aqui huelis quitelhuis ica niyon se tlamantli.  
 Quena, san yaya catli quichihua catli cuali.  
 Huelis yas san catli quiijtohua catli melahuac ica nochi iyolo,
- <sup>3</sup> huan amo tetlaijilhuía.  
 Itztotij nepa catli amo quimahuispolohua catli itztoc icalnechca,  
 huan catli amo quinequi quinyolcocos sequinoc.

<sup>4</sup> Nepa calaquis catli quihuejcamajcahua nochí  
catli fiero,  
huan quinicnelía catli mitztlepanitaj huan qui-  
imacasij mitzixpanose.

TOTECO, ipan mochaj itztose catli quitlamichi-  
huaj catli mocajtoque quichihuase masque  
nelohui huan quincocohua para quichi-  
huase.

<sup>5</sup> Nepa calaquise catli quentzi tlainamaj quema  
tetlanejtíaj tomi,  
huan amo quinistlacahuíaj catli amo tlaixpan-  
otoqué,  
masque sequinoc quintencahuilíaj tomi para ma-  
istlacatica.  
Quena, injuanti catli quichihuaj ni cuali tlamatli  
amo aqui hueli quintlanis,  
pampa ta tiquinmocuitlahuis.

## 16

### *Toteco catli cuali techmacas*

<sup>1</sup> Techmocuitlahui, Toteco Dios,  
pampa ipan ta nimotemachijtoc para  
techmanahuis.

<sup>2</sup> TOTECO, na nimitzilhuijtoc:  
“Ta tinoTeco huan amo aqui seyoc catli huelis  
nechpalehuis.”

<sup>3</sup> Niquinicnelía injuanti catli mitzneltoquilíaj catli  
itztoque ipan nopa tlali.

Injuanti catli nelía yejyectzitzi ininyolo.

<sup>4</sup> Pero mojmostla más motequipachose mase-  
hualme catli quintoquilíaj sequinoc inint-  
laixcopincayohua.

Na amo quema nijtencahuasquía se tlacajcahualistli iniixpa inintotiotzitzin, niyon amo quema niquintocaxtisquía.

<sup>5</sup> San ta, TOTECO, nimitzpixtoc, yeca ayacmo tleno nijtemos.

Ta techmaca nochí notlacualis huan noa catli nechmonequilía para niitztos.

Nonemilis huan nochí catli nijpixtoc eltoc momaco huan nijmati nelía temachtli.

<sup>6</sup> Nopa mecatl catli ica techtlatamachihuili campa nijselijtoc huetzqui campa nelía cuali tlali.

Nelía tlayejectzi campa techmacatoc.

<sup>7</sup> Nimitzhueyichihuas, TOTECO, pampa techconsejomaca.

Tlajco yohual techmaca motlanamiquilis huan technextilía ipan noyolo tlaque monequi nijchihiwas.

<sup>8</sup> Nochipa nimoilhuía tlen ta, TOTECO, huan pampa tiitztoc nonechca, amo tleno nopantlis.

<sup>9</sup> Yeca ipan noyolo nelía nijpiya paquelistli. Nochi notlacayo motemachijtoc ipan ta.

<sup>10</sup> Pampa amo tijcahuas notlacayo ipan ostotl, niyon amo tijcahuas ma palani itlacayo Yaya Catli Tlatzejzeloltic.

<sup>11</sup> Technextilis catlique ojtli quipyia nemilistli.

Nijpiyas hueyi paquelistli nepa campa ta tiitztoc. Quena, oncas hueyi paquili para nochipa nepa campa monejmac.

## 17

*Se netlatlajtili catli quitlajtlanía TOTECO ma quimanahuis*

- <sup>1</sup> Techtlacaquili, TOTECO,  
pampa nimitznojnotza.  
Nijchijtoc catli xitlahuac,  
huan amo niistlacati.  
Techtlacaquili catli nimitztlajtlanía huan tech-  
palehui.
- <sup>2</sup> Techtlajtolsencahua iniixpa nochi masehualme.  
Xiquinnextili para amo tleno nijchijtoc,  
pampa nochipa tijmati catli xitlahuac.
- <sup>3</sup> Masque tijhualtlachilía noyolo ica yohuali huan  
techyejyecojtoc,  
amo tleno amo cuali tijpantijtoc.  
Amo niquijtojtoc catli amo monequi,  
<sup>4</sup> quen quichihuaj ne sequinoc.  
Na nimoiyocatlalijtoc tlen nopa iniojhui catli amo  
cuajcualme.  
Nijchijtoc senquistoc quen quijtohua motlanahu-  
atil.
- <sup>5</sup> Nijtoquilijtoc moojhui huan amo nihuetzto  
ipan tlajtlacoli.
- <sup>6</sup> Nimitznojnotza, noTeco Dios, pampa nijmati  
technanquilis.  
Techtlacaquili huan techchihuili cuenta.
- <sup>7</sup> Technextili moteicnelijcayo catli yejyectzi.  
Taya tiquinmaquixtía ica mochicahualis catli  
motemachiyaj ipan ta.
- <sup>8</sup> Techmocuitlahui quen se quimocuitlahuía iixsit-  
lal.  
Quen se piyo quintlatía ipilconebla ieltlapatzala,  
nojquiya quej nopa techmocuitlahui.
- <sup>9</sup> Techtlati tlen nopa amo cuajcualme catli  
nechyahualojoque para nechmictise.
- <sup>10</sup> Nelía mocualnequij huan quema camanaltij,

san mohueyimatiij.

<sup>11</sup> Nechtoquilijtinemij campa ninentinemi huan  
san quichiyaj nopa tlatoctzi quema huelise  
nechtlahuisose tlalchi.

<sup>12</sup> Inijuanti itztoque quen tecuanime catli tlahuel  
mayanaj huan quinequij tecuase,  
huan motlatijtoque ostojtic para quema se mase-  
huali panos.

<sup>13</sup> Ximotlanana, TOTECO,  
xiquinnamiquiti.

Xiquinchihualti ma motlancuaquetzaca moixpa.  
Ica momachete, techmanahui tlen nopa amo cua-  
jcualme.

<sup>14</sup> Ica mochicahualis, TOTECO,  
techmaquixti ininmaco inijuanti catli san  
quipiyaj catli eltoc ipan ni tlaltipactli.

Tijmiyaquilijtoc catli iniaxca nica.

Nojquiya xiquinmaca miyac tlatzacuiltyli hasta  
mocahuas para ininconehua.

<sup>15</sup> Pero na niitztoc xitlahuac moixpa,  
huan se tonal nimitzitas, TOTECO,  
huan yeca nipaqui.

Se tonal quema niisas nijpiyas nochí catli nijtemo-  
jtinentoc,  
pampa niitztos monechca huan ica paquillistli tim-  
oixtlachilise.

## 18

*David quitlascamati TOTECO pampa tlatlantoc*

<sup>1</sup> Nimitzicnelía, TOTECO.

Na niitztoc momaco.

<sup>2</sup> TOTECO, mopan ta nimotlatía pampa temachtli  
techmaquixtis.

Techyahualohua para amo huelis nechajsise  
nocualancaitacahua.

Taya tinotlamanahuijca.

Ipan ta, noTeco Dios, nimotlatía,  
pampa na niitztoc momaco.

Quena, san ipan ta nimotemachía.

Ta techyahualohua para techmocuitlahuía.

Taya tieli quen se huejcapantic tepancali catli  
cuali huan temachtli.

Ica ta mochicahualis nitlatlanis.

<sup>3</sup> San monequi nijnotzas TOTECO catli quinamiqui  
para nijhueyichihuas,  
huan yaya nechmanahuis ininmaco nochí  
nocualancaitacahua.

<sup>4</sup> Eltoya quen nechpixtoya imaco miquilistli.

Nochi catli fiero catli onca ipan ni tlaltipactli  
nechtlanisnequiyaya.

<sup>5</sup> Nopa mijca ostotl nechtlaquechilijtoya hasta ay-  
acmo nijpixqui fuerza.

San se quentzi más huan nimquisquía.

<sup>6</sup> Pero quema más nimotequipachohuayaya,  
nijnotzqui TOTECO.

Nijtlajtlani ma nechpalehui noTeco Dios.

Huan yaya nechtlacaquili hasta nepa ipan il-  
huicac.

Quena, quichihuili cuenta catli niquilhui.

<sup>7</sup> Huajca chicahuac mojmolini tlali hasta momaj-  
matijque nochí tepeme.

Moojolinijque nopa tepeme hasta campa ont-  
latzquitoque,

huan mohuihuioxojque pampa Toteco Dios cualan-  
qui.

<sup>8</sup> Elqui quen quisayaya poctli ipan iyacatzol,

huan ipan icamac quisayaya se tlitl catli nochí  
quitlamitlatiyaya,  
huan nochí quisosolohuayaya.

Quena, quimajcahuayaya tlicoli xaxahuacatoc  
pampa nelcualanqui.

<sup>9</sup> Pampa Toteco Dios quitlapo nopa cortina tlen  
ilhuicac,

huan temoc para nechpalehuis.

Nejnentihuálayaya ipan miyac mixtli catli  
nelyayahui.

<sup>10</sup> Toteco Dios tlejcoc ipan ieltlapal se querubín  
tequihua,

huan patlantihuála jqui ipan ajacatl.

<sup>11</sup> Yaya motzajqui ica tzintlayohuilotl,

huan atl quiyahualo para amo aqui quiitasquía.

<sup>12</sup> Tlapetlanilotl quiyacantihuála jqui quema  
ajsiyaya yaya catli tlahuel cahuani.

Huan nojquia huetzqui tesihuitl huan tlicoli xax-  
ahuacatoc.

<sup>13</sup> TOTECO quichijqui ma quicaquica itoscac quen  
se tlatomonilotl catli quisqui ilhuicac.

Quena, Toteco Catli Más Hueyi tlahuejchijqui.

¡Tlahuel miyac tesihuitl huan tlicoli xaxahuacatoc  
huetzqui!

<sup>14</sup> Quimajcajqui cuatlamintli ma quinajsi nochí  
nocualancaitacahua,

huan inijuanti cholojtejque.

TOTECO quinhuitejqui ica hueyi tlapetlanilotl  
huan quintzontlamilti.

<sup>15</sup> Quema TOTECO tlailpitzqui,  
nochí nopa atl ipan hueyi atl san sejco momanqui  
hasta nesqui nochí nopa tlali catli mocahua  
atzintla campa más tlahuejcatla.

- Ica icamanal TOTECO mopannexti itzinpehuaultil tlaltipactli, pampa yaya cuanqui.
- <sup>16</sup> Huan TOTECO quimelajqui imax hasta campa más huejcatla,  
huan nechquixti tlen nopa hueyi atl.
- <sup>17</sup> Nechmaquixti ininmaco nocualancaitacahua catli quipixque huejhueyi chicahualistli.  
Quena, nechmanahui tlen nocualancaitacahua catli más quipixque chicahualistli que na.
- <sup>18</sup> Inijuanti motlalijque noca na quema amo nijpixqui fuerza,  
pero TOTECO nechtlananqui.
- <sup>19</sup> Nechquixti huan nechsehui campa amo mahuilili.  
Nechmanahui pampa nechicnelía.
- <sup>20</sup> TOTECO nechmacatoc catli quinamiqui pampa nijchijtoc catli xitlahuac.  
Nechtlaxtlahuijtoc pampa cuali nonemilis.
- <sup>21</sup> Nijtoquilijtoc iojhui TOTECO huan amo nimoiyocacajtoc tlen ya.
- <sup>22</sup> Niquelnamictoc nochí icamanal huan amo quema nijcajtejtoc itlanahuatil.
- <sup>23</sup> Xitlahuac niitztoc iixpa.  
Nimoiyocatlalijtoc tlen nochí catli fiero.
- <sup>24</sup> Huan TOTECO nechtlaxtlahuijtoc quen quinamiqui ica catli cuali nijchijtoc,  
pampa quinpantijtoc cuali nonemilis iixpa.
- <sup>25</sup> TOTECO, tiquinicnelía huan tiitztoc temachatlí ica catli teicnelíaj huan catli temachme.  
Tiitztoc cuali ica catli quihuejcacahua tlajtlacoli.
- <sup>26</sup> Tiquintiochihua catli tetiochihuaj,  
pero tetic timotlalía ica inijuanti catli mosisiníaj.

<sup>27</sup> Tiquinmaquixtía catli moicnonequij,  
pero tiquinpinahualtía catli mohueyimatiij.

<sup>28</sup> TOTECO, ta catli tinoDios,  
ta techmaca tlahuili.  
Ta tijcueptoc nopa tzintlayohuilotl campa niitztoc  
ica tlahuili.

<sup>29</sup> Ica mochicahualis, noTeco Dios,  
niquinhuilanás nocualancaitacahua,  
huan niquixcopanos nopa tepamitl catli ica  
quitzactoque inialtepe.

<sup>30</sup> Iojhui Toteco Dios nelía xitlahuac.

Huan icamanal catli quitencahua,  
cuali para ipan timotemachise.

TOTECO quinmanahuía nochí catli ipan ya  
motemachíaj.

<sup>31</sup> Amo cana aquí seyoc Dios quen TOTECO.

Amo aquí seyoc catli huelis ipan timotemachise  
huan techmanahuis.

<sup>32</sup> Toteco Dios nechmaca chicahualistli,  
huan nechchihualtía ma ninejnemi xitlahuac.

<sup>33</sup> Yaya nechfuerzajmaca para amo ma nihuetzi.  
Noicxihua mochihuaj temachtli quen iicxihua  
se chivo quema moquetzaj campa tlahuej-  
capa huan tlaxixitlaca.

<sup>34</sup> Toteco Dios nechmachtíja tlaque ma nijchihuas  
quema onca tlahuilanalistli.

Nechfuerzajmaca para cuali ma niquitzqui nopa  
tetic tepos huitoli catli quichijtoque ica  
bronze.

<sup>35</sup> Toteco Dios, ta techmanahuía huan  
techmaquixtía.

Techitzquía ica monejmac.

Ica mohueyi teicnelijcayo techhueyichijtoc.

<sup>36</sup> Tijchijtoc noojhui más patlahuac para amo ma nihuetzis.

<sup>37</sup> Niquintepotztocac nocualancaitacahua huan niquinajsito.

Huan amo nimocuepqui hasta quema niquintzontlamiltijtoya.

<sup>38</sup> Niquinhuejhuelo huan ayacmo quema motlananase.

Huetzque noicxitla.

<sup>39</sup> Toteco Dios, ta techfuerzajmacac ipan nopa tlahuilanalistli huan tijchijqui para nocualancaitacahua ma motlancuaquetzaquij noixpa.

<sup>40</sup> Miyaqui moicancuepque para cholojtehuase huan quej nopa huelqui niquintzontlamilti.

<sup>41</sup> Inijuanti tetzajtzilijque ma quinpalehuica, pero amo aqui huelqui quinpalehui.

Quinotzque TOTECO,  
pero yaya amo quinnanquili.

<sup>42</sup> Quen se quitisi tlalcuanextli huan quihuica ajacatl,

na quej nopa niquinchijqui.

Huan ininpan nimoquejquetzqui quen soquitl ipan ojtli.

<sup>43</sup> TOTECO nechmanahuijtoc tlen nopa sequinoc altepetl ehuani catli mosisiniáj huan quinequiyayaj nechhuilanase.

Yaya nechchijtoc ma nieli niinintlayacanca masehualme catli campa hueli ehuani.

Masehualme catli amo niquiniximatiyaya hualahuij para nechtequipanose.

**44** Quema quicaquij nocamanal,  
injuanti nechneltoquiláj.

Sequinoc altepetl ehuani huihuipicaj noixtla.

**45** Nochi motemacaj noixpa huan huihuipicatiy-  
ohuij quema quisaj campa motlatijtoque.

**46** Itztoc TOTECO.

Nijpaquilismacas yaya catli nechmocuitlahuía.

Ma tijhueyitlalica Toteco Dios,  
notemaquixtijca.

**47** Yaya nopa Dios catli quincuepilía ica catli fiero  
injuanti catli nechcocojtoque.

Quintlalijtoc masehualme ipan miyac tlali no-  
maco para ma niquinnahuati.

**48** Yaya nechmanahuía tlen nocualancaitacahua  
huan nechhueyitlalía iniixpa catli  
nechcualancaitaj.

TOTECO, ta techmaquixtijtoc ininmaco nopa  
tlahuilanca masehualme,

**49** yeca nitepohuilis tlen ta campa hueli.

Nihuicas huan nijhueyitlalis motoca.

**50** Miyac hueltas tijchijtoc para ma nitlatlani, na  
niDavid,

ninopa tlanaahuatijquetl catli techtlapejpenijtoc.

Tijpiya hueyi moyolo ica na catli techtlalijtoc ma  
nitlanahuati.

Quena, hueyi moyolo nohuaya huan tijpiyas  
hueyi moyolo para nochipa ica noixhuihua.

## 19

*Ihueyitilis Toteco monextía ipan nochi catli  
quichijtoc*

<sup>1</sup> Ilhuicactli tepohuilia ihueyitilis Toteco Dios.

Tlanemijya technextilía catli onpano yejyectzi  
yaya hueli quisencahua.

<sup>2</sup> Quena, tonali huan yohuali ilhuicactli quisen-  
huiquilía tepohuilía para tlahuel hueyi itlal-  
namiquilis.

<sup>3</sup> Masque amo tleno caquisti huan amo tijcaquij  
niyon se camanali,

nochi masehualme campa hueli quiitaj iyejyejca  
ilhuicactli huan quimachiliáj catli techpo-  
huilia.

<sup>4</sup> Eltoc quen ilhuicactli quipiya itoscac catli ajsi  
hasta campa ontlan toc tlaltipactli,

huan teyolmelahua para itztoc Toteco Dios.

Ipan ilhuicactli yaya quiquetzqui ichaj tonati.

<sup>5</sup> Huan tonati quisa mojmostla huan yohui ipan  
iojhui ica paquelistli quen se telpocatl quisa  
ipan ichaj para mosihuajtiti.

Quena, nopa tonati mochihua quen se mot-  
lalojquetl catli paqui motlalohua pampa  
quimati quintlanis ne sequinoc.

<sup>6</sup> Tonati quisa ilhuicactli inacastla huan quimaca  
huelta hasta ne seyoc inacastla.

Amo aqui huelis motlatis para amo quitonalmic-  
tis.

<sup>7</sup> Ileyes TOTECO eltoc senquistoc cuali,  
huan temaca yancuic nemilistli.

Huelis timotemachise ipan icamanal,  
pampa ya nopa quichihua ma tlalnamiqui se  
masehuali catli moicnonequi.

<sup>8</sup> Itlanahuatilhua TOTECO eltoc melahuac huan  
xitlahuac.

Quinmaca paquelistli masehualme ipan ininyolo.

Quena, sesen tlamantli catli TOTECO techilhuijtoc  
 ma tijchihuaca eltoc quen se tlahuili catli  
 chicahuac.

Techtlahuilia toojhui para tiquitase.

<sup>9</sup> Senquistoc cuali para ma tijtlepanitaca TOTECO  
 huan ma tiquimacasica para tiquixpanose.

Elis cuali para nochipa.

Catli TOTECO quijtojtoc para ma tijchihuaca,  
 ya nopa melahuac.

Quena, ya nopa temachtli.

<sup>10</sup> Noja más nijpatiita que oro.

Quena, noja más cuali que miyac oro catli senquis-  
 toc cuali.

Quema se masehuali quiselía Icamanal Toteco  
 ipan iyolo,

eltoc más tzopelic que se sayolnectli catli yancuic  
 quipatzcatoque.

<sup>11</sup> Nopa tlanahuatilme nechmacaj tlal-  
 namiquilistli, na niitequipanojca,

para amo ma nitlajtlacolchihua.

Catli quintoquilía itlanahuatilhua TOTECO hueyi  
 quitlanis.

<sup>12</sup> Amo aqui huelis momacas cuenta tlen itlaix-  
 panolhua sesen huelta quema quichihua  
 catli amo cuali.

TOTECO, techtlapojojpolhui notlajtlacolhua catli  
 amo nijmatiyaya sintla nijchijtoya.

<sup>13</sup> Huan techpalehui para amo nimohueyimatis,  
 huan amo quema ma nitlajtlacolchihuas ica  
 nopaquilis.

¡Amo! Amo xijcahua tlajtlacoli ma nechnahuati.

Quen nopa nielis se masehuali catli amo aqui  
huelis nechtelhuis ica niyon se tlamantli.  
Huan niitztos nitlatzejtzeloltic.

<sup>14</sup> Ma mitzpacti catli niquijtohua huan catli ni-  
moilhuía, TOTECO,  
ta tinotlamana huija huan tinotemaquixtijca.

## 20

*David quitlajtlanía Toteco ma quipalehui quint-  
lanis icualancaitacahua*

<sup>1</sup> Ma TOTECO mitztlacaquili quema timotequipa-  
chohua.

Ma mitzmanahui nopa Dios catli huejcajya  
quimanahui Jacob.

<sup>2</sup> Hasta campa yaya itztoc ipan ichaj,  
ma quititlani tlapalehuili catli quisa tlen altepetl  
Jerusalén.

<sup>3</sup> Ma quielnamiqui nochí motlacajcahualis catli  
tijmacatoc.

Ma moilhui tlen nopa tlacajcahualistli catli tijtlati  
iixpa huan catli yaya quiseli ica paquillistli.

<sup>4</sup> Ma mitzmacas nopa catli moyolo quinequi.

Ma quichihua ma quisa cuali nochí catli timoilhui-  
jtoc tijchihuas.

<sup>5</sup> Quej nopa tojuanti titzajtzise ica paquillistli  
pampa ta titlatlantoc,  
huan tijtlananase banderas ica itoca Toteco Dios  
pampa mitzpalehuijtoc.

Quena, TOTECO ma mitzmaca nochí catli tijtlajt-  
lanijtoc.

<sup>6</sup> Cuali njmati para TOTECO nechmaquixtía niit-  
lanahuatijca catli nechtlaejpenijtoc.

Hasta tlen nepa ilhuicac campa nelía tlatzejtzeloltic nechhualpalehuijtoc,  
huan nechchihua ma nitlatlani ica ichicahualis.  
<sup>7</sup> Masehualme ipan sequinoc tlalme motemachíaj  
ipan inincarros huan inincahuayohua para  
momaquixtise quema onca tlahuilancayotl.

Pero tojuanti timotemachíaj ipan TOTECO toDios.  
<sup>8</sup> Inijuanti tlaijiyohuise huan huetzise,  
pero tojuanti timotlananase huan noja tijpiyase  
fuerza.

<sup>9</sup> Toteco Dios, xijchihuas ma nitlatlani,  
na nimotlanahuatijca.  
Technanquili quema timitznojnotzaj.

## 21

### *Se huicatl pampa tlatlantoya*

<sup>1</sup> ¡TOTECO! Na nitlanahuatijquetl,  
nipaqui pampa techfuerzajmacatoc.  
Nelía nipaqui pampa tijchijtoc ma nitlatlani.  
<sup>2</sup> Techmacatoc catli noyolo quinequiyaya.  
Quena, techmactili catli nimitztlajtlaniyaya.  
<sup>3</sup> Techsehui nitlanahuatijquetl ica hueyi tlatiochihualistli, huan techicpahuiltijtoc se corona  
catli senquistoc oro.  
<sup>4</sup> Nimitztlajtlani techcahuili ma huejcahuas niittos,  
huan nelía techmacatoc se nemilistli catli huejcahuas para nochipa.  
<sup>5</sup> Techpalehuijtoc ma nitlatlani miyac ica mohueyi  
chicahualis.  
Huan yeca por ta, nochí nechhueyitlepanitaj,

na nitlanahuatijquetl, huan nechhueyitlalíaj.

<sup>6</sup> Techtiochijtoc ica catli huejcahuas para nochipa,  
huan nelhueyi nopa paquelistli catli nijpiya  
pampa timocahua nohuaya.

<sup>7</sup> Na nitlanahuatijquetl nimotemachía ipan ta,  
TOTEKO.

Quena, nimotemachía ipan mohueyi teicnelilis ta  
Catli Más tiHueyi,

yeca amo aqui huelis nechtlanis.

<sup>8</sup> TOTEKO, ica mochicahualis tiquinajsiti nochí  
mocualancaitacahua.

Ica monejmac tiquinitzquis nochí catli  
mitzcualancaitaj.

<sup>9</sup> Quema timonextis, inijuanti tlatlase moixpa  
quen itztosquíaj ipan se horno catli xahuan-  
toc.

TOTEKO, quema tiquintlajtolsencahuas,  
mocualancayo quintlamitlatis.

<sup>10</sup> Tiquintzontlamiltis hasta ininconehua huan  
iniixhuihua.

<sup>11</sup> Masque masehualme catli amo cuajcualme  
mitzcualancaitaj huan quisencahuaj catli  
amo cuali mitzchihuilise,

amo quisas cuali catli moilhuijtoque.

<sup>12</sup> Inijuanti moicancuepase para cholojtehuase  
quema quiitase para tiquinmelactlachilis  
ica mocuahuitol flasencahualli para tiquin-  
huilanás.

<sup>13</sup> Timitzhueyimatij, TOTEKO,  
pampa hueyi mochicahualis.

Huan timitzhueyichihuase ica huicatl pampa  
nelia tijpiya nochí chicahualistli.

**22**

*Se tlacatl quitzajtzilá Toteco huan teipa  
quipaquilismaca*

<sup>1</sup> ¡NoTeco Dios! ¡NoTeco Dios!

¿Para tlen techtlahuelcajtoc?

¿Para tlen timohuejcachijtoc huan amo tihualajtoc  
para techmanahuiqui?

Amo tijtlacaquilía quema nitlatzajtzilá.

<sup>2</sup> NoTeco, tonali yohuali amo nimosiyajquetza  
nimitznotza,

pero amo technanquilía.

<sup>3</sup> Huan masque quej nopa eltoc,  
ta quejipa titlatzejzeloltic.

Nochi tohuejcapan tatahua tiisraelitame  
mitzyahualojque huan mitzhueyichijque.

<sup>4</sup> Totatahua mochixque ipan ta.

Quena, motemachijque mopan ta huan ta tiquin-  
manahui.

<sup>5</sup> Mitznojnotzque quema tlaijiyohuiyayaj huan  
tiquinmaquixti.

Mopan ta motemachijque huan amo  
tiquinpinahualti.

<sup>6</sup> Pero na nimomati quen se pilocultzi huan amo  
nise masehualti.

Sequin san nechhuetzquiláj huan sequinoc  
nechcualancaitaj.

<sup>7</sup> Nochi catli nechitaj san noca paquij,  
huan tlancuitzihuij huan motzonojolinía,

<sup>8</sup> huan quijtohuaj:

“Yaya catli motemachía ipan TOTECO,  
huajca ma tiquitaca sintla quimaquixtis.

Sintla nelía quiicnelía,  
ma quimanahuiqui.”

Quej nopa quijtohuaj masehualme.

<sup>9</sup> Pero TOTECO, na nijmati para techpalehuijtoc.

Techquixti iijtico nonana.

Techmocuitlahuijtoc hasta tlen quema noja nichichiyaya.

<sup>10</sup> Huan quema nitlacatqui ya ipa nimotemachijtoc ipan ta.

Nochi tonali tieltihualajtoc tinoTeco Dios.

<sup>11</sup> Amo techtlalcahui san pampa hualajtoc ni tequipacholi huan amo aqui seyoc catli hueli nechpalehuis.

<sup>12</sup> Miyaqui nocualancaitacahua nechyahualojtoque quen torojme catli mosisiniáj.

Quena, nesij quen nopa huejhueyi torojme catli itztoque ipan tlali Basán.

<sup>13</sup> Nanalcaj quen tecuanime catli mosisiniáj.

Camachalohuaj huan nechmelactlachiliáj.

<sup>14</sup> Na nimomati quen atl catli mopatzcatoc huan campa hueli toyajtoc.

Nochi noomiy o lelecuecatoc.

Noyolo eltoc quen cera catli atiya.

<sup>15</sup> Tlantoc nochi nochicahualis.

Nijpiya nocamac huactoc quen se chachapal tepalcatl,

huan nonenepil tlatzquitoc ica nocamacholec.

Techtlalijtoc campa tlahuactoc huan campa onca miquilistli.

<sup>16</sup> Masehualme catli amo cuajcualme nechyahualojtoque quen chichime.

Quicocoyotztoque nomax huan noicxihua.

<sup>17</sup> Hasta huelis nijpohuas noomiyohuas, pampa sesen nechcocohua.

Nocualancaitacahua nechsentlachilijtoque huan  
san noca paquij.

**18** Momajmacaj catli nimoquentiyaya.

Quena, mahuiltíaj ica piltetzitzi para quiitase  
ajqueya quitocaros sesen noyoyohua.

**19** Pero ta, TOTECO, amo techtlalcahui,  
pampa na niitztoc momaco.

Xihuala nimantzi techpalehuiqui.

**20** Techmanahui tlen ininmachete ni mosisiniija  
masehualme catli itztoque quen chichime.

Amo xiquincahuili ma nechmictica.

**21** Eltoc quen niitztoc inincamaco tecuanime,  
huajca techmaquixti. Nopa masehualme itztoque  
quen torojme,

amo ma nechtempojhuica.

**22** Huan na niquinpohuilis noicnihua tlen ta,  
TOTECO,

huan quema oncas tlasantililistli,  
nimitzhueyichihuas iniixtla nochi.

**23** TOTECO, tojuanti catli timitztlepanitaj huan  
tiquimacasij timitzixpanose timitzpaquilis-  
macaj.

Nochi tiiteipan ixhuihua Israel,  
timitzhueyichihuaj.

Quena, timitzhueyimatiq nochi tiisraelitame.

**24** Pampa amo techelcajtoc quema titlaijiyohuíaj,  
niyon amo techhuejcamajcajtoc.

Amo neli techcuanetlatilíá.

¡Amo! Ta techtlacaquilía quema timitztlajtlaníaj  
techpalehuiqui.

**25** Huajca, TOTECO, ipan nopa hueyi tlasantililistli  
nimitzpaquilismacas iniixtla nochi  
momasehualhua,

pampa ta titemachtli.

Iniixpa catli mitztlepanitaj huan quiimacasij  
mitzixpanose,  
na nijchihuas catli nimitztencahuilijtoc para ni-  
jchihuas.

**26** Huajca nochí catli teicneltzitzi tlacuase huan  
ixhuise.

Nochi catli quitemohuaj TOTECO quipantise huan  
quipaquilismacase.

Quena, paquise para nochipa.

**27** Masehualme ipan nochí tlalme campa hueli  
ipan tlaltipactli motepotztocase huan quiel-  
namiquise TOTECO.

Inijuanti pehuase quihueyimatise huan  
motlancuaquetzase iixpa.

**28** Pampa TOTECO, yaya nopa tlanahuatijquetl  
catli quinahuatía nochí tlalme.

**29** Nochi catli quipiyaj tomi huan nochí catli teic-  
neltzitzi ipan ni tlaltipactli motlancuaquet-  
zase iixpa.

Quena, nochí tlaltipac ehuani catli teipa miquise,  
quihueyimatise.

**30** Nojquiya noteipan ixhuihua quihueyimatise  
TOTECO huan tepohuilise tlen ya nochí  
ininnemilis.

**31** Quema toteipan ixhuihua tlacajtiyase,  
tepohuilise para xitlahuac TOTECO huan nochí  
nopa huejhueyi tlamantli catli techchihuil-  
ijtoc.

- <sup>1</sup> Quen se tlamocuitlahuijquetl quinmocuitlahuía  
pilborregojtzitzi,  
TOTECO nechmocuitlahuía.  
Huan yeca amo tleno nechpolohua.
- <sup>2</sup> Yaya nechsiyajquetza campa onca yejyectzi  
sacatl catli xoxohuic.  
Nechhuica campa mantoc cuali atl catli amo  
mahuilili.
- <sup>3</sup> Quema ayacmo hueli nimotlanana,  
nechmaca yancuic chicahualistli.  
Yaya nechyacana ipan ojtli xitlahuac para nijchi-  
jtinemis catli cuali,  
huan quej nopa nochí quihueyitlalise.
- <sup>4</sup> Masque ninemis ipan tzintlayohuilotl nechca  
miquilistli,  
amo tleno niquimacasis, pampa ta, TOTECO,  
tiitztoc nohuaya.  
Ica mocuatopil techmanahuía ica catli amo cuali.  
Huan ica mocuachijcol catli huehueyac techtilana  
quema seyoc ojtli nijtoquilisnequi.
- <sup>5</sup> Techsencahuilía se cuali tlacualistli iniixpa  
nocualancaitacahua.  
Ica aceite techpajtía campa nimococojtoc.  
Techtiochijtoc hasta mocahua.
- <sup>6</sup> Nijmati para ta, TOTECO, techyacanas nochí  
nonemilis ica motlaicnelijcayo,  
pampa tipiya hueyi moyolo nohuaya.  
Huan teipa nimocahuas mohuaya ipan mochaj  
nepa ilhuicac para nochipa.

## 24

*Nopa hueyi tlanahuatijquetl ipan nochí tlaltipactli huan ilhuicactli*

<sup>1</sup> TOTECO iaxca ni tlaltipactli huan nochí catli eltoc ipani.

Senquistoc nochí catli itztoque ipan ilhuicactli huan tlaltipactli iaxca.

<sup>2</sup> Pampa yaya quitatzquilti cuali huan quiquestzqui ni tlaltipactli tlatzintla ipan nopa atl catli tlahuel huejcatla.

<sup>3</sup> ¿Ajqueya huelis tlejcos ipan itepe TOTECO?

¿Ajqueya huelis itztos ipan icaltiopa catli tlatzeloltic?

<sup>4</sup> Huelis itztose nepa san catli quipiyaj ininmax huan ininyolo tlapajpactli iixpa, pampa yaya quintlapojpolhuijtoc inintlajtlacolhua.

San yase nepa catli amo quihueyichihuaj se tlaixcopincayotl huan catli amo istlacatij quema quitestigojquetzaj TOTECO.

<sup>5</sup> Quena, quinmaquixtis TOTECO, huan quintiochihuas huan quijitos para inijuanti itztoque cuali iixpa.

<sup>6</sup> Catli quej nopa quitemohuaj Toteco Dios, huelise moquetzase iixpa huan quihueyichihuase Toteco Dios catli Jacob huejcajya quitoquila.

<sup>7</sup> Ma motlapoca cuali nopa huejhueyi caltemitl catli ipa eltoya huan nochipa eltos ipan altepetl Sion,

pampa calaquiqui nopa hueyi tlanahuatijquetl catli quinahuatia nochí tlaltipactli huan ilhuicac.

<sup>8</sup> ¿Ta tijmati ajqueya nopa hueyi tlanahuatijquetl  
catli quinahuatía nochí ilhuicactli huan  
tlaltipactli?

Yaya TOTECO catli tlahuel quipiya chicahualistli  
huan amo tleno quiimacasi.

Yaya TOTECO catli tlatlantinemí ipan nochí  
tlahuilancayotl.

<sup>9</sup> Ma motlapoca cuali nopa caltemitl catli ipa el-  
toya ipan altepetl Sion,  
huan calaquis nopa hueyi tlanahuatijquetl  
catli quinahuatía nochí tlaltipactli huan  
ilhuicactli.

<sup>10</sup> ¿Ta tijmati ajqueya nopa hueyi tlanahuatijquetl  
catli quinahuatía nochí tlaltipactli huan il-  
huicactli?

Yaya TOTECO.

Yaya nopa hueyi tlanahuatijquetl catli quinahu-  
atía nochí tlaltipactli huan ilhuicactli.

## 25

*David quinejqui quimatis nopa ojtli catli más  
xitlahuac*

<sup>1</sup> Mopan ta, TOTECO, nimotlatlajtía ica nochí noy-  
oltzi.

<sup>2</sup> Mopan ta, noTeco Dios, nimotemachía.

Amo techcahua para ma nimopinahualti.

Amo xiquincahuili nocualancaitacahua ma nech-  
huetzquilica.

<sup>3</sup> Amo quema mopinahaultijtoc se catli ipan ta  
motemachijtoc.

Ma mopinahuase inijuanti catli nimantzi  
quinequij mitzixpanose.

<sup>4</sup> TOTECO, technextili moojhui.

Quena, technextili nopa pilojtzi campa tijnequi  
ma ninejnemi.

<sup>5</sup> Techyacana ipan moojhui catli xitlahuac huan  
techmacthi,

pampa ta tino Teco Dios huan tinotemaqueixtijca.  
Mopan ta nimotemachía ipan tlen hueli hora.

<sup>6</sup> TOTECO, xiquelnamiqui moteicnelilis catli tijpix-  
toc para nochipa,  
catli hasta tlen huejcajya titenextilijtoc,  
huan yeca techtlasojyla.

<sup>7</sup> Amo xiquelnamiqui notlajtlacolhua catli nijchi-  
jqui quema nitelpocatixtoya.

Xiquelcahua quema nimotlepanitayaya moixpa.  
TOTECO, techelnamiqui ica motlaicnelilis pampa  
hueyi moyolo nohuaya.

<sup>8</sup> TOTECO, ta nelía ticuali huan tixitlahuac.

Yeca tiquinnextilia tlajtlacolchihuani nopa cuali  
ojthi catli ipan ma nejnemise.

<sup>9</sup> Tiquinyacana catli moicnonequij ipan nopa ojtli  
catli más xitlahuac.

Quena, tiquinmachtía injuanti catli quitemohuaj  
tlaque mopaquilis.

<sup>10</sup> Quema se masehuali quitoquilía motlanahuatil,  
TOTECO,

nochi ojtli catli ipan tijuica quinextilia motlaic-  
nelilis,

huan quinextilia para ta tiitztoc tixitlahuac.

<sup>11</sup> ¡TOTECO! Techtlapoypolhui notlajtlacol masque  
nelía hueyi.

Techtlapoypolhui pampa quej nopa tiquijtojtoc ti-  
jchihuas.

<sup>12</sup> TOTECO, ica masehualme catli quiimacasij  
mitzixpanose,

tiquinnextilis nopa cuali ojtli catli tijtlapejpenijtoc  
para injuanti.

<sup>13</sup> Tiquintiochihuas miyac,  
huan ininconehua quiselise nopa tlali catli tiquin-  
macas.

<sup>14</sup> TOTECO tiquinpohuilá catli eltoc ipan moy-  
olo injuanti catli mitztlepanitaj huan qui-  
imacasij mitzixpanose.

Quena, tiquinnextilía nochí catli inihuaya timo-  
cajtoc masehualme.

<sup>15</sup> Nochipa nimitztemohua TOTECO,  
huan nijchiya para techpalehuiqui,  
pampa san ta tihuelis techmanahuis tlen ni tla-  
quetztli.

<sup>16</sup> Techtlachili, TOTECO,  
huan xijpiya hueyi moyolo noca na,  
pampa niitztoc noseli huan nimoyoltequipa-  
chohua.

<sup>17</sup> Nimoyoltequipachohua ica tlahuél miyac tla-  
mantli catli ohui.

Techmanahui tlen nopa tequipacholi.

<sup>18</sup> Xijtlachili nopa tequipacholi catli nechcuatet-  
zopa huan nechtlaijiyohuiltía.

Huan techtlapojpolhui nochí notlajtlacolhua.

<sup>19</sup> Xiquita quesqui nocualancaitacahua niquin-  
piya huan quenicatza tlahuél nechcualan-  
caitaj.

<sup>20</sup> Techmocuitlahui huan techmaquixti para amo  
nechcocose.

Amo xijcahua ma nechpinahaultica,  
pampa ipan ta nimotemachijtoc.

<sup>21</sup> Techmanahui pampa nitemachtli huan nijchi-  
hua catli xitlahuac,  
huan nimotemachijtoc ipan ta.

**22** NoTeco Dios, techmaquixti tiisraelitame tlen  
nochi totequipachol,  
pampa timomasehualhua.

## 26

### *Nopa nemilistli catli tlahuatl tlapajpactli*

**1** TOTECO, techtlajtolsencahua.

Xiteyolmelahua para amo tleno catli fiero nijchijtoc.

Nimotemachijtoc san ipan ta huan amo quema nimoilhuijtoc nimitzcahuas.

**2** Techyoltlachili, TOTECO,  
huan techyejyeco.

Xijtlachili cuali noyolo huan notlalnamiquilis catli más noyolijtic eltoc.

**3** Pampa na nijpatiita motlaicnelilis, huan nochipa nijtoquilía mocamanal catli melahuac.

**4** Amo quema ninejnentoc inihuaya masehualme catli tlacajcayahua,  
niyon amo nimohuicatoc inihuaya catli quipiyaj ome iniixayac.

**5** Nijcualancaita inintlasentililis amo cuajcualme.  
Amo quema nimosentilijtoc inihuaya catli fiero quichihuaj.

**6** Tlapajpactli nomax tlen nochi tlajtlacoli,  
huan san quej nopa nimonechcahuis motlaixpa,  
TOTECO.

**7** Nepa nihuicas huicatl para nimitzhueyitlalis huan niteyolmelahuas nochi catli yejyectzi catli ta tijchijtoc.

**8** Tlahuel niquicnelía mochaj campa tiitztoc,  
TOTECO,  
campá monextía motlatlanex.

- <sup>9</sup> Amo techchihuili quen tiquinchihuilia tlajtla-  
colchihuani huan temictiani.
- <sup>10</sup> Inijuanti quisencahuaj quenicatza huelis tet-  
lacuicuilise.  
Quipiyaj ininmax temitoc ica tomi catli tlaichtaca  
tlainantoque.
- <sup>11</sup> Pero na ninemi xitlahuac.  
Xijpiya hueyi moyolo noca na,  
huan techmaquixti.
- <sup>12</sup> TOTECO, nimitzhueyichihua tlamiyacapa.  
Ica ta, cuali niijcatoc,  
huan amo techcahuilijtoc ma nihuetzi.

## 27

*TOTECO nechtlahuilía huan nechmaquixtía*

- <sup>1</sup> TOTECO nechtlahuilía huan nechmaquixtía.  
¿Ajqueya ma niquimacasis?  
TOTECO yaya nochicahualis,  
huan na niitztoc imaco.  
Amo aqui niquimacasis.
- <sup>2</sup> Quema amo cuajcualme quinequise  
nechhuilanase huan quinequise  
nechmictise,  
motepotlamise huan huetzise.
- <sup>3</sup> Masque nochí isoldados se hueyi tlali mot-  
lananase noixpa,  
amo niyolmajmahuis.  
Masque nechhuilanase,  
na nimotemachijtos ipan TOTECO pampa yaya  
itztoc nohuaya.
- <sup>4</sup> San se tlamantli nijtlajtlanjtoc TOTECO.  
San se tlamantli nijnequi.  
Nijnequi niitztos ipan ichaj TOTECO nochí tonali.

Nijnequi nijhueyichihuas nepa huan nimopaquilismacas ica noch ihueyitilis huan itlatlanex.

Quena, ipan ichaj nijtemos catli ya ipaquilis.

<sup>5</sup> Quema ajsis tonali catli amo cuali,  
TOTEKO nechmocuitlahuis.

Nechtlatis ipan icaltiopa campa más  
tlatzejtzeloltic,  
huan teipa nechquetzas ipan se hueyi tetl para  
nechhueyitlalis.

<sup>6</sup> Quena, nechhueyitlalis iniixpa nocualancaitacahuia.

Yeca na nijtencahuas tlacajcahualistli ipan icaltiopa,

huan nicuatzajtzis ica paquillistli.

Nihuicas huan nitlatzotzonas para nijpaquilismacas TOTEKO.

<sup>7</sup> TOTEKO, techtlacaquili pampa nimitznojnotza.

Xipiya hueyi moyolo noca na,

huan technanquili.

<sup>8</sup> TOTEKO, quema techilhuía:

“Techcamanalhuiqui”,

na nimitznanquilia:

“Nimitzcamanalhuiti”.

<sup>9</sup> ¡Amo techcuanetlatili!

¡Amo techhuejcamajcahua pampa ticualantoc no-huaya!

San ta catli techpalehuía,

noTeco Dios, ta catli tinotemaquequixtijca.

Amo techiyocacahua, niyon amo techcajtehua noseltzi.

<sup>10</sup> Masque notata huan nonana nechtlahuelcahuase,

TOTECO, ta nochipa techmocuitlahuis.

<sup>11</sup> TOTECO, technextili catli tijnequi ma nijchihua.  
Techyacana san ipan nopa ojtlí cuali campa ti-  
jnequi ma ninejnemi,

pampa nocualancaitacahua nechyahualohuaj.

<sup>12</sup> Amo techtemactili ininmaco quen inijuanti  
quinequij,  
pampa noca na motlanantoque masehualme catli  
istlacatij huan san quimatiij catli más fiero  
nechchihuilise.

<sup>13</sup> Pero na cuali nijmati TOTECO nechmanahuis,  
huan sempa niquitas quenicatza cuali iyolo no-  
huaya ipan ni tlaltipactli campa niitztoc.

<sup>14</sup> Ximochiya ipan TOTECO.

Ximotemaca huan ximoyolchicahua huan amo  
ximomajmati.

Quena, ximotemachi ipan TOTECO.

## 28

*Toteco quitlacaquilía quema timotlatlajtíaj*

<sup>1</sup> TOTECO, tinotlamahanuijca.

San ipan ta nimotlatía.

Ta catli nimitztzajtzilía techpalehuiqui.

Amo ximotlahuelnequi para technanquilis,  
pampa sintla amo technanquilis,  
san nimotemacas para ma nechmictica.

<sup>2</sup> Xijcaqui nocamanal quema nimitztlajtlanía tla-  
palehuili.

Techchihuili cuenta quema nimomatlananas  
huan nijmelactlachilis mocaltiopa catli  
tlahuel tlatzejzelotic.

<sup>3</sup> Amo techtlatzacuilti inihuaya masehualme catli amo cuajcualme catli san quichihuaj catli amo monequi.

Inijuanti camanaltij yejyectzi ica sequinoc, pero quipiyaj nochi catli amo cuali ipan ininyolo.

<sup>4</sup> Xiquincuepili nochi catli amo cuali quichiijtoque ica catli amo cuali nojquiya.

Xiquintlaxtlahui ica catli fiero san se quen fiero quinchihuilijtoque sequinoc.

<sup>5</sup> TOTECO, inijuanti amo quichihuilíaj cuenta nochi catli tijchijtoc, huajca tiquintzontlamiltis huan amo quema tiquintlananas sempa.

<sup>6</sup> TOTECO, nimitzpaquilismacas pampa tijtlacaquilihijtoc catli nimitztlajtlanijtoc.

<sup>7</sup> TOTECO, yaya nochicahualis huan notlamanahuijca ica nochi catli mahuilili.

Ipan ya nimoneelmetachijtoc huan nechpalehuijtoc,

yeca ipan noyolo nijpiya miyac paquilibrium.

Nihuicas huan nimitztlascamatis, TOTECO.

<sup>8</sup> TOTECO, ta tiquinpixtoc momaco nochi momase-hualhua.

Yeca san ipan ta motemachía motlanahuatijca catli tijtlapejpenijtoc.

<sup>9</sup> Xijmaquixti moaltepe, TOTECO.

Huan xiquintiochihua inijuanti catli moaxcahuá.

Techmocuitlahui quen se quinmocuitlahuía ipil-borregojhua.

Techhuica momaco para nochipa.

- <sup>1</sup> Xijhueyichihuaca TOTECO,  
amojuanti aniteequihuajcahua.  
Xijhueyichihuaca TOTECO catli quipiya hueyi  
ichicahualis huan itlatlanex.
- <sup>2</sup> Xijhueyichihuaca TOTECO por ihueyitilis,  
pampa ya nopa quinamiqui para yaya catli  
tlahuel hueyi.  
Xijhueyichihuatiij TOTECO catli itztoc campa  
tlahuel tlajejyectzi huan tlatzejzeloltic.
- <sup>3</sup> Quema TOTECO camanalti,  
caquisti quen tlatomonilotl catli chicahuac ipan  
hueyi atl.  
Itoscac Toteco Dios catli itztoc ipan ilhuicac  
caquisti quen tlatomoni ipan ilhuicac  
tlahuel chicahuac.  
Quena, TOTECO itoscac monanquilía iixpa nopa  
hueyi atl ica noch ihueyitilis.
- <sup>4</sup> Itoscac TOTECO quipiya chicahualistli.  
Quena, itoscac quipiya tlahuel miyac chicahual-  
istli.
- <sup>5</sup> Itoscac tlahuel temajmati huan quema TOTECO  
camanalti,  
quichihua para ma ixtzayanica tiocuame.  
Quena, Toteco quintlapana noch iiocuame ipan  
tlali Líbano.
- <sup>6</sup> Quichihua ma huihuipicaca noch cuatitlamitl  
ipan tlalme Líbano huan Sirión.  
Quinchihaultia nopa cuame ma molinica quen  
piltorojtzitzi huan pilhuacaxtzitzi catli  
huitontehuaj.
- <sup>7</sup> Quema TOTECO camanalti,  
quimajcahua tlilemectli.
- <sup>8</sup> Quema TOTECO camanalti,

huihuipica nochí huactoc tlali.  
 Quena, hasta quichihua para ma huihuipica nopa  
     huactoc tlali Cades.

<sup>9</sup> Quema TOTECO quiijtohua para oncas  
     tlatomonilotl,  
 huajca quichihua ma ixtzayanica nopa ahua  
     cuame huan quicahua tlapepestic ipan cu-  
     atilamitl.  
 Ipan ichaj nepa ilhuicac nochí quihueyichihuaj  
     huan quiijtohuaj: “Tlahuel onpano  
     yejyectzi mohueyitilis.”

<sup>10</sup> TOTECO tlanahuatiyaya quema oncac nopa  
     tlahuel miyac atl catli momanqui ipan  
     nochí tlaltipactli.  
 Huan TOTECO noja tlanahuatía huan tlanahuatis  
     para nochipa.

<sup>11</sup> TOTECO quinmaca chicahualistli nochí imase-  
     hualhua.  
 Quena, TOTECO quintiochihua huan quinmaca  
     tlasejseltili ipan ininyolo.

## 30

### *Se huicatl para quitlascamati TOTECO*

<sup>1</sup> TOTECO, nimitzhueyitlalía pampa techtlananqui  
     tlen más tlatzintla.  
 Amo tiquincahuilijtoc nocualancaitacahua ma  
     noca paquica.

<sup>2</sup> TOTECO, nimitztlajtlani motlapalehuil para  
     techchicahua quema nimococohuayaya,  
 huan ta techchicajqui.

<sup>3</sup> TOTECO, techmanahui quema niitztoya para  
     nimiquis.  
 Techmacac nonemilis sempa,

huan yeca amo niitztoc ostojitic.

<sup>4</sup> TOTECO, nochí moaxcahua ma huicaca tio-huicatl moixpa.

Ma mitzhueyichihuaca ta catli titlatzejtzeloltic.

<sup>5</sup> TOTECO, quema ticualani,  
san huejcahua se tlatocdzi,  
pero ipan nochí tonemilis technextilía para tijpiya  
hueyi moyolo tohuaya.

Masque tojuanti quemantic tichocaj ica tlayohua,  
ica ijnaloc tijpiyaj paquilitli ipan ta.

<sup>6</sup> Quema cuali niitztoya huan amo tleno nechpolo-huayaya,

nimoilhui amo aqui huelis nechtlanis.

<sup>7</sup> TOTECO, ica motlaicnelilis techquetztoya cuali  
quen se hueyi tepetl catli amo aqui hueli quiolinis.

Pero teipa, techcuanetlatili huan nimajmaj-camiquiyaya.

<sup>8</sup> Huan nimitznotzqui, TOTECO.

Nimitztzajtzili para techtlasoxtla.

<sup>9</sup> Pampa, TOTECO, sintla techcahuilisquía ma nimiqui,

tlaque tijtlanisquía.

Ayacmo huelisquía nimitzhueyichihuasquía ini-ixpa nohuampoyohua.

Toteco, sintla nimiquis, nimocuepas tlali,  
huan tlali amo huelis mitzhueyichihuas. ¿Amo que?

¿Atlac mijcatzitzí huelise tepohuilise para ta nelía  
itemachtli?

<sup>10</sup> Huajca, TOTECO, techtlacaquili huan xijpiya  
hueyi moyolo nohuaya.

TOTECO, ta xieli tinotlapalehuijca.

**11** Techtlacaquilijtoc huan techquixtilijtoc nopa tequipacholi.

Techmacatoc hueyi paquelistli.

Techquixtilijtoc nopa yoyomitl catli nimoquentij-toya pampa nimotequipachohuayaya.

Huan techquentijtoc se cuali yoyomitl catli tenextilia para niypiya paquelistli.

**12** Yeca TOTECO, amo hueli nimocamatzacuas.

Nimitzhueyichihiwas ica tiohuicatl huan nochipa nimitztlascamatis.

## 31

### *Ma timotemachica miyac ipan Toteco*

**1** TOTECO, ipan ta nimotemachijtoc.

Amo quema xiquincahuili sequinoc ma nechpinahualtica.

Techmanahui ta catli nochipa tijchihua catli xitlahuac.

**2** TOTECO, ximoechcapano para techtlacaquilis.

Techmanahuiqui nimantzi.

Techcahuili ma nimotlati mopan ta.

Na niitztos momaco para techmanahuis.

**3** Ipan ta nimotemachía para techpalehuis.

Quena, ipan ta niitztoc ica temachili.

Techyacantinemi para nochí ma mitzhueyitlalica más.

**4** Ta tinotlamocuitlahujca,

techmaquixti tlen ni tlaquetztlí catli nocualancaitacahua quitlatijtoque ipan noojhui para nechmasiltise.

**5** Nimitzmactilía notonal momaco.

Techmanahui, TOTECO, ta tinopa Dios catli itemachtli.

**6** Niquincualancaita nochí catlí quinhueyichihuaj  
teteyome,  
pampa teteyome amo tleno hueli quichihuaj.

Pero na nimotemachijtoc ipan ta, TOTECO.

**7** Nijpiya miyac paquelistli pampa techicnelía.  
Ta tiquitztoc nochí notequipachol,  
tiquiximajtoc nochí catlí nopantitoc.

**8** Amo techtemactili ininmaco nocualancaitac-  
ahua.

¡Amo! Campa techquetzqui tlacualca huan  
temachtli.

*David tlaijiyohuiyaya ica cocolistli huan ica  
cualancaitacahua*

**9** TOTECO, techtlasojtla pampa niitztoc ipan  
tequipacholi.

Nisenchocatoc hasta nijmati tlantiyohuij noixtey-  
olhua.

Ipan noyolo huan notlacayo nijmati nitlamitlaijij-  
ohuijtoc ica tequipacholi.

**10** Ni tlacuajcualoli nechtzontlamiltía pampa san  
tequipacholi nijmati.

Sesen xihuitl catli pano san nitlaayijhuía.

Ya tlantinemi nochicahualis por notlajtlacolhua  
hasta ya nitlacayohuactinemí.

**11** Nocualancaitacahua huan hasta nocalnechc-  
ahua nechijiyaj.

Catli nechiximatij nechimacasij.

Catli nechitaj ojtipa nechtlalcahuíaj.

**12** Nochi masehualme nechelcajtoque quen ya  
nimictosquía.

Nechtlahuelcajtoque quen se chachapal tepalcatl  
ipan tlasoli.

- 13 Nijcaqui quenicatza nocualancaitacahua nechistlacahuíaj.  
 Yeca nechitzquitoc se hueyi majmajtli huan nech-majmatía.  
 Inijuanti san sejco moijilhuíaj quenicatza huelise nechmictise.
- 14 Pero TOTECO, na nimotemachía ipan ta huan niquijtohua: “¡Taya tinoDios!”
- 15 Sesen tonali catli niitztoc momaco eltoc.  
 Techmanahui ininmaco nocualancaitacahua catli nechtlaijiyohuiltijtinemij.
- 16 TOTECO, ma monextis moteicnelijcayo ipan moixayac quema techtlachilía na,  
 nimotequipanojca.  
 Techmaquixti pampa ta techsenicnelijtoc.
- 17 TOTECO, na nimitztemojtoc.  
 Amo xiquincahuili para ma nechpinahualtica.  
 Xiquinpinahualti masehualme catli amo cuajcualme.  
 Quena, inijuanti mocamatzacuase quema tiquint-zontlamiltis.
- 18 TOTECO, ayacmo molinis ininneneipil inijuanti catli istlacatij quema ya mictose.  
 Ayacmo itztose inijuanti catli mohueyimatij quema camanaltij para techtlaijilhuise tojuanti catli tinemij xitlahuac moixpa.
- Quena, xiquinmicti catli mohueytaláj huan techmahuispolohuaj.
- 19 Pero ta, nelía hueyi moyolo ica inijuanti catli mitztlepanitaj huan tiquinmocuitlahuía.  
 Nelía cuali motlaicnelilis catli ticajoctoc para to-juanti catli timotemachijtoque ipan ta,

tojuanti catli tlamiyacapa titematiltijtoque para  
san ta tihuelei techmanahuis.

<sup>20</sup> TOTECO, ta techlatía campa ichtacatzi tojuanti  
catli timitztlepanitaj,  
huan nepa ta timocahua tohuaya.

Yeca fiero masehualme amo huelij techajsise ica  
catli quisencajtoque.

Quena, momaco techlatía huan amo aqui catli  
techmahuispolohua hueli techajsis.

<sup>21</sup> Nimitztlascamati, TOTECO,  
pampa tijchijqui huejhueyi tlamtli para tech-  
nextilis moteicnelijcayo.

Ica temachili techyahualojtoc para techmanahuis  
tlen nocualancaitacahua.

<sup>22</sup> TOTECO, nimoilhuijtiquisqui para techtlahuel-  
cajtoya.

¡Pero amo neli!

Tijcajqui quema nimittzajtzili techpalehuiqui,  
huan technanquili.

<sup>23</sup> Nochi amojuanti catli aniaxcahua TOTECO,  
xiquipnelica pampa yaya quinmocuitlahuía catli  
itztoque temachme.

Pero ica masehualme catli mohueyimatij,  
TOTECO quintlaxtlahuía hasta ica itlanca nochi  
catli amo cuali quichijtoque.

<sup>24</sup> Nochi amojuanti catli anmotemachíaj ipan  
TOTECO,  
xipaqua huan ximotemacaca.

## 32

*Nelía paqui nopa masehuali catli TOTECO quit-  
lapojpolhuijtoc*

- <sup>1</sup> Nelía paqui nopa masehuali catli TOTECO quitlapojpolhuijtoc itlajtlacolhua huan quiixpolojtoc nochí itlaixpanolhua.
- <sup>2</sup> Quipiya paquelistli catli ya quipohuilijtoc TOTECO itlajtlacolhua, huan ayacmo quitlajtlacoltía ica niyon se tlamanli. Ipan iyolo ayacmo mocajcayahua quen amo tleno quichijtoc.
- <sup>3</sup> Quema ayamo nijpohuilijtoya TOTECO quen nitlajtlacolchijtoya, semilhuitl nitlaayijhuiyaya hasta njimatqui para tlantoya nochicahualis.
- <sup>4</sup> Techtlatzacuiltiyaya tonaya huan tlayohua. Techtlatzaculti hasta njimatiyaya nicuahuaquiyaya quen soquiatl huaqui quema chicahuac tlatotoniyá.
- <sup>5</sup> Pero teipa nimitzpohuili nochí notlajtlacolhua huan niyon se amo njitlati. Nimotemamac nimitzpohuilis nochí notlaixpanolhua huan ta, TOTECO, nochí techtlapoijpolhui, huan techquixtili nopa tlaeticayotl.
- <sup>6</sup> Monequi para nochí catli moaxcahua mitztemose quema itztoque ipan tequipacholi. Monequi motemachise ipan ta, huan masque tequipacholi momiyaquilis quen se atlajtli catli chicahuac mixcuepa, amo quinajsis.
- <sup>7</sup> TOTECO, ipan ta nimotemachía quema onca tequipacholi, huan ta techmocuitlahuía.

Tijchijtoc para sequinoc ma nechyahualoca,  
 huan inijuanti huicaj chicahuac para  
 mitzhueyichihuase pampa techmanahuij-  
 toc.

**8** TOTECO quiijtohua:

“Na nimitztlalnamictis huan nimitznextilis nopa  
 ojthi catli más cuali,  
 catli monequi ipan timonejnemiltis.

Na nimitzconsejomacas huan nimitztlachilijtos.

**9** Amo ximochihua quen se cahuayo,  
 o se mula catli amo quipiya tlalnamiquilistli,  
 catli monequi tijtlalilis se tepos camachali ica se  
 mecatl huan tijtilanas para ma mitznelto-  
 cas.”

**10** Amo cuajcualme quipantise miyac  
 tlaijiyohuilistli,

pero tojuanti catli timotemachíaj ipan TOTECO,  
 yaya techyahualohua ica itlaicnelilis.

**11** Xipaquica ipan TOTECO,  
 amojuanti catli anitztoque xitlahuaque iixpa.

Amojuanti catli anquineltoquilíaj,  
 xitzajtzica ica paquelistli por catli TOTECO quichi-  
 jtoc.

## 33

### *Se huicatl para quihueyichihuase TOTECO*

**1** Xihuicaca ica paquelistli para TOTECO amojuanti  
 catli anitztoque xitlahuac iixpa.

Nelía yejyectzi para nochí tojuanti catli tijchijtine-  
 mij catli cuali ma tijhueyichihuaca.

<sup>2</sup> Xitlatzotzonaca ica arpa para xijhueyichihuaca,  
TOTECO.

Xihuicaca iixpa huan xijpaquilismacaca ica tlat-  
zotzonali catli nesi quen guitarra.

<sup>3</sup> Xijsencahuaca se huicatl catli yancuic,  
huan xijhuicatica TOTECO.

Xitlatzotzonaca cuali,  
huan xitzajtzica ica paquilstli.

<sup>4</sup> Pampa nelia xitlahuac nochi catli quiijtohua  
TOTECO.

Nochi catli quichihua tenextilía para temachtli.

<sup>5</sup> TOTECO quipactía nochi catli xitlahuac huan  
catli melahuac.

Nochi catli itztoque ipan tlaltipactli quiselíaj itlaic-  
nelilis TOTECO.

<sup>6</sup> TOTECO tlanahuati ma onca ilhuicactli huan  
mochijqui.

San camanaltic huan mochijqui metztli, tonati  
huan nochi sitlalime.

<sup>7</sup> Yaya quisansejcotili nochi atl catli eltoc ipan  
hueyi atl.

Quiajojqui nopa atl campa más tlahuejcatla.

<sup>8</sup> Nochi antlaltipac ehuani xijhueyitlepanitaca  
TOTECO.

Quena, nochi catli anitztoque ipan ni tlaltipactli  
xiquimacasica.

<sup>9</sup> Pampa nochi catli yaya quiijto,  
ya nopa mochijqui.

Huan catli yaya tlanahuati ma eli,  
ya nopa monexti.

<sup>10</sup> TOTECO quinsosolhuilía inintlalnamiquilis  
masehualme ipan campa hueli tlalme  
para amo ma quichihuaca catli fiero  
moilhuijtoque.

San tlailpitzas huan quincuapolos tlalme para  
amo huelise quichihuase catli fiero quisenc-  
cajtoque quichihuase.

<sup>11</sup> Pero catli TOTECO moilhuijtoc quichihuas amo  
quema mopatlas.

Catli ya quinequi,  
ya nopa elis para nochipa.

<sup>12</sup> Paquij masehualme ipan nopa tlali catli  
motemachíaj ipan TOTECO.

Quena, nelía paquij nopa masehualme catli  
TOTECO quintlapejpenijtoc para iaxcahua.

<sup>13</sup> TOTECO catli itztoc nepa ilhuicac techhualt-  
lachilitjtoc nochi timasehualme.

<sup>14</sup> Hasta nepa ipan ilhuicac TOTECO techtlachilitj-  
toc catli tiitztoque ipan ni tlaltipactli.

<sup>15</sup> Yaya TOTECO catli techyolchijchijqui nochi ti-  
tlaltipac ehuani huan techtlachilía nochi  
catli tijchijtinemij.

<sup>16</sup> Se hueyi tlanahuatijquetl amo tlatlani pampa  
quinpiya miyac isoldados.

Niyon se soldado catli motemaca amo tlatlani  
pampa quipiya miyac fuerza.

<sup>17</sup> Amo ximotemachi ipan se cahuayo para mitz-  
manahuis masque nelía tetic.

San ica ifuerza amo hueli temanahuía.

<sup>18</sup> Pero TOTECO, quena, yaya nochipa techt-  
lachilitjtoc tojuanti catli tiquimacasij tiquix-  
panose.

Techmocuitlahuía      catli      timochiyaj      ipan  
itlaicnelilis.

<sup>19</sup> Techmanahuía      quema      tiitztoque      nechca  
miquilistli.

Huan techtlamacas quema oncas mayantli para noja ma tiitztoca.

<sup>20</sup> Tojuanti ipan toyoltzi timotemachíaj ipan TOTECO.

Yaya techpalehuía huan techmanahuía ica catli amo cuali.

<sup>21</sup> Yeca ma tiyolpaquica ipan TOTECO, pampa timoneltemachijtoque ipan yaya catli nelía tlatzejtzelotic.

<sup>22</sup> TOTECO, xijpiya moyolo tohuaya, pampa san ipan ta timochiyaj.

## 34

*TOTECO techmocuitlahuía huan techmanahuía*

<sup>1</sup> Nijtlascamatis TOTECO tlatoctzitzi huan nochipa nissenpaquilismacatos.

<sup>2</sup> Nijhueytialis huan niquinilhuis nochi mase-hualme catli yaya nechchihuilijtoc.

Inijuanti catli teicneltzitzi quicaquise huan paquise.

<sup>3</sup> Ma tijhueyichihuaca huan ma tijhueytلالica TOTECO san sejco.

<sup>4</sup> Nijtzajtzili TOTECO ma nechpalehuiqui, huan yaya nechtlacaquili huan nechmanahui tlen nochi catli nechmajmatiyaya.

<sup>5</sup> Sequinoc catli motemachíaj ipan Toteco ixcahuanij ica paquilstli nojquiya, por catli yaya quinchihuilijtoc.

Amo quema pinahuase.

<sup>6</sup> Masque nipilteicneltzi, nijtzajtzili TOTECO,

huan yaya nechmaquixti ica nochí tlamantli catli  
nechtequipachohuayaya.

<sup>7</sup> Itequihua TOTECO quinmocuitlahuía nochí catli  
quiimacasij TOTECO,

huan yaya quinmanahuía.

<sup>8</sup> Xijyejyecoca TOTECO huan anquiitase para  
melahuac cuali iyolo tohuaya.

Hueyi paquelistli quipiyaj nochí masehualme catli  
ipan ya motemachíaj.

<sup>9</sup> Nochi amojuanti catli aniaxcahua TOTECO,  
xiquimacasica,  
pampa nochí catli quitlepanitaj amo tleno quin-  
polohua.

<sup>10</sup> Nopa tecuanime catli más quipiyaj chicahual-  
istli quemantic mayantinemij huan amo  
quipantíaj catli quicuase,  
pero masehualme catli quitemohuaj TOTECO  
quipiyase nochí catli cuali.

<sup>11</sup> Xihualaca noconebla, huan techtlacaquilica,  
huan nimechmachtis quenicatza monequi an-  
quilepanitase TOTECO,

huan anquiimacasise anquiixpanose.

<sup>12</sup> ¿Tijnequi tiitztos ica yejyectzi?

¿Tijnequi tihuejcahuas ipan ni tlaltipactli,  
huan tiquitas catli cuali?

<sup>13</sup> Monequi xijmocuitlahuis monenepil para amo  
tiquinmahuispolos sequinoc ica istlacatili.

<sup>14</sup> Ximoiyocatlali ica catli amo cuali,  
huan xijchihua san catli xitlahuac.

Xijchihuaca catli anhuelij para ma oncas tlase-  
jseltili inihuaya nochí masehualme.

Quena, ya nopa xijtemoca ica nochí amoyolo.

- 15 TOTECO quintlachilía catli nemij xitlahuac iixpa,  
huan san quichiya para quinmacas catli quitlajtlanise.
- 16 Pero TOTECO sencualantoc ica injuanti catli quichihuaj catli fiero.  
Quintzontlamiltis para ma ayacmo aqui quinel-nam quis ipan ni tlaltipactli.
- 17 Quema masehualme catli itztoque xitlahuaque iixpa TOTECO quitzajtzilíaj,  
yaya quintlacaquilía.  
Huan quinmanahuía tlen nochí inincuesolhua.
- 18 TOTECO itztoc ininnehca masehualme catli motequipachohuaj.  
Huan quinmaquixtía catli motequipachohuaj ica inintlajtlacolhua.
- 19 Se masehuali catli itztoc xitlahuac iixpa TOTECO quipiya miyac tequipacholi,  
pero TOTECO quimanahuía ica nochí catli ipanti.
- 20 Pampa TOTECO quimocuitlahuía para amo postequis niyon se iomiyo.
- 21 Se masehuali catli fiero inemilis miquis por nopa tlamatli fiero catli quichihua.  
Quena, TOTECO quintlalilis tlatzacultili catli quicualancaitaj catli cuali.
- 22 TOTECO quinmaquixtía itequipanojcahua.  
Quena, quintlapojpolhuía imasehualhua catli motemachíaj ipan ya.

## 35

*Se netlatlajtili para TOTECO ma quinmaquixti  
inimaco icualancaitacahua*

<sup>1</sup> TOTECO, xiquincamaijixnamiqui catli noca cualanij.

Xiquinhuilana catli quinequij nechhuilanase.

<sup>2</sup> Xijcui nochí motlahuilanca te poshua,  
huan ximotlanana para techmanahuí qui.

<sup>3</sup> Xijquixti mohacha catli ica titlahuilana,  
huan xiquinojtzacua catli nechtepotztocati-  
hualahuij.

Huan techihui:

“Na nimitzmaquixtis.”

<sup>4</sup> Ma mopinahuaca huan ma mocuapoloca catli  
nechtemohuaj para nechmictise.

Ma mocuepaca ininchaj ica pinahualistli catli  
quinequij nechchihuise catli fiero.

<sup>5</sup> Quen se ajacatl quihuica tlasoli,  
itequihua TOTECO ma quintojtocatiyas catli  
nehcualancaitaj.

<sup>6</sup> Ma onca tzintlayohuilotl ipan iniojhui.

Ma tlaxixtlacas campa nemij para ma huetzica,  
huan itequihua Toteco ma quintepotztocatiyas  
para quinmictis.

<sup>7</sup> Pampa masque amo tleno nijchijtoya,  
quitlalijque se tlaquetztli para nechmasiltise.

Quixajque se ostotl para ipan ma nihuetzi.

<sup>8</sup> Ma quintlatocajsi se hueyi tequipacholi.

Ma masica ipan nopa tlaquetztli catli inijuanti  
quitlalijque huan ma motzontlamiltica.

<sup>9</sup> Huajca quena, na nipaquis ipan TOTECO.

Nijpiyas paquilistli pampa TOTECO nechmaquix-  
tijtos.

<sup>10</sup> Ica nochí noyolo niquijtos:

“Amo aqui seyoc quen ta, TOTECO.

Tiquinmocuitlahuía catli amo quipiryaj fuerza  
para masehualme catli tetique amo huelis  
quinajsise.

Quena, tiquinmanahuía catli teicneltzitzi huan  
catli amo quipiryaj catli quinmonequilía.

Tiquinmanahuía ininmaco catli quinequij quint-  
lacuicuilise.”

<sup>11</sup> Motlananaj masehualme catli amo cuajcualme  
huan nechcualancaitaj.

Inijuanti tlatestigojquetzaj catli amo neli,  
huan nechtlaijilhuíaj ica tlamantli catli amo nij-  
mati.

<sup>12</sup> Nechtlaxtlahuíaj ica catli amo cuali,  
masque nelcuali niquinchihiujitoc.

San quinequij nechtequipacholmacase.

<sup>13</sup> Pero quema inijuanti mococojque,  
nimotequipacho inihuaya huan nimoyoyonti ica  
nopa fiero yoyomitl para nochí quimatisé  
nimotequipachohuayaya inihuaya.

Hasta nimosajqui por inijuanti para nijtlajtlanis  
TOTECO ma quinchicahua.

Pero TOTECO amo quicajqui catli niquilhui.

<sup>14</sup> Nimotequipachojtinemiyaya quen se tlamantli  
fiero ipantitosquía se nohuampox o se  
noicni.

Nimotequipacho huan nichocatinemiyaya quen  
mictosquía nonana.

<sup>15</sup> Pero quema na nechajsic tequipacholi, inijuanti  
pajque.

Quema nimotepotlami huan nihuetzqui,  
inijuanti mosentilijque huan nechhuetzquilijque.

Masehualme catli amo cuajcualme huan catli  
nechiximatiyayaj nechejelnamiqiyayaj

huan nechmaquiliyaj masque amo tleno  
nijchijtoya.

<sup>16</sup> Quen masehualme catli amo cuajcualme qui-huetzquiláj tlen hueli,  
inijuanti noca pajque huan motlancochhuehue-chotzque noixpa ica cualantli.

<sup>17</sup> TOTECO, ¿hasta quema noja san tijtlachilijtos  
nochi ni tlamantli?

Techmanahui para amo nechmictise,  
pampa san setzi nonemilis.

Techmaquixti tlen ni masehualme catli mochihuaj quen tecuanime catli quinequij nechhuejhuelse.

<sup>18</sup> Huan nimitztlascamatis tlamiyacapa ipan  
tlasentilistli.

Iniixpa nochi nopa miyaqui momasehualhua  
nimitzpaquilmismacas.

<sup>19</sup> Amo xiquincahuili nocualancaitacahua catli ist-lacatij ma noca paquica.

Amo xiquincahuili catli nechcualancaitaj ma  
moixijcopilica ica paquillistli noixpa pampa  
nimotequipachohua.

<sup>20</sup> Inijuanti amo tenotzaj ica cuali.

San moilhuíaj quenicatza huelis quincaj-cayahuase masehualme catli itztoque ica  
yejyectzi ipan ni tlali.

<sup>21</sup> Nechtlaijilhuíaj huan quijtohuaj:

“¡Xiquitaca tijnelitztoque catli fiero quichijqui!”

<sup>22</sup> TOTECO, ta tiquitztoc catli quichihuaj.

Amo san xiitzto huan amo tleno tijchihuas.

¡Amo techtlahuelcahua!

**23** Ximotlanana huan techchihuili catli xitlahuac  
huan melahuac.

Quena, TOTECO, xiisihui huan techmanahuiqui.

**24** TinoTeco Dios, ta catli ipa titetlajtolsencahua  
xitlahuac,

xitenextili para amo tleno nijchijtoc.

Amo xiquincahuili nocualancaitacahua ma noca  
huetzcaca.

**25** Ma amo nopanti catli inijuanti quinequij.

Ma amo quiijtoca nechixpolojoque.

Amo xiquincahuili mamoilhuica para inijuanti  
nechtlanque.

**26** Xijchihua para inijuanti catli noca paquij por  
notequipachol ma mocuapoloca huan ma  
ayacmo quimatica tlaque quichihuase.

Quena, xijcahua para inijuanti catli moilhuáj  
para más huejhueyi que na ma  
mopinahualtica huan ayacmo aqui ma  
quintlepanitas.

**27** Pero ma huicaca ica paquelistli inijuanti catli  
nechpalehuíaj.

Ma paquica inijuanti catli quiitaj para nijchihua  
catli xitlahuac.

Huan nochipa ma quiijtoca:

“Nelía hueyi TOTECO catli quipactía quipalehuis  
David,

pampa yaya quitequipanohua.”

**28** Quena, xijtlacaquili catli nimitztlajtlanía,

huan teipa nitepohuilis para nelía xitlahuac catli  
tijchihua.

Quena, semilhuitl nimitzpaquilismacas.

# 36

*Inintlajtlacol masehualme huan iteicnelilis  
TOTECO*

<sup>1</sup> Nijpixtoc ipan noyolo catli nijnequi niteyolme-lahuas tlen inintlajtlacol amo cuajcualme.

Amo cuajcualme quielcahuaj Toteco Dios huan amo quiimacasij.

<sup>2</sup> Mohueyimatij ica ininseltzi hasta moilhuíaj yaya amo hueli quichihuas cuenta nochí catli fiero quichijtinemij,

huan yeca amo quintlatzacuiltis.

<sup>3</sup> Quisa inincamaco senquistoc catli fiero huan catli amo melahuac.

Quipolojtoque inintlalnamiquilis,  
huan ayacmo quichihuaj catli cuali.

<sup>4</sup> Quema motecaj ipan inintlapec para cochise,  
san quisencahuaj tlaque tlajtlacoli quichihuase.

Moneltlatzquiljitoque ipan iniojhui catli fiero huan san catli amo cuali quinequij.

<sup>5</sup> TOTECO, motlasojtlacayo quinajsi nochí masehualme huan onajsi hasta ilhuicac huan hasta campa mixtli.

Nelía titemachtli.

<sup>6</sup> Tiitztoc tlahuel tixitlahuac huan amo quema timopatla.

Tiitztoc temachtli quen nopa huejhueyi tepeme campa tlahuel tlahuejcapa.

Nelxitlahuac titetlajtolsencahua,  
huan amo hueli tijmachilíaj motlanejnehuilis,  
pampa eltoc quen nopa hueyi atl catli onpano huejcatla.

¡TOTECO! Ta san se tiquinmocuitlahuía quen masehualme huan tecuanime.

<sup>7</sup> Toteco Dios, nelía yejyectzi moteicnelilis catli amo quema techcahua.

Yeca masehualme catli quipiyaj tlanahuatili huan catli teicneltzitzi monechcahuíaj campa ta para xiquinmanahui.

Quena, mochihuaj quen pilpiyotzitzi catli calaquij ieltlapatzala ininnana.

<sup>8</sup> Masehualme catli mitztemohuaj ixhuij cualica nopa tlatichihualistli catli tiquinmaca nepa mochaj.

Eltoc quen se hueyi tlacualistli catli techtencahuilía toixpa.

Techcahuilía ma tiatllica ipan nopa atlajtli catli temaca ajhuiyac atl.

Quena, nochí catli titlajtlaníaj techmaca.

<sup>9</sup> Pampa ta techmaca nemilistli nochí catli tiitztoque,  
huan pampa techmaca tlahuili, tojuanti tihuelij titlachiyaj.

<sup>10</sup> Nimitzlajtlanía para mojmostla techicneli tojuanti catli timitziximatij.

Nochipa techchihuilía catli xitlahuac nochí tojuanti catli ipan toyolo tijnequij tijchihuase catli cuali.

<sup>11</sup> Amo xijcahua para ma nopen moquejquetzaca inijuanti catli mohueyimati.

Niyon amo xiquincahuili ma nechtojtocaca amo cuajcualme.

<sup>12</sup> Se tonal niquistos:

“¡Xiquitaca quenicatza ama huetztoque nochí tlajt-lacolchijca masehualme catli mosisínáj!  
Toteco Dios quintlahuisojtoc para ayacmo huelise motlananase.”

## 37

### *Iniojhui cuajcualme huan amo cuajcualme*

- 1 Amo ximotequipachó ica amo cuajcualme.  
Niyon amo xiquixtoca catli quipiyaj masehualme catli quichihuaj catli amo monequi.
- 2 Pampa nimantzi huetzise quen cuapachtlí quema quitzon tequij.  
Huan polihuise quen xihuitl catli huaqui.
- 3 Ximotemachi ipan TOTECO huan xijchihua catli cuali.  
Quen nopa tipajcaitztos ipan motlal huan amo tleno mitzpolos.
- 4 Ximohuampoxchihua ihuaya TOTECO,  
huan yaya mitzmacas catli moyolo quinequi.
- 5 Xijcahuili TOTECO ma mitznextili campa tine-mis.  
Ximotemachi ipan ya, huan yaya quichihuas.
- 6 Quipannextis catli xitlahuac tijchihua.  
Quena, quichihuas para nochí ma quiitaca mot-lalnamiquilis quen nochí quiitaj quema tlahuía tonati ipan tlajcotoná.
- 7 Xijpiya moyolo quema tiitztoc iixpa TOTECO.  
Amo ximolini.  
Xijchiya para yaya quichihuas catli monequi.  
Amo xicualani inihuaya catli quipiyaj nochí catli quinequij ama.

Amo xiquinchihuili cuenta inijuanti catli quichijtinemij sesen tlamantli catli fiero quisencajtoque.

<sup>8</sup> Amo ximocualancamacá.

Xijtlalcahui cualantli,  
pampa cualantli noja más hueyi mochihuas huan mitzcocos.

<sup>9</sup> TOTECO quintzontlamiltis catli mosisínáj,  
pero catli motemachíaj ipan ya quintiochihuas huan moaxcatise nopa tlali.

<sup>10</sup> Ayacmo huejcahuas noja itztose amo cuajcualme,  
teipa masque titlachiyas campa itztoyaj,  
amo quema sempa tiquinpantis.

<sup>11</sup> Pero masehualme catli moicnnonequij iixpa Toteco itztose ipan nopa cuali tlali huan tlahuel paquise,  
pampa yaya quintiochihuas hasta mocahuas.

<sup>12</sup> Masehualme catli quicualancaitaj Toteco mosenilhuijtoque tlaque fiero tlamantli huelis quinchihuilise inijuanti catli xitlahuac nemij.

Quintlachilíaj ica cualantli huan motlanhuehuechotzaj iniixpa.

<sup>13</sup> Pero Toteco quinhuetzquilá nopa masehualme,  
pampa quimati para monechcahuía nopa hora quema quintzontlamiltis.

<sup>14</sup> Masehualme catli quicualancaitaj Toteco quicopinaj ininmachete para quintlahuisolise catli teicneltzitzí.

Quihuitolohuaj inincuahuitol huan quinmelactlachilíaj catli moicnnonequij iixpa Toteco.

Quena, quinchiyaj para quinmictise catli xitlahuac monejnemiltíaj.

<sup>15</sup> Pero catli inijuanti ininmachete calaquis ipan ininyolo,

huan inincuahuitolhua pojpostequis huan cuechtic elis.

<sup>16</sup> Más cuali nopa quentzi catli quipiya se cuali masehuali huan amo quen imiyaca nochi tlamantli pajpatiyo catli quipiyaj tlajtla-colchihuani.

<sup>17</sup> Pampa TOTECO quinquixtilis ininchicahualis catli amo itztoque tlapajpacme iixpa, pero quinfuerzajmacas catli monejnemiltíaj cuali iixpa.

<sup>18</sup> Mojmostla TOTECO quitlachilía catli quichihuaj masehualme catli itztoque xitlahuaque iixpa,

huan nopa tlali catli quinmacas para iniaxca huejahuas para nochipa.

<sup>19</sup> Quema ajsis tonali catli amo cuali, quinmocuitlahuis para amo más tlaijiyohuise. Quema oncas mayantli, quinmacas catli quicuase hasta mocahuas.

<sup>20</sup> Pero amo cuajcualme miquise.

Quena, quen huaquij nopa yejyectzitzí xochime sacapetlapani huan ayacmo nesi ininyejca, nojquiya polihuise icualancaitacahua TOTECO.

Quena, polihuise quen poctli catli quisa huan ayacmo nesi.

<sup>21</sup> Se masehuali catli amo cuali iyolo motlanehui se tlamantli huan ayacmo quicuepa.

Pero masehualme catli cuajcualme quipiyaj hueyi ininyolo huan temacaj hasta mocahua.

- <sup>22</sup> Catli TOTECO quintiochihua quiselise nopa tlali  
catli yaya quinmacas,  
pero catli TOTECO quintelchihua quintzont-  
lamiltis.
- <sup>23</sup> TOTECO quichihua ma eli temachtli sesen paso  
ipan inemilis se cuali masehuali,  
huan nopa masehuali paqui miyac pampa nemi  
cuali.
- <sup>24</sup> Masque huetzis nopa cuali masehuali, amo  
mocahuas nepa huetztoc,  
pampa TOTECO quitlananas ica imax.
- <sup>25</sup> Na nojquiya nitelpocatixtoya huan ama ya ni-  
huehuentzi,  
pero amo quema niquitac TOTECO quitlahuelc-  
ahua se masehuali catli itztoc xitlahuac  
iixpa.  
Niyon iconehua se cuali masehuali amo niquinitz-  
toc sintla motlaejehuáj para ica panose.
- <sup>26</sup> Mojmostla se cuali masehuali quintlasojtla se-  
quinoc huan quintlanejtía catli monequi.  
Iconehua se cuali tlacatl tepalehuíaj.
- <sup>27</sup> Huajca sintla tijnequi tiitztos para nochipa,  
xijtlalcahui tlajtlacoli huan xijchihua san catli  
cuali.
- <sup>28</sup> Pampa TOTECO quipactía catli xitlahuac huan  
amo quema quinhuejcamajcahuas iaxc-  
ahua catli itztoque temachme.  
¡Amo! Techmocuitlahuis para nochipa.  
Pero quintzontlamiltis nochí masehualme catli  
amo cuajcualme,  
huan amo quincahuilis niyon se iniixhui.

- 29** Masehualme catli itztoque xitlahuaque iixpa  
TOTEKO moaxcatise nopa tlali catli yaya  
quinmacas,  
huan nepa itztose para nochipa.
- 30** Se masehuali catli itztoc cuali iixpa Toteco ca-  
manalti ica tlalnamiqualistli huan quiijto-  
hua catli xitlahuac.
- 31** Quipiya Icamanal Toteco Dios ipan iyolo,  
huan yeca amo huetzis ipan tlajtlacoli.
- 32** Masehualme catli quicualancaitaj Toteco Dios  
quintlachilíaj masehualme catli monejne-  
miltíaj xitlahuac.  
Quitemohuaj quenicatza huelis quintelhuise para  
ma quinmictica.
- 33** Pero TOTEKO amo quincahuas para cuali  
masehualme ma mocahuaca ininmaco  
inincualancaitacahua.  
Quema ajrise iixpa se juez,  
amo quincahuas ma quintlatzacuiltica catli cuaj-  
cualme ica se tlamantli catli amo quichij-  
toque.
- 34** Ximotemachi ipan TOTEKO huan xijchihua catli  
yaya quinequi,  
pampa yaya mitzhuejcapantlalis huan mitzmacas  
nopa tlali.  
Huan tiquitas quen quintzontlamiltis catli quin-  
pactía tlajtlacolchihuase.
- 35** Pampa na niquinitztoc masehualme catli  
quicualancaitaj Toteco,  
injuanti mohueyimatij huan temajmatíaj.  
Pampa quipiyaj chicahualistli quen se cuahuitl  
hueyi huan xajcaltic.

<sup>36</sup> Pero panoc se ome tonal tlantiyajque huan ayacmo niquinitac campa itztoyaj.

Huan masque niquintemo, ayacmo niquinpanti.

<sup>37</sup> Pero xijtlachili quen monejnemiltía se masehuali catli itztoc xitlahuac iixpa TOTECO, yaya catli amo aqui hueli quitelhuis.

Nopa masehuali quipiyas tlasejseltili huan itztos ica yejyectzi para nochipa.

<sup>38</sup> Pero TOTECO ica se huelta quintlamitzontlamiltis inijuanti catli amo quitlepanitaj.

Huan amo quicajtehuase niyon se iniixhui.

<sup>39</sup> TOTECO quinmaquixtía catli itztoque xitlahuaque iixpa.

Quinfuerzajmaca quema huala tlaohujcayotl.

<sup>40</sup> TOTECO quinpalehuía huan quinmanahuía catli cuajcualme.

Quinmanahuía ininmaco masehualme catli quicualancaitaj huan quinmaquixtía, pampa inijuanti mochixtoque ipan ya.

## 38

### *Inetlatlajtil David quema tlajtlacolchijtoya*

<sup>1</sup> TOTECO, amo techtlaijyohuilty quema ticualani.

Huan amo techtlatzacuilty ica mohueyi cualancayo.

<sup>2</sup> Miyac nechcocohua catli amo cuali nijchijtoc.

Eltoc quen nochí mocuatlaminhua calactoc ipan na.

Quena, eltoc quen techajsitoc, pampa nijmati ticualani nohuaya.

<sup>3</sup> Huan pampa ticualani por notlajtlacol,

nijmati quen nochí notlacayo mococohua.

Niyon se noomiyo amo cuali eltoc.

- <sup>4</sup> Nochi notlajtlacolhua nopen huetztoc.  
 Eltoc quen nimisahuisquía campa miyac atl.  
 Notlajtlacolhua eltoc quen se tlamamali tlahuel  
     etic catli amo hueli niquijiyohuía.
- <sup>5</sup> Palani notlacayo pampa nijchijqui se huihuiyotl.  
 Miyotíaj nococohua.
- <sup>6</sup> Nicuitlapanhuitoltic huan amo hueli nijtlanana  
     notzonteco.  
 Semilhuitl nichocatinemi por catli nijchijtoc.
- <sup>7</sup> Nochi notlacayo tliquisa.  
 Huan ya tlantinemi nochicahualis por notlajtlacol.
- <sup>8</sup> Nimomati quen nitlatejtejtzonli.  
 Nyon quentzi fuerza amo nijpiya.  
 Nelía nitlaayijhuía ipan noyolo.
- <sup>9</sup> NoTeco, ta tijmati quen nijnequi sempa niitztos  
     cuali moixpa.  
 Nochi catli nimoilhuía tlanemijya nesi moixpa.  
 Amo tleno hueli nimitzlatilía.
- <sup>10</sup> Noyolo nelhuihuipica,  
 huan ya tlantinemi nochicahualis.  
 Ayacmo hueli nitlachiya cuali.
- <sup>11</sup> Nonelhuampoyohua huan noteiximatcahua  
     san nechhuejcaitaj, pampa quiijiyaj  
     nococohua.
- <sup>12</sup> Inijuanti catli quinequij nechmictise quisenc-  
     ahuaj tlaquetztl para nechmasiltise.  
 Catli quinequij nechcocose tlatocatzitzin nechilhuíaj  
     quenicatza nechtzontlamiltise.
- Semilhuitl quitemolíaj quenicatza nechc妖  
     cayahuase.
- <sup>13</sup> Pero na nimochihua quen amo nijcaqui catli  
     quiijtohuaj.

Nimochihua quen se ninono huan amo nijtlapo-hua nocamac para niquinanquilis.

<sup>14</sup> Quena, na nimochihua quen amo nijcaqui inincamanal,

huan amo tleno niquijtohua para ica nimomanahuis.

<sup>15</sup> Pampa san ipan ta nimochiya, TOTECO, tin-oDios.

Na nijcajtoc momaco para xiquinnanquili huan techmanahui.

<sup>16</sup> San nimitztlajtlanía para amo xiquincahuili ma noca huetzcaca.

Amo xiquincahuili ma mohueyitlalica noixpa pampa nihuetzqui.

<sup>17</sup> Nijmati nimiquis pampa tlacuajcualoli amo nechcahua niyon se tlatoctzi.

<sup>18</sup> TOTECO, nijnequi nimitzpannextilis nochí not-lajtlacolhua,

pampa nelía nimotequipachohua ica catli nijchijtoc.

<sup>19</sup> Nocualancaitacahua momiyaquilijtoque huan moyoltetilijtoque.

Miyac nechcualancaitaj, masque amo tleno niquinchihuilijtoc.

<sup>20</sup> Masque catli cuali niquinchihuilijtoc, nechcuepilihijtoque ica catli fiero.

Nechcualancaitaj pampa nijtoquilía catli cuali.

<sup>21</sup> NoTeco Dios, amo techcrajtehua noseli.

Amo ximoiyocatlali ica na.

<sup>22</sup> ¡Toteco! Xihuala nimantzi techpalehuiqui, ta tinotemaquiaxtijca.

**39***Amo huejcahuas tonemilis*

<sup>1</sup> Nimoilhuijtoya para nimomocuitlahuisquía miyac para amo nijchihuasquía catli amo cuali.

Niquijtojtoya para nijmocuitlahuisquía nonenepil huan nocamanal para amo nitlajtlacolchihuas ica catli niqujtohua.

Quena, amo tleno niquijtos quema niitztos iniixpa amo cuajcualme.

<sup>2</sup> Huajca nimochijqui quen se ninono.

Amo tleno niquijtohuayaya,  
niyon catli cuali, niyon catli amo cuali.

Huan pampa nicajoctoya nochí catli nijmatiyaya ipan noyolo,

noja más nitlaijiyohuiyaya.

<sup>3</sup> Hasta nijmatiyaya quen noyolo tlatlayaya.

Huan quema san ya nopa nimosenilhuijtoya,  
nijmatiyaya quen se tlitl lemeniyaya ipan noyolo.  
Huajca ayacmo niquijiyohui huan nicamanaltic chicahuac,

huan niquilhui TOTECO:

<sup>4</sup> “TOTECO, technextili quesqui tonali niitztos huan quema nimquis.

Nijmati nelquentzi tonali niyoltos nica.

<sup>5</sup> Techmacatoc se nemilistli catli nelquentzi xihuitl.

Huan nochí xihuitl catli niyoltos elis san se tla-toctzi moixpa,

pampa ta nochipa tiitztoc.

Nochi masehualme polijtehuaj nimantzi san quen ixpolihui inijiyo quema tlaijiyotilanaj.

- 6** Nochi masehualme panotehuaj quen se ec-  
ahuiotl.  
San tlapic noch i inintequi.  
Masque quimiyaquilíaj tlamantli catli ipati,  
amo quimati j ajqueya iaxca elis teipa.
- 7** Huajca, noTeco, amo tleno onca catli ipan huelis  
nimotemachis.  
Nimochiyas san ipan ta.
- 8** Techmaquixti tlen notlajtlacolhua.  
Amo xiquincahuili masehualme catli huihuitique  
ma noca paquica ica catli nijchijtoc.
- 9** Nimocamatzacuas moixpa huan ayacmo nimoli-  
nis ica catli nopanti, pampa ta techtlatza-  
cuiltia.
- 10** Pero noTeco, ayacmo techtlatzacuilti.  
Nijmati nimquis pampa techpanajsitoc.
- 11** Quema se masehuali tlajtlacolchihua, ta tijt-  
latzacuiltia.  
Nopa tlamantli catli más quiicnelía,  
tiquixpolihuiltia quen mejtolime quitlam-  
icualoltíaj se yoyomitl.  
Niyon se masehuali amo quipiya chicahualistli.  
Nochi itztoque san quen se ajacatl catli ica se  
tlatoctzi panotehuaj.
- 12** NoTeco, xijtlacaquili quema nimotlatlajtis.  
Techtlacaquili quema nimitztzajtzilía.  
Amo san xitlachixto quema nimochoquilía, tech-  
palehuiqui.  
Quen noch i nohuejcapan tatahua, san niitztos  
nica se tlatoctzi.  
Quen niehuasquía seyoc altepetl huan san ni-  
panosquía,  
amo nihuejcahuas nica.

<sup>13</sup> Ayacmo techlatzacuilty.

Techcahuili sempa ma nijpiyas fuerza huan se  
quentzi paquelistli pampa se tonal nimiquis  
huan ayacmo niitztos nica.”

## 40

*David quipaquilismaca TOTECO pampa  
quimanahui*

<sup>1</sup> Nijpixqui noyolo huan nimochixqui para  
TOTECO ma nechpalehuiqui.

Huan yaya, quena, moechcapano huan nechtla-  
caquili quema nijnojnotzayaya.

<sup>2</sup> TOTECO nechtlananqui quema nijmatiyaya ni-  
itztoya ipan se ostotl campa mahuilili.

Eltoya quen nimisahuijinemiyaya ipan soqui  
atoli catli huejcatla,

huan ayacmo nijmatiyaya tlaque nijchihuas.

Pero TOTECO nechmaquixti tlen nopa tequipa-  
choli.

Quena, nechquetzqui ipan se hueyi tetl campa  
temachtli.

Huan teipa nechyacanqui ipan se cuali ojtli.

<sup>3</sup> Huan teipa noTeco Dios nechmacac se huicatl  
yancuic,

se huicatl catli ica ma nijpaquilismacas.

Miyac catli quicaquise nochí catli TOTECO  
nechchihuilijtoc, motemachise ipan ya.

<sup>4</sup> Paqui nopa masehuali catli motemachía ipan  
TOTECO.

Huan amo motemachía ipan catli mohueyimatiij,  
niyon ininpan catli quinhueyichihuaj teteyome.

**5** TOTECO noDios, ta techchihuilitoc miyac tlamantli catli huejhueyi.

Amo aqui quiaxilis mohueyi chicahualis.

Ta nochipa techpixtoc ipan motlalnamiquilis.

Quena, tlahuil miyac tlamantli catli yejyectzi tjsencajtoc techchihuilitis.

Sintla nijnequisquía niteyolmelahuas sesen tlamantli catli techchihuilitoc,

amo nihuelisquía.

Pampa nochí catli cuali techchihuilitoc onpano catli hueli nijpohua.

**6** Ya nijmati nopa catli más tijnequi para timasehualme ma timitzmacaca.

Amo hueyi ipati moixpa nopa tlapiyalme huan sequinoc tlamantli tlacajcahualistli catli masehualme mitzmacaj.

Amo hueyi ipati moixpa nopa tlacajcahualistli catli tijtlatíaj moixpa por totlajtlacolhua.

Techtlapolijtoc notlalnamiquilis para hueli nijmachilia catli más tijnequi tlen tojuanti.

Tijnequi ma timotemacaca ipan ta.

Ya nopa, quena, hueyi ipati moixpa.

**7** Yeca nimitzilhujtoc:

“Nica niitztoc.

Ya nihuala quen ijcuilijtoc nijchihuasquía ipan mocamanal.

**8** ¡NoTeco Dios!

Nechpactía nijchihuas mopaquilis,

huan motlamachtil nihuica ipan noyolo.”

**9** Tlamiyacapa iniixpa momasehualhua niteyolmelajtoc para ta, TOTECO,

tiquinchhua masehualme xitlahuaque moixpa.

Cuali tijmati para amo san nicajoctoc catli nijmati.

**10** Amo nijtlatijtoc nopa cuali camanali ipan noyolo para amo aqui niquilhuis.

Nochi masehualme niquinymelaha para ta tiquinmaquixtis.

Nochipa nitematiltis para ta nelia titemachtli huan titepalehuia.

Nepa tlamiyacapa nitepohuilis para titetlasojtla huan amo timoyolpatla.

**11** TOTECO, nijmati amo quema tijcahuas techtlasojtlas.

Nimochiya ipan moteicnelijcayo, pampa ta nochipa techmocuitlahuis.

**12** Miyac tequipacholi nijpiya campa hueli.

Amo hueli nijpohua nochi.

Notlajtlacolhua nechtlantoc huan nichoca hasta amo hueli nitlachiya.

Notlajtlacolhua nelmiyac hasta quipano imiyaca notzoncal.

Tlantinemi noyolo huan nochicahualis.

**13** TOTECO, techmanahuiqui.

Quena TOTECO, ximoisihuilli huan techpalehuiqui.

**14** Ma mopinahualtica huan ma mocuapoloca catli quinequij nechzontlamiltise.

Xiquintojtocatinemi catli nechcualancaitaj huan tlahuel xiquinpahualti.

**15** Nochi catli noca paquij ma huetzica.

Xiquincuepa san ininmax.

**16** Pero ma paquise miyac nochि catli mitztemohuaj.

Quena, paquij catli mitzicneliaj pampa tiquinmaquixtijtoc.

Nochipa quijtohuaj:

“Nelía hueyi TOTECO.”

<sup>17</sup> Masque nimotequipachojtoc huan nechpolo-hua catli nechmonequilía, nipmatí para ta TOTECO techelnamiqui. Ta tinoTeco Dios, techpalehuis huan techmanahuis. NoTeco Dios, amo xihuejcahua quema nimitznotza. Nimantzi techpalehuiqui.

## 41

*David catli mococohua quitlajtlanía Toteco ma quichicahua*

<sup>1</sup> Paqui nopa masehuali catli motequipachohua pampa quinicnelía catli teicneltzitzti, pampa TOTECO quipalehuis quema hualas tlao-huijcayotl.

<sup>2</sup> TOTECO quimocuitlahuis para amo aqui quimictis. Huan TOTECO quitiochiwas tlamiyacapa ipan tlali Israel.

Yaya amo quicajtehuas, niyon amo quicahuas ininmaco icualancaitacahua para ma quichihuilica catli quinequise.

<sup>3</sup> Quema huetztos ipan tlaijiyohuilistli, TOTECO quitlananas ipan itlapec huan quijcuinilis nopa cocolistli.

<sup>4</sup> Na niquilhui TOTECO:  
“TOTECO, na nitlajtlacolchijtoc mocha ta.  
Techtlasojtla huan techchicahua.”

<sup>5</sup> Nocualancaitacahua quinequij ma nechajsi catli fiero.

Noca camanaltij huan quinequij ma nimiqui huan  
ayacmo aqui nechelnamiquis.

<sup>6</sup> Quema nechpaxalohuaj, mochihuaj quen no-  
huampoyohua,  
pero amo nelía catli quijjtohuaj.

Quema itztoque nohuaya san quitlacaquiláj  
tlaque onca para huelis quipatlase ica  
catli más fiero,  
huan teipa quisase huan teyolmelajtinemise tlen  
na.

<sup>7</sup> Quena, nocualancaitacahua mosentiláj huan  
noca camanaltij.

Tepohuiláj para ayacmo onca pajtli para na huan  
nimantzi nimiquis.

<sup>8</sup> Quijjtohuaj:

“Nopa cocolistli catli yaya quipixtoc nelfiero.

Ayacmo motlananas tlen itlapech pampa  
nimantzi miquis.”

Quej nopa quijjtohuaj tlen na.

<sup>9</sup> Nojquiya nechcajtejtoc catli eliyaya nonelhuam-  
pox.

Yaya catli ipan nimotemachiyaya huan  
catli tlacuayaya nohuaya, ama  
nechtlahuelcajtoc.

<sup>10</sup> Pero ta TOTECO, techtlasojtla.

Techtlanana tlen notlapech huan niqun cuepilis  
quen nechchihuilijtoque.

<sup>11</sup> Nijmati techicnelía pampa amo tiquincahuilij-  
toc nocualancaitacahua ma nechtlanica.

<sup>12</sup> Techpalehui pampa nijchihua catli xitlahuac  
huan techmacatoc tequiticayotl ma niitzto  
nepa moixpa para nochipa.

<sup>13</sup> Ma tijhueyichihuaca TOTECO,  
yaya catli iTeco tohuejcapan tata, Israel.  
Quena, ma tijhueyichihuaca ama huan nochipa.  
Quej nopa ma eli.

## 42

*Israelitame catli quinhuicatoque seyoc tlali  
quielnamiquij inintlal*

<sup>1</sup> Quen se masatl catli tlahuel amiqui quitemo-  
jtinemi se atlajtli para atlis,  
quej nopa na nimitzyoltemohua, noTeco Dios.

<sup>2</sup> Quena, quen se catli tlahuel amiqui,  
na ipan noyolo nimitznequi Toteco,  
ta catli nelnelía tiitztoc.

¿Hasta quema huelis niyas huan nimonextis  
moixpa?

<sup>3</sup> Yohuali huan tonali nichoca huan amo nitlacua.  
Nocualancaitacahua tlatoctzitzí nechtlatzinto-  
quilíaj:

“¿Canque itztoc moDios?  
¿Para tlen amo mitzpalehuía?”  
Quen nopa nechilhuíaj.

<sup>4</sup> Quema niquelnamiqui quen eliyaya achtihiuya  
nepa ipan notlal, eltoc quen atiya noyolo.  
Niyohuiyaya inihuaya miyaqui masehualme  
hasta ichaj Toteco Dios.

Na niquinyacyanayaya nochime hasta ichaj ipan  
nopa hueyi ilhuitl.

Titzajtzitiyohuiyayaj ica paquelistli,  
huan tijtlascamatiyayaj Toteco Dios pampa para  
ya tiilhuichihuayayaj.

<sup>5</sup> Huajca nimoilhuía:

“Amo monequi nimotequipachos.  
 Na nimotemachijtoc ipan noTeco Dios,  
 huan sempa nijpaquilismacas,  
 pampa yaya noDios huan notemaquixtijca.”

**6** Pero noTeco, nelía nimotequipachohua nica  
 campa niitztoc ipan ni tlali catli huejca.

Yeca nimitzelnamiquis,  
 huan niquelnamiquis quen tijpixqui hueyi moy-  
 olo tohuaya catli tiehuaj ipan motlal.

Niquelnamiqui nopa tlali yejyectzi catli pehua  
 campa motlalohua nopa atlajtli Jordán,  
 huan ontلام hasta campa motlanantoc nopa te-  
 pemé Hermón huan Mizar.

**7** Ama ta techtitlanilijtoc tequipacholi catli nechi-  
 jiyyomictía.

Quena, miyac tequipacholi nechajsitoc quen imiy-  
 aca atl catli huetzi tlen tepeixco hasta ipan  
 na.

Caquisti quen miyac atl catli tlacomontoc,  
 huan nochí nopa atl panotoc ipan na.

**8** Pero ica ijnaloc TOTECO nechtitlanilis itlaic-  
 nelilis.

Huan ica tlayohua yaya nechmacas se huicatl  
 para nijhueyichihuas,  
 huan nimotlatlajtia ica ya.

Quena, nijnojnotza NoTeco catli mojmostla nech-  
 maca nemilistli.

**9** Niquilhuis Toteco Dios:

“Ipan ta nimotlatía huan amo aqui hueli nechajsis.  
 ¿Para tlen techelcajtoc?

Na san nimotequipachojtinemi,  
 pampa nocualancaitacahua nechtlaijiyohuilitáj.

<sup>10</sup> Catli nocualancaitacahua nechchihuiláj nechcocohua hasta ajsi ipan noomiyohua, pampa nechtlaijilhuíaj huan nechtlatzintoquillíaj tlatocztitzi:

‘¿Canque itztoc moDios?

¿Para tlen amo mitzpalehuía?’ ”

<sup>11</sup> Pero amo monequi nimocuesihuilmacas, niyon nimotequipachos.

Na nimotemachijtoc ipan noTeco Dios, huan teipa sempa nijpaquilismacas pampa yaya noDios huan noTemaquixtijca.

## 43

*Se netlatlajtili catli quitlajtlanía Toteco ma quincuepa ipan inintla*

<sup>1</sup> NoTeco Dios, techtlajtolsencahua xitlahuac huan xitenextili para amo tleno nijchijtoc.

Techmanahui tlen ni istlacaticha masehualme huan amo cuajcualme catli nechtelhuíaj.

<sup>2</sup> Pampa san ta tinoTeco huan tinoDios huan notlamanhujica na.

¿Para tlen techtlahuelcajtoc?

Nimotequipachojtinemi huan más nechtlaijyohuiltíaj nocualancaitacahua, huan amo tleno tijchihua.

<sup>3</sup> Toteco Dios, techyacana ica motlahuil huan technextili catli melahuac.

Quej nopa, quena, huelis nimocuepas motlal huan campa motepe catli tlatzejtzeloltic campa ta tiitztoc ipan mocaltiopa.

<sup>4</sup> Quena, noTeco Dios, nicalaquis huan niajsiti hasta motlaixpa campa masehualme mitzhueyichihuaj.

Nepa nimitzpaquilismacas ica arpa, ta catli tech-maca paquilibrium,  
pampa ta tinoTeco Dios.

<sup>5</sup> San tlamic nimotequipachos.

Na nimotemachijtoc ipan ta, noTeco Dios, huan  
sempa nimitzpaquilismacas,  
pampa, ta tinoDios, huan tinotemaquixtijca.

## 44

*Se tlacatl quitlajtlanía Toteco ma quimocuit-lahuis*

<sup>1</sup> Toteco Dios, tijcactoque tlaque techpohuilijtoque  
tohuejcapan tatahua tlen ta,  
huan nochí nopa tlamantli catli tiqunichihuili  
huejcajya.

<sup>2</sup> Quena, Toteco Dios, ica mohueyi chicahualis ta  
tiquintojtocac nopa fiero masehualme catli  
quinhueyichihuayayaj teteyome ipan nopa  
tlali,

huan nopa tlali tiquinmacac totatahua.

Quena, tiquintlatzaculti ne sequinoc huan  
tiquinpalehui tohuejcapan tatahua para  
ma momiyaquilica,

huan ma moaxcatica.

<sup>3</sup> Tohuejcapan tatahua amo quitlanque nopa tlali  
ica ininmachete, niyon ica ininchicahualis.

Tlatlanque ica nopa hueyi chicahualistli catli ta  
tijpiya ipan monejmac,

huan pampa hueyi moyolo ininhuaya,  
huan achi más tiquinicnelía.

<sup>4</sup> Ta tinotlanahuatijca huan tinoTeco Dios.

Ta tiquinmanahuía huan tijchihua ma tlatlanica  
momasehualhua.

- <sup>5</sup> Quena, ica motlapalehuil tiquintlanise tocualan-caitacahua.  
 Huan ica mochicahualis ininpan timoquejquet-zase catli techhuilanaj.
- <sup>6</sup> Pampa amo timotemachíaj ipan tocuhuitol huan tomachete para ma techmanahuica huan titlatlanise.
- <sup>7</sup> Eltoc ta, Toteco, catli tijchihua ma tiquintlanica tocualancaitacahua.  
 Ta tiquinpinahualtijtoc nochi catli techcualan-caitaj.
- <sup>8</sup> Mojmostla timitzpaquilismacase tinoTeco Dios.  
 Huan timitzhueyichihuase ica huicatl para nochipa.
- <sup>9</sup> Pero amantzi eltoc quen techtlahuelcajtoc huan techpinahualtijtoc.  
 Nyon ayacmo tinemi inihuaya tosoldados quema tiontlahuilanaj.
- <sup>10</sup> Tijchijqui ma ticholoca iniixpa tocualancaitacahua.  
 Quena, inijuanti catli techcualancaitaj techtlahchtequiláj huan quihiuicaj nochi catli quinequij.
- <sup>11</sup> Techtemactilijtoc quen tipilborregojtitzitzi catli san quichiyaj para quinhuicase campa quinmictise.  
 Huan techsemantoc campa hueli ipan sequinoc tlalme campa quinhueyichihuaj teteyome.
- <sup>12</sup> Technemacatoc timomasehualhua ica nelquentzi quen amo tleno topati elisquía.
- <sup>13</sup> Nochi masehualme ipan nopa tlalme catli itz-toque tonechca quiitaque catli techchihuil-ijtoc.

Yeca techtlaijilhuíaj huan toca paquij.

<sup>14</sup> Tijchijtoc para inijuanti catli quinhueyichihuaj tlaixcopincayome ma toca huetcaca.

Nochi quema techitaj, motzonojoliníaj.

<sup>15</sup> Mojmostla toixpa eltoc nopa pinahualistli hasta tijnequisquíaj timoixtzacuase,

<sup>16</sup> pampa techtlaijilhuíaj huan techhuetzquilíaj nopa motlacuepilijca masehualme.

Quena, techpinahaultíaj tocualancaitacahua.

<sup>17</sup> Nochi ni tlamantli topantitoc, masque amo timitzelcajtoque, niyon amo timoiyocacajtoque tlen nopa camanal sencahuali catli tijchijqui ininhuaya tohue-japan tatahua.

<sup>18</sup> Amo timoiyocatlalijtoque tlen ta, niyon amo tijcajtejtoque moojhui.

<sup>19</sup> Pero techtlahuelcajtoc campa amo aqui itztoc, campa san itztoque tlapiyalme catli mosisiníaj.

Techcajtoc ipan se tzintlayohuilotl catli eltoc quen miquilistli.

<sup>20</sup> Toteco Dios, sintla timitzelcajtosquíaj, o tijhueyichijtosquíaj se totlaixcopincayo,

<sup>21</sup> ta tijmajtosquía, pampa ta tijmati nochi catli ichtacatzi eltoc ipan yolojtlí.

Pero amo tijchijtoque, Toteco.

<sup>22</sup> Pero masque amo tleno tijchijtoque, por ta tiitztoque nechca miquilistli.

Techchihuaj quen tipilborregojtzitzi catli san quichiyaj ajqueya quinmictis pampa timoaxcahua.

<sup>23</sup> ¡Toteco ximotlanana!

¡Amo xicochi!

Amo ximoiyocatlali tlen tojuanti para nochipa.

<sup>24</sup> ¿Para tlen timoixtlatía?

Eltoc quen tiquelcajtoc para tojuanti titlaijijy-  
ohuíaj huan miyac techcualancaitaj.

<sup>25</sup> Techtlahuisojoque hasta tlalchi.

Toixayac mocahua ipan tلالtejpoctli huan amo  
hueli timotlanananase.

<sup>26</sup> ¡Ximotlanana, Toteco!

Techpalehuiqui.

Techmaquixti pampa tlahuel techicnelía.

## 45

*Se huicatl para ma huicaca quema nopa  
tlanahuatijquetl mosihuajtía*

<sup>1</sup> Notlalnamiquilis temitoc ica camanali catli  
yejyectzitzti.

Niquijcuilos ni huicatl para ma tijhuicatica tot-  
lanahuatijca.

Tlahuel nijnequi nitepohuilis ni huicatl catli ni-  
jsencajtoc, huan ya ni quijtohua:

<sup>2</sup> Ta más tiyejyectzi tlen nochi sequinoc  
telpocame,

huan yejyectzi catli tiquijtohua,  
pampa Toteco Dios mitztiochijtoc para nochipa.

<sup>3</sup> Ximocualtlalili momachete para titlahuilanas,  
ta catli nelía amo timajmahui.

Nelía tinesi tiyejyectzi pampa ta titlanahuatijquetl  
catli más hueyi.

<sup>4</sup> Xicahuayoylejco huan xitlatlaniti ica nochi mo-  
hueyitisilis.

Ta tiquinmanahuía catli teicneltzitzti huan catli  
quichihuaj catli melahuac.

Titetlajtolsencahua xitlahuac.

Nelía huejhueyi tlamantli tijchihua.

<sup>5</sup> Tlatentili nopa cuatlamintli catli tijhuica,  
huan quinajsis ininyoltipa mocualancaitacahua  
quema tiquinmelactlachilis,  
huan tiquinmajcahuilis.

Ma huetzica moicxitla nochime tlen campa hueli  
tlalme campa quintlepanitaj teteyome.

<sup>6</sup> Toteco Dios, titlanahuatis para nochipa huan  
amo quema tlamis.

Quena, motlanahuatilis elis senquistoc xitlahuac.

<sup>7</sup> Tiquicnelía catli melahuac huan tijcualancaita  
catli amo cuali.

Yeca Toteco Dios, yaya catli moTeco mitztequitlal-  
ijtoc titlanahuatijquetl,  
huan mitzmacatoc más paquelistli huan más  
tlatlepanitacayotl,  
que nochí sequinoc tlanahuatiani.

<sup>8</sup> Nochí moyoyo mijyotía ica nopa tlaajhuiyacayotl  
mirra, áloe huan canela.

Huan mitzpaquilmismacaj ica tlatzotzonali nepa  
ipan mochaj campa quiyeyectlalijtoque  
nochí tlapepecholi ica tlamantli catli  
tlahuel yejyectzitzí huan pajpatiyo.

<sup>9</sup> Iniichpocahua sequinoc tlanahuatiani quipiyaj  
nopa hueyi tlatlepanitacayotl para  
mitztequipanose.

Huan ica monejmac mosehujtoc nopa ichpoca  
tlanahuatijquetl catli elis mosihuá catli  
quiyectlalijtoque ica oro catli onca tlali Ofir.

<sup>10</sup> Xijtlacaquila ichpocatl.

Quena, xijtlacaquila cuali, nocone,  
catli nimitzilhuis:

“Ayacmo xiquintoquili motatahua,  
moicnihua huan nochí catli timomajtoya tijchi-  
hua.

<sup>11</sup> Nopa tlanahuatijquetl tlahuel mitzcualita,  
huan nelía paqui ica moyejyejca.

Huajca monequi tijneltoquilis pampa ama ya  
moTeco.

<sup>12</sup> Hualase mitz Paxaloquij iichpocahua nopa  
tlanahuatijquetl tlen altepetl Tiro.

Quena, catli más tominpixtoque ipan nopa alte-  
petl hualase huan mitztlanemactiquij.

Ya ni quichihuase pampa quinequise ximohuam-  
poxchihua ininhuaya.”

<sup>13</sup> Nopa ichpoca monamictijquetl mocuallalía  
ipan ichaj ica catli más yejyectzi.

Yaya iichpoca se tlanahuatijquetl huan ama  
mocuilis ne tlanahuatijquetl catli hueyi.

Onpano yejyectzi nopa ichpocatl ica iyoyo catli  
nelcuajcualtzi catli tlajtzontli ica oro.

<sup>14</sup> Quena, yejyectzi quiyoyontijtoque ica iyoyo tla-  
jtzontli huan ama quihiucase iixpa nopa  
tlanahuatijquetl catli ihuaya monamictis.

Itepotzco yase iichpocapoyohua catli quinnotz-  
toc.

<sup>15</sup> Ica hueyi paquelistli calactiyohuij ipan nopa  
hueyi cali campa ichaj nopa tlanahuatij-  
quetl.

<sup>16</sup> Tlanahuatijquetl, se tonal tiquinpiyas mocone-  
hua,

huan tiquinmacas tequiticayotl para tlanahuatise  
quen mohuejcapan tatahua mitzmacaque.

Quena, teipa tiquinpiyas motelpocahua catli mitz-palehuise.  
 Huan tijchihuas ma tlana huatica hasta campa hueli techaj ipan nochil motlal.  
<sup>17</sup> Huan na ica ni huicatl catli niquijcuilojtoc para ta,  
 Toteco Dios, quichihuas para masehualme ma mitzelnamique se sen xihuitl catli pantiyas.  
 Quena, masehualme ipan tlen hueli tlali camanal-tise para nochipa tlen nopa huejhueyi tlamantli catli ta tijchijqui.

## 46

### *Tiütztoque imaco Toteco Dios*

- <sup>1</sup> Toteco Dios ya totlamahanuijca huan tochic-ahualis.  
 Nimantzi techpalehuía quema onca tlaohuijcay-otl.
- <sup>2</sup> Yeca amo timajmahuise masque ni tlaltipactli tlamisosolihuis,  
 huan masque misahuise tepeme hasta itzintla nopa hueyi atl.
- <sup>3</sup> Ma tlacomonijto nopa hueyi atl huan ma posoni miyac.  
 Ma mojmolinica tepeme, pero amo nechmajmatis.
- <sup>4</sup> Oncas se atlajtli catli quinmacas paquelistli ini-juanti catli itztose ipan ialtepe Toteco.  
 Huan nepa campa más tlatzejzeloltic itztoc Toteco Catli Más Hueyi.
- <sup>5</sup> Toteco Dios mocahua ipan nopa altepetl,  
 huan amo aqui huelis quisosolos.

Quema hualase icualancaitacahua,  
Toteco Dios amo huejcahuas, nimantzi quipale-  
huis ialtepe.

<sup>6</sup> Masque tlahuejchihuaj masehualme ipan campa  
hueli tlalme catli amo quiiximatiij Toteco,  
huan masque tlanahuatiani huan ininmasehual-  
hua tzajtzij ica cualantli,  
amo tleno hueli quichihuase.

Quema Toteco Dios camanaltis,  
quicaquise itoscac catli caquisti quen tlatomoni,  
huan inijuanti motlancuaquetzase iixpa ica maj-  
majtli.

Huan ica icamanal ni tlaltipactli atiyas.

<sup>7</sup> TOTECO Catli Quinyacana Itequihuajcahua Ma  
Tlatlanitij itztoc tohuaya.

Yaya catli techmocuitlahuía ama,  
yaya iTeco tohuejcapan tata Jacob catli huejcajya  
itztoya.

<sup>8</sup> Xihualaca xiquitaquij nochí nopa huejhueyi tla-  
mantli catli TOTECO quichijtoc.

Quitlamisosolojtoc tlaltipactli huan ama tlatzitzi-  
catoc mocajqui.

<sup>9</sup> Yaya quiquetza nochí tlahuilancayotl hasta  
campa ontlantoc nochí tlaltipactli.

Quipostectoc nochí cuahuitoli huan quisosolo  
nochí tlamantli para ica tlahuilanase mase-  
hualme.

Huan quintlatijtoc nochí tlahuilanca carros.

<sup>10</sup> Huan yaya quijtohua:  
“Ayacmo ximolinica.

Ximomacaca cuenta para na niamoTeco Dios.  
Na niquinnahuatía nochí masehualme ipan  
campa hueli tlali.

Nochi catli itztoque ipan ni tlaltipactli nechhuey-itlalise."

<sup>11</sup> Itztoc tohuaya TOTECO Catli Quinyacana Itequi-huajcahua Ma Tlatlanitij.

Yaya catli iTeco tohuejcapan tata Jacob catli huejcajya itztoya, yaya catli techmocuitlahuía ama.

## 47

*Toteco Dios yaya nopa Tlanahuatijquetl tlen  
nochi ni tlaltipactli*

<sup>1</sup> Nochi anmasehualme ximomatla tlaxcaloca.

Xijpaquilismacaca Toteco Dios huan xihuicaca chicahuac.

<sup>2</sup> Pampa TOTECO yaya catli más hueyi huan temajmati.

Yaya nopa hueyi tlanahuatijquetl catli quinahuatía nochi ni tlaltipactli.

<sup>3</sup> Quintzontlamilti pilaltepetzitzí toixpa huan quitlalijtoc nochi tlalme tomaco para tiquinnahuatise.

Yeca tojuanti tlahuel tipaquij.

<sup>4</sup> Yaya quitlapejpenijtoc ni tlali para techaxcatis.

Techmaca catli más cuali pampa techicnelía tojuanti tiimasehualhua.

<sup>5</sup> Toteco Dios tlejcotoc campa tlanahuatía.

Nochi tzajtziyayaj ica paquilstli huan tlapitzayayaj ica tlapitzali quema TOTECO calaquiyyaya.

<sup>6</sup> Xihuicaca tiohuicatl para ma tijpaquilismacaca Toteco Dios.

Xihuicatica pampa yaya totlanahuatijca.

- <sup>7</sup> Toteco Dios, yaya nopa tlanahuatijquetl catli quinahuatía nochí ni tlaltipactli.  
 Xijcualtlalica se huicatl catli yejyectzi huan xijhuicatica.
- <sup>8</sup> Toteco Dios mosehuijtoc ipan isiya tlatzejtzelotic,  
 huan tlanahuatía ipan nochí tlalme.
- <sup>9</sup> Nopa huejhueyi masehualme catli quipiyaj tlanahuatili ipan campa hueli tlali ipan ni tlaltipactli mosansejcotiláj tohuaya.  
 Quinequij para ma san sejco tijhueyichihuase Toteco Dios,  
 yaya catli iTeco Abraham catli huejcajya itztoya.
- <sup>10</sup> Iaxca ya nochí tlanahuatiani huan ininsoldados campa hueli ipan tlaltipactli,  
 huan inijuanti quihueyitlepanitaj.

## 48

### *Sion, ialtepe TOTECO*

- <sup>1</sup> ¡Tlahuel hueyi TOTECO!  
 Quena, quinamiqui para tijpaquilismacase Toteco Dios catli itztoc ipan ialtepe huan ipan itepe catli tlatzejtzelotic.
- <sup>2</sup> Nelía yejyectzi nopa tepetl Sion huan ijcatoc tlahuejcapa ipan nopa altepetl.  
 Nopona mosehuúa Jerusalén, ialtepe Toteco Dios, nopa hueyi tlanahuatijquetl.
- <sup>3</sup> Toteco Dios iseltzi itztoc ipan nopa huejcapantic cali campa monequi moquetzas catli tlachixtoc para quimanahuis altepetl Jerusalén.

Tenextilijtoc para yaya catli quimanahuía huan  
quimocuitlahuía.

<sup>4</sup> Tlanahuatiani tlen campa hueli itztoque ipan  
ni tlaltipactli mosentilijque para san sejco  
quihiulanase nopa altepetl.

<sup>5</sup> Pero quema quiitaj ajqueya quimocuitlahuía  
nopa altepetl huan para nelía hueyi ichic-  
ahualis,  
momajmatíaj.

Huan nimantzi cholojtehuaj huan mocuepaj  
campa hualajtoque.

<sup>6</sup> Quena, quinitzquía se majmajtli huan nelía tlai-  
jiyohuíaj,  
quen se sihuatl quema conepiya,

<sup>7</sup> o quen se ajacatl chicahuac catli quinsosolohua  
nopa huejhueyi barcos catli hualahuij tlali  
Tarsis.

<sup>8</sup> Ipa tijcactoche quenicatza TOTECO quimocuit-  
lahuía ialtepe,  
huan ama tiquitztoque.

Quena, nopona itztoc TOTECO Catli Quinyacana  
Itequihuajcahua Ma Tlahuilanatij.

Quitlalijtoc para ialtepe Jerusalén ma huejcahuas  
para nochipa.

<sup>9</sup> Toteco Dios, quema tiitztoque ipan motiopa,  
tiqueLNamiquij huan timonejnehuilíaj quenicatza  
techicnelía.

<sup>10</sup> Toteco, campa hueli masehualme mitzpaquilis-  
macaj,

pampa quicactoche quenicatza mohueyitilis.  
Quicactoche hasta campa ontlami tlaltipactli.

Huan quimatij para ica mohueyi chicahualis titetlajtolsencahua xitlahuac.

**11** Huajca ma paquica nopa masehualme ipan tepetl Sion.

Ma huitonica ica paquelistli nochí catli ehuaj ipan altepeme tlen tlali Judá pampa cuali huan xitlahuac titetlajtolsencahua.

**12** Nochi amojuanti catli animasehualhua Toteco Dios,

xiyaca xijyahualotij nopa altepetl Jerusalén,  
huan xijpohuaca quesqui tepancali huejhueyi quipiya campa soldados tlamocuitlahuíaj.

**13** Xijtlachilitij nopa hueyi ichaj nopa tlanahuatijquetl,

huan ximomacaca cuenta quenicatza tlatzajtzac-toque huan quiyectlalijtoque,  
para quej nopa huelis anquinpohuilijtiyase amoteipan ixhuihua.

**14** Pampa ni Toteco Dios, yaya elis toDios para nochipa,

huan amo quema tlamiche ichicahualis.

Yaya techyacanas mojmostla hasta más nepa quema ya timictose.

## 49

*Quichihuaj se huihuiyotl catli motemachíaj ipan inintomi*

**1** Cuali xijtlacaquilica ya ni,  
amojuanti catli campa hueli anitztoque ipan ni tlaltipactli.

**2** Nocamanal elis para nochime.

Elis para catli tominpixtoque huan para catli teicneltzitzti.

Elis para catli quipiyaj tequiticayotl huan para  
catli amo quipiyaj tequiticayotl.

Huajca xijtlacaquilica.

<sup>3</sup> Nicamanaltis ica tlalnamiquilistli.

Nimechpohuilis nochí catli nimonejnehuilijtoc  
ipan noyolo.

<sup>4</sup> Achtihui nimechilhuis se tlatzintoquili catli tot-  
lalnamijca huejcapan tatahua quijtojque,  
huan nitlatzotzonas ica se arpa huan nihuicas  
para nimechmatiltis tlaque quinequi quijj-  
tos:

<sup>5</sup> ¿Para tlen monequi nimomajmatis quema hualas  
tlaohuijcayotl,  
huan quema nopa tlajtlacolchijca masehualme  
catli nechcualancaitaj hualase  
nechyahualoquij?

<sup>6</sup> Inijuanti motemachiyaj ipan inintomi,  
huan mohueyimatij pampa quipiyaj miyac tla-  
mantli catli pajpatiyo.

<sup>7</sup> Pero niyon se tlen inijuanti amo huelis mo-  
maquixtis tlen itlajtlacolhua,  
niyon amo huelis quimaquixtise se iniicni.

Amo aqui huelis quitlaxtlahuis Toteco Dios para  
ma quimaquixtis.

<sup>8</sup> Pampa tonemilis eltoc se tlamantli catli miyac  
ipati.

Amo onca niyon se tomi ipan nochí tlaltipactli  
catli ica huelis moixtlahuas.

<sup>9</sup> ¡Amo! Amo aqui huelis quicohuas inemilis para  
itztos para nochipa huan para amo quema  
miquis.

<sup>10</sup> Nochi masehualme miquise.

Catli tlalnamiquij huan catli mohueyimatij,

huan nojquiya nochí catli huihuitique,  
san se ininpantis.

Mictehuaj huan quicajtehuaj nochí catli pajpatiyo  
quipiyayabaj.

Huan sequinoc moaxcatise.

<sup>11</sup> Inijuanti moilhuáj itztose para nochipa,  
yeca quicualtlalíaj ininchajchaj huan quitlalíaj in-  
intoca ipan inintlal,  
quen elisquía iniaxca para nochipa.

<sup>12</sup> Pero se masehuali amo huejcahuas masque  
nelía tominpixtoc,  
pampa nojquiya miqui san se quen se cuatitlan  
tlapiyali.

<sup>13</sup> Nochi masehualme catli motemachijtoque san  
ipan ininseltzitzi,  
quipantise miquilistli.

Huan nojquiya miquise nopa masehualme catli  
quintoquilíaj huan quihueyitlalíaj ininca-  
manal.

<sup>14</sup> Nopa masehualme miquise quen miquij borre-  
gojme.

Quena, miquilistli quinchiya nochime.

Pero se tonal nopa masehualme catli itztoque xit-  
lahuaque iixpa Toteco Dios quinnahuatise  
masehualme catli amo cuajcualme.

Quej nopa elis quema ya palantose inintlacay-  
ohua nopa masehualme ostojitic.

Huajca quena, ipan nopa tonali nopa tominpiyani  
quicajtejtose huejca ininchajchaj catli  
yejyectzitzi.

<sup>15</sup> Pero Toteco Dios nechmaquixtis tlen  
ichicahualis miquilistli huan nechhuicas  
ihuaya.

- <sup>16</sup> Amo ximotequipacho sintla se masehuali mori-cojchihua,  
huan mojmostla más quiyecchijchihua ichaj.
- <sup>17</sup> Pampa quema miquis amo tleno huelis qui-huicas.  
¡Amo! Quema quitemohuise itlacayo ostojitic,  
niyon quentzi catli yejyectzi quipixqui amo huelis  
yas ihuaya.
- <sup>18</sup> Masque se masehuali itztos ica paquilibrium  
quema noja yoltoc,  
huan sequinoc quitlepanitase pampa moricojchi-jtoc,
- <sup>19</sup> ajsis se tonal quema miquis quen ihuejcapan  
tatahua,  
huan ayacmo quema quiitas tlahuili.
- <sup>20</sup> Se masehuali catli moricojchijtoc,  
pero amo quielnamiqui para amo huejcahuas in-emilis ipan ni tlaltipactli,  
mictehuas san se quen se cuatitlan tlapiyali.

## 50

*Toteco Dios techilhuía quenicatza ma-tijhueyichihuaca*

- <sup>1</sup> Yaya TOTECO Catli Más Quipiya Chicahualistli  
que nochí catli quintocaxtiaj dioses,  
quinnnotztoque nochí masehualme catli itztoque  
campa hueli ipan ni tlaltipactli.  
Quinnotza catli itztoque hasta campa hualquisa  
tonati huan hasta campa oncalaqui.
- <sup>2</sup> Toteco Dios ica iyejyejca petlani huan tlahuía tlen  
Sion,  
nopa tepetl campa ijcatoc icaltiopa catli senquis-toque yejyectzi.

<sup>3</sup> Toteco Dios hualas ica chicahualistli,  
huan iixpa hualas se hueyi tlitl catli quisosolojti-  
hualas nochí catli quipantis.

Tlatomonilotl huan tlapetlanilotl quiyahualohua.

<sup>4</sup> Toteco Dios quinnotza nochí catli itztoque ipan  
ilhuicactli huan ipan tlaltipactli,  
para ma quihualtlachilica quenicatza quintlaj-  
tolsencahuas imasehualhua.

Quiijtohua:

<sup>5</sup> “Xiquinsentilica nomasehualhua catli moiyoca-  
cajtoque noca na.

Quena, ma hualaca nochí injuanti catli quichij-  
toque camanal sencahuali nohuaya,  
quema nechmacaque tlacajcahualistli huan quijj-  
toque para nechtoquilisquíaj.”

<sup>6</sup> Nochi ilhuicactli tepohuilía para Toteco Dios itz-  
toc xitlahuac.

Huan para yaya nopa juez catli tetlajtolsencahuas.

<sup>7</sup> “Xijtlacaquilica nochí annomasehualhua,  
xijcaquica nochí catli niquistos.

Nimechtelhuis tlamiyacapa ica nochí tlamantli  
catli anquichijtoque,

pampa na niDios huan niamoTeco.

<sup>8</sup> Amo nimechajhuas pampa amo antechmacaj  
tlacajcahualistli,

niyon pampa amo anquinmictíaj tlapiyalme huan  
anquintlatíaj noixpa,

pampa quena, ya nopa anquichihuaj.

<sup>9</sup> Pero amo ya nopa catli nijnequi.

Para na amo monequi techmacaca tlacajcahual-  
istli,

quen becerros huan oquich chivojme catli  
hualahuij amopotrero.

<sup>10</sup> Pampa na noaxcahua nochi tlapiyalme ipan  
cuatitlamitl huan nochi huacaxme catli  
campa hueli tlacuajtinemij ipan senquistoc  
noch i tlachiquilme.

<sup>11</sup> Niquiniximati nochi totome campa hueli  
huan nochi tlapiyalme catli nemij cuatitla,  
pampa noaxcahua.

<sup>12</sup> Sintla nimayanásquia, amo nimechtlajt-  
lanisquia techtlamacaca,  
pampa ni tlaltipactli huan nochi catli eltoc ipani  
noaxca.

<sup>13</sup> ¿Anmoilhuíaj nimotlamaca ica torojme inin-  
nacayo,  
huan niquiji inieso oquich chivojme?

¡Amo!

<sup>14</sup> Nijnequi techtlascamatilica ica nochi catli  
nimechchihuilá huan ya nopa niquitas  
quen se tlacajcahualistli.

Xijtlamichihuaca nochi catli anquijtojtoque para  
anquichihuase.

<sup>15</sup> Huan technojnotzaca quema anmotequipa-  
chohuaj,

huan na nimechmanahuis huan amojuanti an-  
technextilise miyac tlatlepanitacayotl."

<sup>16</sup> Pero Toteco quinilhuía masehualme catli amo  
cuajcualme:

"Amo anquipiyaj tequiticayotl para ancamanal-  
tise tlen nopa camanal sencahualli,  
catli quiijtohua catli nimechmacas,  
niyon amo hueli antepohuilise notlanahuatilhua.

- 17** Pampa amo anquicaquij quema nimechtlac-ahualtía,  
niyon amo anquichihuiláj cuenta nocamanal.
- 18** Quema anquiitaj se tlachtejquetl,  
anmohuampoxchihuaj ihuaya,  
huan nojquiya anmohuicaj inihuaya catli  
quichijtinemij tlen hueli ica catli amo  
ininnamic.
- 19** San campa hueli anquicalaquijtinemij  
amonenepil para anquijtose catli fiero.  
Nimantzi anistlacatij.
- 20** Anmosehuíaj huan anquitelhuíaj se catli  
amonelicni.  
Quena, yaya catli nojquiya icone amonana huan  
san sejco anmoscaltijque,  
anquitlaijilhuíaj.
- 21** Nochi ya ni anquichijtoque,  
huan na amo tleno niquijtojtoc.  
Huajca anmoilhuijtoque para na nieli san se quen  
amojuanti.  
Pero ama nimechixcoilhuis nochi catli anquichij-  
toque,  
huan nimechpannextilis nochi.
- 22** Xijtlacaquilica ya ni,  
amojuanti catli antechelcahuaj na, niamoteco  
Dios.  
Sintla amo antechelnamiquij,  
nimechhuejhuelos huan amo aqui itztos catli  
huelis anmechmanahuis nomaco.
- 23** Pero quema antechtlascamatij ica nochi catli  
nimechchihuilía,  
eltoc quen se tlacajcahualistli catli nechnextilía  
antechtlepanitaj.

Huan nopa masehuali catli monejnehuilía campa  
 mocuapolojtoc,  
 huan mocuepa ipan noojhui catli xitlahuac,  
 na nijmaquixtis.”

## 51

### *Se netlatlajtili para Toteco ma quitlapojpolhui*

- 1 ¡Ta, tinoTeco Dios catli techicnelía,  
 nimitztlajtlanía xijpiya hueyi moyolo ica na!  
 ¡Techtlasojtla ta catli tijpiya miyac motlaicnelilis  
 huan techtlapojpolhui nochí notlaixpanol-  
 hua!
- 2 ¡Techpajpaca huan techquixtili ni notlajtlacol para  
 sempa nielis nitlapajpactic!
- 3 Pampa ya nimomamacac cuenta para nelía nitlajtla-  
 colchijtoc moixpa.  
 Huan san ya nopa nimosenilhuijtoc nochipa.
- 4 San ica ta nitlajtlacolchijtoc.  
 Quena, san ica ta nijchijtoc ni hueyi tlajtlacoli catli  
 ta amo tijnequi tiquitas.
- 5 Ta tiquitac nochí catli nijchijqui huan xitlahuac  
 techtlajtolsencajtoc.
- 6 Pero na ipa nitlajtlacolchijquetl hasta quema  
 nitlacatqui.  
 Quena, ipa nitlajtlacolchijca masehuali hasta  
 quema pejqui nimoscaltía iijtico nonana.
- 7 Ta tijnequi se masehuali ma mitztlepanita ipan  
 iyolo;  
 tijnequi ma tijchihuaca san catli melahuac.  
 Techchihua na ma nijmati motlalnamiquilis hasta  
 campa más tlatzintla ipan noyoltipa.
- 8 Xiquijtzelo nopani nopa estli catli tetlapajpacchi-  
 hua,

huan quej nopa nimocahuas nitlapajpactic.  
 Quena, techpajpaca, huan nimocahuas onpano  
 nichipahuac moixpa.

<sup>8</sup> Huan teipa quema ya techtlatzacuiltijtos,  
 xijchihuas para sempa ma niyolpaqui.

Huan elis quen sempa moyancuilise noomiyohua  
 catli tijtlatixchijtoc.

<sup>9</sup> Amo xisenhuiquili xijtlachilijo notlajtlacolhua.  
 Xiquixpolo tlen moixtla nochi catli amo cuali ni-  
 jchijtoc.

<sup>10</sup> NoTeco Dios, xijchihua para noyolo ma eli yan-  
 cuic huan tlapajpactic.

Xijchihua para ma nimonejnehuilis san ipan tla-  
 mantli catli cuali,  
 huan para ma njnequis nijchihuas san catli xit-  
 lahuac.

<sup>11</sup> Amo techiyocacahua tlen ta moixtla,  
 niyon amo techquixtili moTonaltzi catli tlatze-  
 jtzeloltic.

<sup>12</sup> Xijchihua para sempa ma njmati nopa  
 paquilstli catli nijpixqui pampa ta  
 techmaquixti.

Ica moTonaltzi techchihua para nochipa ma ni-  
 jnequis nimitzlepanitas.

<sup>13</sup> Huan huajca niquinnextilis moojhui sequinoc  
 tlajtlacolchihuani catli tlaixpanotoque  
 quen na.

Huan tlajtlacolchihuani moyolcuepase huan  
 hualase campa ta.

<sup>14</sup> Toteco Dios, ta catli techmaquixtía,  
 techmanahui tlen ni tlaeticayotl catli nijpiya  
 pampa nitemicti.

Huan huajca nihuicas tiohuicatl para niteyolmehahuas para ta tijchihua catli senquistoc xitlahuac.

**15** Toteco, xijchihua para sempa ma nihuica, huan nitepohuilis nochí catli techchihuilijtoc huan na nimitzpaquilismacas.

**16** Pampa ta amo tijnequi ma nimitzmacas tlacajcuhualistli para techtlapojojpolhuis.

Sintla quej nopa elisquía, huajca ica paquelistli nijchihuasquía.

Pero amo mitzpactía ma niquintlali tlapiyalme ipan tlaixpamitl para niquintlatis moixpa, quen se tlacajcahualistli tlatlatili.

**17** Ta tijnequi ma nimoyolcoco, huan ma nimotequipacho ica nochí catli amo cuali nijchijtoc, huan ma nimoyolcuepa.

Quena, nopa masehuali catli moechcapantlalía huan moyolcuepa, ta tinoTeco Dios, temachtli tijtlacaquilía huan amo tijhuejcamajcahua.

**18** Huan, Toteco, amo xijtlatzacuilti altepetl Sion por notlajtlacolhua.

Ta xiquinpalehui momasehualhua huan xijmocuitlahui moaltepe Jerusalén.

**19** Huan quema noyolo ya eltos xitlahuac moixpa, tipaquis ica catli cuali nijchihuas.

Huan tijselis nochí tlacajcahualistli quema niquinhuicas torojme para niquinmictis, huan nimitzmacas ipan motlaixpa.

## 52

*Toteco tetlasoxtla huan tetlajtolsencahua*

<sup>1</sup> ¡Xijtlacaquili ta catli timoilhuía para tlahuel ti-hueyi!

¿Para tlen timohueyimati ica catli fiero tiquinchihuili imasehualhua Toteco Dios?

Toteco Dios quipixtoc itlaicnelilis para nochipa.

<sup>2</sup> Pero ta nochipa timonejnehuilí san catli fiero tiquinchihuilis sequinoc.

Huan nochí istlacatili catli quisa mocamaco eli quen se cuchillo catli tlahuel tlatequi.

<sup>3</sup> Achi más mitzpactía tijchihuas tlen fiero huan amo catli cuali.

Huan nojquia achi más mitzpactía istlacatili huan amo catli melahuac.

<sup>4</sup> Mitzpactía titeistlacahuis.

Huan mitzpactía tiquijtos camanali catli tecocohua.

¡Tiistlacatica tlacatl!

<sup>5</sup> Yeca Toteco Dios mitztzontlamiltis para nochipa.

Mitzhuahuatatzas para mitzquixtis tlen mochaj, huan ayacmo tiitztos ipan ni tlaltipactli campa itztoque masehualme.

<sup>6</sup> Nochi masehualme catli quitlepanitaj Toteco, quiitase catli yaya quichihuilis nopa fiero masehuali,

huan momajmatise.

Huajca inijuanti quihuetzquilise huan quijtose:

<sup>7</sup> “Xiquitaca catli ipantic ne masehuali catli amo quitlepanita Toteco Dios.

San motemachi ipan itomi huan nochí tlamatli pajpatiyo catli yaya quipiya,

huan quichijtenenqui catli amo cuali.”

<sup>8</sup> Pero na cuali nijcatoc quen se olivo cuahuitl,

huan Toteco nechyahualohua para nechmocuitlahuis.

Na nimotemachía ipan Toteco para yaya ma nechtlasojtlnochipa.

<sup>9</sup> NoTeco Dios, na nochipa nimitztlascamatis por nochí nopa cuali tlamanli catli tijchijtoc.  
Huan san ipan ta nimochiyas para techtlasojtlas, pampa nochí quimatiq para ta nelía tijpiya hueyi moyolo ica catli moaxcahua.

## 53

### *Masehualme catli huihuitique*

<sup>1</sup> San se masehuali catli tlahuél huihuitic moilhuisquía ipan iyolo para amo onca Dios.

¿Para tlen quej nopa quiijitosquía?

Eltoc pampa iyolo tlahuél fiero huan san quichihua catli amo cuali.

Amo aqui se masehuali catli quichihua catli nelxitlahuac.

<sup>2</sup> Toteco Dios hasta nepa ilhuicac quinhualtlachilía masehualme, para quiitas sintla onca se catli nelía quitemohua huan quichihua catli cuali.

<sup>3</sup> ¡Pero amo!

Nochi masehualme mocueptoque ipan tlajtla-colotl.

Quena, nochi tlajtlacolchijtoque huan moijsacotoque.

Amo aqui quichihua catli senquistoc cuali, niyon se.

<sup>4</sup> ¿Atlac amo quipiyaj inintlalnamiquilis nopa tlajtlacolchijca masehualme?

Inijuanti quintzontlamiltíaj momasehualhua  
quen elisquiáj pantzi catli quicuaj huan  
amo quinequij quitemose Toteco Dios.

<sup>5</sup> Pero ajsis tonali quema Toteco Dios  
quinpinahualtis huan quintlatzacuiltis  
nopa masehualme.

Quena, quintzontlamiltis huan inintlacayohua  
mocahuase tepejtoque campa hueli.

Amo aqui quintalpachos pampa yaya quint-  
lahuelcajtoc.

<sup>6</sup> ¡Cuali elisquiá sintla Toteco hualasquiá tlen al-  
tepetl Jerusalén huan quinmaquixtis nochí  
israelitame!

Israelitame san huelis itztose ica paquillistli  
quema Toteco Dios quichihuas para  
inijuanti catli imasehualhua ma tlatlanica.

## 54

*Se netlatlajtili para Toteco ma quimanahui tlen  
icualancaitacahua*

<sup>1</sup> ¡NoTeco Dios, xihuala techmaquixtiqui pampa  
nochí quimatiј ta tihueyi!

¡Techmanahuiqui ica mohueyi chicahualis!

<sup>2</sup> Techtlacaquili quema nimotlatlajtía ica ta.

Quena, xijtlacaquili catli nimitzpohuilía,

<sup>3</sup> pampa tlahuilanca masehualme motlanantoque  
ica na.

Quena, masehualme catli amo quema mitzel-  
namiquij nechtemohuaj para nechmictise.

<sup>4</sup> Pero Toteco Dios nochipa nechpalehuía,  
huan amo quincahuilis ma nechmictica.

<sup>5</sup> Toteco quincuepilis nocualancaitacahua nochí nopa tlamatli amo cuál catli inijuanti quisencajtoque nechchihuilise.

Quena, TOTECO, ta catli nelía titemachtli, xijchi-hua senquistoc quen techtencahuilijtoc, huan xiquintzontlamilti nochí nocualancaitacahua.

<sup>6</sup> Ica paquelistli nimitzmacas notlacajcahualis.

Nimitzhueyimatis pampa ta nelía ticuali,

<sup>7</sup> pampa ta techmanahuijtoc tlen nochí tlaohuij-cayotl,

huan niquitztoc quenicatza tiquntlantoc nochí nocualancaitacahua.

## 55

*Se netlatlajtili tlen se masehuali catli quicaj-cayajqui ihuampox*

<sup>1</sup> NoTeco Dios, techtatlacaquili quema nimotlatlajtía ica ta.

Amo ximotlati quema nimitztzajtzilía.

<sup>2</sup> Techtlacaquili huan technanquili, pampa tlahuél nimotequipachohua huan nichoca pampa nitlaijiyohuía.

<sup>3</sup> Nocualancaitacahua nechtzajtzilíaj chicahuac huan quinequij nechmictise.

Tlahuel nechcualancaitaj huan ica nochí inincualancayo nechtepotztocatihuahuij para nechtzontlamiltise.

<sup>4</sup> Nelía nechcocohua noyolo pampa nechitzquía se hueyi majmajtli.

<sup>5</sup> Quena, tlahuél nimajmahui huan nihuihuipica.

- <sup>6</sup> ¡Cuali elisquía sintla nijpiyasquía noeltlapal quen  
      quipiya se paloma para huelisquía nipat-  
      lantehuasquía huan nimosiyajquetzati!
- <sup>7</sup> Quena, nicholosquía hasta nepa campa huactoc  
      tlalme catli mopantíaj huejca huan nepa  
      nimocahuasquía.
- <sup>8</sup> Nimoisihuiltisquía para nicholos huan  
      nimotlatis tlen nochí ni tlaijiyohuilistli  
      catli hualajtoc nopani.  
Eltoc quen se hueyi ajacatl hualajtoc catli tlamit-  
      lasosolohua.
- <sup>9</sup> Toteco, xiquintzontlamilti nocualancaitacahua.  
Xijchihua ma mocuapoloca inijuanti ininseltzitz  
      quema camanaltij.  
Na niquitztoc para nochí tlahuilanaj campa hueli  
      ipan ni moaltepe.
- <sup>10</sup> Tlayohua huan tonaya masque itztoque catli  
      quiyahualojtinemij ni altepetl ipan itepa  
      para quimocuitlahuise tlen tocualancaitac-  
      ahua,  
inijuanti catli nica ehuani ininseltzitz  
      mohuilanaj se ica seyoc ipan ni altepetl.
- <sup>11</sup> Tlatlajco nopa altepetl quichihuaj miyac tla-  
      mantli catli amo cuali,  
huan amo onca tlatlepanitacayotl.  
Ipan tianquis huan campa hueli momictíaj,  
tlachtequij huan tlacajcayahuaj.
- <sup>12</sup> Amo elqui se nocualancaitaca catli nechcay-  
      cayajqui,  
pampa sintla quej nopa eltosquía, huajca niquijiy-  
      ohuijtosquía.  
O hueltosquía nimotlatis huan nicholos.
- <sup>13</sup> Pero elqui se catli nemiyaya nohuaya,

se catli nechyacanayaya huan catli nonelhuampox.

<sup>14</sup> Quena, elqui yaya catli sentic timopohuiliyaj nopa tlamatli catli tijpixtoyaj ipan toyolo, huan yejyectzi timocamanalhuiyayaj quema san sejco tiyohuiyayaj ipan mochaj, Toteco Dios.

<sup>15</sup> Ma tlatoocmiquica nochi nocualancaitacahua huan ma yaca hasta mictla quema noja yoltoque, pampa ipan ininchaj huan ipan ininyolo san onca tlajtlacolotl.

<sup>16</sup> Pero na san nijtzajtzilis Toteco Dios para ma nechmaquixti.

Huan quena, temachtli yaya nechmaquixtis.

<sup>17</sup> Na nimotlatlajtis ica ijnaloc, ica tlajco tona huan ica tiotlac.

Huan yaya nechtlacaqulis huan nechnanquilis.

<sup>18</sup> Ipan tlahuilancayotl yaya nechmanahuis, masque tlahuel miyac nocualancaitacahua nechhuilanase chicahuac.

<sup>19</sup> Toteco Dios catli ipa itztoc huan tlanahuatijtoc hasta tlen huejcajya,

yaya nechtlacaqulis huan quintzontlamiltis.

Pampa nocualancaitacahua amo quipatlaj inin-nemilis catli fiero,

niyon amo quitelepanitaj itlanahuatil.

<sup>20</sup> Nopa masehualme catli amo cuajcualme momatlananaj para quinhuilanaj hasta inin-huampoyohua.

Quiixpanoj nopa camanali catli quichihuaj inin-huaya sequinoc.

**21** Quitequihuíaj camanali catli nelyejectzi huan  
yamanic quen mantequilla,  
pero ipan ininyolo san moilhuiáj quenicatza  
tlahuilanase.

Nochi catli quijtohuaj eltoc alaxtic quen aceite,  
pero ichtacatzi teyolcocohuaj ica camanali quen  
quema timotzontequis ica machete.

**22** Nochi motequipachol xijcahua imaco TOTECO  
huan yaya mitzmacas temachili.

TOTECO amo quicahuas ma huetzi se catli  
quitlepanita.

**23** Pero ta tinoTeco Dios,  
tiqquintilanis nocualancaitacahua ipan nopa os-  
totl catli tlahuel huejcatla.

Nopa temictiani huan istlacatini amo itztose  
niyon tlajco tlen inninemilis,  
pampa amo huejcahuase itztose ipan ni tlalti-  
pactli.

Pero na nochipa nimotemachis ipan ta para tech-  
maquixtis.

## 56

### *David motlatlajtía ica Toteco*

**1** NoTeco Dios, techtlasoxtla,  
pampa nocualancaitacahua semilhuitl  
nechtepotzocatinemij.

Nochi se tonal nechtaijiyohuiltíaj.

**2** Nochi se tonal nechcuatetzopaj huan noca  
paquij.

Tlahuel miyaqui itztoque catli quinequij necht-  
lamiltise.

<sup>3</sup> Pero quema nijmati nimajmahui, na nimotemachía ipan ta.

<sup>4</sup> Nijhueyichihua Toteco Dios huan nimotemachía ipan ya para nechmanahuis quen techtlajtolcahuilijtoc quichihuas ipan icamanal.

Huajca pampa nimotemachía ipan ya,  
¿tlaque huelis nechchihuilis se masehuali?

<sup>5</sup> Tlatocztitzi quipatlaj nocamanal huan san moilhuíaj quenicatza huelis nechchihuilise catli amo cuali.

<sup>6</sup> Mosentilíaj huan quisencahuaj tlaque nechchihuilise.

Teipa motlatíaj ojteno huan nechchiyaj ma nipano para nechmictise.

<sup>7</sup> Toteco Dios, xijtlachili nochí inintlaixpanolhua huan xiquintlatzacuilty.

Ica mohueyi cualancayo, xiquintlahuiso hasta tlalchi.

<sup>8</sup> Ta techitztoc quesqui hueltas nimochololtijtoc huan nimoccoquiliijtoc.

Nochi noixayo tjsentilijtoc huan ticajoctoc ipan se frasco.

Huan ipan molibro tiquijcuilojtoc quesqui imiyáca.

<sup>9</sup> NoTeco Dios, quema nimittzajtzilía para techpalehui,

nochi nocualancaitacahua nimantzi cholohuaj.

Quej nopa eli pampa cuali nijmati para ta tiitztoc nohuaya para techpalehuis.

<sup>10</sup> Na nimotemachía ipan Toteco Dios.

Quena, nimopaquilismacas ipan TOTECO ica-manal,  
por nochí catli nechtlajtolcahuilijtoc nechchihuolis.

<sup>11</sup> Quena, nimotemachía ipan Toteco Dios huan amo nimajmahui.

¿Tlaque huelis nechchihuolis se masehuali?

<sup>12</sup> NoTeco Dios, nochí catli nimitztlajtolcahuilijtoc, nijtlamichihuas.

Nimitztlascamatilis ica tiohuicatl pampa tech-palehuijtoc miyac.

<sup>13</sup> Ta Toteco Dios techmanahuijtoc para amo nim-iquis,

huan amo techcahuilijtoc ma nihuetzi ipan tlamanantli catli amo cuali.

Yeca ama noja hueli ninentinemis moixpa nica ipan ni tlaltipactli ica masehualme catli itz-tóque.

## 57

### *Se netlatlajtili para Toteco ma quipalehui*

<sup>1</sup> Techtlasojtla, noTeco Dios, xijnexti motlaicnelilis noca na,  
pampa san ipan ta nimotemachía para techmanahui.

Quen se pilpiyotzi motlatía ieltlapatzala inana,  
na nojquiya nimotlatía ipan ta hasta panos ni hueyi tlaohuijcayotl catli eltoc quen se hueyi ajacatl.

<sup>2</sup> Nijtzajtzilis Toteco Dios Catli Más Hueyi.

Quena, nijnojnotzas Toteco Dios catli nochipa nechpalehuía ipan nochí tlamanantli.

**3** Tlen ilhuicac nechtitlanilía itlapalehuil para  
nechmaquixtis.

Yaya nechchololtis ininmaco nocualancaitacahua  
catli ica miyac cualantli nechtepotzto-  
catinemij,

huan quinequij nechtzontlamiltise.

Pampa yaya Toteco Dios temachtli huan tlahuel  
nechicnelía.

**4** Nechyahualojtoque masehualme catli mosisiniáj  
quen tecuanime.

Inincamanal eltoc quen tlitl catli quisa ininca-  
maco.

Inintlancoch tlajtlatequi quen cuatlamintli huan  
ininnenenepil tlatequi quen machete.

**5** NoTeco Dios, nochi ma mitzhueyichihuaca ipan  
nochilhuicactli.

Mohueyitis ma quitemiti ni tlaltipactli.

**6** Nocualancaitacahua quitlalijtoque se tlaquetztli  
para ma nimasi,

yeca tlahuel nimajmahui.

Nojquiya quichijque se ostotl ipan ojtli para ma  
nimooostohui,

peroxiquita inijuanti huetzque nopona.

**7** NoTeco Dios, ipan noyolo nipaqui huan nijpiya  
tlasehuilistli.

Huan yeca nimocualtlalijtoc para nihuicas huan  
nisencahuas tiohuicatl para ta.

**8** Na nimocualtlalía para nijtzotzonas noarpa  
huan noguitarra.

Cualca niisa para nimitztlatzotzonilis.

**9** Na nimitztlascamatis iniixpa masehualme  
pampa ta, Toteco, techchihuilijtoc miyac  
tlamantli catli yejectzi.

Huan nihuicas para nimitzhueyimatis iniixpa masehualme tlen nochi tlalme.

<sup>10</sup> Motlaicnelijcayo nelhueyi quen ipatlajca il-huicactli huan huejcapantic hasta quionpano mixtli.

Ta tlahuel titemachtli.

<sup>11</sup> Toteco Dios, nochi ma mitzhueyichihuaca ipan nochi ilhuicactli.

Mohueyitilis ma quitemiti ni tlaltipactli.

## 58

*Se netlatlajtili para Toteco ma quintlatzacuilty catli amo tlatlepanitaj*

<sup>1</sup> ¡Amojuanti anmasehualme catli anquipiyaj tequiticayotl para antetlajtolsencahuaj!

¿Atlac nelía xitlahuac anquintlajtolsencahuaj masehualme?

<sup>2</sup> ¡Amo! San anmoilhuíaj catli fiero huelis anquichihuase.

Anquichijtoque para noja más ma onca tlahuilan-cayotl ipan amotlal.

<sup>3</sup> Nopa masehualme catli amo quitelepanitaj Toteco pejque moiycacahuaj hasta quema tlacatque.

Huan ipa istlacatij hasta quema pejque huelij camanaltij.

<sup>4</sup> Inijuanti tencocoque quen cohuame catli temictíaj ica inintencococa.

Huan itztoque quen nopa cohuame catli momatij quincaquij inintoscac inintecohua,

pero ayacmo quinequij quinneltocase.

<sup>5</sup> Monacastzacuaj huan ayacmo quichihuilíaj cuenta,

masque ininteco quintlatzotzonilíaj yejyectzi para  
 ma quinneltoquilica.  
 Huan nimantzi tetzacaníaj.  
 Quej nopa itztoque ni fiero masehualme.

<sup>6</sup> NoTeco Dios, xiquintlamiltli ininchicahualis.  
 Quena, xiquinquixtili ininchicahualis nopa mase-  
 hualme catli mosisiníaj,  
 quen tiquinquixtilisquía inintlancoch huan inint-  
 lacuajcuayo nopa tecuanime.

<sup>7</sup> Ma ixpolihuica quen ixpolihui nopa atl catli toy-  
 ahui ipan huactoc tlali.  
 Huan nopa tepostli catli quipixtoque ininmaco  
 para ica tlahuilanaj,  
 ma eli quen amo tleno ipati.

<sup>8</sup> Ma elica quen nopa cuachololojtli catli atiya  
 quemá noja nentinemi.  
 O ma elica quen se pilconetzi catli tlacatqui mictoc  
 huan catli amo quemá quiitac tlatlanextli.

<sup>9</sup> Toteco Dios quinixpolihuiltis catli huehuentzitzí  
 huan catli telpocame.

Quintzontlamiltis nelnimantzi quen se chacha-  
 pali catli nimantzi totoniya ica nopa tlilt  
 catli lementoc ica huitzcuahtlitl.

<sup>10</sup> Pero catli itztoque xitlahuaque iixpa Toteco,  
 paquise quemá quiitase para Toteco ya mo-  
 macueptoc ica nopa masehualme catli amo  
 tleno quitlepanitaj,

huan moicxipajpacase ica inieso nopa mase-  
 hualme.

<sup>11</sup> Huan huajca nochí masehualme quiijtose:

“Nelía quiselíaj se cuali tlaxtlahuili nopa masehualme catli itztoque xitlahuaque, pampa melahuac itztoc se Dios catli tetlajtolsencahua xitlahuac ipan ni tlaltipactli.”

## 59

*Se netlatlajtili para Toteco ma quimanahui David*

<sup>1</sup> ¡NoTeco Dios, techmanahui ininmaco nocualancaitacahua!

¡Techmocuitlahui tlen inijuanti catli hualajtoque para nechtzontlamiltise!

<sup>2</sup> ¡Techmanahui ininmaco tlajtlacolchijca masehualme,

inijuanti catli temictíaj!

<sup>3</sup> Nechpijpiyaj para quiitase quenicatza nechmictise.

Masehualme catli quipiyaj chicahualistli nechchixtoque yahualtic.

Pero amo pampa niquinchihuilitoc se tlamatli catli amo cuali

o pampa niquinxpanotoc.

<sup>4</sup> ¡Amo! Amo tleno catli fiero niquinchihuilitoc, pero inijuanti mocualtlalíaj para nechmictise.

¡TOTECO, xiisa!

¡Xihuala techpalehuiqui!

<sup>5</sup> TOTECO, Ta Catli Tijpiya Nochi Chicahualistli, ta catli titoDios tiisraelitame,

ximotlanana huan xiquintlatzacuilty nopa tlalme campa itztoque masehualme catli amo israelitame,

pampa techyahualojtoque.

Amo xiquintlapojpolhui nopa masehualme catli  
mosisiníaj huan nimantzi tlaixpanoj.

<sup>6</sup> Mojmostla ica tlapoyahui hualahuij para quit-  
lachilise quenicatza huelis techtlanise.

Tzajtzitinemij quen chichime catli quiyahualo-  
jtinemij ni altepetl.

<sup>7</sup> Nijcaqui camanaltij fiero hasta camaposonij,  
huan mitztelchihuaj Toteco,  
pampa inijuanti quijtohuaj:  
“Amo aqui techcaqui.”

<sup>8</sup> Pero ta TOTECO, san xiquinhuetzquili,  
huan xiquinpinahaulti ni masehualme tlen se-  
quinoc tlalme catli nechyahualohuaj.

<sup>9</sup> NoTeco Dios, pampa nocualancaitacahua  
quipiyaj chicahualistli, ipan ta  
nimotemachis,  
pampa ta catli techmanahuía.

<sup>10</sup> NoTeco Dios, ta nochipa techicnelijtoc miyac,  
yeca nijmati para temachtli techyacantiyas.  
Tijchihuas ma niquitas catli tlahuel nijnectoc ma  
ininpanti nocualancaitacahua.

<sup>11</sup> NoTeco, ta catli techmanahuía,  
amo xiquinmicti nimantzi ni nocualancaitac-  
ahua,  
pampa huelis ni nomasehualhua nimantzi quielc-  
ahuase catli ininpantis nopa mosisinijca  
masehualme.

Más cuali san xiquinsemana ica mohueyi chic-  
ahualis huan xiquinechcapantlali.

<sup>12</sup> Quena, xiquintlatzaculti pampa nochí ini-  
juanti tlahuel istlacatij, mohueyimatij huan  
tlatelchihuaj.

<sup>13</sup> Xiquintzontlamilti ica mohueyi cualancayo,

huan xiquintlamii xpolihuilty.  
 Huan quej nopa nochí masehualme quimatisé  
     para ta, Toteco Dios,  
 titlanahuatía ipan tlali Israel,  
 huan ipan nochí tlaltipactli.

<sup>14</sup> Nocualancaitacahua mocuepaj ica tiotlac huan  
     tzajtziq quen chichime,  
 huan quiyahualojtinemij ni altepetl.

<sup>15</sup> Nentinemij campa hueli para quitemojtinemise  
     inintlacualis.  
 Huan quema amo ixhuise,  
 tzajtziq seyohual quen chichime.

<sup>16</sup> Pero na sesen ijnaloc nihuicas ica nopa chic-  
     ahualistli catli techmaca.  
 Huan nimitzhueyimatis pampa techtlasojtla  
     miyac.  
 San ta techmanahuía huan san ipan ta  
     nimotemachía,  
 quema huala tlaohuijcayotl.

<sup>17</sup> Toteco Dios, momaco ta niitztoc temachtli,  
 yeca nimitzhueyimatis huan nihuicas para ta,  
 pampa san ta techmocuitlahuía huan techicnelía.

## 60

*Se netlatlajtili para Toteco ma quimanahui  
 David*

<sup>1</sup> Toteco Dios, ta techhuejcamajcajtoc huan ay-  
     acmo tijmatij tlaque monequi tijchihuase.  
 Ticalantoc ica tojuanti huan techtlahuelcajtoc.  
 Ama timitztlajtlaníaj para sempa ximoyoltlali to-  
     huaya huan sempa techfuerzajmaca.

<sup>2</sup> Ni tlali tijchijqui ma huihuipica ica majmajtli.  
 Tlahuel tijtlaijiyohuiltyjtoc.

Huajca ama, noTeco Dios, sempa xijcuatlali totlal catli tlamitlatlapacatoc.

<sup>3</sup> Tijchijtoc para tojuanti timomasehualhua ma tijpanoca huejhueyi tlaijiyohuilistli.

Huan ica ni tlaijiyohuilistli techchijtoc ma timomimilojtinemica quen elisquía tiihuintitoque.

<sup>4</sup> Pero ama techmacatoc nochí tojuanti catli timitzimacasij huan timitztlepanitaj se bandera campa timosentilise.

Huan quena, nochí tojuanti catli tijchihuaj catli melahuac timosentilise nopona, para timomanahuise quema tocualancaitacahua techmajcahuilise cuatlamintli.

<sup>5</sup> Technanquili huan techmanahui nochí tojuanti catli techicnelía.

Xijtequihui mohueyi chicahualis para techmanahuis.

<sup>6</sup> Toteco Dios, yaya catli itztoc ipan ichaj nepa ilhuicac quijtojtoc:

“Ica paquelistli nijxelos tlali Siquem, huan nijtamachihuas nopa tlamayamitl catli itoca Sucot, para nijmacas aqui nijnequis pampa nopa tlalme noaxcahua.

<sup>7</sup> Huan nopa tlali Galaad huan Manasés nojquiya noaxcahua.

Ipan tlali Efraín hualase nosoldadojhua catli nechmanahuise quen notzontzajca,

huan ipan tlali Judá hualase notlanahuatiyahua.

<sup>8</sup> Catli itztose ipan tlali Moab elise notequipanojcahua catli teicneltzitzti.

Catli itztoque ipan tlali Edom nechtequipanose.

Huan nitlahuejchihuas chicahuac quema ya  
niquintlantos nopa filisteos.”  
Quej nopa quiijtohua Toteco.

<sup>9</sup> ¿Ajqueya nechchihuas ma nicalaqui ipan nopa  
altepeme catli moyahualtzactoque ica  
tepamitl ipan tlali Edom?

¿Ajqueya nechchihuas ma niquintlani sintla amo  
ta?

<sup>10</sup> San ta techyacanas ipan tlahuilancayotl, noTeco  
Dios.

Amo techtlahuelcahua.

Sintla ta amo tiyas ihuaya tosoldados para  
tlahuilanase, Toteco,  
amo aqui techpalehuis.

<sup>11</sup> Quena, Toteco Dios, techpalehui para tiquint-  
lanise tocualancaitacahua,  
pampa inintlapalehuil masehualme, amo tleno  
ipati.

<sup>12</sup> Ica itlapalehuil Toteco Dios tijchihuase hue-  
jhueyi tlamantli.

Yaya iseltzi quintzontlamiltis noch i tocualan-  
caitacahua.

## 61

### *David quinequi itztos ipan itiopa Toteco*

<sup>1</sup> NoTeco Dios, techtlacaquili quema nimitztza-  
jtzilía.

Xijtlacaquili nonetlatlajtil.

<sup>2</sup> Masque niitztosquía campa hueli o hasta campa  
ontlantoc tlaltipactli,  
na nimitztzajtzilisquía para nimitztlajtlanis mot-  
lapalehuil.

Quema nimajmahui o nimotequipachohua,  
techyacana huan techlatía ipan se huejcapantic  
tetl,  
campa amo tleno huelis nechajsis.

<sup>3</sup> Pampa san ipan ta nimotemachía para amo tleno  
nopantis.

Ta tiitztoc quen se huejcapantic cali catli nech-  
manahuía,

para amo huelis nechajsise nocualancaitacahua.

<sup>4</sup> Nijnequi niitztos para nochipa ipan motiopa  
para techmocuitlahuis.

Nopona niitztos temachtli quen se pilpiyotzi catli  
mocahua ieltlapatzala inana.

<sup>5</sup> Ta tinoTeco Dios, tijcactoc catli nimitztlajtolc-  
ahuilijtoc para nijchihuas.

Huan techmacatoc nopa tlatiochihualistli catli  
ticajoctoc para tiquinmacas masehualme  
catli mitzimacasij huan mitztlepanitaj.

<sup>6</sup> Xijchihuas para na nitlanahuatijquetl ma niitzto  
miyac xihuitl,

huan para nonemilis ma eli yejyectzi.

<sup>7</sup> Techcahuili ma nitlanahuatis moixpa para  
nochipa.

Techmanahui huan techmocuitlahui ica motlaic-  
nelijcayo.

<sup>8</sup> Quej nopa nimitzhuicatis huan nimitzpaquilis-  
macas mojmostla.

Quena, sesen tonal nijtlamichihuas catli nimitz-  
tencahuilijtoc para nijchihuas para ta.

- <sup>1</sup> Na san ipan Toteco Dios nimochiya para yaya ma nechmanahui,  
pampa san ya hueli temaquixtía.
- <sup>2</sup> Nimotlatía ipan ya para amo tleno nechajsís.  
San yaya nechmaquixtía huan nechmocuitlahuía quemá huala tlaohuijcayotl.  
Amo tleno hueli nechpanos.
- <sup>3</sup> Pero ¿hasta quemá tlamis nocualancaitacahua nechhuilanase?  
Ayacmo nijpiya más chicahualistli quen tlanahuatijquetl ipan notlanahuatilis.  
Nocualancaitacahua quisencahuaj quenicatza huelis nechtlahuisose.  
Nechitaj quen se tlapepecholi o tepamitl catli quinequi huetzis.
- <sup>4</sup> Quena, san moilhuíaj san sejco quenicatza huelis nechtzontlamiltise.  
Quinpactía quitlacaquilise istlacatili huan tlacajcayahualistli.  
Ica inincamac nechcamanalhuíaj yejyectzi,  
pero ipan ininyolo nechtelchihuaj.
- <sup>5</sup> Pero na san nimochiya ipan Toteco Dios,  
san nimochiya para yaya ma nechmanahui,  
pampa san ya hueli temaquixtía.
- <sup>6</sup> Nimotlatía ipan ya para amo tleno nechajsís.  
San yaya nechmaquixtía huan nechmocuitlahuía quemá huala tlaohuijcayotl,  
yeca san ipan ya nimotemachía.
- <sup>7</sup> San Toteco Dios hueli nechmaquixtis huan sempa nechhueyitlalis iniixpá sequinoc.  
Yaya nechtlatía huan nechfuerzajmaca.  
Nechmocuitlahuía para amo ma nechajsi catli fiero.

- 8** ¡Annomasehualhua, nochipa ximotemachica ipan  
Toteco Dios!  
Xijpohuilica nochi catli eltoc ipan amoyolo,  
pampa san yaya hueli techmocuitlahuis ica catli  
amo cuali.
- 9** Amo tleno nelía ininpati masehualme iixpa  
Toteco,  
masque catli tominpiyaj o catli teicneltzitzti.  
Sintla se quintlalisquía ipan balanza para quinta-  
machihuas sintla etique quen se tlamantli  
catli tlahuel ipati,  
momacas cuenta para melahuac amo etique  
pampa masehualme itztoque san quen  
ajacatl.
- 10** Masehualme, amo ximoilhuica para  
antlahuilanase para anquitlanise más tomi.  
Amo ximoilhuica para antlachtequise para an-  
moricojchihuase.  
Huan sintla anmochihuase rico,  
amo ximohueyimatica, niyon amo xi-  
motemachica ipan amotomi.
- 11** Nijmati ya ni, pampa miyac hueltas Toteco Dios  
nechilhuijtoc:  
san yaya quipyia nochi chicahualistli.
- 12** San ta, Toteco, titeicnelía mojmostla.  
Huan tiquintlaxtlahuía sesen masehuali quen  
quinamiqui ica catli quichijtoque.

## 63

### *Nijtemohua noTeco*

- 1** ¡Toteco Dios, ta tinoDios!  
¡Nelía tlahuel nimitztemohua!

¡Quen se masehuali catli tlahuel amiqui ipan huactoc tlali campa amo onca atl, na ica nochí noyolo huan ica nochí noalma njnequi nimitzpantis!

<sup>2</sup> Nijnequi niquitas mochicahualis huan mohueytílis quen niquitac ipan motiopa.

<sup>3</sup> Pampa motlaicnelijcayo más hueyi ipati huan amo nonemilis.

¡Tlahuel nimitzhueyimati!

<sup>4</sup> Huan nochí tonali quema noja niitztos, nimitzti-ochihuas.

Huan moixpa nimomatlananas huan nimotlatlajtis ica ta.

<sup>5</sup> Huan huajca, quena, nijmatis quen elisquía ya niixhuic ica se tlacualistli catli ajhuiyac.

Huan nimitzhueyimatis ica miyac paquilibrium.

<sup>6</sup> Nochi yohuali quema nimoteca ipan notlapech huan amo hueli nicochi,

nimoilhuía tlen ta.

Quena, nimonejnehuilía tlen ta sesen hora.

<sup>7</sup> Nimoilhuía quenicatza techpalehuijtoc huan yeca sesen yohuali tlahuel nipaqui.

Quen se piyo quintlatía iconehua ieltlapatzala, quej nopa ta techtlatía na para amo tleno nechassis.

<sup>8</sup> Nimotlatzquilijtoc ipan ta pampa san ta techmocuitlahuía ica mohueyi chicahualis.

<sup>9</sup> Nochi catli quinequij nechmictise yase mictla.

<sup>10</sup> Pampa ya eltoc tlasencahuali para miquise, huan para sequinoc quintzontlamiltise ica machete.

Huan inintlacayohua elis tlacualistli para nopa tepechichime.

**11** Pero na nitlanahuatijquetl nimopaquilismacas  
ipan ta, Toteco Dios.  
Huan nojquiya paquise nochí sequinoc catli sen-  
quistoc motemachíaj ipan ta.  
Pero nochí catli istlacatij,  
ta, Toteco, tiquincamatzacuas.

## 64

### *Se netlatlajtili para Toteco ma quimocuitlahui*

- 1** NoTeco Dios, xijtlachili notequipachol.  
¡Xijmanahui nonemilis tlen nocualancaitacahua  
catli quinequij nechmictise!
- 2** Techtlati tlen ni amo cuajcualme catli ich-  
tacatzí quisencahuaj para nechchihuilise  
catli fiero.
- 3** Nochi inincamanal ajsi ipan noyolo,  
huan tlahuel nechcocohua quen elisquía se cuat-  
lamintli.
- 4** Inijuanti amo majmahuij para nechtlatzacuile-  
tise.  
Motlatíaj campa amo aqui hueli quinita,  
huan quinmajcahuilíaj cuatlamintli masehualme  
catli amo tleno quichijtoque.
- Nyon quentzi amo majmahuij ica catli fiero  
quichihuaj.
- 5** Se ica seyoc mofuerzajmacaj para quichihuase  
más catli fiero.  
Ichtacatzí mosentilíaj para quitlalise tlaquetztlí.  
Huan quijtohuaj: “Nica tijtlalise ni tlaquetztlí  
campa amo aqui huelis quiitas.”
- 6** Ica miyac cuidado quisencahuaj quenicatza  
quichihuase para temictise.

Ica yolic quitemolíaj quenicatza quichihuase catli  
fiero quisencajtoque quichihuase para ma  
cualquisa.

Iyolo huan itlalnamiquilis se masehuali tlahuel  
quimati quisencahuas catli fiero para  
quichihuas.

<sup>7</sup> Pero Toteco Dios yaya iseltzi quintlamicocos.  
Elis quen quinmajcahuilis cuatlamintli quema  
amo quichiyaj,  
huan nimantzi quintlanis.

<sup>8</sup> Quena, huetzise huan motzontlamiltise,  
por nopa camanali catli quiijtojtoque.  
Huan nochí catli quinitase momajmatise.

<sup>9</sup> Huajca nochí masehualme quitepanitase Toteco  
Dios huan quiimacasise quiixpanose.  
Tepohuilise nochí catli yaya quichijtoc.  
Huan huajca quimachilise para san ya quichihua  
huejhueyi tlamantli.

<sup>10</sup> Huan nochí masehualme catli itztoque xit-  
lahuaque quipaquilismacase TOTECO,  
huan más motemachise ipan ya huan quihueyi-  
matise.

## 65

### *David quihueyimati Toteco*

<sup>1</sup> Toteco Dios, san ta quinamiqui ma timitzhueyi-  
matica,  
ta catli tiitztoc ipan altepetl Jerusalén.

Huan quinamiqui ma timitzmacaca nochí catli  
timitztlajtolcahuiljtoque timitzmacase.

<sup>2</sup> Ta technanquilía quema timotlatlajtíaj huan  
techmaca catli timitztlajtlaníaj,

huajca nochí masehualme ipan tlaltipactli ma  
hualaca campa ta.

<sup>3</sup> Masque toyolo temitoc ica tlajtlacoli huan techtlantoc,  
ta techtlapojpolhuía nochí totlaixpanolis.

<sup>4</sup> ¡Nelía tipaquij miyac tojuanti catli techtlapejpenijtoc para ma tihualaca,  
huan ma tiitztoquij mohuaya ipan motiopa catli  
tlatzejzeloltic!

¡Ta techmacas hueyi paquelistli huan nochí catli  
cuali catli onca nopona!

<sup>5</sup> Quema timitzlajtlaníaj se tlamantli,  
ta technanquilía ica huejhueyi tlamantli.

Toteco Dios, nochí masehualme ipan tlaltipactli  
motemachíaj ipan ta.

Quena, masque itztoque hasta campa ontlan toc  
hueyi atl,

nochí motemachíaj para ta tiquinpalehuis.

<sup>6</sup> Ta ica mohueyi chicahualis tiquinchijchijqui  
nopa tepeme huan tiquintlatzquilti campa  
eltoc.

<sup>7</sup> Ta tijseseltía nopa hueyi atl quema mosisinía.

Huan tiquinyoltlalía masehualme campa hueli  
quema quinequij mohulanase.

<sup>8</sup> ¡Yeca nochí masehualme catli itztoque hasta  
campá ontlan toc tlaltipactli,  
mitztlepanitaj huan mitzimacasij para mitzix-  
panose quema quiitaj nopa huejhueyi tlaman  
catli tijchihua!

Tijchihua para masehualme ma paquica tlen  
quema tlanesi huan hasta quema tlay-  
ohuiya.

<sup>9</sup> Ta ticatequía ni tlaltipactli para ma tlaelilti.

Nopa hueyame catli ta moaxca amo quema  
huaquij.

Ta tijcualtlalía ni tlali para momasehualhua ma  
quitocaca ininxinach,  
huan teipa tijchihua para ma onca se hueyi  
pixquistli.

**10** Ta tijxolonía ica miyac atl nopa surcos ipan mila.  
Tijchihua ma huetzi atl para ma yamaniya nopa  
tlali huan ma poxoni nopa tlaltojtolomitl.  
Huan tijchihua para ma ixhua nochí tlamatli  
tlatoctli ipan nochí tlaltipactli.

**11** Teipa sesen xihuitl tijtlamiltía ica se pixquistli  
catli nelía yejyectzi.

Huan nopa mixtli tijchihua para tlaquiyahuiltía  
miyac.

**12** Onca sacatl ipan huactoc tlali,  
huan campa tlaixtemolis moscaltíaj cuajcuali xi-  
huitl,  
huan temacaj ininxochiyo.

Nesi quen moscaltíaj ica miyac paquelistli.

**13** Ta tijchijtoc para nochí potreros ma temica ica  
borregojme para quicuase nopa sacatl.

Huan ipan nochí nopa tlamatayamitl motlanantoc  
trigo mili.

Eltoc quen nochí catli ta tijchijtoc ipan tlaltipactli  
tzajtzij ica paquelistli huan huicaj.

## 66

*Se huicatl para quitlascamatis Toteco*

**1** ¡Nochi anmasehualme ipan tlaltipactli,  
xihuicaca ica paquelistli para Toteco Dios!

**2** ¡Xihuicaca tiohuicatl catli tepohuilía para tlahuel hueyi ya!

¡Xijhueyimatica por nochí catli quichijtoc!

**3** Xiquilhuica Toteco Dios:

“¡Nelía yejyectzi huan tetzatic nochí catli tijchijtoc!

¡Tlahuel hueyi mochicahualis!

Yeca nochí mocualancaitacahua motemactilíaj ica ta pampa tlahuel temajmati catli tijchihua.

**4** Nochi masehualme ipan tlaltipactli mitzhueyichihiuase.

Inijuanti huicase para mitzhueyimatise,  
huan tepohuilise tlen mohueyitilis.”

**5** Xihualaca huan xiquitaquij nochí nopa huejhueyi tlamantli catli Toteco Dios quichijtoc.

¡Quinchihuilijtoc masehualme huejhueyi tiochicahual nextili!

**6** Quihuatzqui nopa atl huan tlatlajco nopa hueyi atl quitlapo se ojtli huactoc campa panoque tohuejcapan tatahua.

¡Nochi israelitame quipixque se hueyi paquilitli ipan nopa tonal!

**7** Toteco ica ichicahualis tlanahuatía para nochipa.

Yaya quitlachilía sesen tlamantli catli masehualme quichihuaj ipan nochí tlalme ipan tlaltipactli.

Catli amo quitlepanitaj huan catli mohueyimatiij, yaya quinechcapantlalis.

**8** Nochi anmasehualme xijtlascamatica Toteco Dios huan xijhueyimatica,

por nochí catli quichijtoc,

**9** pampa sesen tojuanti tonemilis eltoc imaco.

Quena, yaya techmocuitlahuijtoc huan techyacantoc xitlahuac ipan toojhui.

<sup>10</sup> Pampa ta, tiToteco Dios, techyejyecojtoc huan techtlapajpacchijtoc,

quen nopa tepos plata catli quimoloníaj ipan tlilti  
catli tlahuel totonic,

para san mocahuas catli senquistoc cuali.

<sup>11</sup> Ta techmasilti ipan momatla huan tijtlali tocuitlapa tlamamali catli tlahuel etic.

<sup>12</sup> Tijchijqui ma cahuayo jnemica topani catli  
ehuaj sequinoc tlalme.

Tipanoque ipan atl huan ipan tlilti.

Pero ama techtiochijtoc huan techmacatoc nochicatli cuali.

<sup>13</sup> Ama nihualajtoc ipan motiopa para nimitzmacas tlacajcahualistli tlatlatili.

Huan quej nopa nijtlamichihuas catli nimitztlajtolcahuilijtoc para nijchihiwas.

<sup>14</sup> Pampa quema niitztoya ipan tlaohuijcayotl,  
nimitztlajtolcahuili ica nocamac,

para nimitzmacas miyac tlacajcahualistli.

<sup>15</sup> Yeca ama nimitzhualiquilia ni oquich borregojme, chivojme huan becerros catli tomahuaque.

Huan ininpocy o tlejcos hasta ajsis moixpa.

<sup>16</sup> Nochi amojuanti catli anquitlepanitaj Toteco  
Dios huan anquiimacasij anquiixpanose,

xihualaca xijtlacaquiliquipij,

huan nimechpohuilis nochicatli yaya nechchihuilijtoc.

<sup>17</sup> Chicahuac na nijtzajtzili para ma nechpalehui,

huan quema nijcamanalhuiyaya, nijhueyi-matiyaya.

<sup>18</sup> Pero sintla na amo niquilhuijtosquía Toteco not-lajtlacolhua para ma nechtlapojojpolhui, huajca amo nechtlacaquilijtosquía.

<sup>19</sup> Pero pampa niquilhui Toteco Dios ma nechtlapojojpolhui,  
yaya nechtlacaquili huan quichijqui catli niquilhui.

<sup>20</sup> Xijpaquilismacaca Toteco Dios,  
pampa yaya nechtlacaquili huan amo quihuejcamajcajqui nocamanal quema nimotlatlajti.  
Nechtlasojtlac huan nechicneli.

## 67

### *Se huicatl para quitlascamatis Toteco*

<sup>1</sup> Toteco Dios, xipiya hueyi moyolo ica tojuanti huan techtiochihua.

Ma petlani moixayac pampa tipaqui ica tojuanti quema techhualtlachilía hasta tlen nepa ilhuicac.

<sup>2</sup> Nochi masehualme ipan tlaltipactli ma quiiximatica moojhui.

Masehualme ipan nochi tlalme ma quimatica para ta titemaquixtía.

<sup>3</sup> NoTeco Dios, ma mitzpaquilismacaca nochi masehualme ipan tlaltipactli.

Quena, nochi masehualme ma mitzhueyimatica.

<sup>4</sup> ¡Ma paquica nochi masehualme ipan nochi tlalme huan ma huicaca pampa ta, tiinintlanahuatijca!

Ta tiquintlajtolsencahuas quen quinamiqui, huan nochi tlalme tiquinyacanas xitlahuac.

**5** ¡NoTeco Dios, ma mitzpaquilismacaca nochi ipan tlaltipactli!

¡Quena, nochi masehualme ma mitzhueyimatica!

**6** Ni tlali temacatoc miyac pixquistli, pampa ta,  
Toteco Dios,

catli titodios tojuanti, tlahuel techtiochijtoc.

**7** Quena, noja más techtiochihuas, Toteco Dios,  
huan masehualme campa hueli ipan ni tlaltipactli  
mitztlepanitase huan mitzimacasise mitz-  
ixpanose.

## 68

### *Toteco Dios tlatlantoc*

**1** ¡Ximotlanana, Toteco Dios, huan xiquinsemana  
nochi mocualancaitacahua!

Xiquinchihua ma choloca tlen moixtla nochi catli  
amo mitzcualitaj.

**2** Xiquinixpolo quen poctli ixpolihui ipan ajacatl.  
Xiquintlamilti quen nopa cera catli atiya ipan tlilt.  
Quej nopa ma ininpanti moixpa nochi amo cuajcualme.

**3** Pero nochi masehualme catli itztoque  
xitlahuaque ma paquica iixpa Toteco Dios  
huan ma huitonica ica paquilstli.

**4** Xijhuicatica Toteco huan xijpaquilismacaca.

Xijhueytalalica yaya catli nejnemi iixco mixtli,  
yaya catli itoca TOTECO.

Xipaquiaca miyac iixpa ya.

**5** Toteco Dios yaya inintata catli icnotzitzti.

Yaya quinchihuilá catli xitlahuac nopa cahual  
toahuihua,

pampa yaya tlatzejzeloltic.

**6** Toteco Dios quinmaca ininchampoyohua catli  
itztoque ininseltzitzi.

Huan quinchololtía catli quintzactoque.

Pero catli motlepanitaj quintitlanilía mayantli  
huan tlaijiyohuilistli.

**7** NoTeco Dios, quema tiquinyacantiyajqui mo-  
masehualhua tlen tlali Egipto

huan tiquinhuicac ipan nopa huactoc tlali,

**8** nopa tlali mojmolini huan huetzqui atl tlen il-  
huicactli moixpa.

Nopa tepetl Sinaí mojmolini moixpa ta catli  
titoteco tiisraelitame.

**9** Toteco Dios, ta tijchijqui ma huetzi miyac atl ipan  
ni tlali catli tiquinmacac momasehualhua.

Quena, ica nopa atl tiquinfuerzajmacac catli  
moaxcahua quema tlahuel siyajtoyaj

**10** Yeca momasehualhua mocajque nica ipan ni  
tlali.

Huan ta ica motlaicnelijcayo tiquinmacac nopa  
teicneltzitzi nochí catli monequiyaya para  
ica mopanoltise.

**11** Toteco quiijto para ya tlatlantoya,  
huan miyac masehualme tzajtzique chicahuac  
para tepohuilise catli panotoc.

Quiijtojque:

**12** “Cholotejque nopa soldados catli hualajtoyaj  
para techtzontlamiltise.”

Quena, ama nopa israelita sihuame momajmacaj  
nochí tlamantli catli quicajtejque nopa sol-  
dados.

13 Xiquitaca, masque quinmocuitlahuiyayaj bor-regojme,  
ama nopa sihuame hasta petlanij ica oro huan  
plata.

Nochi inintlacayo quitlamitzactoque ica  
tlamantzitzi catli yejyectzitzi quen se  
paloma quitlamitzacua itlacayo ica  
ieltlapal.

14 Toteco Dios Catli Quipyia Nochi Chicahualistli  
quinsemanqui icualancaitacahua quen  
nopa setl catli huetzi ipan tepetl Salmón.

15 Nochi nopa tepeme catli huejcapantique catli  
mopantíaj ipan tlali Basán iaxcahua Toteco  
huan nelía yejyectzi inintzonatipa,

16 pero ma amo mochicoitas ica nopa Tepetl Sion  
catli TOTECO quitlapejpenijtoc para ipan  
itztos para nochipa.

17 Toteco Dios quisqui ipan tepetl Sinai ica mil-  
lones icuacarros huan itequihuajcahua.

Yaya yajqui ipan itiopa catli tlatzejzeloltic ipan  
tepetl Sion.

18 Quema Toteco tlejcoc ilhuicac campa más huej-  
capa,  
quichihuayaya quen se tlatlanquetl catli mocuepa  
ipan se tlahuilancayotl,

huan quinhuicac ilpitoque nopa masehualme  
catli quintlantoya para iaxcahua.

Huan nopa tonal Toteco quiseli nemactli tlen  
nochi masehualme,  
hasta nojquiya masehualme catli amo quinejque  
quitlepanitase.

Huan ama TOTECO temachtli itztos ica tojuanti.

19 Ma tijpaquilismacaca Toteco,

pampa yaya mojmostla techmaca itlatiochihualis.  
 Yaya Toteco catli techpalehuía huan  
 techmaquixtía.

<sup>20</sup> Toteco Dios, yaya catli techchololtía ininmaco  
 tocualancaitacahua.

Huan yaya Toteco catli techmanahuía para amo  
 timiquise.

<sup>21</sup> Temachtli Toteco quintzontlamiltis nochí  
 icualancaitacahua,

pampa inijuanti tlahuel yoltetique huan amo  
 quinequij quicahuase inintlajtlacolhua.

<sup>22</sup> Toteco quinilhuijtoc imasehualhua:

“Na niquinhualicas nochí amocualancaitacahua.  
 Niquincuiti masque motlatijtose ipan nopa huej-  
 capantic tepetl catli itoca Basán,

o masque motlatijtose hasta tlatzintla tlen nopa  
 hueyi atl.

<sup>23</sup> Niquinhualicas pampa monequi nochí anquint-  
 zontlamiltise.

Inieso quixolonise amoicxihua huan amochichi-  
 hua quipipitzose.”

<sup>24</sup> NoTeco Dios, tinotlanahuatijca,  
 niquinita miyac masehualme mitztoquilíaj para  
 yase ipan motiopa.

<sup>25</sup> Inijuanti catli huicaj tlayacantiyohuij.

Tlatlajco yohuij nopa ichpocame catli quitzilini-  
 jtiyohuij panderos.

Tlatepotzco yohuij catli tlatzotzonaj.

<sup>26</sup> Huan quej ni huicaj:

“Nochi anisraelitame, xijhueyimatica Toteco Dios.  
 Xijpaquilismacaca Toteco catli techmacatoc ne-  
 milistli nochí tojuanti.”

- 27** Tlayacantiyohuij iixhuihua Benjamín.  
 Huan tlatepotzco hualahuij nopa tlayacanani  
     huan huehue tlacame tlen iixhuihua Judá,  
 huan nopa tlayacanani catli iixhuihua Zabulón  
     huan Neftalí.
- 28** Toteco Dios, ica mohueyi chicahualis xijchihua  
     nochi catli techilhuijtoc.  
 Quena, xijnexti mohueyi chicahualis para se-  
     quinoc ma quiitaca nopa huejhueyi tla-  
     mantli catli ta techchihuilijtoc.
- 29** Nopa tlanahuatiani tlen nochí tlalme quihual-  
     icaj iniofrendas ipan motiopa catli eltoc  
     ipan altepetl Jerusalén.
- 30** Toteco Dios, xiquinajhua tocualancaitacahua.  
 Xiquinechcapantlali nopa tlacame catli mosisiniáj  
     quen torojme,  
 huan xiquinchihua ma motemactilica ica ta.  
 Ma mitzhualiquilica inintepos plata quen se  
     nemactli.  
 Xiquinsemana nopa mosisinixca masehualme  
     catli tlahuel quinpactía tlahuilanase.
- 31** Nopa Egipto ehuani quinhualicase inintelpoc-  
     ahua huan nochí tlamantli ininteposhua  
     catli yejyectzitzí huan pajpatiyo.  
 Huan nopa Etiopía ehuani momatlananase  
     moixpa para mitzhueyichihuase.
- 32** Nochi antlanahuatiani ipan nochí ni tlaltipactli,  
     xihuicatica Toteco Dios.  
 Xihuicaca huan xijpaquilismacaca Toteco.
- 33** Yaya catli nentinemi ipan nopa ilhuicactli catli  
     hasta huecjajya eltoc.

Xijcaquica itoscac catli chicahuac caquisti quen  
quema tlatomoni.

<sup>34</sup> Xiquinpo huilica nochí masehualme quenicatza  
hueyi ichicahualis Toteco Dios.

Huan itlatlanex ajsi ipan nochí israelitame.

Quena, nelía tlahuel hueyi ichicahualis nepa il-  
huicac.

<sup>35</sup> Ma tijhueyitlepanitaca Toteco Dios pampa  
temajmati ihueyitilis nopona ipan itiopa.

ToDios tiisraelitame quinmaca tetili huan chic-  
ahualistli nochí imasehualhua.

¡Ma tijpaquilismacaca Toteco Dios!

## 69

### *David quinotza Toteco ma quipalehuiqui*

<sup>1</sup> NoTeco Dios, techmaquixti,  
pampa ni tlaohuijcayotl tlahuel mochijtoc hueyi  
hasta nijmachilía nimquis.

Eltoc quen atl catli nechatzonpolihuiltisnequi,  
huan ya ajsic hasta noquechtla.

<sup>2</sup> Eltoc quen nimasitoc ipan soquitl catli huejcatla  
huan amo hueli niquisa.

O quen nechyahualosquía tlahuel miyac atl huan  
huejcatla.

<sup>3</sup> Tlahuel nichocatoc hasta nisiyajtoc.

Nimitzajtzilijtoc, Toteco Dios, hasta nechcoco-  
hua noquechtla huan ayacmo hueli nica-  
manalti.

Nochi noixteyol samajtoc ica choquistli.

Ya niixcuatqui pampa campa hueli nitlachixtoc  
para niquitas sintla tihualla, Toteco Dios,  
para techpalehuis.

<sup>4</sup> Tlahuel miyaqui nopa masehualme catli  
nechcualancaitaj masque amo tleno  
niquinchihuilijtoc.

Nelía quipiyaj miyac chicahualistli nocuan-  
caitacahua catli quinequij nechmictise.

Pero na amo niquinixpanotoc.

Quinequij nechtlatzacuiltise ica se tlamantli catli  
amo nijchijtoc.

<sup>5</sup> NoTeco Dios, ta tijmati para nelía nihuahuitic,  
huan tiquiximati nochí notlajtlacolhua.

<sup>6</sup> TOTECO, ta tiDios Catli Tijpiya Nochi Chicahual-  
istli,

amo xiquincahuili ma huetzica ipan tlajtlacoli por  
na notlajtlacol,

nopa masehualme catli motemachíaj ipan ta.

Ta catli titoTeco tiisraelitame,

amo xiquincahuili ma mopinahuaca sequinoc is-  
raelitame ica catli nijchijtoc na.

<sup>7</sup> Pampa nimitzicnelía, niquijiyohuijtoc pinahual-  
istli,

huan nechhuetzquilijtoque hasta amo nijmatqui  
tlaque nijchihuasquía.

<sup>8</sup> Hasta noicnihua nechchihuaj quen amo nechix-  
imatij huan nechitaj,

quen se niseyoc altepetl ejquetl.

<sup>9</sup> Quena, niquicnelía motiopa ica nochí noyolo  
masque ica ya nopa monequi nimquis.

Huan catli mitztlaijilhuiáj ta,

nojquiya nechtlaijilhuiáj na pampa nim-  
itztequipanohua.

<sup>10</sup> ¡Quena, tlahuel nechhuetzquilíaj huan nechpina-  
jtíaj,

quema nichoca huan nimosahua iixpa Toteco!

**11** ¡Tlahuel fiero camanaltij tlen na quema ni-moquentía yoyomitl catli sosoltic para ni-jnexitis nimotequipachohua por notlajtacolhua!

**12** Nopa tlayacanca tequitini catli mosehuíaj ipuer-tajteno altepetl,  
noca motlahuetzquiltiáj.

Huan nopa ihuintini noca huicatinemij.

**13** Pero TOTECO na nijsenhuiquilía nimitztemo-hua huan nimotlatlajtía ipan ta,  
pampa nijmati ajsis tonali para techtlacaquilis.  
Toteco Dios, ica mohueyi tlaicnelilis technanquili,  
pampa ta nochipa techicnelijtoc.

Huajca technanquili quema nimotlatlajtía huan  
techmanahui.

**14** Techquixti tlen ni soquitl catli huejcatla campa  
nimasitoc.

Amo techcahuili para niatzonpolihuis.

Techmanahui ininmaco catli nechcualancaitaj.

Techquixti tlen ni hueyi atl catli nechyahualojtoc.

**15** Amo xijcahuili ma nechtlaijiyohuilty ni miyac  
atl catli ajsitoc,

niyon amo xijcahuili nopa atl ma nechtolo.

Techmanahui para amo nimasis ipan nopa ostotl  
catli tlahuel huejcatla.

**16** TOTECO, technanquili quema nimittzajtzilía  
pampa ta nelía ticuali.

Ta techicnelía miyac huan tipiya hueyi moyolo  
ica na.

**17** ¡Amo ximotlati quema nimitztemohua pampa  
tlahuel nitlaijiyohuía!

Ximoisihuilty, xihuala huan techmaquixtiqui.

**18** Xihuala, noTeco Dios huan techmanahuiqui.

Techmaquixti ininmaco nocualancaitacahua.

<sup>19</sup> Ta tijmati quenicatza camanaltij fiero tlen na huan quenicatza nechpinahaultijoque.

Quichijtoque para ayacmo aqui ma nechtlepanita. Ta tiquiniximati nochí nocualancaitacahua huan tijmati tlaque quiijitoque sesen inijuanti.

<sup>20</sup> Inijuanti tlahuēl nechyolcocojtoque huan nechtequipacholmacatoque.

Nijtemojtoc ajqueya nechtlassotlasquía huan nechyoltalisquía,

pero niyon se amo nijpanti.

<sup>21</sup> Quema nimayanayaya nechmacaque pajtli catli temictía para notlacualis.

Huan quema niamiquiyaya nechmacaque ma niquiji vinagre.

<sup>22</sup> Nopa paquilibrium catli inijuanti quipiyaj ma mocuepa tequipacholi.

Huan nopa tlasehuilibrium catli quipiyaj ica ininhuampoyohua,

ma mocuepa cualancayotl.

<sup>23</sup> Ma huala ininpani tzintlayohuilotl huan ma huihuipicaca pampa ayacmo quipiyase más fuerza.

Ma elica popoyotzitzí huan ma tlami nochí ininchicahualis.

<sup>24</sup> Xiquinnextili mohueyi cualancayo huan xiquintzontlamilti.

<sup>25</sup> Ipan inintequivicalhua ma mocahua tlasosoltic, huan ipan ininchajchaj ma tlatzitzicato.

Ayacmo aqui ma itzto.

<sup>26</sup> Pampa inijuanti más quitlaijiyohuultíaj catli ta tijcocojtoc,

huan quipinajtíaj catli ta tijtequipacholmacatoc.

- <sup>27</sup> Xiquijcuilo nochí inintlajtlacolhua huan amo  
xiquintlapojpolhui.
- <sup>28</sup> ¡Xiquixpolo inintoca ipan moama campa eltoc  
inintoca inijuanti catli yoltoque!  
¡Ma amo quipiyaca tlasehuilistli quen quipiyaj  
nopa masehualme catli itztoque  
xitlahuaque moixpa!
- <sup>29</sup> Pero na catli nitlaijiyohuía huan niteicneltzi,  
techmaquixti huan techtlanana.  
Quena, Toteco Dios, techtlali campa ta tiquitas  
quinamiqui.
- <sup>30</sup> Huan huajca nihiucas huan nijpaquilismacas  
Toteco Dios.  
Quena, nijhueyimatis huan njtlascamatis.
- <sup>31</sup> Huan TOTECO achi más quipactis ya nopa,  
huan amo quen sintla nijmacasquía se toro o se  
becerro catli tlacuacuajhuía huan quipiya  
iistihua.
- <sup>32</sup> Inijuanti catli teicneltzitzti quittase Toteco Dios  
quema quinmacas itlapalehuil,  
huan yeca tlahuel paquise.  
Huan nochí catli quitemohuaj Toteco Dios itztose  
ica paquillistli.
- <sup>33</sup> Pampa TOTECO quintlacaquilia catli teicneltz-  
itzti,  
huan amo quintlahuelcahua inijuanti catli itz-  
toque ipan tlatzactli.
- <sup>34</sup> ¡Xijpaquilismacaca TOTECO nochí amojuanti  
catli anitztoque ipan ilhuicactli huan  
tlaltipactli!  
¡Ma quihueyichihuaca nochí catli itztoque ipan  
hueyi atl!

- 35 Pampa Toteco Dios quimaquixtis ialtepe,  
          Jerusalén,  
huan sempa quincualtlalis nopa altepeme ipan  
          tlali Judá.  
Huan imasehualhua mochantise nopona huan  
          moaxcatise nopa tlali.  
36 Huan teipa ininconehua nojquiya moaxcatise  
          nopa tlali.  
Huan nochí catli quitequipanohuaj huan quiic-  
          nelíaj Toteco itztose nopona temachme.

## 70

### *Se netlatlajtili para Toteco ma quipalehuiqui*

- 1 ¡NoTeco Dios, xihuala techmanahuiqui ininmaco  
          nocualancaitacahua!  
¡Quena, ximoisihuili, Toteco Dios!  
¡Xihuala techpalehuiqui!  
2 Inijuanti nentinemij notepotzco huan paquij  
          quema nechtlaijiyohuiltíaj.  
Yeca nimitztlajtlanía xiquinpinahualti,  
huan xiquincuepalti para ayacmo ma nechchi-  
          huilica catli fiero.  
3 Xiquincuepa ica pinahualistli huan ayacmo  
          xiquincahuili ma nechpinajtica.  
4 Pero nochí masehualme catli mitztemohuaj,  
xiquinmaca miyac paquelistli.  
Nochi catli paquij pampa tiquinmaquixtijtoc, ma  
          quiijtoca:  
“Ma tijhueyitlalica Toteco Dios.”  
5 Pero na catli tlahuel nitlaijiyohuía,  
nimitztlajtlanía xihuala nimantzi huan  
          techmanahuiqui,

pampa san ta hueli techpalehuis huan techmaquixtis.

¡NoTeco Dios, amo xihuejcahua!

## 71

*Netlatlajtili tlen se huehue tlacatl catli itztoc xitlahuac iixpa Toteco*

<sup>1</sup> ¡TOTECO, na san ipan ta nimotemachijtoc!

¡Amo quema techpinahualti!

<sup>2</sup> ¡Techmanahui tlen nocualancaitacahua,  
pampa ta tixitlahuac!

¡Techchololti ininmaco!

Ximohuijtzoma quentzi para techtlacaquilis huan  
techmaquixti.

<sup>3</sup> Nochipa san nimotlatijtoc huan nimotemachijtoc  
ipan ta para amo nechajsise nocualancaitacahua.

Nijmati para ta titlanahuatijtoc ma nechmaquixtica pampa san ipan ta huelis  
nimomanahuis.

<sup>4</sup> NoTeco Dios, techmanahui ininmaco ni mosisiniijca tlacame huan temictiani.

<sup>5</sup> TOTECO, ta catli titoTeco, san ipan ta nimotlatzquilijtoc,  
huan san ipan ta nimotemachijtoc hasta tlen  
quema niconetzi.

Huan quej nopa nitelpocatixqui.

<sup>6</sup> Ta nochipa tiitztoc nohuaya hasta quema noja  
niitztoya ijlico nonana.

Quena, tlen iijtico nonana ta techquixti huan  
nochipa techpalehuijtoc.

¡Yeca tlahuel nijnequi nimitzpaquilismacas para  
nochipa!

- <sup>7</sup> Miyac san nechsentlachilíaj pampa quiitaj quenicitza techmocuitlahuía.
- <sup>8</sup> Semilhuitl nimitzpaquilismacas huan nimitzhueyimatis por nochí catli techchihuilijtoc.
- <sup>9</sup> Amo techtlahuelcahua ama quema ya nihuehuentzi huan ayacmo nijpiya fuerza.
- <sup>10</sup> Pampa nocualancaitacahua nechejelnamiquij, huan san sejco mosentilijque inihuaya sequinoc catli quinequij nechmictise.
- <sup>11</sup> Huan quijtohuaj:  
“¡Ma tijtepotztocaca para tiquitzquise pampa iDios ya quitlahuelcajtoc,  
huan amo aqui huelis quimanahuis!”
- <sup>12</sup> ¡Toteco Dios, amo ximohuejcachihua tlen na!  
¡NoTeco, xihuala nimantzi techpalehuiqui!
- <sup>13</sup> Xiquinpinahualti huan xiquintzontlamilti nopa nocualancaitacahua catli quinequij nechchihuilise catli fiero.  
Quena, ma ayacmo quimatica tlaque quichihuase.
- <sup>14</sup> Pero na más nimotemachis mopan ta para techpalehuis.  
Huan noja más nimitzpaquilismacas.
- <sup>15</sup> Nochi masehualme niquinilhuis para san ta ticuali huan niquinpohuilis quenicatza techmanahuijtoc,  
huan techmocuitlahuijtoc mojmostla.  
Amo hueli nijpohuas quesqui huelta techmanahuijtoc ica catli amo cuali pampa tlahuel miyac.
- <sup>16</sup> Nochi tonali ninejnemi ica nopa chicahualistli catli techmaca, TOTECO, ta catli tinoDios.

Huan nochí masehualme niquinilhuía para san ta  
tixitlahuac huan ticali.

**17** ¡Toteco Dios, ta techpalehuijtoc hasta quema  
noja nieliyaya niconetzi!

Hasta ama noja niquinpohuilijtinemi sequinoc  
tlen nopa huejhueyi tlamatli catli tijchij-  
toc.

**18** ¡Toteco Dios, ama quema ya nihuehuentzi huan  
nitzonchipahuac,

amo techtlahuelcahua!

Noja techmaca nemilistli para niquinpohuilis tlen  
mohueyi chicahualis ni masehualme catli  
itztoque ama huan catli teipa tlacatise.

**19** Toteco Dios, mochicahualis huan catli xitlahuac  
tijchihua onajsi hasta ilhuicac.

Ta tijchijtoc huejhueyi tlamatli.

Amo onca seyoc Dios quen ta.

**20** Ta techcahuilijtoc ma nijpano huejhueyi tlao-  
huijcayotl huan tequipacholi.

Pero nijmati para teipa, sempa techtlananas tlen  
campa nopa ostotl,

huan tijchihuas ma nimoyolcui.

Huan sempa nijpiyas nemilistli.

**21** Huan huajca achi más techhueyitlalis huan  
sempa techyoltlalis.

**22** Huan na nimitzpaquilismacas ica tlatzotzonali  
tlen arpa huan guitarra.

NoTeco Dios, nihuicas tiohuicatl catli tepohuilía  
para tijchihua nochí catli tiquijtohua.

Ta titoteco tiisraelitame huan titlatzejzelotic  
huan nelía titemachtli.

**23** Ica paquelistli nitzajtzis huan nihuicas para  
niteilhuis quenicatza techmaquixtijtoc.

**24** Semilhuitl nitepohuilis para ta tijchihua catli  
xitlahuac,  
pampa nochí catli quinequiyayaj nechmictise  
tiquinpinahaulti huan tiquinechcapantlali.

## 72

*Itlanahuatilis nopa tlanahuatijquetl catli itztoc  
xitlahuac iixpa Toteco*

**1** NoTeco Dios, techmaca motlamachtil huan techpalehui na catli nitlanahuatijquetl,  
para ma nitelajtolsencahua xitlahuac quen ta titelajtolsencahua.

Huan xipalehui nocone para ma monejnemilti xitlahuac teipa.

**2** Xipalehui para ma quintlajtolsencahuas xitlahuac nochí momasehualhua,  
huan catli teicneltzitz nojquiya.

**3** Xijchihua para nochime ipan ni tlali ma paquica  
pampa nopa tlanahuatijquetl quichihua  
catli xitlahuac,  
hasta eltoc quen nochí cuame catli onca ipan  
tepeme huan ipan tlachiquilme nojquiya  
paquij huan temacaj cuali inintlajca.

**4** Yaya quinmanahuis catli itztoque ipan tequipacholi huan catli amo tleno quipiyaj.

Nojquiya ma quintlatzacuilty nopa masehualme  
catli tetlaijiyohuilitáj.

**5** Huan catli teicneltzitz huan amo tleno quipiyaj  
mitzimacasise mitzixpanose nochí tonali  
quema noja eltos tonati huan metztli.

¡Quena, ma mitzhueyimatica para nochipa!

**6** Huan nochí altepeme ipan itlanahuatilis nocone  
ma eli yejectzi huan temachtli,

quen nopa atl catli huetzi para ma chamanica  
cuáme,  
o quen nopa ajhuachtli catli quixolonía nopa tlali.  
 7 Huan nochí masehualme catli itztoque xit-  
lahuaque huan cuajcualme,  
ma itztoca ica yejyectzi quema yaya tlanahuatis.  
Quema yaya tlanahuatis, oncas miyac  
tlasehuilistli hasta itlamiya tonali.  
 8 Itlanahuatilis nocone ma ajsi hasta campa pehua  
huan hasta campa ontlami nopa hueyi atl.  
Ma ajsi tlen campa nopa hueyi atl Eufrates hasta  
campa ontlantoc tlaltipactli.  
 9 Nochí masehualme catli itztose ipan huactoc tlali  
mohujtzomase iixpa,  
huan icualancaitacahua motlancuaquetzase  
iixpa hasta quipipitzose tlaltejpoctli.  
 10 Nochí nopa tlanahuatiani catli itztoque itejteno  
nopa hueyi atl catli itoca Mediterráneo,  
huan nopa tlanahuatiani tlen tlali Tarsis huan  
nopa tlanahuatiani tlen tlali Sabá huan  
Seba quihualiquilise miyac nemactli.  
 11 ¡Quena, nochí tlanahuatiani tlen campa hueli  
tlalme quitlanemactise!  
¡Huan nochí inijuanti motlancuaquetzase iixpa  
huan quitequipanose!  
 12 Yaya quinmanahuis nopa teicneltzitzi huan  
catli amo tleno quipiyaj quema quitlajt-  
lanise tlapalehuili.  
Pampa inijuanti amo quipiyaj ajqueya quinpale-  
huis.  
 13 Yaya quintlasojtlas catli amo quipiyaj chic-  
ahualistli huan catli teicneltzitzi,  
huan quinmanahuis.

**14** Quinmanahuis para amo quintlaijijohuultise  
huan para amo quinhuilanase.

Pampa quiitas para ininnemilis tlahuel miyac  
ipati iixpa.

**15** Huan quema noja itztos nopa tlanahuatijquetl,  
quimacase miyac oro catli onca ipan tlali Sabá.

Huan imasehualhua quisenhuiquilitjose motlat-  
lajtijtose ica Toteco huan mojmostla quit-  
lascamatise.

**16** Ma oncas miyac trigo ipan nochí nopa tlali,  
huan hasta nopa cuame catli onca ipan tepeme  
ma temacase inttlajca quen temacaj nopa  
cuame catli onca ipan tlali Líbano.

Huan ma onca miyac masehualme ipan altepeme,  
quen imiyaca nopa xihuime catli onca ipan cuati-  
tlamitl.

**17** Nochime ma quihueyimatica nopa tlanahuatij-  
quetl para nochipa,

huan itequiticayo ma huejcahua quen huejcahuas  
tonati.

Nochi ma quiselica tlatiochihualistli por ya.

Huan masehualme ipan nochí tlalme ma  
quipaquilmismacaca,

huan ma quijjtoca para Toteco quintiochijtoc.

**18** Ma tijhueyichihuaca TOTECO Dios catli toDios  
tiisraelitame,

pampa san yaya hueli quichihua huejhueyi tla-  
mantli.

**19** Nochipa ma tijpaquilismacaca Toteco.

¡Nochi tlaltipactli ma temi ica ihueyitilis!

¡Ma quej nopa eli!

**20** Nica tlami motlatlajtía David, icone Isaí.

# 73

*Itlaicnelilis Toteco Dios*

- <sup>1</sup> Toteco Dios nelía cuali iyolo ica israelitame.  
Quena, quinicnelía nochí catli quipiyaj tlapaj-pactic ininyolo.
- <sup>2</sup> San quentzi polihuiyaya para nihuettosquía.  
Noicxihua xitlaniyaya huan nechcatitoya para nimomimilos tlatepexico.
- <sup>3</sup> Quej nopa nielqui pampa amo niquijyohui para amo niquixtocas quema niquitac quenicatza tlapijpiyayabaj nopa masehualme catli mohueyimatij huan catli tlaixpanoj.
- <sup>4</sup> Itztoque cuali ipan nochí ininnemilis, huan amo mococohuaj.
- <sup>5</sup> Amo quinaksi tlaohuijcayotl niyon tequipacholi, quen sequinoc quipiyaj.
- <sup>6</sup> Yeca quema mohueyimatij, quiitaj para yejyectzi quen se costli catli tlachijchihuali ica piltet-zitzti catli pajpatiyo.  
Huan quema quichihuaj catli amo cuali, quiitaj quen ininyoyo catli yejyectzi.
- <sup>7</sup> Nopa tlaixpanoca masehualme ya quijquisas iniixteyol pampa tlahuel motomajtoque, huan ya quipixtoque nochí catli ininyolo quinequij.
- <sup>8</sup> Inijuanti san quihuetzquiláj Toteco huan quintemajmatíaj imasehualhua.  
Mohueyimatij quema camanaltij.
- <sup>9</sup> Fiero quitlaijilhuíaj Toteco Dios catli itztoc ipan ilhuicactli.

Huan quintelchihuaj catli itztoque ipan ni tlaltripactli.

<sup>10</sup> Yeca Toteco Dios quinhualicas sempa nochimasehualhua ipan ni inialtepe, huan quipiyase miyac atl nochinijuanti.

<sup>11</sup> Huan quijtose:

“¿Atlac Toteco quimatis tlaque pano?

¿Atlac Yaya Catli Más Hueyi quichihuilá cuenta catli pano nica?”

<sup>12</sup> Xiquitaca, ni masehualme catli amo tlenquineltocaj amo tlenoininpati.

Quipiyaj se yejyectzi nemilistli huan tlatoctzitziquimiyaquilíaj más inintomi.

<sup>13</sup> ¡Amo tleno nechpalehuía para nijpiya noyolo tlapajpactli,

huan san tlapic nimocuatotonía para amo nijchi-huas tlajtlacoli!

<sup>14</sup> Pampa nochis se tonal nechtlatzacuiltyaj huan nechtlaijiyohuiltyaj sesen ijnaloc.

<sup>15</sup> Sintla nicamanaltitosquía quen inijuanti, huajca niquincaj cayajtosquía nochimomasehualhua.

<sup>16</sup> Quema nijnejqui nijmachili para tlen itztoque cuali nopa masehualme catli quicualancaitaj Toteco,

elqui tlahuel ohui para nijmachilis.

<sup>17</sup> Pero se tonal nicalajqui ipan motiopa, Toteco Dios, para nimonejnehuilis tlen nopa tlamanli,

huan huajca nijmachili tlaque quinchiya.

<sup>18</sup> Tiquintlalijtoc ipan se ojtli catli tlahuel alaxtic.

Quema tiquincuatopehuas,  
huajca nimantzi huetzise ipan se hueyi ostotl  
huan nopona tzontlamise.

**19** Quena, ica se tlatoctzi tlamis nochin ininpaquilis.  
Huan itztose ipan majmajtli para nochipa.

**20** ¡Nochi ininnemilis eltoc quen se temictli!  
Quena, quen quema se cochtoc huan isatiquisas,  
Toteco, quej nopa quema timotlananas huan  
tiquinhuejcamajcahuas.

**21** Quema niquitac ya ni,  
nelia tlahuel nicualanqui huan hasta nechcoco-  
huayaya noyolo.

**22** Pampa niquitac para tlahuel nihuihuitic niel-  
toya.

¡Hasta ninesiyaya moixpa quen se nitlapiyali catli  
amo quipiya itlalnamiquilis!

**23** Pero masque ya ni nopantic, nochipa niitztoc  
mohuaya ta, Toteco,

huan techitzquijtoc ipan nomanejmac.

**24** Huan nijmati para motlamachtil quisen-  
huiquilis nechyacanas ipan nochin  
nonemilis.

Huan teipa, quema nimiquis,  
techselis nepa mochaj campa tlayejyectzi.

**25** Amo aqui seyoc nijpiya nepa ilhuicac.

¡San ta, tinoTeco Dios!

¡Huan san ta nimitznequi ipan ni tlaltipactli huan  
amo aqui más!

**26** Quemantic nimococohua huan nimotequipa-  
chohua.

¡Pero Toteco Dios yaya mocahua para nochipa!

Yaya quifuerzajmaca noyolo huan san yaya  
noaxca para nochipa.

<sup>27</sup> Pero Toteco quintzontlamiltis nochi catli amo  
quinequij quihueyichihuase.

Quena, yaya quintzontlamiltía nochi catli quit-  
lahuelcahuaj.

<sup>28</sup> Pero na achi más nimonechcahuis campa  
Toteco Dios,

pampa ya nopa catli más cuali para na.

San ipan TOTECO nimotemachijtoc pampa yaya  
noTeco.

Huan niquinpohuilis nochime nochi nopa  
yejyectzi tlamantli catli yaya nechchihuila.

## 74

*Quema tocualancaitacahua hualahuij, ma tijete-  
moca Toteco*

<sup>1</sup> Toteco Dios, ¿para tlen techtlahuelcajtoc para  
nochipa?

¿Para tlen tlahuel ticualani ica tojuanti catli tiitz-  
toque quen timopilborregojhua?

<sup>2</sup> Xiquelnamiqui para tojuanti timomassehualhua  
catli timocohui huejcajya quema titete-  
quipanohuayayaj san tlapic.

Quena, techtlapejpeni para techchihuas timoaxc-  
ahua.

Nojquiya tijtlapejpeni nopa altepetl Jerusalén  
para tijchihuas quen elisquía mochaj ipan  
ni tlaltipactli.

<sup>3</sup> Xihuala xiquitaqui quen quitlamisosolojtoque  
nopa altepetl,

huan xijtlachili quenicatza tocualancaitacahua  
quisosolojtoque motiopa.

- <sup>4</sup> Nopona tzajtlique mocualancaitacahua ica paquolistli quema tlasosolojque.  
 Teipa san techhuetzquilijque huan quinquetzque ininteteyohua para quinextise ya techt-lantoyaj.
- <sup>5</sup> Hualajque ica ininhachas huan huejhueyi martillos hasta nesiyaya quen cuajcuahuini tlatlajco cuatitlamitl.
- <sup>6</sup> Huan ama ica ininteposhua quitlapanque huan quisosolojtoque nochí tlamantli catli ica tlayejyecchijtoyaj motiopa.
- <sup>7</sup> Quena, motiopa quitlatijque,  
 huan quimahuispolojque moixpa nopa catli qui-huicayaya motoca,  
 huan quitlahuisojoque tlalchi.
- <sup>8</sup> Huan quijtojque ipan ininyolo:  
 “Ma tijtlamisoloaca nochí catli onca ipan ni tlali.”  
 Huan yajque campa hueli huan quitlatijque nochí israelita tiopame,  
 campa timosentiliyayaj para timitzhueyichi-huase, Toteco Dios.
- <sup>9</sup> Ayacmo onca niyon se tlamantli catli quinextía para timomasehualhua.  
 Ayacmo onca tlajtol pannextiani.  
 Ayacmo aqui huelis techilhuis hasta quema tlamis nochí ya ni.
- <sup>10</sup> Toteco Dios, ¿hasta quema tlamis mitzmahuis-polohuaj mocualancaitacahua?  
 ¿Atlac amo quema tiquintlatzacultis?
- <sup>11</sup> ¿Para tlen tihuejcahua para techpalehuis?  
 ¿Para tlen amo tijnextía mohueyi chicahualis huan techpalehuía?

- 12** Hasta tlen huejcajya Toteco Dios itztoya not-lanahuatijca.  
 Yaya nechpalehuijtoc ipan ni tlaltipactli huan campa hueli campa niyajtoc.
- 13** Ica mochicahualis tijxelo hueyi atl.  
 Huan tiquintzontlamilti huejhueyi tlapiyalme catli temajmatijque catli itztoyaj ipan atl.
- 14** Tijtzonxamani nopa hueyi tlapiyali catli itoca leviatán,  
 huan inacayo tiquinmacac ma quicuaca nopa tecuanime catli itztoyaj ipan huactoc tlali.
- 15** Tijchijqui ma meya atl ipan huejhueyi amelme huan para hueyame ma quipiyaca atl.  
 Nojquiya tiquinhuatzqui hueyame catli amo quema huactoyaj.
- 16** Ta moaxca tonali huan yohuali.  
 Ta tijchijchijqui metztli huan tonati.
- 17** Ta tijtamachijqui hasta canque tlamic tlaltipactli.  
 Nojquiya ta tijchihua ma tlatotoniya huan ma tlaseseyea.
- 18** TOTECO, xiquita quenicatza mitzmahuispolo-huaj mocualancaitacahua,  
 huan quenicatza mitztlaijilhuíaj nopa masehualme catli mohueyimatij.
- 19** ¡TOTECO, amo techtlahuelcahua!  
 Xijmanahui mopaloma imaco nopa cuajtli.  
 Quena, xiquinmanahui momasehualhua ininmaco nopa masehualme catli itztoque quen tecuanime.
- 20** ¡Xiquelnamiqui nopa camanal sencahuali catli tijchijtoc tohuaya!

Pampa ni tlali temitoc ica tzintlayohuilotl huan  
ica masehualme catli mosisiníaj.

<sup>21</sup> Amo xijcahua para tlatoctzitzti ma techmahuis-  
poloca tojuanti catli tijpanotoque miyac  
tlaohuijcayotl.

Xiquinpallehui catli teicmeltzitzti huan amo tleno  
quipiyaj para huelis mitzpaquilismacase.

<sup>22</sup> Toteco Dios, ximotlanana huan ximomanahui  
ica catli quijjtohuaj mocualancaitacahua.

Xiquelnamiqui nochí nopa camanali catli ica  
mitztlaijilhuijtoque nochí se tonal.

<sup>23</sup> Amo xiquelcahua quenicitza mitztelchijtoque  
mocualancaitacahua,  
pampa inijuanti noja más mitztlaijilhuíaj.

## 75

*Toteco quinechcapantlalis sequin huan quin-  
hueyitlalis sequinoc*

<sup>1</sup> ¡Timitztlascamatij, Toteco Dios, pampa tiitztoc  
tonechca!

Pampa masehualme tepohuiliáj nochí huejhueyi  
tetzatl catli tijchijtoc.

<sup>2</sup> Huan Toteco Dios quijjtohua:  
“Quena, quema ya nimocuallalijtos, na niquix-  
quetzas se tonal.

¡Huan niquintlatzacuiltis quen quinamiqui nochí  
nopa tlaixpanoca masehualme!

<sup>3</sup> Masque ni tlaltipactli mojmolinis huan nochí  
masehualme huihuipicase,  
itlaquetzalhua amo huetzise pampa na niquin-  
quetztoq cuali ipan ininlugar.”

<sup>4</sup> Niquinilhui masehualme catli mohueyimatij ma  
amo mohuihuinequica.

Huan niquinilhui tlaixpanoca masehualme ma  
amo mohueyimatica.

<sup>5</sup> Niquinilhuijtoc catli quipiyaj chicahualistli ma  
amo tetlamijilhuica.

Huan quema ancamanaltij, amo ximoyacaquet-  
zaca para anmohueyimatisse.

<sup>6</sup> Pampa san Toteco hueli tehueyitlalía.

Amo aqui catli huala tlen campa hualquisa tonati,  
o ica campa oncalaquí,

o campa huactoc tlali huelis quihueyitlalis se  
masehuali. ¡Amo!

<sup>7</sup> San Toteco Dios itztoc Juez.

San yaya nopa tetlajtolsencajquetl catli hueli  
tehueyitlalía huan temaca chicahualistli.

Huan sequin masehualme quinhueyitlalía huan  
sequin quinechcapantlalía.

<sup>8</sup> Toteco quipixtoc imaco se caxitl catli temitoc ica  
huino catli nelía cococ.

Huan ya nopa eltoc nopa tlatzacuiltili catli quin-  
titlanilis tlaixpanoca masehualme ipan ni  
tlaltipactli.

Huan monequis quijise hasta quitlamise ica  
nochi itetejtzo.

<sup>9</sup> Pero na para nochipa nitepohuilis nochí catli  
quichijtoc Toteco Dios,

yaya catli iTeco Jacob.

<sup>10</sup> Yaya quijtohua: “Na nijtlamiltis ininchic-  
ahualis nopa fiero masehualme,  
pero catli itztoque xitlahuaque noja niquinmacas  
más chicahualistli.”

- <sup>1</sup> Ipan tlali Judá huan hasta nochí tlali Israel nochí masehualme quiiximatiij Toteco Dios para nelía hueyi.
- <sup>2</sup> Itiopa eltoc ipan altepetl Jerusalén.  
Quena, ipan tepetl Sion moquetza ichaj.
- <sup>3</sup> Nopona quipojpostejqui nochí tlamantli inin-teposhua tocualancaitacahua.
- <sup>4</sup> ¡Nopa tepeme catli eltoque tlen huejcajya amo quipiyaj ininyejyejca quen tepetl Sion quipiya!
- <sup>5</sup> Nopa tocualancaitacahua catli más quipiyayaya j chicahualistli,  
quintlamitlacuicuilijque.  
Toixpa tepejtoque mictoque.  
Nyon se tlen inijuanti ayacmo hueli quitlananas imax para techhuilanas.
- <sup>6</sup> Quema ta tiToteco, catli tiiDios Jacob, tiquinajhuac nopa cahuayo jme huan catli tlejcotoyaj ininpani,  
nochí huetzque hasta tlalchi.
- <sup>7</sup> ¡Yeca nochí quiitaj para tlahuel titemajmati!  
Huan amo aqui huelis quiijiyohuis ijcatos moixpa quema tlahuel ticualantoc.
- <sup>8</sup> Hasta nepa ilhuicac titlayolmelahua para titel-latzacuiltis.  
Huan ni tlaltipactli majmahui huan amo molinía moixpa,
- <sup>9</sup> quema timotlananqui, Toteco Dios,  
para tiquintlatzacuiltis catli quichihuaj catli amo cuali,  
huan para tiquinmanahuis nochí catli moechcapanohuaj ipan ni tlaltipactli.

- <sup>10</sup> Ta tijtequihuía inincualancayo masehualme para sequinoc ma mitzhueyimatica.  
Huan tijtequihuis para más monextis moyekiyeja.
- <sup>11</sup> Xijchihuaca nochí catli anquitlajtolcahuilij-toque TOTECO para anquichihuase.  
Sesen ma quihualica nopa tlamatli catli quitenc-ahuilijtoc para quimacas Toteco Dios.  
Monequi ma tijhueyitlepanitaca huan ma tiquimacasica,
- <sup>12</sup> pampa yaya quintlamiltilia ininnemilis nopa huejhueyi tlayacanani.  
Quichihuas para nochí tlanahuatiani ipan tlalti-pactli ma quiimacasica.

## 77

*Monejnehuili David tlen catli Toteco quichijqui  
huejcajya*

- <sup>1</sup> Chicahuac nijtzajtzilía Toteco Dios para ma nech-palehui.  
Quena, nijnojnotza pampa nijnequi ma nechtla-caquilis.
- <sup>2</sup> Quema nechajsic miyac tlaijiyohuilistli nimantzi nijtemo noTeco.  
Seyohual nimomatlanantoya huan nimotlatla-jtiyaya,  
huan amo nijcahuili niyon se tlatoctzi.  
Amo nipaquis hasta yaya monextis huan nech-caquis.
- <sup>3</sup> Nimonejnehuilía tlen Toteco Dios huan niyol-pitzahuía huan nichoca.  
Nimotequipachohua pampa tlami nochicahualis, yeca tlahuel nijnequi ma nechpalehui.

- <sup>4</sup> Toteco, ta amo techcahuili ma nicochis.  
 Amo nechcahuilia nimotlatlajtis pampa tlahuel  
 hueyi ni notequipachol.
- <sup>5</sup> Tlatocztitzi nimonejnehuilia tlen nopa yejyectzi  
 tonali huan xihuime catli panoque huejca-  
 jya.
- <sup>6</sup> Niquelnamiqui sesen tlayohua quema  
 nihuicayaya ica paquilibrium.
- Quena, nimotlajtlachilía huan niquita para ama  
 nochí tlamanli tlahuel mopatlatoc.
- <sup>7</sup> ¿Huelis Toteco nechtlahuelcajtoc para nochipa?  
 ¿Huelis ayacmo quema nechpalehuis?
- <sup>8</sup> ¿Huelis ya tlanqui itlaicnelilis ica na?  
 ¿Huelis ya tlanqui catli achtihuiya techtlajtolc-  
 ahuii techmacas?
- <sup>9</sup> ¿Huelis Toteco Dios ya quielcajqui para monequi  
 nechchihuilis catli cuali na catli niitztoc  
 ipan tequipacholi?
- ¿Huelis tlahuel cualantoc huan yeca ayacmo  
 quinequi nechtlassoxtlas?
- <sup>10</sup> Huan ipan nohueyi tequipachol nimoilhui:  
 “Toteco Catli Más Hueyi mopatlatoc.  
 Achtihui niitztoya inejmac huan nechtiochi-  
 huayaya miyac,  
 pero ama nechcualancaita.
- <sup>11</sup> Más cuali niquelnamquis nochí nopa hue-  
 jhueyi tiochicahual nextili catli TOTECO  
 nechchihuli huejcajya.”
- <sup>12</sup> Quena, mojmostla nimoilhuis tlen nopa hue-  
 jhueyi tlamanli para nochipa.  
 Amo hueli nijcahuas nimonejnehuilis tlen yaya  
 quichijtoc.

**13** ¡NoTeco Dios, nelía tlatzejzeloltic nochí moojhui!

Amo aquí seyoc dios catli más quipiya chicahualistli que ta, titoTeco.

**14** ¡Ta tiDios catli tijchihua huejhueyi tiochicahual nextili huan miyac tlamantli catli masehualme quisentlachilíaj!

Huan hasta ama quejipa tijnextía mohueyi chicahualis.

**15** Ica mohueyi chicahualis techmanahui, timomasehualhua catli tiiconehua Jacob huan José.

**16** Toteco Dios, nopa hueyi atl catli itoca Chichiltic momajmati quema mitzitac.

Huan huihuipicac hasta tlatzintla campa más huejcatla.

**17** Nopa mixtli quichijqui ma tlaquiyahui chicahuac.

Huan tlatomonqui nepa ilhuicac.

Huan nojquia tlapetlanqui tlen se lado hasta seyoc.

**18** Caquistic tlatomonilotli ipan nopa hueyi ajcomalacatl.

Huan nopa tlapetlancayotl quitlahuili nochí tlaltipactli,

huan ni tlaltipactli huihuipicac.

**19** Tijchijqui se ojtli quema tiquixcotonqui nopa hueyi atl,

pero amo aquí quipanti campa tijquetziyajqui moicxihua.

**20** Huan ipan ni ojtli tiquinyacanqui momasehualhua quen eltosquíaj pilborrego jtitzitzi ininmaco Moisés huan Aarón.

# 78

*Catli huejcajya panoc ipan tlali Israel*

- <sup>1</sup> Nomasehualhua, xijtlacaquilica notlamachtil huan nochi catli niquijtohua,
- <sup>2</sup> pampa nimechnextilis tlamantli catli amo aqui más quimati catli panoc huejcaya.
- <sup>3</sup> Tlamantli catli tijcactoque huan tijmajtoque pampa totatahua techpohuilijque.
- <sup>4</sup> Quena, nimechmatiltis para anhuelise anquinpohuilise amocone hua nochi nopa yejyectzitz huan huejhueyi tlamantli, catli TOTECO quichijqui ica ihueyi chicahualis.
- <sup>5</sup> Toteco Dios quimacac miyac tlanahuatilme Jacob ipan tlali Israel para ma monejne-miltica xitlahuac, huan quinnahuati tohuejcapan tatahua ma quin-nextilica inincone hua,
- <sup>6</sup> huan inixhuihua catli tlacatise teipa. Huan quej nopa nochi masehualme quiniximatisce itlanahuatilhua Toteco.
- <sup>7</sup> Yeca hasta ama miyac masehualme quintlepanitaj itlanahuatilhua Toteco Dios, huan motemachíaj ipan ya para quinmocuitlahuis. Huan amo ma quielcahuaca nochi nopa huejhueyi tlamantli catli quichijtoc Toteco. Monequi ma quitoquilijtinemica nochi itlanahuatilhua.
- <sup>8</sup> Pampa amo quinamiqui para elise quen ininhuejcapan tatahua catli moyoltetilijque huan amo tlatlepanitaque. Inijuanti amo elque temachme ica Toteco Dios,

niyon amo quimactilijque ininyolo, niyon ininmealis.

<sup>9</sup> Nopa masehualme tlen tlali Efraín mocuepatoj huan cholojque ipan nopa tonali quema yohuiyaya tlahuilanatij.

Quena, cholojque masque quipiyayayaj miyac tepestli para tlahuilanase.

<sup>10</sup> Amo quintlepanitaque itlanahuatilhua Toteco Dios,

huan amo quinejque nejnemise ipan iojhui.

<sup>11</sup> Quielcajque nochí tlamatli catli yaya hueli quichihua.

Amo quielnamijque nopa yejyectzi tidochicahual nextili catli quichijqui Toteco.

<sup>12</sup> Quena, Toteco Dios quichijqui miyac tlamatli iniixtpa ininhuejcapan tatahua ipan tlali Egipto campa itoca Zoán.

<sup>13</sup> Quitlajcoxelo nopa hueyi atl huan quichijqui ma panoca.

Ipan ome lados nopa atl moquetzqui quen tepamitl.

<sup>14</sup> Ica tonaya quinyacanqui ica se mixtli para quinecahuilis,

huan ica tlayohua ica se mixtli catli tlahuiyaya quen tlitl.

<sup>15</sup> Ipan huactoc tlali quitlapo nopa hueyi tetl huan quisqui miyac atl para atlique hasta aixhuique.

<sup>16</sup> ¡Quena, ipan tetl quisqui miyac atl catli motlalo quen se hueyat!

<sup>17</sup> Pero injuanti quisenhuiquilijque amo quitlepanitaque.

Huan nepa campa huactoc tlali tlajtlacolchijque  
ica Toteco Catli Más Hueyi.

<sup>18</sup> Pampa quiyejyecojque Toteco Dios huan  
quitlajtlanjque tlacualistli catli ininyolo  
quinequiyaya.

<sup>19</sup> Hasta cuelanque ica Toteco huan quijitojque:  
“¿Atlac Toteco Dios huelis techtlamacas ipan ni  
huactoc tlali?”

<sup>20</sup> Xiquitaca, Toteco Dios quitlapo nopa hueyi tetl  
huan quisqui miyac atl quen eltosquia se  
hueyatl hasta atzonpoli tlali,  
pero ¿atlac nojquiya hueli techmacas tlacualistli?

¿Huelis techtlamacas tiimasehualhua ica nacatl?”

<sup>21</sup> Huan quema TOTECO quicajqui ni tlamantli,  
tlahuel cuelanqui.

Huan ipan icualancayo quisqui tlitl ica israeli-  
tame, inijuanti catli iixhuihua Israel,

<sup>22</sup> pampa inijuanti amo quineltocaque Toteco  
Dios,

niyon amo motemachijque ipan ya para quipiya  
chicahualistli para quinmaquixtis.

<sup>23</sup> Pero masque quej nopa quichijque,  
Toteco Dios quinahuati nopa mixtli huan quitlapo  
ilhuicactli.

<sup>24</sup> Huan quichijqui ma huetzi nopa tlacualistli  
catli itoca maná para ma quicuaca quen  
quema huetzi atl.

Quinmacac tlacualistli catli hualajqui tlen il-  
huicac.

<sup>25</sup> Masehualme quicuajque catli elqui  
inintlacualis itequihuajcahua Toteco.

Quena, quintlamacac hasta cuali ixhuique huan  
hasta mocajqui nopa tlacualistli.

- 26 Ica ihueyi chicahualis quihualicac nopa ajacatl catli huala campa hualquisa tonati huan catli huala ica tlani para ma tlaajaca campa ilhuicactli.
- 27 Quichijqui ma hualaca miyaqui totome quen imiyaca tlaltejpoctli.  
Quena, hualajque totome quen mixtli huan quen imiyaca xali catli onca iteno hueyatl.
- 28 Huan Toteco quichijqui para nopa totome ma huetzica tlatlajco campa quichijtoyaj ininyoyoncal.
- 29 Huan nopa masehualme tlacuajque hasta ixhuique.  
Toteco quinmacac nacatl quen ininyolo quinequiyaya.
- 30 Pero quema sanoc tlantoyaj tlacuaj, huan hasta noja quipixtoyaj nacatl ipan ininamac,
- 31 Toteco Dios motlananqui ica ihueyi cualancayo, huan quintzontlamilti noch i nopa telpocame catli más tlapetjpenilme ipan tlali Israel.
- 32 Pero masque Toteco quinchihuili ya nopa, nopa masehualme quisenhuiquilijque tlajtlacolchijque, huan amo quineltocaque nopa huejhueyi tiochicahual nextili catli yaya quichijqui iniixpa.
- 33 Yeca Toteco quintlaijiyhuiti ipan noch ininemilis huan quintzontlamilti san ica se tlatoctzi.
- 34 Pero teipa, quema ya quintzontlamiltijtoya sequin, huajca quena, ne sequinoc quitemojque Toteco Dios.

¡Quena, nimantzi mocuepque huan quitoquili-jque!

<sup>35</sup> Huan quielnamijque para yaya Toteco Dios catli quinmocuitlahuiyaya para amo quinajsis catli amo cuali.

Huan quielnamijque para Toteco Catli Más Hueyi san yaya inintemaquixtijca.

<sup>36</sup> Pero nopa israelitame amo quitoquiliyayaj ica nochí ininyolo.

¡Amo! Quitoquiliyayaj san ica inincamac.

<sup>37</sup> Pampa ininyolo eltoya huejca tlen Toteco.

Huan amo quichihuayayaj catli quitlajtolcahuilij-toyaj Toteco para quichihuase.

<sup>38</sup> Pero Toteco quipixqui hueyi iyolo ica inijuanti.

Quintlapojpolhuiyaya inintlajtlacolhua huan amo quintzontlamiltiyaya.

Miyac huelta quiquetzqui icualancayo para amo quintlatzacuiltyis.

<sup>39</sup> Pampa Toteco quielnamijqui para inijuanti san elque masehualme catli ininnemilis ixpolihui san ica se tlatoctzi,

huan amo quema mocuepasquíaj sempa.

<sup>40</sup> Nepa ipan huactoc tlali,

tlahuel miyac huelta amo tlatlepanitaque ica Toteco Dios huan quiyolcocojque.

<sup>41</sup> Tlatocztitzi quiyejyecojque,

huan ica ya nopa quichihuaultiyayaj para Toteco ma quintzontlamilti.

Niyon amo quicahuilijque para Toteco ma quintiochihua,

yaya catli ininDios israelitame huan catli Tlatzeloltic.

- 42** Quielcajque ihueyi chicahualis huan iteicnelijcayo.
- Huan quielcajque quenicatza quinmanahui ininmaco inincualancaitacahua.
- 43** Quielcajque quenicatza Toteco quititlanqui tlatzacuiltili ipan tlali Tanis huan ipan tlali Egipto.
- 44** Quielcajque quenicatza quicuepqui estli nopa atl huan ayacmo aqui huelqui quijic.
- 45** Quielcajque quenicatza quintitlanqui tlahuel miyac sayolime hasta quitemitijque nopa tlali.
- Quielcajque quenicatza nopa temasolime quitemitijque nopa tlali Egipto.
- 46** Toteco quintitlanqui ocuilime huan chapolime para ma quicuaca inintlatochui huan ininpixquilis.
- 47** Ica tesihuitl quintzontlamilti ininxocomecamil huan ininhigueramil.
- 48** Ininhuacaxhua mijque ipan potrero pampa Toteco Dios quinmajcahuili tesihuitl catli tlahuel huejhueyi.
- Huan ininborregojhua mijque ica tlapetlancayotl.
- 49** Quena, Toteco tlahuel cualanqui ica inijuanti, huan yeca quintitlanili tlacuajcualocayotl huan tlaohuijcayotl.
- Huan quintitlanili se pamitl tlen itequihuajcahua Toteco catli tetzontlamiltiaj.
- 50** Cualanqui nelchicahuac huan amo quimanahui niyon se Egipto ejquetl.
- San quintitlanili tlatzacuiltili huan huejhueyi colistli.

- 51 Teipa Toteco quinmicti nopa achtihiu ehuani  
ipan sesen familia tlen tlali Egipto.  
Quena, quinmicti catli elqui iniachtihiu fuerza  
quema pejque quinpiyaj coneme.
- 52 Pero quinquixti imasehualhua quen elisquíaj  
pilborregojtzitzi,  
huan quinyacanqui ica yejyectzi ipan nopa  
huactoc tlali.
- 53 Quinyacanqui ica miyac temachili para ma amo  
majmahuica.  
Pero nopa hueyi atl quinatzonpolihuulti inin-  
cualancaitacahua.
- 54 Huan quinhuicac hasta campa inepa nopa tlali  
catli tlatzejtzelotic.  
Nopa tlali catli quipiya miyac tepeme catli Toteco  
quintlanili para inijuanti.
- 55 Iniixpa quintojtocac nopa masehualme catli itz-  
toyaj ipan nopa tlali.  
Teipa quitamachijqui huan quinmajmacac nopa  
huejhueyi familias tlen israelitame para  
inaxca.  
Huan nopona quincajqui ma itztoca.
- 56 Pero masque quinchihuili ya nopa,  
inijuanti quisenhuiquilijque quiyejyecohuaj  
huan quicualancamacaj Toteco Catli Más  
Hueyi.  
Huan amo quinejque quitlepanitase icamanal.
- 57 Yeca mocuepque para amo calaquise ipan nopa  
tlali tlatencahuali huan quicamaijixnami-  
jque san se quen intatahua quichijque.  
Huan quen se cuatlamintli catli huijcoltic amo  
yohui xitlahuac quema quimajcahuaj,

inijuanti nojquiya amo yajque xitlahuac para  
quichihuase ipaquilis Toteco.

**58** Quicualancamacaque Toteco pampa mochijchi-  
huilijque teteyome huan tlaixpamitl para  
quinhueyichihuase ininteteyohua.

**59** Pero quema Toteco Dios quiitac ya ni,  
tlahuel cualanqui huan pejqui quincualancaita.

**60** Huan quitlahuelcajqui itiopa catli eltoya ipan  
altepetl Silo,

nopa yoyon cali campa ipan itztoya catli quichij-  
toya nopona ininhuaya imasehualhua.

**61** Huan Toteco quincahuili inincualancaitacahua  
ma quihuicaca icaxa catli quinpixtoya it-  
lanahuatilhua.

Elqui quen quincuilijque ininchicahualis huan  
ininyejyejca.

**62** Nojquiya quintemactili imasehualhua  
inimaco inincualancaitacahua para ma  
quinmictica ica machete,  
pampa yaya tlahuel cualantoya ininhuaya.

**63** Inintelpocahua quintlatijque,  
huan iniichpocahua quintzontlamiltijque,  
niyon amo quiaxilijque para monamictise huan  
huicase ipan nemamictili.

**64** Quintzontlamiltijque nopa totajtzitzi ica ma-  
chete huan ininsihuajhua nojquiya mijque  
nimantzi,

niyon amo quinchoquilijque ininhuehuejhua.

**65** Huajca Toteco motlananqui quen quema se aca-  
jya cochi huan mehua,

o quen se tetica tlacatl catli tlahuel tzajtzi chic-  
ahuac pampa ihuintitoc.

- <sup>66</sup> Huan Toteco quinichtacahui quinhuilanqui icualancaitacahua.  
 Quena, quinhuejcamajcajqui huan quintitlanqui ipan se lugar campa quipanose pinahualistli para nochipa.
- <sup>67</sup> Pero Toteco quintlahuelcajqui nopa huejhueyi familias catli hualajqui tlen José huan Efraín.
- <sup>68</sup> San quintlapejpeni ihueyi familia Judá, huan nopa tepetl Sion catli yaya tlahuatl quiicnelyaya.
- <sup>69</sup> Huan npona quichijchijqui itiopa catli yejyectzi huan temachtli, huan catli huejcahuasquía para nochipa quen huejcahua ilhuicactli huan tlaltipactli.
- <sup>70</sup> Quitlapejpeni itequipanojca, David, quema quinmocuitlahuiyaya borregojme,
- <sup>71</sup> quema yohuiyaya inintepotzco nopa tenan borregojme catli quinpiyayayaj ininconehua, huan quinhualicayaya para ma quinmocuitlahui. Huan Toteco quichijqui David ma quinyacana imasehualhua, nopa israelitame catli quintlapejpenijtoya para iaxcahua.
- <sup>72</sup> Huan quena, David quinmocuitlahui imasehualhua Toteco ica noch i chicahualis huan ica noch iyolo.

## 79

*Tequipacholi pampa masehualme quisosololque Jerusalén*

<sup>1</sup> ¡NoTeco Dios, masehualme tlen sequinoc tlalme hualajque huan moaxcatijque motlal!

Motiopa quiijtlacojque huan altepetl Jerusalén  
quitlamisosolojtoque.

<sup>2</sup> Nochi inintlacayo momasehualhua quinmajcaj-  
toque para ma quincuaca totome.

Hasta quinmajcajtoque ininnacayo mototajtzitzi,  
nopa tlatzejtzeloltiljca tlacame catli moquetzque  
moixpa,

para ma quincuaca tecuanime.

<sup>3</sup> Quena, tocualancaitacahua quintzontlamilti-  
jque nochি nopa masehualme ipan altepetl  
Jerusalén.

Huan inieso catli toyajqui motlalo quen hueyatl,  
huan amo mocajqui niyon se para quintalpachos.

<sup>4</sup> Huan ama nochи tlalme catli techyahualojoque  
techpinajtiaj huan techhuetzquiláj.

<sup>5</sup> Toteco Dios, ¿hasta quema tlamis ticualantos ica  
tojuanti?

¿Huelis para nochipa mocualancayo eltos quen  
tlitl?

<sup>6</sup> Xijtitlani mohueyi cualancayo ipan nopa tlalme  
campa amo mitziximatiј,

huan ipan altepeme campa amo aqui mitzhueyi-  
mati,

pero amo xijtitlani ipan tojuanti.

<sup>7</sup> Pampa inijuanti quintzontlamiltijque  
nochи moisraelita masehualhua huan  
quinsosolojque nochи calme.

<sup>8</sup> ¡Amo xiquelnamiqui huan techtlatzacuilti por  
inintlajtlacolhua tohuejcapan tatahua,

catli inijuanti quichijque huejcajya!

Más cuali nimantzi techtlasojtlapampa ayacmo  
tijpiyaj fuerza.

<sup>9</sup> Toteco Dios, titotemaquixtijca, techpalehui,

para quej nopa nochí mitzhueyitlepanitase.  
 ¡Techmaquixti huan techtlapojojpolhui totlajtlacol-  
 huia ica mohueyi tlaicnelilis!  
 10 Pampa sintla amo techpalehuis,  
 huajca nopa masehualme catli amo mitzneltocaj  
 quiijtose:  
 “¿Canque itztoc ininTeco Dios?”  
 Huajca xiquintlatzacuilty, Toteco, iniixta  
 nochime, pampa quinmictijque  
 momasehualhua.  
 11 Xijtlacaquili inintequipachol nopa  
 masehualme catli tzactoque,  
 huan ica mohueyitilis huan mohueyi chicahualis,  
 xiquinmanahui catli quinixquetztoque para quin-  
 mictise.  
 Xiquinmaquixti para nochí ma quiitaca mohueyi  
 chicahualis.  
 12 TOTECO, xiquincuepili chicome huelta catli  
 mitzchihuilijque quema mitzpinahualti-  
 jque nopa tlalme catli san mitzhuetzquiláj.  
 13 Huan huajca tojuanti, timomasehualhua catli  
 tiitztoque quen timoborregojhua,  
 timitzhueyichihuase para nochí tonali huan tim-  
 itzpaquilismacase ica huicatl para nochipa.

## 80

*Netlatlajtili para Toteco ma quicualtlali tlali Is-  
 rael huan imasehualhua*

<sup>1</sup> ¡Ta catli tiinintlamocuitlahuijca israelitame  
 huan techyacana quen tielisquíaj  
 timoborregojhua,  
 techtlacaquili!

Ta catli timosehuijtoc tlatlajco nopa querubines  
tequihuajme,

ximohujitzoma quentzi huan techtlacaquili  
quema timotlatlajtíaj.

Xijnexti mohueyi chicahualis huan mohueyitilis  
catli petlani.

<sup>2</sup> Xijchihua para nochí tiisraelitame,  
hasta nojquiya iniihxuihua Efraín, Benjamín huan  
Manasés,

ma tiquitaca quenicatza timotlananas huan tech-  
manahuis ica mohueyi chicahualis.

<sup>3</sup> Toteco Dios, techchihua ma timocuepaca ica ta.  
Techtlachili ica se moixayac catli senpactoc.

Techicneli huan techmaquixti.

<sup>4</sup> TOTECO, ta tiDios Catli Tijpiya Nochi Chicahual-  
istli,

¿hasta quema tlamicus ticalantoc ica tojuanti huan  
amo tijtlacaquilis quema timotlatlajtíaj?

<sup>5</sup> Techmacatoc ma tijcuaca pantzi ica choquistli,  
huan ma tiquijica toixayo.

<sup>6</sup> Tijcajtoc ma techpinahuáltica nopa tlalme catli  
techyahualohuaj huan ma techhuetzquil-  
ica tocualancaitacahua.

<sup>7</sup> Toteco Dios, ta tiDios Catli Tijpiya Nochi Chic-  
ahualistli, xijchihua ma timocuepaca ica ta.

Techtlachili ica moixayac catli senpactoc.

Techicneli huan techmaquixti.

<sup>8</sup> Techhualicac tlen tlali Egipto quen tiellosquíaj se  
xocomeca tzontli catli selic.

Tiquintojtocac nopa sequinoc masehualme catli  
amo mitziximatque huan nopona techto-  
jqui.

**9** Tijcualtlali nopa tlali huan elque quen tijpixque miyac tonelhuayohua.

Huan tijtemitijque nopa tlali.

**10** Nopa tepeme tiqquintlamitzajque ica toecahuil.

Huan tielque quen tiocuame catli huejcapantique catli moaxcahua, Toteco.

**11** Tichamanque huan moscaltijque tomacuayohua.

Huan toecahuil tiisraelitame ajsic hasta campa nopa hueyi atl catli itoca Mediterráneo huan hasta campa nopa hueyatl Eufrates.

**12** Huajca ¿para tlen ayacmo techmocuitlahuía?

Eltoc quen tijtlamisosolo itepanyo moxocomecamil huan tijcahua ma quitlamicuaca nochí ojtipanyani.

**13** Inijuanti itztoque quen cuapitzome catli hualahuij huan tlapoxoníaj yahualtic tlen tojuanti,

huan eltoc quen nopa tecuanime ya techtlamicuaj.

**14** Yeca Toteco Dios Catli Tijpiya Nochi Chicahualistli timitztlajtlaníaj,

ximocuepa huan techtiochihua.

Techhualtlachili tlen nopona ilhuicac,

ximomaca cuenta quenicatza tiitztoque huan xijmocuitlahui ni moxocomecamil.

**15** Quena, xijmocuitlahui catli ta tijtojqui huan nopa ichamanca catli cuali tijtlatzquiltijtoc.

**16** Pampa tocualancaitacahua techhuejhuelojoque huan techtlatijtoque.

¡Xiquintzontlamilti ica mohueyi cualancayo!

<sup>17</sup> Xijmaca chicahualistli nopa telpocatl catli tiquicnelía huan tijtlapejpenijtoc para tlanaahuatis.

<sup>18</sup> Quej nopa ayacmo quema timitzlahuelcahuase.

Techmaca yancuic nemilistli huan sempa timitznotzase huan timotlatlajtise moixpa ta.

<sup>19</sup> Techchihua ma timocuepaca sempa ica ta, TOTECO,

ta tiDios Catli Tijpiya Nochi Chicahualistli.

Sempa techtlachili ica se moixayac catli senpactoc.

San ica ta motlapalehuil timomaquixtise tlen tocualancaitacahua.

## 81

*Toteco quihiya hueyi iyolo ica nopa tlaixpanoca israelitame*

<sup>1</sup> ¡Xihuicaca ica paquelistli para Toteco Dios, pampa yaya techpixtoc imaco!

¡Ma tijpaquilismacaca!

¡Ma tihuicaca para Toteco Dios yaya catli iTeco Jacob!

<sup>2</sup> Ma tihuicaca huan ma tijtzitzilinica pandero. Nojquiya ma tijtzotzonaca nopa arpa huan guitarra.

<sup>3</sup> Ma tijpitzaca tlapitzali quema yancuic metztli, quema temitoc metztli, huan ipan sequinoc tonalme quema tiilhuichihuaj,

<sup>4</sup> pampa Toteco Dios catli eli iTeco tohuejcapan tata Israel techmacatoc nopa tonalme para ma tipaquica miyac.

Huan nojquiya eltoc ijcuilijtoc ipan itlanahuatil-hua para ma tijchihuaca.

<sup>5</sup> Huan techmacac para ma tiquelnamiquica catli quichijqui ica José,

huan quenicatzca mohuilanqui ininhuaya nopa masehualme tlen tlali Egipto,  
campa titetequipanojque san tlapic.

Nijcajqui camanaltic se catli amo niquiximatqui huan quijito:

<sup>6</sup> “Ama nimechquixtilis nopa tlamamali catli an-  
quihiucaj amoajcolpa,  
huan ayacmo anquitlananase ica amomax tla-  
mantli catli tlahuel etic.”

<sup>7</sup> Nojquiya quijito:

“Amojuanti antechtzajtzilique quema  
anitztoyaj ipan tlaohuijcayotl huan na  
nimechmaquixti.

Nimechnanquili hasta tlen nepa tepetl Sion  
campa motlatía nopa tlatomonilotl.

Nojquiya ipan tlali Meriba nimechyejyecoli  
amotlaneltoquilis quema anmotequipa-  
chohuayayaj pampa amo oncayaya atl.

<sup>8</sup> Yeca annoisraelita masehualhua,  
techtlacaqilica quema chicahuac nimechtlac-  
ahaultía.

<sup>9</sup> Amo quema xijhueyichihuaca seyoc catli quito-  
caxtiaj ‘dios’.

Nyon amo xiquinpiyaca tlaixcopincayome ipan  
amocalijtic.

<sup>10</sup> Pampa elqui na, niamotECO huan amoDios,  
catli nimechquixti ipan tlali Egipto.

Xijtlapoca amocamac huan anquiiitase sintla amo  
nimechixhuitis.

Quena, anquiselise nochí tlamtli tlatiochihualistli catli amechpolohua.

**11** ¡Pero amo! Nomasehualhua amo quinejque nechtlacaquilise.

Israelitame amo quinejque ma niitzto tlatlajco inijuanti.

**12** Yeca niquintlahuelcajqui para ma huihuitiyaca huan ma elica quen popoyotzitzí.

Huan niquincahuili ma quichihuaca catli inijuanti quinequiyayaj.

**13** Pero sintla noisraelita masehualhua nechtlacaquilijtosquíaj huan quitoquilijtosquíaj noojhui,

**14** huajca na san ipan se tlatoctzi niquinechcapantlalijtosquía inincualancaitacahua huan niquintzontlamiltijtosquía.”

**15** Quena, nochí catli quicualancaitaj TOTECO, nimantzi moechcapanojtosquíaj iixpa.

Huan itztosquíaj ipan tlatzacuiltli para nochipa.

**16** Pero Toteco Dios amechtlamacasquía ica tlacualistli catli más cuali.

Huan amechmacasquía sayolnectli huan nochí catli más anquinequij para amechixhuitisquía.

## 82

*Toteco quinajhuac nopa jueces catli amo tetlaj-tolsencahuaj xitlahuac*

**1** Toteco Dios itztoc ipan se hueyi tlasentilistli nepa ilhuicac.

Huan nopona tlayolmelahua quenicatza quintlatzacuiltis nopa jueces huan quinilhuía:

- <sup>2</sup> “¿Hasta quema tlamic antlacajcayahuaj quema  
antetlajtolsencahuaj?  
¿Hasta quema tlamic anquinchicoicnelise amo  
cuajcualme catli fiero quichihuaj?  
<sup>3</sup> Xiquintenpalehuica catli ayamo quipiyaj tetili  
huan catli icnotzitzit.  
Xiquintlajtolsencahuaca catli tlaijiyohuáj huan  
catli amo tleno quipiyaj.  
<sup>4</sup> Xiquinmaquixtica catli ayacmo quipiyaj chic-  
ahualistli huan quinpolohua catli quin-  
monequilía.  
Quena, xiquinmanahuica ininmaco nopa mase-  
hualme catli amo aqui quitlepanitaj.  
<sup>5</sup> Amojuanti catli anquintlaijiyohuiltíaj amo tleno  
anquimati j huan amo tleno anquimachilíaj.  
Annemij ipan tzintlayohuilotl huan nochitzinpe-  
hualtil tlaltipactli huihuipica.  
<sup>6</sup> Quena, na nimechtocaxtijtoc ‘andioses’ huan ‘an-  
nocone hua ni Dios Catli Más Hueyi’,  
<sup>7</sup> pero quema hualas miquilistli, nimantzi an-  
miquise pampa amojuanti san anmase-  
hualme.  
Amopantis quen ipanti aqui hueli masehuali catli  
quipiya tequiticayotl,  
pampa nochimiquise.”  
Quej nopa quijto Toteco.
- <sup>8</sup> ¡Toteco Dios, ximotlanana huan xijtlajtolsenc-  
hua ni tlaltipactli,  
pampa nochimoa xca!  
Nochi tlalme huan tlanahuatiani eltoque mo-  
maco.

## 83

*Toteco, xiquintlatzacuilty catli quicualancaitaj Israel*

- <sup>1</sup> Toteco Dios, amo san xitlacacto,  
niyon amo san xitlachixto quema timotlatlajtíaj!  
Monequi technanquili huan techmanahui,
- <sup>2</sup> pampa mocualancaitacahua tlahuejchihuaj  
hasta quen nanalcaj huan mohueyimatiij  
ica ta.
- <sup>3</sup> Inijuanti tlahuel quimatiij quenicatza quitlalise  
tlaquetztlí ica momasehualhua.  
Huan quisencahuaj quenicatza quichihuase para  
quinmictise catli tiquintlapejpenijtoc.
- <sup>4</sup> Huan quijjtohuaj:  
“Ma tiyaca tiquinixpolotij nochí nopa israelitame  
para ayacmo ma elica se tlali ica imasehual-  
hua.
- Huan ayacmo aqui quielnamiquis itoca Israel.”
- <sup>5</sup> Ya nopa catli quisencajque san sejco quema  
mosentilijque para mocamanalhuise.
- Quena, san sejco quichijque se camanali para  
fiero mitzchihuilise.
- <sup>6</sup> Nopa masehualme elque iixhuihua Edom, Is-  
mael, Agar huan Moab.
- <sup>7</sup> Nojquiya inijuanti hualajque tlen nopa tlalme  
Gebal, Amón, Amalec, Filistea huan Tiro.
- <sup>8</sup> Huan nopa masehualme tlen tlali Asiria no-  
jquiya mosansejcotilijque ininhuaya.  
Nojquiya iixhuihua Lot.
- <sup>9</sup> Xiquinchihuili san se quen tiquinchihuili tlali  
Madián ehuani,  
o quen tijchihuili Sísara huan Jabín ehuani ipan  
hueyatlı Cisón.

- 10** O xiquinchihuili quen tijchijqui ica mocualan-caitacahua ipan tlali Endor.  
 Inijuanti inintlacayohua mocajque tepejtoque tlalchi huan elque quen abono para tlali.
- 11** Xijchihua para nopa tlacame catli tlahuel tejete-tique ma miquica quen Oreb huan Zeeb quinmictijke.  
 Huan nojquiya xijchihua para inintlayacancahua ma miquica quen nopa tlanahuatiani Zeba huan Zalmuna.
- 12** Pampa inijuanti quiijtojque:  
 “Ma timoaxcatica nopa tlali catli iaxca Dios.”
- 13** NoTeco Dios, xiquinsemana ica moijiyo quen inijuanti elisquíaj tlaltejpocatl,  
 o quen tlasoli catli quihuica ajacatl,
- 14** o quen se hueyi tlitl catli quitlamitlatía ipan se cuatitlamitl.
- 15** Xiquintojtoca ica huejhueyi tlitl, ica tlatomonilotl,  
 huan ica huejhueyi ajcomalacatl.
- 16** TOTECO, xiquinpinahualti nochí hasta mitzixi-matise ta huan mohueyi chicahualis.
- 17** Ayacmo ma quimatica tlaque quichihuase.  
 Ma mopinahaultica huan ma huetzica ipan maj-majtli.
- 18** Quena, xiquinchihuili ya nopa hasta quimachilise para san ta tiTOTECO,  
 huan para ta tiDios Catli Más Hueyi huan para san ta tijnahuatía nochí tlaltipactli.

**84**

*Masehualme tlahuel quinejque itztose ipan  
 itiopa Toteco*

- <sup>1</sup> TOTECO, ta tiDios Catli Tijpiya Nochi Chicahual-  
istli,  
tlahuel yejyectzi motiopa.
- <sup>2</sup> Nelía tlahuel nijnequi nicalaquis ipan icalixpa  
nopa tiopamitl,  
para nimonechcahuis huan nihuicas ica nochi  
noyolo para ta, Toteco Dios, catli tiitztoc.
- <sup>3</sup> TOTECO, ta tiDios Catli Tijpiya Nochi Chicahual-  
istli,  
Ta tinotlanahuatijca huan tinoTeco.  
Campa motlaixpa ipan mochaj nochi quipantíaj  
ininchaj,  
hasta nopa cocheme huan toctoctzitzi catli no-  
pona motepasoltíaj,  
para nopona quintlacatiltíaj ininconehua.
- <sup>4</sup> ¡Nelía paquij nopa masehualme catli itztoque  
ipan motiopa huan quisenhuiquilíaj mitz-  
paquilismacaj!
- <sup>5</sup> Cuali ininpanti nopa masehualme catli itztoque  
momaco, Toteco,  
huan quitoquilíaj moojhui huan yohuij Jerusalén  
para mitzhueyimatise.
- <sup>6</sup> Quema panose campa ohui huan ipan nopa tla-  
mayamitl tlen Choquistli,  
quicuepase para elis quen se yejyectzi ameli catli  
temitos ica atl quema tlaquiyahui,  
pampa nopona quipantise miyac tlatiochihual-  
istli,
- <sup>7</sup> Huan quej nopa nejnentiyase mojmostla ica más  
chicahualistli,  
huan ajsise ipan Jerusalén para nopona monex-  
tise moixpa, Toteco.

<sup>8</sup> TOTECO Dios, ta tiDios Catli Tijpiya Nochi Chicahualistli, techtlacaquili quema nimotlatlajtía.

Quena, techtlacaquili ta tiiTeco Israel.

<sup>9</sup> Toteco, ta catli techmanahuía.

Xijcualita huan xijtiochihua nopa tlanahuatijquetl catli ticaltijtoc para tlanahuatis ipan Israel.

<sup>10</sup> Achi más cuali ma niyolto se tonal huan ma niitzto ipan motiopa, Toteco, huan amo niyoltos se mil tonali huan san ninentinemis campa hueli.

Quena, achi más cuali nimoquetzasquía campa ipuerta motiopa, Toteco, huan amo niitztos ipan se hueyi cali campa onca tlajtlacoli.

<sup>11</sup> Pampa ta, Toteco Dios, techtlahuilía huan techmanahuía.

Ta techicnelía huan techhueytلالیا. Huan nochi catli monejnemiltíaj xitlahuac ipan moojhui, ta tiquinmacas nochi tlamantli cuajcuali catli ini-juanti quinequij.

<sup>12</sup> Toteco Dios, ta tiDios Catli Tijpiya Nochi Chicahualistli, nelía paquij nopa masehualme catli motemachíaj ipan ta para tiquinmocuitlahuis.

## 85

*Netlatlajtili para Toteco ma quintlasoxtla nopa israelitame*

<sup>1</sup> TOTECO, ta techtitlanilijtoc miyac tlatiochihualistli catli yejyectzitzti ipan ni tlali,

- pampa sempa tiquinhualicac nica iixhuihua Jacob catli itztoyaj ipan sequinoc tlalme,
- <sup>2</sup> Tiquinquixtili inintlaixpanolhua nochi momasehualhua.
- Quena, tiquixtlalpacho nochi inintlajtlacolhua.
- <sup>3</sup> Timoyottlali tohuaya huan ayacmo tlahuel ticualantoc.
- <sup>4</sup> NoTeco Dios, ta catli titemaquixtía, ama xijchihua para sempa ma timitzicnelica para ayacmo quema techajsis mohueyi cualancayo.
- <sup>5</sup> ¿O huelis tijsenhuiquilis ticualantos tohuaya para nochipa?
- ¿O huelis tijhueyilis mohueyi cualancayo para nochixihuít?
- <sup>6</sup> Toteco Dios, sempa techtlanana, huan tojuanti timomasehualhua sempa timopaqilismacase ipan ta.
- <sup>7</sup> TOTECO, technextili mohueyi tlaicnelilis, huan techmaquixti.
- <sup>8</sup> Na nijtlacaquilitoc nochi catli quijtohua TOTECO Dios, pampa yaya quincamanalhuis itlatzejzeloltijca masehualhua catli quintlapejpenijtoc. Huan catli quijtos quinmacas tlasehuilistli ipan ininyolo, para inijuanti ma ayacmo mocuepaca ipan nopa ojthli catli huihuitic campa nemiyayaj ipan tlajtlacoli.
- <sup>9</sup> Melahuac Toteco Dios itztoc nechca para quinmaquixtis masehualme catli quitlepanitaj huan quiimacasij quiixpanose.

Se tonal ihueyitilis Toteco quitemitis totlal.

<sup>10</sup> Campa hueli mopantise tlaicnelijcayotl huan catli melahuac.

Campa hueli nochí quimatise para quichihuase nochí catli xitlahuac huan quej nopa oncas tlasehuilistli campa hueli.

<sup>11</sup> Catli melahuac elis campa hueli ipan tlaltipactli, huan yaya catli senquistoc xitlahuac hualtlachixtos tlen nepa ilhuicac huan paquis ica catli quiitas.

<sup>12</sup> Quena, TOTECO quititlanis itlatiochihual ipan ni totlal,

huan nochí totlatochui temacas itlajca.

<sup>13</sup> Campa hueli yas Toteco oncas catli melahuac, huan nochipa iojhui elis xitlahuac.

## 86

### *Netlatlajtili para Toteco ma quipalehui*

<sup>1</sup> TOTECO, ximohuijtzoma quentzi huan techtla-caquili quema nimotlatlajtía.

Technanquili pampa niteicneltzi huan niitztoc ipan tequipacholi huan tlaohuijcayotl.

<sup>2</sup> NoTeco Dios, techmanahui pampa na nijchihua campica para nijchihuas catli quiijtohuaj motlanahuatilhua.

Techmaquixti pampa na nimitztequipanohua huan san ipan ta nimotemachía para techmocuitlahuis.

<sup>3</sup> TOTECO, xijpiya hueyi moyolo ica na pampa nochí se tonal nimitztzajtzilijtoc,

huan ipan ta nimochiya para techpalehuis.

<sup>4</sup> Toteco, techmaca paquilitli pampa na san ta nimitzhueyichihua.

**5** Toteco, ta nelía ticuali huan timoquetztoc timo-  
cualtlalijtoc para titetlapojpolhuis.

Tiquinicnelía huan nimantzi tiquintlasojtla nochí  
catli mitztlajtlaníaj motlapalehuil.

**6** TOTECO, techtlacaquili quema nimotlatlajtía.

Quena, techtlacaquili quema nimittzajtzilíá.

**7** Nimittzajtzilis ipan nopa tonali quema nechaj-  
sis tlaohuijçayotl,

pampa san ta technanquilíá huan techpalehuía.

**8** Ipan nochí sequinoc catli quintocaxtíaj “dioses”,  
amo onca seyoc quen ta, Toteco.

Huan amo aqui hueli quichihua huejhueyi tla-  
mantli quen ta tijchihua.

**9** Elqui ta catli tiquinchijchijqui nochí tlalme ica  
inimasehualhua.

Yeca hualase huan mitzhueyichihuase, Toteco.

Huan mitzhueyitlalise ta catli titlatzejzeloltic,

**10** pampa ta tlahuel tihueyi huan tijchihua hue-  
jhueyi tlamantli.

¡San ta nelía tiDios!

**11** TOTECO, technextili moojhui huan nijtoquilis  
pampa san ya nopa temachtli.

Xijchihua para noyolo ma mitzhueyitlepanita,  
huan ma quiimacasis mitzixpanos nochí none-  
milis.

**12** TOTECO Dios, nimitzpaquilismacas ica nochí  
noyolo huan nimitzhueyitlalis para  
nochipa,

**13** pampa tlahuel hueyi motlaicnelilis noca na,  
huan amo quema tlami.

Ta techmanahuijtoc para amo niyas mictla campa  
tlanahuatía miqualistli.

**14** Toteco Dios, miyac masehualme catli mohueyi-matij huan catli mosisiníaj motlanantoque para nechhuilanase.

Huan miyac tlahuilanca masehualme huan tlaixpanoni quinequij nechmictise, huan amo monejnehuiláj tlen ta.

**15** Pero ta Toteco nelía titetlasojtla huan hueyi moyolo.

Amo nimantzi ticualani.

San ta titeicnelía huan san ta timelahuac.

**16** Techtlachili ica miyac tlaicnelijcayotl huan techmaca chicahualistli na nimotequipanojca.

Huan xijmanahui icone mosihua tequipanojca.

**17** Xijnexti se tlanextili para ta techcualita.

Quej nopa quiitase nocualancaitacahua, huan mopinahuase pampa momacase cuenta para ta, TOTECO,

tlahuel techpalehuía huan techyoltlalía.

## 87

*Nelía elis se hueyi paquelistli para catli ehuaj altepetl Jerusalén*

**1** Altepetyl Jerusalén eltoc ipan nopa tepetl tlatzeljtzelotic catli iaxca Toteco.

**2** Huan TOTECO quiicnelía Jerusalén achi más que nopa sequinoc pilaltepetzitzti ipan tlali Israel.

**3** Quena, Jerusalén eltoc ialtepe Toteco Dios, huan quema masehualme quielnamiquij, camanaltij nelyejyectzi tlen nopa altepetl.

- <sup>4</sup> Quema tlatlajco nohuampoyohua ni quintocaxtía  
nopa tlalme catli inintoca Egipto, Babilonia,  
Filistea, Tiro huan Etiopía,  
itztos se catli mohueyimatis pampa tlacatqui ipan  
se tlen nopa tlalme.
- <sup>5</sup> Pero ajsis tonali quema masehualme quiselise  
más hueyi tlatlepanitacayotl pampa tla-  
catque ipan altepetl Jerusalén,  
pampa Toteco Catli Más Hueyi quitiochihuas ni  
altepetl.
- <sup>6</sup> Huan TOTECO quiijcuilos inintoca nochí catli  
itztoque ipan nopa altepetl.  
Huan nochí catli tlacatque nopona quintlalilis se  
tlanextili campa ijcuilijtos inintoca.
- <sup>7</sup> Huan quema ilhuichihuase inijuanti, huicase ica  
paquilibrium huan quiijtose:  
“Nochi noyolo nijtlalijtoc ipan Jerusalén.”

## 88

*Netlatlajtili para Toteco ma quinmanahui  
imaco miquilistli*

- <sup>1</sup> TOTECO, ta catli tinoDios huan tinotemaqueixti-  
jca.  
Tonali huan yohuali nimitztzajtzilijtoc para tech-  
palehui.
- <sup>2</sup> Techtlacaquili quema nimotlatlajtía huan  
quema nimitztzajtzilía,
- <sup>3</sup> pampa nijmati nisiyajtoc ica nochí catli amo  
cuali hasta nijmati ya nechcatitoc para nim-  
iquis.
- <sup>4</sup> Miyac quiijtohuaj para ya tlantinemi nonemilis  
huan para ayacmo nijpiya chicahualistli.

**5** Masehualme nechtlahuelcajtoque para ma nimiqui.

Niitztoc quen se catli ya mijqui ipan tlahuilancayotl huan nochí quielcahuaj sintla itztoya.

Huan eltoc quen ta techelcajqui huan ayacmo techmocuitlahuía.

**6** Ta techmajcajtoc ipan nopa ostotl catli más huejcatla campa onca tzintlayohuilotl catli más yayahuic.

**7** Mocualancayo nechtaijiyohuiltía chicahuac huan tlatocztitzi nechtlatzintlanhuetziltía más.

**8** Tijchijtoc para noteiximatcahua ma nechtlahuelcahuaca huan ma nechijiyaca.

Eltoc quen niitztoc ipan se tlatzactli huan amo hueli niquisa.

**9** Ayacmo hueli nitlachiya pampa tlahuel nimochoquijtoc.

Mojmostla nimitzlajtlanía motlapalehuil, huan nimomatlanana quema nimotlatlajtía ica ta, TOTECO, para techtlasojtla.

**10** Pero nijmachilía para, quena, nimquis nimantzi,

huan ¿tlaque ipati elis para na nopa tiochicahual nextili catli tijchihuas quema ya nimictoc?

¡Amo tleno! ¿Atlac nihuelis nimitzpaquilismacas quema ya nimictos?

**11** Se mijcatzi catli ya quitlalpachojtoque amo huelis tepohuilis para tipiya hueyi tlaicnelli.

Amo huelis tepohuilis para titemachtli.

**12** Nepa campa tzintlayohua amo huelise tepohuilise nopa huejhueyi tiochicahual nextili catli tijchihua.

Mijcatzitzitl itztoque ipan se tlali campa ayacmo tleno quielnamiquij,  
huan amo huelis mitzelnamiquise para san ta tixitlahuac.

**13** Pero na nimitztajtzilijtoc ta TOTECO,  
huan sesen ijnaloc nochi catli niquipijtohua quema nimotlatlajtía ica ta ajsi hasta moixtla.

**14** TOTECO, ¿para tlen tijhuejcamajcajtoc none-milis?

¿Para tlen tiquijcuinía moixayac huan titlachiya ipan seyoc lado?

**15** Na niitztoc ipan tlaijiyohuili huan tequipacholi hasta quema noja niitztoya nitelpocatl.

Majmajtli huan miquilistli catli ta techtitlanilijtoc nechtoquilijinemi,

huan ama ayacmo nihuelli más niquipijyohuía.

**16** Miyac huelta hualajtoc napan na mohueyi cualancayo,

huan nopa majmajtli catli techtitlanilijtoc tlahuel nechtlaijiyohuiltía.

**17** Quena, nochi nopa tlamatli nechyahualojtoc quen atl.

**18** Nochi catli niquinicnelía huan catli itztoyaj nohuampoyohua tiquinchijtoc ma nechtlahuelcahuaca,

ayacmo nechchihuiláj cuenta.

Huan noteiximatzahua tiquintlalijtoc ipan tzintlayohuilotl.

## 89

*Nopa camanal sencahuali catli Toteco quichijqui ihuaya David*

<sup>1</sup> Nimitzhuicatis, TOTECO, para nochipa pampa tlahuel hueyi moyolo ica na.

Quena, nochi telpocame huan huehuentzitziniquinpoohuilis para ta nelía titemachtli.

<sup>2</sup> Na niquijto: “Ta titetlasoijtas para nochipa.

Huan nochipa tiitztos titemachtli san quen para nochipa huejcahuas ilhuicac campa tiitztoc.”

<sup>3</sup> Ta tiquijtojtoc para tijchijqui se camanal sencahuali ica motequipanojca David catli tijtlapejpenijtoc.

Titlatestigojquetzqui catli tijchihuilis.

<sup>4</sup> Tiquilhui para se iixhui mosehuis ipan isiya campa yaya tlanahuatía,

huan nopona tlanahuatis para nochipa.

<sup>5</sup> TOTECO, catli itztoque ipan ilhuicac mitzpaquilismacaj por nochi nopa tiochicahual nextili catli tijchihua.

Huan miyac millones motequihuajcahua mitzhueyimatise pampa titemachtli.

<sup>6</sup> Pampa ipan nochi ilhuicac amo aqui seyoc catli san se quen ta, Toteco Dios.

Huan niyon se tequihuajquetl amo quipiya chicahualistli catli quiaxilía catli tijpiya ta, Toteco.

<sup>7</sup> Toteco Dios, ta nelía tihueyi huan titemajmati.

Nochi motlatzejzeloltijca tequihuajcahua mitztlepanitaj.

Quena, nochi catli mitzyahualojoque, majmahuij quema moquetzaj moixpa.

- 8** TOTECO, ta tiDios Catli Tijpiya Nochi Chicahualistli,  
 ¿ajqueya seyoc tlahuel quipiya chicahualistli quenta?  
 ¡Amo aqui seyoc! San ta TOTECO tlahuel tijpiya chicahualistli.  
 San ta nelia titemachtli.
- 9** San ta tihueli tijnahuatia nopa hueyi atl quema  
 mosisinia huan mocoxonia chicahuac.  
 Tijtlacahualtia huan quichihua catli tiquilhuia.
- 10** Ta tijtzontlamilti nopa catli temajmatiyaya ipan  
 hueyi atl.  
 Ica mohueyi chicahualis tiquinsemanqui  
 mocualancaitacahua.
- 11** Ta moaxca ilhuicactli, tlaltipactli huan nochi  
 catli onca,  
 pampa nochi tijchijchijqui ta.
- 12** Tijchijchijqui nopa norte huan sur.  
 Nopa tepeme Tabor huan Hermón paquij pampa  
 ta tiquinchijchijqui.
- 13** Moajcol tlahuel quipiya chicahualistli.  
 Huan monejmac quipiya tetili huan miyac yajatili  
 para tlatlanis.
- 14** Motlanahuatilis motlatzquilijtoc ipan ome tlamantli:  
 Titetlajtolsencahua xitlahuac huan tijchihua catli  
 cuali.  
 Titeicnelia huan tiquijtohua catli melahuac.
- 15** Nelia paquij nopa masehualme catli quicaquij  
 nopa tlapitzali catli quinnotza ma  
 mitzhueyichihuaca, TOTECO.  
 Inijuanti nemise nelia monechca huan ta tiquintlahuilis.

- 16** Semilhuitl mopaquilismacase ipan ta pampa tlahuel tihueyi huan tixitlahuac.
- 17** Pampa san ta tijpiya mohueyitilis huan tiquinfuerzajmaca.  
Timasehualme tijpiyaj chicahualistli pampa ta techpalehuá.
- 18** Quena, Toteco Dios, ta catli titlatzejtzeloltic techmocuitlahuía tojuanti ipan tlali Israel.  
Ta titotlanahuatijsca.
- 19** Ipan se tlanextili tijcamanalhui motlatzejtzeloltijca tlajtol pannextijca huan tiquilhui:  
“Tlen nochí masehualme nijtlapejpenijtoc se yejyectzi telpocatl catli tlahuel motemaca, huan nijtequitlali ma eli tlanahuatijsquetl para na.
- 20** Quena, nijpantijtoc notequipanojca David huan nicaltijtoc ica nopa aceite catli ica niteiyocatlalía para ma nechteinapanoca.
- 21** Nijchihuas ma eli temachtli huan nijmacas chicahualistli.
- 22** Amo quiechcapantlalise icualancaitacahua, niyon amo quitlanise tlaixpanoca masehualme.
- 23** Iixpa niquintzontlamiltis icualancaitacahua huan nochí catli quicualancaitaj.
- 24** Na catli nitemachtli nijmocuitlahuis huan nijtiochihiwas tlatoctzitzí,  
huan tlahuel miyac niquicnelis.  
Ica na notlapalehuil yaya elis tlahuel hueyi.
- 25** Na nijchihuas para itlanahuatilis pehuas campa hueyatl Eufrates,  
huan tlamis hasta campa hueyi atl catli itoca Mediterráneo.
- 26** Huan yaya nechtzajtjis huan nechilhuis:

- ‘¡Ta tinoTata, ta tinoTeco Dios!  
 Ta catli techmaquixtía huan techtlatía para amo  
 tleno nechajsis.’
- <sup>27</sup> Na niquitas nopa tlanahuatijquetl quen  
 noachtihui cone.  
 Nijchihuas para yaya ma eli nopa tlanahuatijquetl  
 catli más hueyi ipan nochí tlaltipactli.
- <sup>28</sup> Niquicnelis para nochipa huan para nochipa  
 nijchihuilis catli cuali.  
 Huan nopa camanal sencahuали catli nijchijtoc  
 ihuaya, amo quema tlamis.
- <sup>29</sup> Na nijtequimacas se iixhui para ma tlanahuatis  
 campa yaya tlanahuatiyaya.  
 Itlanahuatilis huejcahuas para nochipa quen hue-  
 jcahuas ilhuicactli.
- <sup>30</sup> Pero sintla iconehua quitlahuelcahuase noley  
 huan amo monejnemiltise quen quijtohua  
 notlamachtil,
- <sup>31</sup> o sintla quiixpanose catli niquinnahuatijtoc ma  
 quichihuaca ipan ininnemilis huan amo  
 quintlepanitase notlanahuatilhua,
- <sup>32</sup> huajca niquintlatzacuiltis pampa ya nopa  
 quinextis para amo nechneltocatoque  
 huan tlajtlacolchihuaj.
- <sup>33</sup> Pero amo nijcahuas niquinicnelis,  
 niyon amo nijtlamiltis nopa camanali catli nijchi-  
 jtoc inihuaya.
- <sup>34</sup> Amo niquelcahuas catli ica nimocajtoc David  
 huan amo nijpatlas nocamanal.
- <sup>35</sup> Pampa na nitlatestigojquetzqui para nijchi-  
 huilis David nochí catli nijtlajtolcahuilijtoc.  
 Huan na niDios catli nitlatzejzeloltic amo hueli  
 niistlacatis.

<sup>36</sup> Iixhui mosehuis huan tlanahuatis para nochipa  
campa ya mosehui.

Itlanahuatilis huejcahuas san quen imiyaca tonali  
tlahuijtos tonati.

<sup>37</sup> Quena, itlanahuatilis tlahuel huejcahuas quen  
huejcahuas metzli,  
o quen huejcahuas nochí catli eltoc ipan ilhuicac  
catli eltoque quen notestigos.”

Quena, quej nopa tiquijto, Toteco.

<sup>38</sup> ¿Huajca para tlen techtlahuelcahua huan tech-  
huejcamajcahua?

¿Para tlen tlahuel ticualani ica yaya catli tijtlape-  
jpenijtoc para elis tlanahuatijquetl?

<sup>39</sup> ¿Atlac tijsosolojtoc nopa camanali catli tijchijqui  
ihuaya?

Pampa eltoc quen tijtlahuiso icorona hasta tlalchi.

<sup>40</sup> Tijcahuili tocualancaitacahua ma quihuelonica  
nopa tepamitl catli yahualtic quitza-  
cuayaya toaltepe.

Huan quitlamisosolojque nopa calme catli huejca-  
pantique campa timomanahuiyayaj.

<sup>41</sup> Nochí catli panoj nopena quiichtequij catli ini-  
juanti quinequij.

Huan nopa masehualme catli itztoque tonechca  
san techhuetzquiláj.

<sup>42</sup> Tiquinfuerzajmacatoc tocualancaitacahua,  
huan tiquinchijtoc ma paquica pampa tech-  
lantoque.

<sup>43</sup> Tijquixtili itlatequiyo tomachete catli ica tit-  
lahuilanayayaj,

huan amo tijnejqui techpalehuis para ma titlat-  
lanica.

- <sup>44</sup> Techquixtili noyejyejca huan tijtlahuisojtoc hasta tlalchi notlanahuatilis.
- <sup>45</sup> Techchijtoc ma nitlatochuehuejtiya huan techpinahualtijtoc iniixpa nochi masehualme.
- <sup>46</sup> TOTECO, ¿hasta quema tlamic ticualantos?  
 ¿Hasta quema noja timotlatijtos tlen tojuanti?  
 ¿Atlac para nochipa mohueyi cualancayo eltos quen tlitl?
- <sup>47</sup> ¡Toteco, xiquelnamiqui para tonemilis amo huejcahuas ipan ni tlaltipactli!  
 ¿Atlac amo tleno ipati nopa nemilistli catli tiquinmacatoc nochi masehualme?
- <sup>48</sup> Niyon se masehuali amo huelis itztos para nochipa. ¡Nochi miquise!  
 ¿Ajqueya huelis quimanahuis inemilis imaco miquilistli?
- <sup>49</sup> NoTeco Dios, ¿canque eltoc motlaicnelilis tlen huejcaya?  
 ¿Para tlen ayacmo tijpiya hueyi moyolo ica tojuanti?  
 Ta tiToteco catli titemachtli, tijtlajtolcahuili David para melahuac amo quema techtlahuelahuas.
- <sup>50</sup> TOTECO, xijtlachili quenicatza nochi masehualme techcualancaitaj tojuanti timomasehualhua.
- <sup>51</sup> Mocualancaitacahua quipinahualtiaj yaya catli tijtlapejpenijtoc para elis tlanahuatijquetl.
- <sup>52</sup> Ma tijpaquilismacaca TOTECO para nochipa.  
 Quej nopa ma eli.

**90***Masehualme amo huejcahuaj*

- <sup>1</sup> Toteco, ta nochipa techmocuitlahuijtinentoc,  
hasta tlen ipejya nochí xihuitl huan para nochí  
tonali.
- <sup>2</sup> Hasta quema ayamo tiquinchijchihuayaya te-  
peme huan tlaltipactli, ta ipa tiitztoc.  
Pampa ta, tiToteco Dios, amo quema tijpixqui  
mopejya,  
huan amo quema tijpiyas motlamiya.
- <sup>3</sup> Ta tijchihua para nochí masehualme ma  
mocuepaca tlali.  
Quena, ticamanalti huan tiquijtohua:  
“Ximiquica anmasehualme.”
- <sup>4</sup> Pampa mil xihuitl ta tiquita quen se tonal catli  
panoc yalohua,  
o quen elisquía se eyi hora quema se tlamocuit-  
lahuiyaya tlayohua.
- <sup>5</sup> Tonemilis motlalojti quen atl catli hualtemo chic-  
ahuac ipan se atlajtli.  
Huan ica se tlatoctzi tiixpolijtehuaj quen se  
temictli.  
Nojquiya tiitztoque quen se xihui cuahuitl.
- <sup>6</sup> Ica ijnaloc moscaltía huan cahuani,  
huan ica tiotlac quitzontequiv huan huaqui.
- <sup>7</sup> Pampa ica mohueyi cualancayo techtlaijiy-  
ohuiltía huan techtzontlamiltía.
- <sup>8</sup> Totlajtlacolhua huan totlaixpanolhua tlanemi-  
jya nestoc moixpa.
- <sup>9</sup> Yeca nochí tonali huan nochí xihuitl tijpanoj  
huejhueyi tlaohuijcayotl,  
catli ta techtitlanilía ica mohueyi cualancayo.

**10** San techcahuilía timasehualme ma tiitztoca se-tenta xihuitl.

Huan catli quentzi más tejtetique san tiquinc-ahuilía ma itztoca ochenta xihuitl.

Pero ipan nochí nopa xihuitl san tijpanoj tlao-hui-jcayotl huan tequipacholi,

pampa nochí nopa xihuitl san panotiquisa huan tojuanti san tiixpolijtehuaj.

**11** ¿Ajqueya quimachilía nochí catli tihuelis tijchi-huas quema ticualani?

¿Ajqueya tlen tojuanti mitzimacasi quen quinamiqui?

**12** Amo miyac tonali tijpiyaj,  
huajca technextili quenicatza ma tijchihuaca para amo timotonapolo-se,  
huan para ma tijpiyaca tlalnamiquilistli ipan toy-olo nochí tonali.

**13** TOTECO, xihuala huan techtiochihua.

¿Hasta quema tlamicus ticualantos?

Techtlasojtla tojuanti timotequipanojcahua.

**14** Mojmostla ica ijnaloc technextili motlaicnelilis,  
huan nochí tonemilis timitzhucatise huan tiyol-pactose.

**15** Toteco, techmaca paquilibrium quen ipatlaca nopa tlao-huijcayotl catli tijpanoque.

Huan techcahuili ma tiitztoca ica yejectzi para miyac xihuitl,

quen imiyaca nopa xihuitl quema tijpanoque tlamantli catli fiero.

**16** Xijchihua para sempa ma tiquitaca nopa hue-jhueyi tiochicahual nextili catli tijchihua.

Huan tocone-hua ma quiitaca nochí nopa yejectzi tlaman-tli san se quen tijchihuayaya achti-huiya.

**17** TOTECO, ta titoDios,  
techtlahuilía ica motlatlanex huan technextilía  
para techcualita.  
Techpalehui para nochí catli tijchihuase ma  
cualquisas huan ma huejcahuas.  
Quena, Toteco, ma cualquisa nochí catli tomax  
quichihuas pampa ta techfuerzajmaca.

## 91

### *Ma timotlatzquilijtoca ipan Toteco*

- 1** Catli motlatzquilijtoc ipan Toteco Dios Catli Más  
Hueyi itztos temachtli imaco,  
pampa mocahuas ica Toteco Catli Quipiya Nochi  
Chicahualistli.
- 2** Huan na niquijtos tlen TOTECO para yaya nech-  
mocuitlahuía ica ihueyi chicahualis.  
Yaya noTeco Dios huan san ipan ya nimotemachía.
- 3** Pampa san yaya hueli mitzmanahuis tlen nochí  
tlaquetztlí catli sequinoc quintlatise para  
mitzmasiltise.  
Mitzmocuitlahuis para amo mitzajsis nopa cocol-  
istli catli tetzontlamiltía.
- 4** Quen se tenampillo quintlatía ipilconehua ieltla-  
paltzala,  
Toteco quej nopa nojquiya mitzmocuitlahuía.  
Temachtli mitzchihuilis nochí catli mitztlajtolc-  
ahuilijtoc,  
pampa timotemachijtoc ipan ya para  
mitzmanahuis.
- 5** Huajca ama ayacmo ximajmahui ica tlayohua,  
niyon amo xiquimacasi catli hueli panos ipan  
tonaya.
- 6** Amo xiquimacasi nopa tlaijiyohuilstli catli  
huala ipan tzintlayohuilotl,

niyon nopa miquilistli catli ajsi ica tlajcotona.

<sup>7</sup> Masque monechca miquise mil o majtlactli mil  
masehualme,  
pero ta amo mitzajsis.

<sup>8</sup> Ica moixteyol tiquitas quenicatza quiselise  
tlatzacuiltili nopa tlaixpanoca tlacame.

<sup>9</sup> Sintla timotemachijtoc ipan TOTECO para mitz-  
mocuitlahuis,  
huan timochiya ipan Toteco Catli Más Hueyi para  
mitzpalehuis,

<sup>10</sup> huajca amo mitzajsis niyon se tlamantli catli  
amo cuali,  
niyon amo quiajisis mochaj.

<sup>11</sup> Pampa Toteco quintitlanis itequihuajcahua  
para ma mitzmocuitlahuica,  
huan mitzmocuitlahuijtinemise campa hueli ta  
tiyas.

<sup>12</sup> Huan itequihuajcahua mitzlananase ica inin-  
max para amo timotepotlamis ipan ojtlí.

<sup>13</sup> Niyon amo timajmahuis masque tijquetzas  
moicxi ipan se león o se cohuatl catli  
temictía.

Quena, amo tleno mopantis masque timoquej-  
quetzas ininpani.

<sup>14</sup> Pampa Toteco Dios quijtohua:

“Na nijmanahuis pampa nechicnelía.

Nijhueyitlalis pampa motemachía ipan na.

<sup>15</sup> Quema nechtzajtzilis, na nijnanquilis.

Nojquiya niitztos ihuaya quema quipiyas tequipa-  
choli.

Nijmanahuis huan nijhueyitlalis.

<sup>16</sup> Nijchihuas ma itzto tlahuél miyac xihuitl huan  
nijmaquixtis.”

**92***Xijpaquilismacaca Toteco*

- <sup>1</sup> Nelía cuali para timitzhueyichihuase, TOTECO,  
ta nopa Dios Catli Más tiHueyi.  
Cuali ma timitzpaquilismacaca ica huicatl.
- <sup>2</sup> Ica ijnaloc ma titepohuilica motlaicnelilis pampa  
hueyi moyolo,  
huan ica tlapoyahui ma tipaquica miyac pampa  
nelía titemachtli.
- <sup>3</sup> Ma tihuicaca huan ma titlatzotzonaca ica nopa  
tlatzotzonali catli itoca arpa, guitarra huan  
lira.
- <sup>4</sup> NoTeco Dios, ta nelía techchihuilijtoc miyac tla-  
mantli catli cuali,  
huan techchijtoc ma nipaqui.  
Yeca nihuica ica miyac paquilibrium.
- <sup>5</sup> ¡TOTECO, ta tijchihua huejhueyi tiochicahual nex-  
tili!  
¡Huan motlalnamiquilis amo aqui hueli  
quimachilía!
- <sup>6</sup> Nopa masehualme catli huihuitique amo  
quimatiñ niyon amo quimachilíaj.
- <sup>7</sup> Masehualme catli fiero ininnemilis motlananaj  
huan mohueyichihuaj ica tlamantli catli  
amo cuali,  
pero amo quimatiñ para teipa quintzontlamiltise  
huan ayacmo quema motlananase.
- <sup>8</sup> Pero ta tiTOTECO, mitzhueytalalijtose para  
nochipa pampa ta tiDios Catli Más Hueyi.
- <sup>9</sup> Xiquita nica itztoque mocualancaitacahua pero  
nojquiya nica tiquintzontlamis.  
Quena, TOTECO, nochi masehualme catli quichi-  
huaj catli amo cuali, ta tiquinsemanas.

- 10** Pero techmacas na chicahualistli quen se toro  
catli nemi cuatitla.  
Huan sempa techaltis ica moaceite catli temaca  
yancuic chicahualistli.
- 11** Niquitas quenicatza tiquintzontlamis  
nocualancaitacahua.  
Huan nijcaquis quenicatza quintzontlamise nopa  
tlaixpanoca tlacame catli motlanantoque  
ica na.
- 12** Pero catli itztoque xitlahuaque iixpa Toteco  
quipiyase chicahualistli.  
Inijuanti yejyectzitz quen ixochiyo apachi  
cuahuitl.  
Mohueyichihuase quen nopa tiocuame catli onca  
ipan tlali Líbano.
- 13** Masehualme catli cuajcualme quipiyase chic-  
ahualistli quen cuame catli quintoctoque  
ipan ichaj TOTECO,  
huan Toteco Dios yaya quinmocuitlahuis.
- 14** Huan quema nopa cuajcualme huehuejtiyase,  
noja quipiyase fuerza.  
Itztose quen cuame catli temacase inintlajca,  
huan nochipa xoxohuixtose.
- 15** Huan ya nopa quinextis para TOTECO  
catli nechmocuitlahuía quichihua catli  
melahuac.  
Nochipa yaya xitlahuac tetlajtolsencahua.

## 93

*Toteco tlahuél hueyi*

<sup>1</sup> ¡TOTECO tlanahuatía!

Yaya tlahuél hueyi hasta quipiya itlatlanex catli  
onpano yejyectzi.

Quitlatzquilti nelcuali ni tlaltipactli,  
huan amo hueli mojmolinis tlen itlatzinpehualtil.

<sup>2</sup> Nochipa hasta tlen huejcajya ta tijpixtoc tlanahu-  
atili,

huan nochí catli itztoque ipan motlanahuatilis  
mocahuaj temachime.

San ta tiitztoc para nochipa.

<sup>3</sup> TOTECO, nopa hueyame caquisti para mitz-  
paquilismacaj quema mocoxoníaj.

<sup>4</sup> Pero ta, TOTECO, catli tiitztoc hasta huejcapa  
tijpiya más chicahualistli,

huan amo quen nopa atl catli mocoxonía ipan  
nochí huejhueyi atl ipan tlaltipactli.

<sup>5</sup> Motlanahuatilhua amo quema mopatlaj.

TOTECO, para nochí xihuitl huan para nochí  
tonali motequiticayo eltoc senquistoc  
tlatzejzeloltic.

## 94

*Netlatlajtili para Toteco ma quincuepili  
tocualancaitacahua*

<sup>1</sup> TOTECO, ximonexti.

Ta tiDios catli tijpiya motequi para tiquincuepilis  
catli amo cuali techchihulijahtoque tocualan-  
caitacahua.

<sup>2</sup> Ximotlanana huan xijtlatzacuilty ni tlali.

Nochi catli mohueyimatij xiquintlatzacuilty quen  
quinamiqui.

- <sup>3</sup> TOTECO, ¿hasta quema tlamic tlatlanise huan mopaquilismacase nopa masehualme catli amo aqui quitlepanitaj?
- <sup>4</sup> ¿Hasta quema tlamic tetlajilhuise huan mohuey-imatise nopa tlajtlacolchijca masehualme?
- <sup>5</sup> TOTECO, inijuanti tlahuel quintlaijiyohuilitaj huan quintequipacholmacaj momasehual-hua catli tiquinicnelía.
- <sup>6</sup> Inijuanti quinmictíaj cahual toahuihua catli ehuani ipan sequinoc altepeme huan catli icnotzitzti.
- <sup>7</sup> Huan quijtohuaj para ta, TOTECO, amo tiquita, niyon amo timomaca cuenta.  
Quej nopa quijtohuaj tlen ta catli tiiTeco tohuej-capan tata Jacob.
- <sup>8</sup> Amojuanti catli anhuihuitique ipan ni masehualme, xijmachilica.  
¿Hasta quema anquitequihuise amotlalnamiquilis para antlamachilise?
- <sup>9</sup> Toteco quisencajqui tonacashua, huajca ¿anmoilhuíaj para amo quicaquis catli anquijtohuaj?  
Yaya quichijchijqui toixteyol, huan ¿anmoilhuíaj para amo quiitas catli anquichihuaj?
- <sup>10</sup> Yaya quintlatzacuiltia masehualme ipan nochitlalme,  
¿anmoilhuíaj amo anmechtlatzacuiltis nojquiya?  
Yaya quimati nochitlalme ipan nochitlalme,  
huan ¿anmoilhuíaj amo quimati tlaque anquichihuaj?

<sup>11</sup> TOTECO quiiximati inintlalnamiquilis masehualme huan quimati para san moilhuíaj tlamantli catli amo cuali.

<sup>12</sup> Pero cuali ininpanti nopa masehualme catli ta, TOTECO,  
tiquintlatzacultis para tiquintlalnamictis.  
Ya nopa quinpalehuía para quitoquilise moojhui,  
huan para monejnemiltise xitlahuac ipan motlanahuatilhua.

<sup>13</sup> Huan para itztose ica paquelistli quema ajsis  
nopa tonali catli fiero.

Pero nopa masehualme catli amo quitlepanitaj  
TOTECO mochihuíaj se ostotl para ipan  
momasiltise huan motzontlamiltise.

<sup>14</sup> Pampa TOTECO amo quintlahuelcahuas imasehualhua pampa inijuanti iaxcahua.

<sup>15</sup> Se tonal Toteco tetlajtolsencahuas xitlahuac,  
huan nochí catli itztoque ica ininnemilis xitlahuac,  
inijuanti paquise miyac.

<sup>16</sup> ¿Ajqueya nechmanahuis ininmaco nopa mosisiniijca masehualme?

¿Ajqueya nechmocuitlahuis tlen nopa tlaixpanoca  
masehualme?

<sup>17</sup> Sintla Toteco amo nechpalehuijtosquía,  
huajca noyoltzi ya eltosquía campa tlatzitzicatoc  
pampa ya nimictosquía.

<sup>18</sup> Na nitzajtzic huan niquijto:

“TOTECO, xixitlaca noicxihua.”

Huan yaya nechtlaosjtlac huan nechmaquixti.

**19** NoTeco, quema san nimonejnehuilía tlen miyac tequipacholi huan san ya nopa nijmati, ta techyoltlalía.

Techchihua ma nimotemachi ipan ta huan tech-maca paquilibrium.

**20** Se tlanahuatijquetl catli amo quichihua catli xitlahuac,

amo tijcahuas para mosentilis ica ta.

Niyon amo itztoc mohuaya catli quichihua se tlanahuatili catli amo xitlahuac.

**21** Pero tlanahuatiani quej nopa mosentilíaj huan mocamanalhuíaj para quenicatza quimictise se catli amo tleno quichijtoc, o se catli cuali monejnemiltía.

**22** Pero TOTECO yaya nechmocuitlahuía pampa tlahuel miyac chicahualistli quipiya.

Ipan noTeco Dios nimotlatía huan amo tleno huelis nechajsis pampa yaya nechmanahuía.

**23** Huan Toteco Dios quichijtoc para ma huetzi ininpani nopa mosisinijca masehualme nochí nopa tlamatli catli amo cuali quichijtoque.

Yaya quintzontlamiltis senquistoc quen quisencajtoyaj quinchihuise sequinoc.

Quena, TOTECO toDios yaya quintzontlamiltis.

## 95

*Se huicatl para tijpaquilismacase huan tijhueyichihuase Toteco*

**1** ¡Xihualaca, ma tihuicaca para TOTECO!

Quena, ma tihuicaca ica paquilibrium para tijhueyimatise Toteco catli techmaquixtia huan techlatia para amo tleno techajsis.

<sup>2</sup> Ma tiyaca iixpa Toteco para tijtlascamatise ica nochitoyolo.

Ma tijpaquilismacaca ica huicatl.

<sup>3</sup> Pampa TOTECO yaya se Dios Catli Tlahuel Hueyi. Yaya nopa Hueyi Tlanahuatijquetl huan amo quen nochitsequinoc totiotzitzitl catli masehualme quinhueyichihuaj.

<sup>4</sup> Imaco eltoc nochitnopa ostotl catli mas huejcatla huan nopa tepeme catli mas huejcapan-tique.

Nochi iaxca ya.

<sup>5</sup> Yaya iaxca nopa hueyi atl huan tlaltipactli, pampa yaya quichijchijqui.

<sup>6</sup> Xihualaca, ma tijhueyichihuaca huan ma timo-ixtlapachoca hasta tlalchi iixpa TOTECO, yaya catli techchijchijqui.

<sup>7</sup> Pampa yaya toDios huan tojuanti tiimasehualhua.

Tiitztoque quen tiiborregojhua catli yaya quinmocuitlahuia.

Achi cuali sintla anquitoscacaquise Toteco.

<sup>8</sup> (Toteco quijtohua:)

“Amo ximoyoltetilica quen israelitame quichijque huejcajya ipan nopa huactoc tlali catli itoca Meriba huan Masah.

<sup>9</sup> Nopona amohuejcapan tatahua nechyejyecojque para quiitase tlaque nijchihuasquia.

Huan quichijque ya ni masque ipa ya quiitztoyaj  
nopa huejhueyi tiochicahual nextili catli na  
nijchijtoya iniixpa.

<sup>10</sup> Para cuarenta xihuitl nicualantoya inihuaya,  
pampa ininyolo huan inintlalnamiquilis eltoya  
huejca tlen na.

Huan hasta ama amo moselijtoque quitoquilise  
notlanahuatilhua.

<sup>11</sup> Yeca ica nohueyi cualancayo nitlatestigojquet-  
zqui para amo quema calaquise campa ni-  
jsencajtoya ma mosiyajquetzaca.”

## 96

### *Huicatl para tijpaquilmacase Toteco*

<sup>1</sup> Nochi catli anitztoque ipan tlaltipactli,  
xihuicaca para TOTECO.

Quena, xihuicaca se huicatl yancuic.

<sup>2</sup> Ma tijhuicatica TOTECO por nochi catli quichij-  
toc.

Ma tijpaquilmacaca huan ma tijtlascamatica  
por nochi catli techchihuilijtoc.

Huan mojmostla ma titepohuilica para yaya  
temaquixtía.

<sup>3</sup> Ipan nochi tlaltipactli ma titepohuilica ihuey-  
itilis huan nochi tlamantli yejyectzi catli  
quichijtoc.

Huan nochi masehualme ma tiquinpoohuilica  
nopa huejhueyi tlamantli catli yaya  
quichihua.

<sup>4</sup> Pampa TOTECO nelía tlahuel hueyi huan  
quinamiqui ma tijhueyimatica.

San yaya nelía temajmati huan ne sequinoc catli  
masehualme quintocaxtíaj dioses, amo.

<sup>5</sup> Pampa nochí nopa dioses catli quinhueyichihuaj  
ipan sequinoc tlalme,  
amo tlenó ininpatí.

Inijuanti san elij teteyome catli masehualme  
quinchijchijtoque.

Pero TOTECO yaya quichijchijqui ilhuicactli.

<sup>6</sup> Campa itztoc Toteco senquistoc onca itlatlanex  
huan temitoc ica ihueyitilis.

Huan ipan itiopa onca ichicahualis huan iyejye-  
jca.

<sup>7</sup> Nochi anmasehualme tlen nochí tlaltipactli,  
xitepohuilica para san TOTECO quipiya chic-  
ahualistli huan san yaya hueyi.

<sup>8</sup> Xijtlepanitaca TOTECO quen quinamiqui.

Xijhualiquilica tlacajcahualistli huan xiyyaca ical-  
ixpa itiopa.

<sup>9</sup> Xihualaca huan xijhueyichihuaca TOTECO.

Quena, xijhueyichihuaca ica se amonemilis catli  
yejyectzi huan tlatzejtzeloltic.

Huan nochí tlaltipactli ma huihuipica iixpa.

<sup>10</sup> Xiquinpoohuilica nochí tlalme para Toteco  
tlanahuatía.

Tlaltipactli quitlalijtoc cuali huan amo quema mi-  
jcuinis campa quitlatzquiltijtoc.

Huan Toteco Dios xitlahuac quintlajtolsencahuas  
nochí altepeme.

<sup>11</sup> ¡Ma paqui ilhuicactli huan nochí tlaltipactli!

¡Nochi huejhueyi atl ma mocoxonica iixpa Toteco  
ica paquilistli!

<sup>12</sup> ¡Ma paqui nopa cuatitlamitl huan nochí catli  
ónca,  
pampa nochí cuame quinextíaj para Toteco  
tlahuel hueyi!

Quena, ma tzajtzica nopa cuame para quipaquilismacase iixpa TÓTECO,

<sup>13</sup> pampa yaya huala.

Quena, yaya hualas para quitlajtolsencahuas catli itztoque ipan ni tlaltipactli.

Quena, quintlajtolsencahuas masehualme ipan nochí altepeme quen quinamiqui.

Quena, quema tetlajtolsencahuas, nochí quimatise para quichihua catli melahuac.

## 97

### *Toteco nochí quinahuatía*

<sup>1</sup> ¡Nochi tlaltipactli ma paqui pampa TÓTECO tlanahuatía!

Huan nochí nopa pilaltepetzitzi catli mopantíaj tlatlajco hueyi atl, xiquinilhuica nojquiya ma paquica.

<sup>2</sup> Mixtli huan tzintlayohuilotl quiyahualojtoc Toteco.

Huan itlanahuatilis pejtoc ipan catli melahuac huan catli xitlahuac.

<sup>3</sup> Iixpa tlayacanti se tlilt catli quintzontlamiltía icualancaitacahua.

<sup>4</sup> Nopa tlapetlanilotl catli yaya quititlani quitalhuilía nochí tlaltipactli.

Huan ni tlaltipactli huihuipica quema quiita.

<sup>5</sup> Nochi tepeme atiyaj quen cera iixpa TÓTECO catli iaxca nochí tlaltipactli.

<sup>6</sup> Ilhuicactli tlayolmelahua para Toteco xitlahuac tetlajtolsencahua.

Huan nochí tlaltipactli quiita ihueyitilis.

<sup>7</sup> Ma mopinahuaca nochí catli quinhueyichihuaj teteyome,

huan nochí catlí mohueyimati jíca inintlaixcopin-  
cayohua catlí amo tleno ininpati.

Nochi sequinoc amojuanti catlí masehualme an-  
mechtocaxtía “andioses” ximotlancuaquet-  
zaca iixpa Toteco.

<sup>8</sup> TOTECO, nopa altepetl Jerusalén huan nochí alte-  
peme ipan tlali Judá quipiyaj paquelistli ica  
motlamachtil.

<sup>9</sup> Pampa ta, tiTOTECO, tijnahuatía nochí tlalti-  
pactli,  
huan más tihueyi que nochí sequinoc dioses.

<sup>10</sup> TOTECO quinicnelía nochí catlí quicualancaitaj  
catlí amo cuali.

Quinmocuitlahuía imasehualhua huan  
quinchololtía ininmaco tlaixpanoca  
masehualme.

<sup>11</sup> Catlí xitlahuac ininnemilis nemi ipan itlahuil  
Toteco,

huan catlí cuali ininyolo quipantíaj paquelistli.

<sup>12</sup> Xipaquica ipan TOTECO nochí amojuanti catlí  
anitztoque xitlahuac iixpa.

Xijhueyichihuaca huan nochipa xiquelnamictoca  
para Toteco yaya senquistoc tlatzejzeloltic.

## 98

*Ma tijpaquilismacaca Toteco pampa yaya xit-  
lahuac tetlajtolsencahua*

<sup>1</sup> Ma tihuicaca para TOTECO se huicatl yancuic,  
pampa yaya quichijtoc nochí nopa huejhueyi ti-  
ochicahual nextili.

Yaya ya tlatlantoc ica ihueyi chicahualis huan ica  
imax catlí tlatzejzeloltic.

- 2** TOTECO quipannextijtoc ipan nochí tlaltipactli  
para san yaya temaquixtía.  
Quinextijtoc iniixtla sequinoc tlalme para xit-  
lahuac tetlajtolsencahua.
- 3** Yaya quielnamictoc catli techtencahuilijtoc  
pampa techicneli tojuanti tiisraelitame.  
Huan ama ipan nochí tlaltipactli quiitztoque  
quenicatza Toteco Dios techmaquixtijtoc ti-  
imasehualhua.
- 4** Yeca ipan nochí tlaltipactli xijpaquilismacaca  
TOTECO huan xihuicaca ica miyac  
paquelistli.
- 5** Xijhuicatica TOTECO.  
Xijhueyimatica huan xitlatzotzonaca ica arpa.
- 6** Xijpitzaca nochí tlamantli tlapitzali huan xi-  
huicaca ica yejyectzi iixpa TOTECO,  
yaya catli Tlanahuatiquetl.
- 7** ¡Ma mojmolini chicahuac tlen ihuexca nopa  
hueyi atl huan ma quipaquilismaca Toteco!  
Nochi tlaltipactli huan catli itztoque ipani ma tza-  
jtzica huan ma quijtoca:  
“Tijhueyitlalise Toteco.”
- 8** Nopa hueyame ma paquica,  
huan masehualme ma momatlatzinica,  
huan nochí tepeme ma huicaca ica paquelistli
- 9** iixpa TOTECO,  
pampa yaya huala para quintlajtolsencahuaqui  
xitlahuac nochí masehualme catli itztoque  
ipan ni tlaltipactli.

**99***Toteco yaya tlatzejtzelotic***1** ¡TOTECO tlanahuatía!

Nochi masehualme ipan nochi tlalme ma hui-huipicaca ica majmajtli.

Isiya campa mosehuía para tlanahuatis quipiya más tlanahuatili huan eltoc más huejcapa que nopa querubines tequihuajme.

Nochi catli onca huan nochi catli itztoque ipan tlaltipactli,

ma moyolpitzahuilica.

<sup>2</sup> Ipan Tepetl Sion nochi quimatiј para TOTECO nelia hueyi.

Yaya más hueyi tlen nochi sequinoc tlanahuatiani ipan tlaltipactli.

<sup>3</sup> Nochi ma quihueyichihuaca Toteco, yaya catli hueyi huan temajmati.

San ya nelia tlatzejzeloltic.

<sup>4</sup> Toteco yaya se tlanahuatijquetl catli quipiya nochi chicahualistli,

huan quipactia tetlajtolsencahuas xitlahuac.

Nochi catli quichihua senquistoc cuali.

Yaya quinchihuilitoc catli xitlahuac nochi israelitame.

<sup>5</sup> ¡Ma tijhueyitlalica TOTECO, yaya toDios,  
yaya catli tlatzejzeloltic!

Ma timotlancuaquetzaca huan ma timoixtlapachoca hasta tlalchi iicxitla,

pampa san yaya tlatzejzeloltic.

<sup>6</sup> Quema nopa totajtzitzi Moisés huan Aarón, huan nopa tlajtol pannextijquetl Samuel,

quitzajtziliyayaj TOTECO para quitlajtlanise itlapalehuil,

yaya quinnanquiliyaya.

<sup>7</sup> Toteco quincamanalhui ipan se mixtli,

huan inijuanti quichijque nochí catli quiijto ica-  
manal huan itlanahuatilhua.  
Quena, inijuanti quichijque nochí catli quinilhui  
ma quichihuaca.

<sup>8</sup> Quena, TOTECO, ta titoDios, ta tiquinnanquili.  
Ta tieli se Dios catli tiquintlapojpolhuía inintlajtla-  
colhua masehualme.  
Pero nojquiya tiquintlatzacuiltía quema quichi-  
huayayaj tlamatli catli amo cuali.

<sup>9</sup> Ma tijhueyitlalica TOTECO huan ma tijhueyichi-  
huaca.  
Ma timotlancuaixtlapachoca iixtla ipan nopa te-  
petl tlatzejzeloltic catli itoca Sion.

## 100

### *Ma tijtlascamatica Toteco*

<sup>1</sup> Xihuicaca ica paquelistli para TOTECO,  
nochí ammasehualme catli anitztoque ipan ni  
tlaltipactli.

<sup>2</sup> Xijtequipanoca TOTECO ica paquelistli.  
Huan quema anhualahuj iixpa, xihuicatihualaca.

<sup>3</sup> Xijmatica cuali para TOTECO, yaya Toteco Dios.  
Yaya techchijchijqui.

Amo timochijchijtoque tojuanti.  
Tojuanti tiimasehualhua huan tiitztoque quen ti-  
iborregojhua catli techpixtoc ipan ipotrero  
para techmocuitlahuis.

<sup>4</sup> Quema ticalaquij ipan itiopa, ma tijtlascamatica  
miyac.

Huan quema tinemij icalixpa, ma tihuicaca.

Quena, ma tijtlascamatica huan ma tijpaquilis-macaca.

<sup>5</sup> Pampa TOTECO yaya nelía cuali.

Nochipa teicnelía huan tetlasojtla.

Yaya itztos temachtli para nochipa ica nochि mase-hualme catli tlacajtihualahuij.

## 101

### *Toteco, tijnequij tiitztose tixitlahuaque*

<sup>1</sup> Na nijnequi nihuicas para ta,  
TOTECO, pampa ta techicnelía huan techchihuilía  
catli xitlahuac.

Quena, nimitzpaquilismacas ica huicatl.

<sup>2</sup> Nijnequi xitlahuac nimonejnemiltis ipan moo-jhui,  
huan quema tihualas techitaqui,  
amo techpantilis niyon se tlamatli catli amo  
cuali.

Nojquiya nimonejnemiltis xitlahuac ipan nochaj.

<sup>3</sup> Amo nijnequi tlamatli catli nenpolihui huan  
catli amo tleno ipati.

Amo nijchihuas tlamatli catli amo xitlahuac.

<sup>4</sup> Nijhuejcamajcahuas nochि tlalnamiqualistli catli  
nechchihuasquía ma nijchihua catli fiero.

Amo nijnechcahuis tlamatli catli amo cuali.

<sup>5</sup> Amo niquijiyohuis catli quiichtacaejelnamiqui  
ihuampox.

Huan amo aqui nijcahuilis ma mohueyimati huan  
moyacaquetzas.

<sup>6</sup> Niquinmocuitlahuis nopa masehualme catli  
temachme ipan notlal,

huan niquinnotzas para ma itztoca nohuaya ipan  
nochaj.

Huan san catli nelía monejnemiltíaj xitlahuac,  
niquincahuilis ma nechtequipanoca.

<sup>7</sup> Pero amo niquincahuilis ma itztoca ipan nochaj  
catli tlacajcayahuaj huan istlacatij.

<sup>8</sup> Mojmostla ica ijnaloc niquintzontlamiltis nochi  
catli amo tleno quitlepanitaj.

Huan quej nopa niquintlamiltis nochi catli quichi-  
huaj catli fiero ipan ialtepe TOTECO.

## 102

### *Inetlatlajtil se catli motequipachohua*

<sup>1</sup> ¡TOTECO, techtlacaquili quema nimotlatlajtía!  
Xijchihua cuenta nocamanal quema nimitztza-  
jtzilía para techpalehui.

<sup>2</sup> Amo ximohuejcatlali tlen na ipan nopa hora  
quema nitlaijiyohuía.

¡Ximohujtzoma para techtlacaquilis huan nimantzi  
technanquili quema nimitznotza!

<sup>3</sup> Pampa mojmostla nonemilis tlantiya quen  
pocatlí.

Huan noomiyohua njmachilía quen tlatlasquía.

<sup>4</sup> Tlahuel nimococohua ipan noyolo.

Ayacmo njipiya chicahualistli.

Niitztoc quen se xihuitl catli pilintoc.

Ayacmo nimayana huan niquelcahua para nit-  
lacuas.

<sup>5</sup> Huan pampa tlahuel nitlaayijhuijtoc,  
tlamicuahuaqui nocuetlaxo ipan noomiyo.

<sup>6</sup> Nijmati quen nielisquía nopa tzopilotl catli nemí  
ipan nopa tlali campa amo tleno eli,

o quen cuamojmojtli catli iseltzi itztoc ipan  
huactoc tlali.

<sup>7</sup> Nochi yohuali ayacmo nicochi.

Niitztoc quen nopa totol catli nemí iseltzi huan  
mosehuía itzonatipa se cali.

<sup>8</sup> Nocualancaitacahua mojmostla nechpinajtái  
huan nechtelchihuaj.

<sup>9</sup> Ayacmo nijcua pantzi.

Ama nijcua cuanextli huan catli niquiji mo-  
manelohua ica noixayo,

<sup>10</sup> pampa tlahuel ticualantoc ica na.

Ama techtlanantoc huan teipa techhuejcamajcaj-  
toc.

<sup>11</sup> Nonemilis panoti chicahuac quen tlayohuilotl.

Huan notlacayo pilinti quen xihuitl.

<sup>12</sup> Pero ta TOTECO, tiitztos para nochipa,  
huan nochí catli tlacajtiyase para nochipa mitzel-  
namictose.

<sup>13</sup> Na nijmati para ta timotlananas huan tihuálas  
para tijtlasojtlaqui altepetl Jerusalén.

Huan ama ya ajsic tonali para tijtlasojtlas huan  
tijpalehuis quen tijtlajtolcajtoc.

<sup>14</sup> Pampa momasehualhua tlahuel quinicnelíaj  
nopa teme tlen itepa Jerusalén,  
huan hasta quitlasojtlaj nopa tlaltejpooctli catli  
onca ipan icalles ni altepetl pampa nochí  
moaxca ta.

<sup>15</sup> Huajca nochí tlalme huan inintlanahuatijcahua  
ma huihuipicaca iixpa TOTECO.

Quena, huihuipicase quema quiitase ihueyitilis.

<sup>16</sup> Pampa TOTECO sempa quicualtlalis altepetl  
Jerusalén.

Huan nopona yaya monextis ica nochí ihueyitilis.

<sup>17</sup> Yaya quintlacaquilis nopa teicneltzitzí quema  
motlatlajtise,

pampa yaya nochipa mochixtoc para  
 quintlacaquilis huan quinmacas catli  
 quitlajtlaníaj.

<sup>18</sup> Niquijcuilohua ya ni para nochí catli  
 tlacajtiyase teipa ma nojquiya  
 quihueyichihuase TOTECO por nochí catli  
 quichijtoc.

<sup>19</sup> Pampa TOTECO quihualtlachili tlaltipactli tlen  
 nepa ilhuicac campa eltoc itiopa,  
 Quena, tlen ilhuicac quitlachili catli onca ipan  
 tlaltipactli.

<sup>20</sup> Huan quintlacaquili quema tlaayijhuiyaj  
 imasehualhua catli tetequipanohuayayaj  
 ipan sequinoc tlalme.

Huan quinmanahui imaco miquilistli.

<sup>21</sup> Huajca miyac masehualme sempa hualase ipan  
 altepetl Jerusalén para quipaquilismacase  
 TOTECO.

Quena, quipaquilismacase ipan nochí ni altepetl.

<sup>22</sup> Huan miyac tlanahuatiani tlen ni tlaltipactli  
 hualase para quitequipanose huan qui-  
 hueyichihuase TOTECO.

<sup>23</sup> Yaya nechquixtili nochicahualis quema noja  
 polihuiyaya tlajco para nimquis,  
 huan nonemilis quichijqui más cototzi.

<sup>24</sup> Pero nijtzajtzili huan niqulhui:  
 “NoTeco Dios, ta tiitztoc para nochipa.  
 Amo techcahuili nimquis quema noja nechpolo-  
 hua tlajco imiyaca tonali para niitztos.

<sup>25</sup> Hasta ipejya tonali ta tijtlali itzinpehualtil ni  
 tlaltipactli,  
 huan ica momax tijsencajqui ilhuicactli.

<sup>26</sup> Masque nochí catli tijsencajqui se tonali tlamis,

ta tiitztos para nochipa.  
 Quena, nochí catlí tijchijtoc sosolihuise quen se  
     yoyomitl,  
 huan ta tiquinpatlas quen se tlacatl mopatla huan  
     moquentía se iyoyo catlí yancuic,  
 huan nopa catlí sosoltic quitlahuisohua.  
<sup>27</sup> Pero ta amo quema tihuehuejtiyas.  
 Nochipa san se tiitztos.  
 Tiitztos para nochipa huan monemilis amo  
     quema tlamis.  
<sup>28</sup> Pero tojuanti catlí timotequipanojcahua,  
 hasta toixhuihua, itztose ica temachili,  
 huan hasta iniixhuihua catlí tlacajtiyase itztose  
     cuali moixpa.”

## 103

*Ma tijpaquilismacaca Toteco por nochí itlati-ochihual catlí techmacatoc*

- <sup>1</sup> Ica nochí noyolo njipaqulismacas TOTECO yaya  
     catlí tlatzejtzeloltic.
- <sup>2</sup> Quena, njipaqulismacas TOTECO ica nochí noy-  
     olo,  
     huan amo niquelcahuas nopa huejhueyi  
     tlamantli catlí nechchihuilijtoc.
- <sup>3</sup> Yaya nechtlapojojpolhuía nochí notlajtlacolhua.  
     Huan nechchicahua quema nimococohua.
- <sup>4</sup> Nechchololtía imaco miquilistli.  
     Nechyahualohua ica itlaicnelijcayo huan ica  
     nochí nopa tlamantli catlí nechchihuilía,  
     pampa nechtlaejtla.
- <sup>5</sup> Quitemitía nonemilis ica tlamantli catlí cuali.  
     Huan mojmostla más njipiya chicahualistli hasta  
     njipiya tetili quen se hueyi cuajtli.

**6** TOTECO quinchihuila catli cuali huan quintlatolsencahua xitlahuac nochi masehualme catli tlaijiyohuiaj ininmaco sequinoc.

**7** Toteco quinextili Moisés quenicatza eltoc, huan quinnextili iisraelita masehualhua nopa huejhueyi tlamantli catli quichihua ica ihueyi chicahualis.

**8** TOTECO tetlasojtla miyac huan quipiya hueyi iyolo.

Yaya tlahuel huejcahua para pehuas cualanis.

Amo quema tlami itlaicnelijcayo.

**9** Amo techtlajilhuia tlatoctzitzti, niyon amo huejcahua cualantoc.

**10** Yaya amo techtlatzacuiltijtoc quen quinamiqui, por nochi totlajtlacolhua,

**11** pampa yaya quipiya nelhueyi iyolo ica nochi catli quiimacasij huan quitlepanitaj.

Quena, itlaicnelijcayo nelhueyi quen ihuexca il-huicactli.

**12** Toteco techquixtili totlajtlacolhua huan quitlali huejca tlen tojuanti.

Quena, quitlali quen ihuejcaca campa hualquisa tonati huan hasta campa oncalaqui.

**13** Quen se tetata quintlasojtla iconehua, quej nopa TOTECO quintlasojtla catli quiimacasij huan quitlepanitaj.

**14** Pampa Toteco quimati para tojuanti san tielij tlaltejpoctli,

**15** huan tonemilis san panotiquisa huan amo huejcahua.

Tonemilis eltoc quen se xihuitl o quen se xochitl.

**16** Quema quiilpitza ajacatl,

ixpolihui tonemilis huan ayacmo aqui hueli  
quimati sintla nelía tiitztoyaj.

<sup>17</sup> Pero TOTECO mojmostla quinicnelía nochí catlí  
quiimacasij huan quitlepanitaj.

Huan quinchihuilis catli xitlahuac nochí mase-  
hualme catli itztoque ama huan nojquiya  
ininconehua catli tlacajtiyase teipa.

<sup>18</sup> Quena, yaya quinchihuilis catli cuali inijuanti  
catli quichihuaj catli ica mocajtoque  
quichihuase,

huan inijuanti catli quichihuaj catli quiijtohuaj  
itlanahuatilhua.

<sup>19</sup> TOTECO quitlalijtoc isiya nepa ilhuicac huan  
nopona mosehuía para tlanahuatis.

Yaya quipiya tlanahuatili ica nochí catli onca.

<sup>20</sup> Xijpaquilismacaca TOTECO nochí amojuanti  
anitequihuajcahua catli tlahuel  
antejtetique.

Quena, amojuanti catli anquitlacaquillaj  
catli anmechnahuatía huan nimantzi  
anquichihuaj,

xijpaquilismacaca.

<sup>21</sup> Quena, xijhueyimatica TOTECO nochí amo-  
juanti anitequihuajcahua catli anitztoque  
quen isoldados.

Xijhueyimatica amojuanti catli anquite-  
quipanohuaj huan anquichihuaj catli yaya  
quinequi.

<sup>22</sup> ¡Nochí masehualme huan nochí tlamtli catli  
mopantíaj campa hueli ipan nochí itlanahu-  
atilis,

nochí ma quipaquilismacaca TOTECO!

Na nojquiya tlahuel nijpaquilismaca.

# 104

*Toteco quimocuitlahuía catli quisencajtoc*

**1** ¡Na nimitzpaquilismacas, TOTECO!

¡TOTECO Dios, nelía tihueyi!

Campa ta timocahua nochí tlayejyectzi huan cua-jcualtzi.

**2** Mitzyahualohua tlahuili catli onpano yejyectzi.  
Ta tijpatlajqui nopa ilhuicactli quen se masehuali  
quipatlajtosquía se yoyomitl.

**3** Eltoc quen quema timochanti,  
tijtlali nopa cuatetomitl ipan atl catli huejcapa,  
huan tijsencajqui nopa mixtli para elisquía mo-carros.

Ta tihueli tinejnemi san ajacatipa.

**4** Tiquintequihuía motequihuajcahua quen mot-lati-lanilhua huan tiquinchihua ma elica  
quen tlielemectli.

**5** Ta cuali tijtlatzquilti ni tlaltipactli para ma amo  
mijcuinis tlen campa eltoc.

**6** Tijchijqui ma huala miyac atl catli quiixtzajqui  
ni tlaltipactli quen elisquía iyoyo.

Quena, tijchijqui atl ma tlejco hasta ajsic ipan  
nochí tepeme.

**7** Pero quema ta ticamanaltic huan ticajhuac nopa  
atl,  
nopa atl motlalojtejqui huan mosansejcotilito  
ipan nopa hueyi atl pampa ta titlahuejchi-jqui.

**8** Tlejcoque tepeme huan nopa tlamayame  
temoque ipan ininlugar campa ta  
titlanahuati ma mosehuica.

**9** Teipa tiquintlalili ininnepa nopa huejhueyi atl  
para ayacmo quema ma quiixtzacuaca tlali.

- 10** Ta tijchijqui atl ma motlalo ipan atlajtli campa  
tepeme,  
huan ma temotihualla hasta quitemitía campa más  
tlatzintla nopa tlamatayame campa hueli.
- 11** Ica nopa atl tiquinamac a nochí tlapiyalme para  
ma atlaca.  
Ipan nopa atlajtli aixhuij nopa burrojme catli ne-  
mij cuatitla.
- 12** Nopa totome quichihuaj inintepasol iteno nopa  
atlajtli,  
huan huicaj quema itztoque ipan ininmacuayo  
nopa cuame.
- 13** Ta tijchihua ma huetzi atl ipan tepeme,  
huan tijchihua ma tlaelilti nopa tlali.
- 14** Quena, ta Toteco tijchihua ma moscalti sacatl  
para ma tlacuaca tlapiyalme.  
Huan tijchihua ma onca quilitl,  
cuatlajcayotl huan cuayolotl catli masehualme  
quitocaj para ma ica mopanoltica.
- 15** Nojquiya tiquinmaca xocomecatl iayo para ma  
ica yolpactoca,  
huan aceite para ma mopologa ipan inixayac,  
huan nojquiya tiquinmaca tlacualistli para ma  
quipiyaca fuerza.
- 16** Ica nopa atl moscaltíaj nopa tiocuame catli ta,  
TOTECO,  
tijtojqui ipan tlali Líbano.  
Nopa cuame tlahuél huejcapantique huan  
quipiyaj miyac ininxochiyo.
- 17** Ipan nopa cuame motepasoltíaj nochí tlamatli  
totome.  
Huan ipan nopa ciprés cuahuitl motepasoltía  
nopa tototl catli itoca cigüeña.

**18** Inintzonatipa nopa huejhueyi tepeme onca sacatl para nopa chivojme catli nemij cuatitla.

Huan campa cocoyocatoc nopa teme, mochantij-toque nopa cuatochime.

**19** Toteco, ta tijchijqui metztli para quinextis ipan tlaque metztli itztoque masehualme.

Huan nopa tonati tijchijqui para tenextilis sesen tonal.

**20** Ta tijtitlani nopa tzintlayohuilolt huan mochihua yohuali,

huan quema tlayohua, quisaj noch tecuanime catli itztoque ipan cuatitlamitl.

**21** Nopa leones catli noja conetzitzin nanalcaj pampa mayanaj.

Huan quitemohuaj nopa tlacualistli catli ta, Toteco Dios, tiquinmacas.

**22** Quema quisas tonati sempa onmotlatíaj ipan iniosto.

**23** Huan masehualme quisaj para tequipanotij, huan tequitij chicahuac hasta tiotlac.

**24** ¡TOTECHO, nelía tijchijtoc miyac tlamatli!

Huan noch tlamatli tijsencajtoc ica miyac tlalnamiqulistli.

Nejmaxtic tlal tipactli temitoc ica miyac tlamatli yejyectzitzin catli ta tijchijtoc.

**25** Xiquitaca nopa hueyi atl catli tlahuac huan hueyi.

Nopona itztoque miyac tlamatli tlapiyalme tziquitetzitzin huan huejhueyi.

**26** Nopona nejnemij nopa huejhueyi barcos,

huan nopona itztoc nopa hueyi tlapiyali itoca levi-  
atán catli temajmati catli ta tijchijqui para  
ma mahuilti ipan hueyi atl.

<sup>27</sup> Nochi ni tlapiyalme mochiyaj ipan ta para  
xiquintlamaca quema monequi.

<sup>28</sup> Huan quema tiquinmaca inintlacualis,  
inijuanti quiselíaj.

Ta timomatlapohua ica motlaicnelilis huan  
tiquintlamaca hasta ixhuij ica tlen más  
cuali.

<sup>29</sup> Pero sintla tiquintlahuelcahua, inijuanti mote-  
quipachohuaj.

Huan sintla tiquinquixtilía ininnemilis, miquij  
huan mocuepaj tlaltejpoctli.

<sup>30</sup> Huan quema ta tijtitlani moTonaltzi catli  
temaca nemilistli,  
tlacatij sempayano para sempa ma momiyaquil-  
ica huan tlacualnesis ipan ni tlaltipactli.

<sup>31</sup> ¡Ma tijhueyitlalica TOTECO pampa ihueyitilis  
amo quema tlamis!

¡Ma quipanti paquelistli TOTECO ipan nochí catli  
quichijtoc!

<sup>32</sup> Quema Toteco quitlachilía tlaltipactli, ni tlalti-  
pactli huihuipica.

Huan quema quinpanajsi tepeme, inijuanti  
lemenij.

<sup>33</sup> Nijhuicatis TOTECO nochí tonali catli niitztos  
ipan ni tlali.

Quena, nijpaquilismacas Toteco Dios ica  
tiohuicatl hasta tlamis nitlaijiyotilanas.

<sup>34</sup> Ma quipacti TOTECO nochí catli nimonejne-  
huilia tlen ya,

huan na nimopaquilismaca ipan ya.

<sup>35</sup> Ma miquica nochí catli quinپactía tlajtlacolchi-huaj ipan ni tlaltipactli.

Quena, ma ayacmo itztoca catli amo quinequij quitlepanitase TOTECO.

Pero na nijpaquilismacas ica nochí noyolo.

¡Paquilitli!

## 105

*Nopa huejhueyi tlamantli catli Toteco quinchihuili israelitame*

<sup>1</sup> Xijtlascamatica TOTECO por nochí nopa huejhueyi tlamantli catli yaya quichihua.

Xitepohuilica ipan nochí tlaltipactli catli yaya quichijtoc.

<sup>2</sup> ¡Xijhuicatica!

Quena, xijhuicatica tiohuicatl.

Xitlacamanalhuica tlen nopa huejhueyi tiochicahual nextili catli yaya quichijtoc.

<sup>3</sup> ¡Ximopaquilismacaca ipan Toteco!

¡Quena, xipaquiça nochí amojuanti catli anquihueyichihuaj TOTECO!

<sup>4</sup> Xijtemoca TOTECO huan ichicahualis.

Quena, nochipa xijtemoca para anquiximatise más.

<sup>5</sup> Xiquelnamiquica nopa tiochicahual nextili catli yaya quichijqui por amojuanti.

Xiquelnamiquica itlamachtil huan catli yaya quijtojtoc.

<sup>6</sup> Aniixhuihua Abraham catli itequipanojca Toteco,

huan amojuanti aniconehua Jacob catli Toteco quitlapejpeni,

xiquelnamiquica.

<sup>7</sup> Yaya TOTECO huan yaya toDios.

Catli yaya tlanahuatijtoc para mochihuas, ya nopa  
monextía ipan nochí tlaltipactli.

<sup>8</sup> Yaya amo quema quielcahuas nopa camanal  
sencahualli catli quichijqui,

masque tlacajtiyase masehualme huan inincone-  
hua huan mil hueltas tlacatise ininteipan  
ixhuihua,

yaya amo quielcahuas.

<sup>9</sup> Noja eltoc nopa camanal sencahualli catli quichi-  
jqui ica Abraham huan Isaac.

<sup>10</sup> Teipa quiompahui nopa camanal sencahualli ica  
Jacob para ma pano ica nochí israelitame,  
huan elis para injuanti para nochipa.

<sup>11</sup> Huan Toteco quijito:

“Na nimechmacas nopa tlali Canaán para elis  
amoaxca para nochipa.”

<sup>12</sup> Quinilhui ya ni quema injuanti noja ayamo  
eliyayaj miyaqui,

huan san itztoyaj quen paxalohuani ipan tlali  
Canaán.

<sup>13</sup> Teipa san panotinenque tlen se tlali hasta seyoc  
tlali,

huan tlen se tlanahuatilistli hasta seyoc tlanahu-  
atilistli.

<sup>14</sup> Pero ipan nochí nopa tlamantli Toteco amo  
quincahuili ma quinajsi se tlamantli catli  
amo cuali.

Huan tlanahuatiani catli quichijke campica para  
quinchihuilise catli fiero,

Toteco quintlatzaculti.

<sup>15</sup> Toteco Dios quinilhui:

“Amo xiquincuatotonica nomasehualhua catli  
niquidapejpenijtoc,  
niyon amo tleno xiquinchihuilica notlajtol pan-  
nextijcahua.”

<sup>16</sup> Toteco quititlanqui se hueyi mayantli ipan tlali  
Canaán,  
huan quinquixtili nochí tlamatli tlacualistli catli  
ica mopanoltiyaya.

<sup>17</sup> Pero teipa Toteco quititlanqui se tlacatl ma  
quintlayacancuili para quinmanahuis  
imasehualhua tlen nopa mayantli.

Quena, elqui José catli quinamacatoyaj para ma  
tequipanoti san tlapic ipan tlali Egipto.

<sup>18</sup> Huan nepa ipan tlatzactli quimetzcocojque  
quema quimetzilpilijque ica tepos cadena,  
huan quiilpilijque se tepostli ipan iquechtla.

<sup>19</sup> Nopona itztoya José hasta ajsic nopa tonali catli  
TOTECHO quiixquetztoya.

Quena, Toteco quiyejyeco José para quiitas sintla  
cuali elqui ipan iyolo.

<sup>20</sup> Huajca Faraón catli eliyaya hueyi tlanahuatij-  
quetl, tlanahuati ma quiqxistica.

Huan quicajqui ma yohui majcajtoc.

<sup>21</sup> Teipa nopa tlanahuatijquetl quitlali ma quinya-  
cana nochí itequipanojcahua,

huan ma quimocuitlahui nochí catli quipixtoya.

<sup>22</sup> Mocajqui ipan ya imax para quintlatzacuiltis  
itequipanojcahua catli más hueyi,

huan para ma quintlalnamicti catli huehuentzitzti.

<sup>23</sup> Teipa Israel ajsico ipan tlali Egipto,

huan itztoya nopona ihuaya iconehua ipan tlali  
Cam.

- 24** Huan Toteco tlahuel quinmiyaquili iixhuihua Jacob,  
 huan quipixque más chicahualistli,  
 huan amo quen inincualancaitacahua catli quin-nahuatiyayaj.
- 25** Teipa Toteco quinyolpatlac nopa egiptome,  
 huan quinchijqui ma quincualancaitaca nopa israelitame.  
 Quena, quincualancaitaque huan quinchihualti-jque ma tetequipanoca san tlapic.
- 26** Pero teipa Toteco quititlanqui itequipanoja, Moisés,  
 huan Aarón catli yaya quintlapejpenijtoya.
- 27** Huan inijuanti quichijque huejhueyi tlanextil-ijcayotl huan tiochicahual nextili ipan tlali Egipto.
- 28** Quena, Toteco quititlanqui tzintlayohuilotl ipan nochí nopa tlali,  
 pampa amo quichihuili jque cuenta itlanahuatil para ma quincahuaca imasehualhua ma yaca majcajtoque.
- 29** Teipa quicuepqui estli nochí atl catli oncayaya ipan nopa tlali.  
 Huan nopa michime mijque.
- 30** Teipa quintitlanqui tlahuel miyac temasolime ipan nochí nopa tlali,  
 huan calajque hasta ipan nopa cuarto campa cochqui nopa tlanahuatijquetl.
- 31** Teipa quema Moisés camanaltic,  
 hualajque miyac sayolime.  
 Huan atime quitlapachocoj nopa tlali.
- 32** Nojquiya quintitlanili huejhueyi tesihuitl huan amo atl.

Huan tlapetlaniyaya campa hueli ipan noch i nopa tlali.

<sup>33</sup> Huan nopa tesihuitl quinenpolo noch i xocomeca mili, huan higuera cuame, huan quitlami pojpostejqui nopa huejhueyi cuame.

<sup>34</sup> Teipa Toteco camanaltic huan ajsicoj tlahuel miyac chapolime, hasta amo aqui hueliyaya quinpohua.

<sup>35</sup> Huan quicuajque noch i tlamantli xihuime catli oncayaya ipan nopa tlali, huan nojquiya quitlamicuajque noch i tlamantli pixquistli.

<sup>36</sup> Teipa quinmicti nopa coneme catli achtihui tlacatque ipan sesen familia tlen tlali Egipto. Quinmicti masque nopa tetajme tlahuel paquiyayaj huan motlepanitayayaj por nopa iniachtihui cone.

<sup>37</sup> Huan Toteco quinquixti imasehualhua ica temachili, huan quihiuicaque miyac oro huan plata.

Huan ipan nopa tonali amo mococo niyon se imasehual Toteco.

<sup>38</sup> Huajca nopa egiptome nelia pajque quema quisque nopa israelitame, pampa noch i injuanti tlahuel quinimacasiyayaj.

<sup>39</sup> Toteco quipatlajqui inintzonatipa se mixtli para quinecahuilis huan amo quintlatis tonati.

Huan ica tlayohua quitlaliyaya se tlilemectli inintzonatipa para ma quintlahuili.

<sup>40</sup> Quitlajtlanijque ma quinmaca nacatl para quicuase, huan quintitlanili solime.

Nojquiya quinmacac nopa tlacualistli catli itoca  
“maná” catli huetzqui tlen ilhuicac para ica  
ma ixhuica.

<sup>41</sup> Toteco quitlapo se tetl huan quisqui atl hasta  
mochijqui quen se hueyatl,  
catli motlalo ipan nopa huactoc tlali campa amo  
tleno eliyaya.

<sup>42</sup> Pampa yaya quielnamijqui catli ica mocajtoya  
itequipanojca Abraham.

<sup>43</sup> Huajca ica miyac paquelistli Toteco Dios quin-  
quixti imasehualhua catli quintlapejpenij-  
toc ipan tlali Egipto.

<sup>44</sup> Huan quinmacac imasehualhua nopa tlalme  
catli elque iniaxca masehualme catli amo  
israelitame.

Huan moaxcatijque ica nochí nopa pixquistli catli  
nopona oncayaya.

Quicuajque cuatlactli catli sequinoc quitoctoyaj.

<sup>45</sup> Nochi ya ni quichijqui para ma quichijtinemica  
catli quinilhuijtoya huan ma quintoquili-  
jtinemica itlanahuatilhua.

¡Paquelistli!

## 106

### *Ininyolteticayo israelitame*

<sup>1</sup> ¡Paquelistli!

¡Ma tijtlascamatica TOTECO pampa yaya nelía  
cuali iyolo huan itlaicnelijcayo amo quema  
tlamis ica tojuanti!

<sup>2</sup> ¿Ajqueya huelis quitlamijcuilos nopa yejyectzitzi  
tiochicahual nextili catli TOTECO quichi-  
hua?

¿Ajqueya huelis tepohuilis nochí catli quichijtoc  
Toteco?

<sup>3</sup> Quipiyaj paquilibrium nopa masehualme catli  
nochipa quichijtinemij catli cuali huan  
catli xitlahuac.

<sup>4</sup> TOTECO, techelnamiquis na quema tiquintiochi-  
huas huan tiquinmaquixtis momasehual-  
hua.

<sup>5</sup> Techcahuili ma niquitas catli yejyectzi tiquinchihuilis momasehualhua catli tiquintlapenijtoc.

Xijcahuili para nojquiya ma nipaquis inihuaya.  
Xijcahuia ma nimopaquilismacas ica inijuanti  
catli moaxcahuia.

<sup>6</sup> Tojuanti nojquiya titlajtlacolchijtoque san se  
quen tohuejcapan tatahua.

Titlaixpanoque huan tijchijtoque catli fiero.

<sup>7</sup> Tohuejcapan tatahua amo quimachilijque nopa  
huejhueyi tiochasticual nextili catli Toteco  
quichijqui ipan tlali Egipto.

Nyon amo quielnamijque para quipixqui hueyi  
iyolo inihuaya.

Inijuanti moyoltelijque ica Toteco nepa campa  
nopa hueyi atl catli itoca Chichiltic.

<sup>8</sup> Pero Toteco quinmaquixti para ma quitlepani-  
taca,  
huan tenextili ihueyi chicahualis ipan nochí tlalti-  
pactli.

<sup>9</sup> Quiajhuac nopa hueyi atl catli itoca Chichiltic  
huan quinahuati ma motlajcoxelo.

Huan quej nopa quitlapo se ojtli huactoc quen  
elisquía huactoc tlali,

huan quinchihualti tohuejcapan tatahua ma ipan panoca.

**10** Quej nopa quinmaquixti huan quinchololti inimaco inincualancaitacahua.

**11** Huan nopa atl quinatzonpolihuilti inincualancaitacahua hasta amo mocajqui niyon se catli amo mijqui.

**12** Huan huajca tohuejcapan tatahua quinelto- caque icamanal catli Toteco quinilhuijtoya.

Huan teipa huicaque huan quipaquilismacaque.

**13** Pero sempa nimantzi quielcajque nochí catli Toteco quichijtoya.

Huan amo mochixque para Toteco ma quinmaca consejos.

**14** ¡Amo! Nepa ipan huactoc tlali quiyejyecojque Toteco Dios ica catli tlahuatl quinequiyayaj ma quinmaca.

Quena, quifuerzajhuijque ma quinmaca nopa tlacualistli catli inijuanti quinequiyayaj.

**15** Huajca Toteco quinmacac catli quitlajtlanijque, pero nojquiya quintitlanili cocolistli catli ica mijque miyac nopa masehualme.

**16** Huan nopona campa quiqejetztoyaj ininyoyoncal,

quichicoitaque Moisés,

huan quichicoitaque Aarón catli TOTECO quiyocatlalijtoya para ma eli itotajtzi.

**17** Huajca motlapo tlali huan quintolo Datán, Abiram huan nochí catli quintoquiliyayaj.

**18** Huan Toteco quititlanqui tliltl tlen ilhuicac, huan quintlamitlati nopa tlaixpanoca tlacame.

- <sup>19</sup> Nepa ipan tepetl Horeb mochihuilijque se becerro tlen oro huan ya nopa quihueyichijque.
- <sup>20</sup> Quitlahuelcajque Toteco huan ihueyi chicahualis,  
huan pejque quihueyimatij se becerro tlen oro,  
iixcopinca se tlapiyali catli quicua xihuitl.
- <sup>21</sup> Huan quej nopa quielcajque ininteco Dios catli quinmaquixtijtoya,  
yaya catli quichijtoya huejhueyi tlamantli ipan tlali Egipto,
- <sup>22</sup> huan ipan nopa hueyi atl catli itoca Chichiltic.
- <sup>23</sup> Huajca Toteco quiijto para quintzontlamiltisquia,  
pero Moisés catli Toteco quitlapejpenijtoya motla-jcoquetzqui,  
huan quitlajtlani Toteco para amo ma quintzontlamilti ica ihueyi cualancayo.
- <sup>24</sup> Teipa nopa israelitame amo quinejque calaquise ipan nopa tlali catli nelía cuali,  
pampa amo quineltoaque para Toteco quinmocuitlahuisquia.
- <sup>25</sup> Huan ipan ininchajchaj pejque quiejelnamiquij TOTECO huan amo quitlacaquilijque catli quinilhuiyaya ma quichihuaca.
- <sup>26</sup> Yeca Toteco Dios momatlananqui huan tlatestigojquetzqui para quintzontlamiltisquia ipan nopa huactoc tlali.
- <sup>27</sup> Quiijto para ininconebla quinsemanasquia huan quintitlanisquia,  
ipan sequinoc tlalme para ma itztotij quen sequinoc altepetl ehuani.

- 28 Nojquiya ipan tlali Peor tohuejcapan tatahua mosansejcotilijque inihuaya catli quihueyichihuayayaj Baal,  
 huan hasta quinmacaque tlacajcahualistli mijcatzitz.
- 29 Huan ica ya ni quicualancamacaque Toteco.  
 Yeca Toteco quititlanqui se hueyi cocolistli ininpani huan miyac mijque.
- 30 Huan Finees moneltlali huan motlananqui,  
 huan quinmicti nopa masehualme catli ica intlatjtlacolhua quichijtoyaj ma huala nopa cocolistli.  
 Huan ica ya nopa moquetzqui nopa cocolistli.
- 31 Huan ni cuali tlamantli quichijqui para Finees ma quielnamictoca para nochipa quen se tlacatl catli cuali.
- 32 Nojquiya campa atl Meriba,  
 nopa israelitame quicualancamacaque Toteco.  
 Quena, por inijuanti, Toteco cualanqui ica Moisés.
- 33 Pampa quichijque ma cualani Moisés,  
 huan ma camanaltitiquisa ica catli amo monequiyaya.
- 34 Huan nojquiya nopa israelitame amo quintontlamiltijque nochi nopa altepeme,  
 ipan nopa tlalme catli TOTECO quinnahuatijtoya ma quisosoloca.
- 35 San achi más mosansejcotilijque inihuaya catli amo quitlepanitayayaj Toteco,  
 huan nojquiya quichijque catli inijuanti momajtoyaj quichihuaj.
- 36 Quinhueyimatque ininteteyohua,  
 huan mohuejcatlalijque tlen Toteco,  
 huan ica ya nopa mopolojque.

**37** Hasta quinmictijque ininconehua quen se tlacajcahualistli para iajacahua Amocuallacatl.

**38** Huan pampa quinmictijque ininconehua catli amo tleno quichijtoyaj para quinmacase nopa teteyome tlen tlali Canaán, quinenpolojque nopa tlali ica inieso.

**39** Huan inijuanti nojquiya monenpolojque ica nochitlamantli fiero catli quichijque.

Pampa quema quinhueyichihuayabaj teteyome, Toteco Dios quinitayaya quen elisquíia momecatiyayaj ica seyoc catli amo ininnamic.

**40** Yeca TOTECO tlahuel cualanqui ica imasehualhua,

huan ayacmo quinejqui quinitas.

**41** Huan quintemactili ininmaco inincualancaitacahua catli ehuayayaj ipan nopa tlalme catli amo quitlepanitayayaj Toteco,

para nopa masehualme ma quinnahuatica.

**42** Huan quena, inincualancaitacahua quintlaijiyohuiltijque

huan tlahuel quincocojque pampa itztoyaj ininmaco.

**43** Miyac huelta Toteco quinmanahui, pero inijuanti quisenhuiquiliyayaj moyoltetilíaj ica ya.

Yeca teipa quicahuili ma motzontlamiltica por inintlajtlacolhua.

**44** Pero masque ya nopa quichihuayabaj, Toteco quintlaquiliyaya quema quitzajtziliyayaj,

huan quinpalehuiyaya quema masehualme quintlaijiyohuiltiyayaj.

**45** Quena, quielnamiquiyaya nochi catli quintlaj-tolcahuilijtoya para quinchihuilis.

Yeca quintlasojojtlac huan moyolcuepqui pampa tlahuel quinicneliyaya.

**46** Huan hasta quichijqui para inincualancaitacahuia catli quintlaijiyohuiliyayaj, ma nojquiya quintlasojojtlaca.

**47** ¡TOTECO Dios, techmaquixti tlen tocualancaitacahuia!

Sempa techsentili tlen campa hueli tlalme para tihuelise timitztlascamatise ta catli titlatzejzeloltic,

huan para huelis tipaquise huan timitzhueyimatisse.

**48** Ma tijpaquilismacaca TOTECO Dios para nochipa,

yaya catli toTeco tiisraelitame.

Nochi imasehualhua ma quijjtoca:

“¡Quej nopa ma eli! ¡Paquilstli!”

## 107

### *Toteco quinmanahuía masehualme*

**1** ¡Xijtlascamatica TOTECO pampa yaya nelía cuali! ¡Itlaicnelilis amo quematlamis!

**2** Nochi amojuanti catli TOTECO anmechmanahui-jtoc, xitepohuilica.

Quena, xitepohuilica para yaya anmechmaquixti-jtoc ininmaco amocualancaitacahuia.

**3** Yaya ya quinsentilijtoc nochi nopa masehualme catli itztoyaj campa hueli ipan tlaltipactli.

Quinsentili catli itztoyaj ica ajco, ica tlani,

ica campa hualquisa tonati huan ica campa calaqui.

<sup>4</sup> Sequin nentinenque ipan huactoc tlali,  
niyon amo quipiyayayaj ininchaj,  
niyon amo quipixque se altepetl para ipan itztose.

<sup>5</sup> Amictinemiyayaj huan mayantinemiyayaj,  
hasta quimachiliyayaj para miquisquíaj pampa  
ayacmo quipiyayayaj chicahualistli.

<sup>6</sup> Huajca quitzajtzilijque TOTECO para ma quin-  
palehui,  
huan yaya quinpalehui.

<sup>7</sup> Quinyacanqui xitlahuac ipan se ojtlí catli  
temachtli.  
Huan quinhuicac ipan se altepetl para nopona ma  
itztotij.

<sup>8</sup> Xijhueyimatica TOTECO pampa yaya tlahuel tet-  
lasojtla,  
huan quichihua huejhueyi tlamantli catli nochí  
quisentlachilíaj.

<sup>9</sup> Pampa Toteco quitlamaca catli teicneltzi huan  
mayantinemí.

Quiaixhuitis catli amictinemi.

<sup>10</sup> Sequin inijuanti itztoyaj ipan tzintlayohuilotl  
ipan tlatzactli huan nechca para  
miquisquíaj.

Itztoyaj ilpitoque ica tepos cadenas.

<sup>11</sup> Ya nopa ininpantic pampa inijuanti moyoltetil-  
ijque ica catli TÓTECO quinnahuatijtoya,  
huan amo quitlacaquilijque Toteco Catli Más  
Hueyi.

<sup>12</sup> Yeca Toteco quincajqui ma tlaijiyohuica ipan  
nopa tequitl catli tlahuel teticayo.

Quena, huetzque huan amo aqui quinpalehui  
para sempa motlananase.

<sup>13</sup> Huajca quema ayacmo quimatiyayaj tlaque  
quichihuase ica nopa tlaijiyohuclistli,  
quitzajtzilijque TOTECO,

huan yaya quinmanahui tlen nopa tlaijiyohuclistli

<sup>14</sup> Quinquixti ipan nopa tzintlayohuilotl huan  
quinmanahui para amo miquise.

Huan quicotonqui nopa tepos cadena catli ica  
quinilpijtoyaj.

<sup>15</sup> Xijhueyimatica TOTECO pampa yaya tlahuatl  
tetlasojtla huan quichihua huejhueyi tla-  
mantli catli ica masehualme san quisent-  
lachilíaj.

<sup>16</sup> Pampa yaya quitlapanqui nopa puertas tlen  
bronze ipan tlatzacme,  
huan quihuejhueto nopa teposme catli ica quitza-  
cuayayaj nopa puertas.

<sup>17</sup> Sequin masehualme tlahuatl mohualiquilijque  
tlaohuijcayotl,  
pampa moyoltetilijque ica Toteco huan quiix-  
panoque.

<sup>18</sup> Huan ipan nopa tlaijiyohuclistli ayacmo  
mayanayayaj por inincocolis huan pampa  
itztoyaj nechca para miquise.

<sup>19</sup> Pero quema ayacmo quimatiyayaj tlaque  
quichihuase ica nopa tlaijiyohuclistli,  
quitzajtzilijque TOTECO huan yaya quinmanahui.  
<sup>20</sup> Toteco camanaltic huan mochicajque.

Huan quej nopa quinmaquixti para amo miquise.

<sup>21</sup> Xijhueyimatica TOTECO pampa yaya tlahuatl  
tetlasojtla huan quichihua huejhueyi tla-  
mantli catli nochiquisentlachilíaj.

- 22 Xijpaquilismacaca Toteco huan yaya quiitas  
quen elisquía se tlacajcahualistli.  
Huan xihuicaca huan xitepohuilica nochí catli  
yaya quichijtoc.
- 23 Nopa masehualme catli nemij ica ininbarcos  
ipan hueyi atl,  
huan yohuij ipan nochí tlaltipactli para  
tlanemacase huan tlacohuase,
- 24 nojquiya quiitztoque nopa yejyectzitzi  
tlamantli catli TOTECO quichijtoc ipan  
atl.
- 25 Quiitztoque quema TOTECO camanaltic huan  
quichijqui ma motlanana se ajacatl catli  
chicahuac,  
huan quitlananqui nopa atl.
- 26 Nopa barcos motlananayayaj huan sempa atz-  
intla huetziyayaj.  
Huan nopa masehualme catli itztoyaj ipan  
nopa barcos pejque huihuipicaj huan  
majmahuij.
- 27 Inijuanti huihuipicaque huan momimilojque  
quen ihuintini,  
huan ayacmo quimatque tlaque quichihuase.
- 28 Huajca quema itztoyaj ipan tlaohuijcayotl,  
quitzajtzilijque TOTECO,  
huan yaya quinmaquixti tlen catli quintequipa-  
cholmacayaya.
- 29 Quema tlaquiyahuiyaya huan tlaajacayaya  
chicahuac,  
yaya quitlacahualti nopa hueyi atl para ma ay-  
acmo molini,  
huan mochijqui icamanal.

**30** Huan inijuanti pajque miyac quema quiitaque  
ya moquetzqui nopa atl.

Huan quej nopa Toteco quinyacanqui ica  
yejyectzi hasta nopa ateno campa monequi  
ajsise ica ininbarcos.

**31** Ma quihueyimatica TOTECO pampa yaya  
tlahuel tetlasojtla,  
huan quichihua huejhueyi tlamantli catli noch  
quisentlachilíaj.

**32** Ma quipaquilismacaca Toteco tlamiyacapa ini  
ixpa noch masehualme huan inixpa nopa  
huehue tlacame catli tlayacanaj ipan nopa  
tlali.

**33** Toteco quinhuatztoc hueyame huan quinchijtoc  
quen huactoc tlali,

Nojquiya hueli quinhuatza campa meya atl.

**34** Nopa cuali tlali catli tlahuel tlaeliltia quichijtoc  
ma ayacmo tlaelilti.

Huan ya ni quichijqui por inintlajtlacolhua nopa  
masehualme catli itztoyaj nopona.

**35** Pero nojquiya nopa huactoc tlali campa amo  
tleno eli quichijqui ma tlaelilti.

Nojquiya quichijqui ma quipiya miyac atl catli  
meya campa hueli.

**36** Huan quinhuicac nopa masehualme catli  
mayantinemiyayaj para ma itztoca  
nopona,

huan ma quichihuaca inialtepe.

**37** Nojquiya quichijqui para ma tocaca ipan mila,  
huan ma quichihuaca xocomeca mili,  
huan ma quipixcaca tlahuel miyac inintlajca.

**38** TOTECO tlahuel quintiochijqui.

Nojquiya momiyaquilijque huan quinpixque  
miyac ininhuacaxhua.

<sup>39</sup> Teipa pejqui caxani ininmiyaca nopa mase-  
hualme,  
huan nochi mocajque teicneltzitzti,  
pampa quinajsic tlaohuijcayotl,  
tequipacholi huan tlaijiyohuclistli.

<sup>40</sup> Huan yaya quinechcapantlali nopa tlayacanani  
catli mohueyimatiyayaj,  
huan quinchijqui ma mocuapoloca campa amo  
oncac ojtli huan amo quimatque campa  
yohuiyayaj.

<sup>41</sup> Pero yaya quinmanahui nopa teicneltzitzti.  
Quinmiyaquili ininconebla quen elisquíaj pil-  
borregojtzitzti hasta mochijque onpanoc  
miyac.

<sup>42</sup> Ma quiitaca nochi catli quichijtoc TOTECO nochi  
catli nemij xitlahuac iixpa,  
huan ma paquica.

Pero nochi nopa fiero masehualme ma moca-  
matzacuaca.

<sup>43</sup> Masehualme catli tlalnamiquini quimachilise  
noch ni tlamatli catli Toteco quichijtoc,  
huan quiajocuise ipan ininyolo.  
Inijuanti monejnehuilise quenicatza TOTECO  
quintlasojlatihualajtoc imasehualhua.

## 108

*David quitlajtlani Toteco para itlapalehuil*

<sup>1</sup> ¡NoTeco Dios, noyolo mocuallalijtoc para nim-  
itzhueyimatis!

Nipaquis huan nihuicas tiohuicatl moixpa ica  
noch i noyolo.

<sup>2</sup> ¡Quena, na nihuicas huan nitlatzotzonas ipan noguitarra huan noarpa!

Ica paquilibrium na nihuicas ijnaltzi quema ayamo tlanesi.

<sup>3</sup> Nimitzpaquilibriumcas, TOTECO,  
campa hueli iniixpa masehualme tlen nochi alte-peme,

huan nimitzhueyimatis iniixpa masehualme tlen nochi tlalme.

<sup>4</sup> Pampa ta tlahuel titemachtli huan onpano miyac motlaicnelijcayo,

hasta quionajsi ihuejcapanca ilhuicactli.

<sup>5</sup> Ma nochi mitzhueyimatica nepa ilhuicac, Toteco Dios.

Huan ipan nochi tlaltipactli ma quisentlachilica masehualme mohueyitilis.

<sup>6</sup> Xijtlacaquili quenicatza mittzajtzilíaj mocone-hua catli tiquinicnelía.

Xihuala ica miyac chicahualistli huan techmanahuiqui.

<sup>7</sup> Toteco Dios camanaltic ipan itiopa huan quijito:  
“Ica paquilibrium nijxelos tlali Siquem huan nopa tlamayamitl catli itoca Sucot.

<sup>8</sup> Pampa na noaxca tlali Galaad huan Manasés.

Nosoldados hualase ipan tlali Efraín.

Huan notlanahuatijcahua hualase ipan tlali Judá.

<sup>9</sup> Pero catli itztoque ipan tlali Moab huan Edom nechtequipanose,

huan nitzajtzis ica paquilibrium quema ni quint-lantos nopa filisteos.”

**10** ¿Ajqueya nechmacas chicahualistli para niqintlanis nopa altepeme catli moyahuatzac-toque ica tepamitl?

¿Ajqueya nechyacanas para nicalaquis ipan tlali Edom?

**11** ¿Amo elis ta, tiToteco Dios, catli techyacanas? Techyacana huan xiya ica nosoldados para titlahuilanatij pampa amo aqui seyoc para techpalehuis, Toteco.

**12** Techpalehui para tiquintlanise tocualancaitacahua pampa san motlapalehuil ipati.

Amo ipati masque miyac masehualme techpalehuisquíaj sintla ta, amo.

**13** Pero ica ta motlapalehuil tijchihuase huejhueyi tlamantli.

Pampa san por ta ipan hueli timoquejquetzase tocualancaitacahua.

## 109

*David motlatlajti para Toteco ma quintlatza-culti icualancaitacahua*

**1** NoTeco Dios catli nimitzhueyitlalía, technanquili quema nimotlatlajtía ica ta, amo san xitlacacto.

**2** Pampa nopa tlajtlacolchijca masehualme nechejelnamiquij huan nechistlacahuíaj.

**3** Inijuanti nechcualancaitaj huan nechyahualohuaj para nechilhuisse camanali catli amo monequi.

Nechhuilanaj masque amo tleno niquinchihuilijtoc.

**4** Na niquinicnelía huan nimotlatlajtía para tiquintiochihuas.

Pero masque ya nopa njchihua,  
noja más quichihuaj campica para nechtzont-  
lamiltise.

<sup>5</sup> Na niquinchihuilá catli cuali,  
pero inijuanti nechtlaxtlahuíaj ica catli amo cuali.  
Masque niquinicnelía, inijuanti nechcualancaitaj.

<sup>6</sup> NoTeco, xiquintlali imaco se catli fiero.  
Se catli quimati tetlatelhuía ma quinhuica iixpa  
se juez catli fiero para ma quintlajtolsenc-  
ahua.

<sup>7</sup> Huan quema ya quintlajtolsencajtose, xijchihua  
para nochí quimatise para quihuicaj tlajtla-  
coli.

Huan quema motlatlajtíaj, xiquita quen elisquía  
tlajtlacolchihuaj.

<sup>8</sup> Nimitztlajtlanía para inemilis nocualancaitaca  
ma amo huejcahua ipan ni tlaltipactli.

Huan seyoc tlacatl ma quichihua nopa tequitl catli  
yaya quichihuayaya.

<sup>9</sup> Iconehua ma mocahuaca icnotzitzí huan isihua  
ma mocahua cahuali.

<sup>10</sup> Iconehua ma monejnenaquixtca huan ma  
motlaejehuijtinemica.

Ma quitemoca tlacualistli huejca tlen ininchaj  
catli ya tlamisosolijtoc.

<sup>11</sup> Ma quitlamitlacuicuilica catli quitlatlane-  
jtiyayaj,

huan catli seyoc tlali ehuani ma quiqxtilica  
nochí catli quitlantoc ica itequi.

<sup>12</sup> Amo aqui ma quipalehui ica niyon se tlamatli  
huan amo aqui ma quintlasojtla iconehua  
catli icnotzitzí.

<sup>13</sup> Ma miquica nochí iconehua.

Ma tlamiixpolihuica huan ayacmo aqui ma quinelnamiqui inintoca.

<sup>14</sup> TOTECO, amo xiquelcahua noch i intlajtlacol-hua itatahua huan inanahua.

Huan amo xiquintlapojpolhui.

<sup>15</sup> Ma mocahua inintlajtlacolhua moixpa, TOTECO,

pero ayacmo aqui ma quinelnamiqui nopa mase-hualme ipan ni tlaltipactli.

<sup>16</sup> Pampa inijuanti amo quinejque quipalehuise inihuampox.

Nojquiya quintojtocaque catli teicneltzitz huan quinmictijque catli motequipa-chohuayaya.

<sup>17</sup> Quinpactiyaya quintelchihuase inihuampox.

Huajca ama ta nojquiya xiquintelchihua.

Amo quema quintiochijque sequinoc, huajca ama nojquiya amo xiquintiochihua.

<sup>18</sup> Nopa tlatelchihualistli tlahuell quinpactia pampa eltoc ipan noch i catli quichihuaj.

Tlatelchihuaj mojmostla quen mojmostla moquentiaj ininyoyo,

o quijijatl o quicuaj se tlacualistli catli ajhuiyac.

<sup>19</sup> Huajca ama ipani ma huetzi nopa tlatelchihualistli,

quen elisquia se yoyomitl catli quinpantzacuas o quen inintzinquechilpica.

<sup>20</sup> Quej nopa, TOTECO, xiquintlaxtlahui nopa nocualancaitacahua catli nechistlacahuiaj, huan catli quinequij nechmictise.

<sup>21</sup> Pero TOTECO, ta catli tinoTeco,

techita na quen elisquía nimocone catli nijhuica  
motzonquisca.

Yeca techchololti imaco nocualancaitaca pampa  
ta titemachtli huan tinelcuali.

<sup>22</sup> Na nitlaijiyohuía huan tlahuel monequi motla-  
palehui,

Tlahuel nechcocohua noyolo.

<sup>23</sup> Niyajtinemi para nim quis huan nitlaijiyohuía  
quen se chapoli catli quitlahuiso se mase-  
huali.

<sup>24</sup> Notlancuaco ayacmo quipiya chicahualistli  
pampa tlahuel nimosajtoc.

Huan notlacayo ayacmo nacayo.

<sup>25</sup> Nochi masehualme ipan tlaltipactli nechhuet-  
zquiláj.

Yeca nochi catli nechitaj quojoliníaj inintzonteco  
huan nechpinajtíaj.

<sup>26</sup> ¡TOTECO Dios, techpalehui!

¡Techmaquixti pampa ta tlahuel titetlasojtla!

<sup>27</sup> Techmaquixti tlamiyacapa,  
para nochi ma quimatica para ta catli tijchijtoc,  
TOTECO.

<sup>28</sup> Huan teipa sintla nechtelchihuaj, amo tleno,  
pampa ta techtiochihuas.

Sintla motlananase ica na,  
mopinahuase,

huan na nijsenhuiquilis nimopaquilismacas,  
pampa na nimotequipanojca.

<sup>29</sup> Ma mopinahualtica tlamiyacapa inijuanti catli  
nechistlacahuíaj.

Quena, xiquinpinahualti.

<sup>30</sup> Pero na tlatocztitzi njtascamatis TOTECO,

huan      nijpaquilismacas      iniixpa      nochí  
masehualme.  
<sup>31</sup> Pampa yaya itztoc ininhuaya catli teicneltzitzi  
para quinmanahuis ininmaco inincualan-  
caitacahua.

## 110

*Toteco quimaca tlanahuatili nopa tlanahuatij-  
quetl*

<sup>1</sup> TOTECO quilhui nohueyiTeco:  
 "Ximosehui    nica    ica    nonejmac    hasta  
 nimitzmactilis    mocualancaitacahua    para  
 xiquinnahuati."

<sup>2</sup> TOTECO quichihuas para titlanahuatis tlen alte-  
 petl Jerusalén,  
 huan tiquinnahuatis mocualancaitacahua catli  
 campa hueli itztoque.

<sup>3</sup> Huan ipan nopa tonali quema titlahuilanas huan  
 monextis mochicahualis,  
 momasehualhua hualase campa ta huan mitztl-  
 jtlanise caquihuili para tlahuilanase para ta  
 ica miyac paquilstli.

Moyoyontijtose ica ininyoyo catli tlatzejzeloltic  
 para mitztequipanose,  
 huan ta tijpiyas yancuic chicahualistli mojmostla,  
 quen huetzi nopa yancuic ajhuachtli ica ijnaloc.

<sup>4</sup> TOTECO tlatestigojquetzqui huan amo moyol-  
 patlas ica catli quijitojtoc quichihuas.

Quena, yaya quijitojtoc para ta tielis titotajtzi para  
 nochipa quen Melquisedec.

<sup>5</sup> Toteco itztoc campa monejmac para mitzmocuit-  
 lahuis.

Ipan nopa tonali quema yaya tlahuel cualanis,

quintzontlamiltis miyac tlanahuatiani.

<sup>6</sup> Quintlatzacuiltis miyac masehualme ipan nochitlalme,

huan quintemitis nopa tlalme ica mijcatzitzti.

Miyac masehualme quintzonxamanis ipan miyactlalme.

<sup>7</sup> Pero ipan ojtli yaya atlis ipan miyac atlajme, huan nopa atl quifuerzajmacas huan quiseseltis.

## 111

*Toteco quinmocuitlahuía imasehualhua*

<sup>1</sup> ¡Paquリスト!

Ica nochí noyolo nijnequi njtlascamatis TOTECO, campa mosentilíaj masehualme catli itztoque xitlahuaque.

<sup>2</sup> Huejhueyi tlamatli quichijtoc TOTECO.

Nochi catli quiicnelíaj ma monejnehuilica tlen nochí ni tlamatli catli quichijtoc.

<sup>3</sup> Pampa tlahuel yejyectzi nochí nopa huejhueyi tlaticchicahual nextili catli quichihua.

Huan technextilíia ihueyitilis huan para yaya nochipa quichihua catli xitlahuac.

<sup>4</sup> TOTECO quichijtoc huejhueyi tlamatli catli amo huelis tiquelcahuase.

Quichijtoc tlamatli catli technextilíia para techicnelíia huan para yaya quipiya hueyi iyolo ica tojuanti.

<sup>5</sup> Yaya quinmaca tlacualistli nochí catli motemachíaj ipan ya.

Huan amo quema quielcahuas catli techtlajtolcahuilijtoc techchihuilis.

<sup>6</sup> Toteco quinextijtoc ihueyi chicahualis ica imasehualhua pampa yaya quinmacac nopa tlali Israel,  
masque achtihuiya eliyaya iniaxca sequinoc tlamantli masehualme.

<sup>7</sup> Nochi catli Toteco quichihua eltoc senquistoc xitlahuac huan cuali.  
Huan nochi itlanahuatilhua nelía temachtli.

<sup>8</sup> Para nochipa technextilía catli melahuac huan catli xitlahuac,  
huan monequi tijchihuase catli melahuac huan tiquinneltocase.

<sup>9</sup> TOTECO ya tlaxtlajtoc nochi para quinmanahuis imasehualhua.  
Huan quinilhuijtoc imasehualhua para quichihuas nochi catli quintencajqui ipan nopa camanal sencahualli.

¡Toteco nelía tlatzejzeloltic huan temajmati!

<sup>10</sup> Para tipehuase tijpiyase tlalnamiquilistli,  
achtihui monequi tiquimacasise huan tijtlepanitase Toteco Dios.  
Mochihuaj nelía tlalnamiquini nopa masehualme catli quintlepanitaj itlanahuatilhua.  
Ma tijpaquilismacaca para nochipa.

## 112

### *Toteco quinhueytlatlácatli quihueyitlepanitaj*

<sup>1</sup> ¡Miyac paquelistli quipiya nopa masehuali catli quiimacasi TOTECO!

Quena, nochi catli quinpactía quichijtinemise catli quiijtohuaj itlanahuatilhua Toteco tlahuel paquij.

<sup>2</sup> Iniixhuihua ni masehualme quipantise tlatlepanitacayotl campa hueli,

Pampa Toteco quintiochihua hasta iixhuihua se  
catli monejnemiltía xitlahuac iixpa.

<sup>3</sup> Ipan ichaj se masehuali catli quintlepanita it-  
lanahuatilhua Toteco,  
mopantis ica miyac tlamantli catli cuali huan  
patiyo.

pampa yaya quichihua catli xitlahuac huan cuali,  
amo quema quielcahuase.

<sup>4</sup> Ni masehuali itztoc quen se tlahuili catli tlahuía  
ipan tzintlayohuilotl.

Yaya tetlasojtla huan teicnelía huan techihuila  
catli xitlahuac.

<sup>5</sup> Se tlacatl catli cuali iyolo tetlasojtla huan tetlat-  
lanejtía catli quipiya.

Nochi catli quichihua quisa cuali,  
huan quiyacana xitlahuac nochí tlamantli catli  
eltoc imaco.

<sup>6</sup> Se tlacatl catli quej ni quichihua,  
amo huetzis quema hualas tlaohuijcayotl.

Masehualme catli cuajcualme quielnamiquise  
para nochipa.

<sup>7</sup> Yaya amo majmahui masque quiyolmelahuaj  
tlen se camanali catli temajmatía,  
pampa yaya senquistoc motemachijtoc ipan  
TOTECHO para quimocuitlahuis.

<sup>8</sup> Yaya quipiya temachili ipan iyolo huan amo  
majmahui.

San motemacas huan mohuilanas chicahuac ica  
icualancaitacahua.

<sup>9</sup> Yaya quinpalehuía miyac catli teicneltzitzí huan  
amo tleno quipyaj.

Por nochí nopa tlamantli cuali catli quichihua,  
amo quema quielcahuase masehualme.

Nochi quicualitase huan quitlepanitase.

<sup>10</sup> Quema nopa fiero masehualme quiitase ni  
cuali tlacatl huan quenicatza masehualme  
quitlepanitaj,

cuanise chicahuac hasta tlanhuehuechocase  
pampa quichicoitase.

Pero teipa san quisase ipan pinahualistli pampa  
momacase cuenta para ayacmo tlenio hueli  
quichihuase.

## 113

### *Toteco quitlanana se catli teicneltzi*

<sup>1</sup> ¡Xijpaquilismacaca TOTECO!

¡Quena, nochí amojuanti catli anitequipanojcahua  
TOTECO, xijhueyimatica!

<sup>2</sup> Ma tijhueyimatica TOTECO ama huan para  
nochipa.

<sup>3</sup> Quena, nochí masehualme tlen campa hualquisa  
tonati hasta campa oncalaqi ma quihuey-  
imatica TOTECO.

<sup>4</sup> TOTECO quipiya tlanahuatili ica nochí catli itz-  
toque ipan nochí tlalme.

Huan ihueyitilis conpano ilhuicactli.

<sup>5</sup> ¿Ajqueya seyoc más hueyi quen TOTECO toDios  
catli mosehuía nepa huejcapa para tlanahu-  
atis?

<sup>6</sup> Tlatzintla tlen ya eltoc ilhuicactli huan tlalti-  
pactli.

Huan yaya mohujitzoma para tlachiyas ipan ni  
tlaltipactli.

<sup>7</sup> Huan quitlanana nopa teicneltzi catli eltoc quen  
masitoc ipan soquitl catli huejcatla.

Huan catli huetztoc campa quitepehuaj tlasoli  
quitlanana huan quisehuía campa cuali.

<sup>8</sup> Quena, quitlanana huan quisehuía ininhuaya  
huejhueyi tlacame  
catli quinyacanaj ialtepe ehuani.

<sup>9</sup> Yaya quichihua para nopa sihuatl catli amo  
quema conepixqui  
ma quinpiya iconehua huan ichaj.

Quena, quichihua ma eli se tenantli catli sen-  
pactoc.

¡Paquilibrium!

## 114

*Catli Toteco quinchihuili nopa israelitame ipan  
tlali Egipto*

<sup>1</sup> Huejcajya quema nopa israelitame quisque ipan  
tlali Egipto,

campa nopa masehualme camanaltij seyoc ca-  
manali,

<sup>2</sup> hualajque huan quichijque itiopa Toteco ipan  
tlali Judá para nopona ma mocahua inin-  
huaya,

huan nochí tlali Israel eltoya itlal campa nojquiya  
yaya tlanahuati.

<sup>3</sup> Quema nopa Hueyi Atl Chichiltic quinitac  
hualahuij nopa israelitame,

nimantzi moisihuilty huan motlapo para ma  
panoca campa tlahuactoc.

Nojquiya nopa atemitl Jordán motlapo para ma  
panoca.

<sup>4</sup> Nochí paquiyayaj hasta elqui quen nopa tepeme  
tzicuunque ica paquilibrium quen chivojme,

huan nopa tlaixtémolis tzicuínque quen pilborregojtzitzí.

<sup>5</sup> ¿Tlaque panoc ica nopa Hueyi Atl Chichiltic?

¿Para tlen motlajcoxelo?

Huan nopa atemitl Jordán, ¿para tlen moquetzqui?

<sup>6</sup> Huan nopa tepeme, ¿para tlen tzicuínque quen chivojme?

Huan nochí tlaixtémolistli,

¿para tlen tzicuínque quen pilborregojtzitzí?

Elqui pampa nochí tlahuel quitlepanitaj Toteco.

<sup>7</sup> Nochí tlaltipactli huihuipica iixpa TOTECO,  
yaya catli iTeco Jacob,

<sup>8</sup> pampa yaya quichijqui para ipan nopa tetl ma  
meya atl.

Quena, yaya quiqxiti atl ipan nopa tetl huan  
mochijqui quen se hueyatil.

## 115

### *Toteco huan teteyome*

<sup>1</sup> ¡TOTECO, amo techhueytatlali tojuanti!

¡Ximohueytatlali ta!

Xijchihua para nochí ma mitzpaquilismacaca  
pampa ta tlahuel titetlasoxtla huan tijchi-  
hua catli nelía melahuac.

<sup>2</sup> Amo xiquincáhuili para nopa masehualme ipan  
sequinoc tlalme ma quijjtoca:

“¿Canque itztoc ininDios?”

<sup>3</sup> Ta toTeco Dios, tiitztoc nepa ilhuicac,

huan nochí catli tijnequi tijchihuas, ta tijchihua.

<sup>4</sup> Pero nopa masehualme quinitaj quen ininteco-  
hua nopa teteyome catli quinchijchijtoque  
ica oro huan plata.

<sup>5</sup> Quipiyaj inincamac, pero amo camanaltij.

Quipiyaj iniixteyolhua, pero amo tlachiyaj.

<sup>6</sup> Quipiyaj ininnacas, pero amo tlacaquij.

Quipiyaj ininyacatzol, pero amo tlaijiyotilanaj.

<sup>7</sup> Quipiyaj ininmax, pero amo hueli quiitzquíaj  
niyon se tlamantli.

Quipiyaj ininmetz, pero amo nejnemij.

Amo huelij camanaltij.

<sup>8</sup> Huan nochí masehualme catli quinchijchijtoque  
nopa totiotzitzi nelía huihuitique quen  
nopa teteyome,

huan nojquiya san se huihuitique catli quin-  
hueyichihuaj.

<sup>9</sup> ¡Anisraelitame, ximotemachica ipan TOTECO,  
pampa san yaya anmechpalehuía huan anmech-  
manahuía

tlen nochí tlamantli catli amo cuali!

<sup>10</sup> Antotajtzitzi catli aniixhuihua Aarón huan ani-  
axcahua TOTECO,

ximotemachica ipan ya,

pampa san yaya anmechpalehuía huan anmech-  
manahuía tlen nochí tlamantli catli amo  
cuali.

<sup>11</sup> Nochi amojuanti catli anquimacasij huan an-  
quitlepanitaj TOTECO ximotemachica ipan  
ya,

pampa san yaya anmechpalehuía huan anmech-  
manahuía tlen nochí tlamantli catli amo  
cuali.

<sup>12</sup> TOTECO tlatocztitzi techelnamiqui huan yeca  
temachtli techtiochihuas.

Techtiochihuas tiisraelita masehualhua.

Quintiochihuas nopa totajtzitzi catli iixhuihua  
Aarón.

- <sup>13</sup> Quena, Toteco quintiochihuas nochí catli qui-imacasiy huan quitlepanitaj.  
 Quintiochihuas catli huejhueyi huan catli tziquitetzitzi.
- <sup>14</sup> Tlahuel miyac TOTECO ma anmechtiochihuas amojuanti huan amocone hua.
- <sup>15</sup> Quena, TOTECO catli quichijqui ilhuicactli huan tlaltipactli,  
 yaya catli anmechtiochihuas.
- <sup>16</sup> Nochi ilhuicactli iaxca TOTECO,  
 pero ni tlaltipactli quinmacatoc masehualme.
- <sup>17</sup> Catli mictoque amo huicaj huan quihueyimati TOTECÓ.  
 Inijuanti ayacmo hueli moliníaj.
- <sup>18</sup> Pero tojuanti, quena, tojuanti tijhueyimati se  
 TOTECO ama huan para nochipa.  
 ¡Xijhueyimatica TOTECO!  
 ¡Paquilitli!

## 116

*Tlascamatili pampa Toteco quimanahui tlen miquilitli*

- <sup>1</sup> Nelía niquicnelía TOTECO pampa yaya nechtla-caquilía quema nimotlatlajtía huan nech-nanquilía.
- <sup>2</sup> Huan pampa mohujtzoma huan nechnanquilía, nimotlatlajtis ica ya nochí tonali quema niyoltos.
- <sup>3</sup> Nechyahualojtoya miquilitli.  
 Nijmachiliyaya quen niitztosquía ipan ostol,  
 pampa nechajsic miyac cuesoli huan tequipacholi.
- <sup>4</sup> Huajca nijtzajtzili TOTECO huan niquilhui:  
 “TOTECO, techmanahui.”

- <sup>5</sup> ¡TOTECO nelía cuali iyolo!  
 ¡Yaya senquistoc xitlahuac!  
 ¡Toteco tlahuel tetlasojtla!
- <sup>6</sup> TOTECO quinmocuitlahuía catli moechca-panohuaj huan itztoque quen coneme.  
 Na ya nimictinemiyaya huan yaya nechmanahui.
- <sup>7</sup> Ama huelis nimosiyajquetzas pampa TOTECO nechchihuilitoc catli cuali.
- <sup>8</sup> Nechmanahujtoc imaco miquilistli,  
 quihuatztoc noixayo huan nechpalehujtoc para ma amo nihuetzi ipan tlajtlacoli.
- <sup>9</sup> Ipan ni tlaltipactli campa itztoque masehualme, nimonejnemiltis xitlahuac iixpa TOTECO.
- <sup>10</sup> Na nijneltocayaya Toteco huajca niquijto:  
 “Nitlaijiyohuía miyac, Toteco.”
- <sup>11</sup> Huan quema ayacmo nijmatiyaya tlaque nijchi-huas, niquijto:  
 “Nochi masehualme san istlacatij.”
- <sup>12</sup> Huan ama ya niitztoc cuali.  
 ¿Quenicatza huelis nijtlaxtlahuís TOTECO por nochi catli nechchihuilitoc?
- <sup>13</sup> Nijhualiquilis xocomecatl iayo quen se tlacajc-ahualistli,  
 huan nijhueyimatis TOTECO pampa nechmaquix-tijtoc.
- <sup>14</sup> Tlamiyacapa nijhualiquilis TOTECO nopa tlaca-jcahualistli catli nijtlajtolcahuili nijmacas.
- <sup>15</sup> TOTECO quiita para tlahuel ipati ininnemilis imasehualhua catli quinicnelía,  
 huan amo quincahuila miquise san quej hueli.
- <sup>16</sup> TOTECO, na nimotequipanojca,

quena, niicone se nonana catli nojquiya mitztequipano.

Huan techmanahuijtoc tlen campa niilpitoya.

<sup>17</sup> Nimitzpaquilismacas huan nimitztlascamatis huan ta tiquitas quen elisquía se tlacajcahualistli.

<sup>18</sup> Tlamiyacapa nijhualiquilis TOTECO nopa tlaca-jcahualistli catli nijtlajtolcahuili nijmacas.

<sup>19</sup> Quena, nijmacas TOTECO nopona ipan icalixpa ichaj catli eltoc ipan altepetl Jerusalén.

¡Paquilstli!

## 117

### *Ma tijhueyichihuaca Toteco*

<sup>1</sup> Xijpaquilismacaca TOTECO nochí anmase-hualme ipan nochí tlalme, xijhueyimatica nochí amojuanti ipan nochí alte-peme.

<sup>2</sup> Pampa yaya techicnelía ica se hueyi tlaicnelijcay-otl catli amo quema tlamis.

Yaya temachtli huan elis temachtli para nochipa.

¡Paquilstli!

## 118

### *Ma tijtlastcamatica Toteco*

<sup>1</sup> ¡Xijpaquilismacaca TOTECO pampa yaya nelía cual!

Itlaicnelijcayo amo quema tlamis.

<sup>2</sup> Nochi anisraelitame xijhueyimatica Toteco huan xiquijtoca:

“Itlaicnelijcayo Toteco amo quema tlamis.”

- <sup>3</sup> Nochi antotajtzitzi catli aniixhuihua Aarón no-jquiya xiquijtoca:  
“TOTECO itlaicnelijcayo amo quema tlamis.”
- <sup>4</sup> Nochi amojuanti catli anquitlepanitaj TOTECO xiquijtoca:  
“TOTECO itlaicnelijcayo amo quema tlamis.”
- <sup>5</sup> Quema nimotequipachohuayaya,  
nijtzajtzili TOTECO,  
huan yaya nechnanquili huan nechmanahui.
- <sup>6</sup> TOTECO itztoc nohuaya para nechpalehuis,  
yeca ayacmo nimajmahui,  
niyon amo niquimacasi catli huelis nechchihuilise masehualme.
- <sup>7</sup> TOTECO itztoc nonechca.  
Yaya nechpalehuis.  
¡Huan temachtli niquitas catli nijnequi ma inin-panti nocualancaitacahua!
- <sup>8</sup> Más cuali nimotemachis ipan TOTECO huan amo ipan se tlacatl.
- <sup>9</sup> Más cuali nimomanahuis ipan TOTECO huan amo ipan se hueyi tlanahuatijquetl.
- <sup>10</sup> Masque nochi masehualme tlen nochi tlalme ma nechyahualoca para nechhuilanase, na niquintzontlamiltis ica ichicahualis TOTECO.
- <sup>11</sup> Quena, masque nechyahualose huan nech-huilanase, pero na niquintlanis pampa nihuica itequiticayo TOTECO.
- <sup>12</sup> Nocualancaitacahua hualajque nopani quen sayolime, huan cuanque chicahuac quen tlitl catli quitlatía nochi huitzli.

Pero na niquintzontlamilti ica itequiticayo  
TOTECO.

<sup>13</sup> Nocualancaitacahua quichijque campica para  
nechmictise,  
pero TOTECO yaya nechpalehui.

<sup>14</sup> TOTECO nechpixtoc imaco,  
huan yeca nihuica para ya pampa nechchijtoc ma  
nitlatlani.

<sup>15</sup> Ipan ininchajchaj catli monejnemiltíaj  
xitlahuac iixpa TOTECO tlahucejchihuaj  
huan huicaj ica paquelistli,  
pampa TOTECO quinmaquixtía huan quichihua  
huejhueyi tlamantli.

<sup>16</sup> Ichicahualis TOTECO nelía hueyi huan quichi-  
hua huejhueyi tlamantli.

<sup>17</sup> Amo nim quis.

Pero niitztos para nitepohuilis nochí catli TOTECO  
quichijtoc.

<sup>18</sup> Toteco nechtlatzacuulti chicahuac,  
pero amo nechtemactili para ma nim qui.

<sup>19</sup> Xijtlapoca ipuertajyo itiopa TOTECO,  
pampa nijnequi nicalaquís para njtlascamatis  
TOTECO.

<sup>20</sup> Ipan ni puerta calaquij para yohuij hasta iixpa  
TOTECO,  
huan nopona calaquise nochí catli tlatzejzelol-  
tique iixpa.

<sup>21</sup> Nijhueyimatis noTeco Dios, huan njtlasca-  
matilis miyac,  
pampa nechtlacquaquili huan nechmaquixti tlen  
nocualancaitacahua.

<sup>22</sup> Calchihuani quihuejcamajcajque se hueyi tetl  
catli amo quinejque quitequihiuse,

pero ama nopa hueyi tetl eltoc catli más monequi  
para yas calnacastla huan ipan quiquetzase  
nopa cali.

<sup>23</sup> Nochi ya ni quichijtoc TOTECO huan yejyectzi  
nesi.

<sup>24</sup> Inin nopa tonali catli TOTECO quichijqui.  
Ma tipactoca ipan ni tonali.

<sup>25</sup> Nijtlajtlanía TOTECO ama ma techmaquixti to-  
juanti tlen tocualancaitacahua.

Techpalehui ama para titlatlanise.

<sup>26</sup> ¡Ma TOTECO mitztiochihua ta catli tihuala ica  
itequiticayo [118:26 O ica itoca.]!

Timitztiochihuaj hasta campa ichaj TOTECO.

<sup>27</sup> TOTECO yaya Dios, huan yaya techtlahuilía.  
Nijhualiquilis notlacajcahualis huan nijtlalis ipan  
itlaixpa para nijmacas.

<sup>28</sup> Pampa yaya noTeco Dios, yeca nijtlascamati  
huan nijhueyimati.

<sup>29</sup> ¡Xijtlascamatica TOTECO pampa yaya nelía cual!  
Itlaicnelijcayo amo quema tlamis.

## 119

### *Toteco itlanahuatilhua nelía cuali*

<sup>1</sup> Nelía paquij nochí catli monejnemiltíaj xit-  
lahuac,  
huan catli senquistoc quichijtinemij catli quiijto-  
hua iley TOTECO.

<sup>2</sup> Paquij nopa masehualme catli quitemohuaj  
TOTECO ica nochí ininyolo huan quichi-  
jtinemij catli yaya quiijtohua.

<sup>3</sup> Pampa inijuanti amo quichihuaj catli amo cuali.

- Monejnemiltíaj senquistoc ipan iojhui TOTECO.
- <sup>4</sup> Ta techmacatoc motlanahuatilhua para ma ti-jchihuaca catli quijtohuaj.
- <sup>5</sup> ¡Tlahuel nijnequisquía nijchijtinemis senquistoc catli techyolmelajtoc ma tijchihuaca!
- <sup>6</sup> Quej nopa amo nimopinahuasquía sintla niquinchijtinemis nochí motlanahuatilhua.
- <sup>7</sup> Na nimitztlascamatis ica nochí noyolo quema ya nijmachilis nochí motlamachtilhua catli xitlahuac.
- <sup>8</sup> Na nijchihuas nochí catli techyolmelajtoc ma tijchihuaca ipan tonemilis.
- Yeca amo techtlahuelcahua.
- <sup>9</sup> ¿Tlaque monequi quichihuas se telpocatl para itztos tlapajpactic moixpa, TOTECO?
- Monequi quipohuas mocamanal huan quichihuas catli quijtohuua.
- <sup>10</sup> Na ica nochí noyolo nimitztemojtoc, Toteco.  
Amo techcahuili nimoiyocacahuas tlen motlanahuatilhua.
- <sup>11</sup> Ipan noyolo nicajoctoc nochí catli tiquijtojtoc, para amo nitlajtlacolchihuas ica ta.
- <sup>12</sup> TOTECO, ta catli nochí mitzhueyimatiij, technextili quenicatza nijchihuas nochí catli techyolmelajtoc.
- <sup>13</sup> Na nitepohuilijtoc nochí motlamachtilhua catli ta techmacatoc.
- <sup>14</sup> Más nimopaquilismacatoc pampa ninemi ipan moojhui huan nijchihua catli ta tiquijtojtoc, huan amo ipan ricojyotl.

- 15 Nimonejnehuilis tlen motlanahuatilhua huan ninemis ipan nopa ojtli campa quiijtohuaj ma ninejnemi.
- 16 Nimopaquilismacas ica catli techyolmelajtoc, huan amo quema niquelcahuas mocamanal.
- 17 Na nimotequipanojca, techchihuili catli cuali. Techcahuili ma niitzto miyac tonali para nijsen-huiquilis nijtlepanitas mocamanal.
- 18 Techixtlapo para niquitas nopa huejhueyi tlamachtilistli catli quipiya moley.
- 19 Na san nipaxalohua ipan ni tlaltipactli. Amo xijtlati motlanahuatilhua tlen na pampa monequi ma nechyacana.
- 20 Ipan noyolo tlahuel nijnequi nijchihuas nochí catli xitlahuac quen quiijtohuá motlamachtil.
- 21 Ta tiquinajhua nopa tlaixpanoca masehualme catli mohueyimatiij.  
Inijuanti itztoque quen tlatelchihualme pampa quinhuejcamajcahuaj motlanahuatilhua.
- 22 Amo xiquincahuili ma nechpinahualtica pampa na nijtlepanita nochí catli ta tiquijtohuá.
- 23 Hasta nopa huejhueyi tlacame catli quipiyyaj tequiticayotl mosehuijque para nechejelnamisque,  
pero na nimotequipanojca, senquistoc nimonejnehuilía tlen nochí catli ta techyolmelajtoc.
- 24 Pampa motlajtol nechtlahuilía huan nechconsejomaca.
- 25 Nelía nimotequipachohua hasta nihuetztoc ipan tlatcejpoctli.

Xijyancuili nonemilis ica mocamanal.

<sup>26</sup> Na nimitzpo huili noch i catli nijsencajtoc nijchihuas huan ta techtlacaquili.

Ama technextili quenicatza nijchihuas noch i catli techyolmelajtoc.

<sup>27</sup> Techchihua ma nijmachili nopa ojtli catli ipan ninemis para niquito quilis noch i motlanahuatilhua.

Huan na nimonejnehuilis ipan noch i nopa huejhueyi tlamatli catli tijchihua.

<sup>28</sup> Nichoca pampa tlahuel nitlaijyohuía.

Techyolchicahua ica mocamanal.

<sup>29</sup> Techpalehui mojmostla para amo niistlacatis.

Huan pampa techicnelía, techpalehui ma nijmati noch i moley.

<sup>30</sup> Na nijtlapejpenijtoc nopa ojtli catli melahuac, huan san nimoilhuía tlen motlamachtil.

<sup>31</sup> Na nimotlatzquilijtoc ipan motlajtol huan nijchihuas catli quijtohua.

¡TOTECO, amo techcahuili nihuetzis ipan pinahualistli!

<sup>32</sup> Sintla techmacas noyolo catli cuali moixpa, huajca na achi más nijchijtinemis catli quijtohua j motlanahuatilhua.

<sup>33</sup> TOTECO, technextili quenicatza nijchihuas noch i catli techyolmelajtoc.

Huan nijchijtinemis noch i tonali hasta nimquis.

<sup>34</sup> Techmaca tlalnamiquilistli huan nijchijtinemis noch i catli quijtohua moley.

Quena, nijchijtinemis ica noch i noyolo.

<sup>35</sup> Techyacana ipan nopa ojtli catli technextilíaj motlanahuatilhua,

pampa san ya nopa nijnequi nijchihuas.

- <sup>36</sup> Xijchihua para más ma nijnequi motlajtol huan amo tomi.
- <sup>37</sup> Techhuejcatlali tlen nochí tlamantli catli amo cuali para amo niquixtocas.  
Más cuali tlatocztitzi techyolchicahuas para senquistoc ninemis ipan moojhui.
- <sup>38</sup> Techmatilti na, nimotequipanojca, para temachtli techmacas catli techtlajtolcahuilijtoc,  
pampa san ta nimitzimacasi huan nimitzlepanita.
- <sup>39</sup> Amo techcahuili ma niquinimacasi catli nechpinahualtíaj pampa nimitzlepanita,  
pampa motlamachtil senquistoc cuali huan xitlahuac.
- <sup>40</sup> TOTECO, na tlahuel nijnequi nijchihuas catli quijtohuaj motlanahuatilhua.  
Xijyancuili nonemilis pampa ta senquistoc tixitlahuac.
- <sup>41</sup> TOTECO, techtlasojtla huan techmaquixti tlen nocualancaitacahua,  
san quen tiquijtojtoc tijchihuas.
- <sup>42</sup> Quej nopa huelis niquinnanquilis inijuanti catli nechpinahualtíaj,  
huan niquinmatiltis para san nimotemachía ipan mocamanal.
- <sup>43</sup> Amo techquixtili mocamanal catli melahuac huan amo techcahuili ma niquelcahua,  
pampa san ipan motlamachtil na nimotemachía.
- <sup>44</sup> Na njtlepanitas moley mojmostla.  
Quena, para nochipa njtlepanitas moley huan amo quema tlamis.

- 45** Ninemis nimajcajtoc pampa niquintemohua motlanahuatilhua para nijchiwas catli quijtohuaj.
- 46** Na niquinpoohuilis motlajtol tlanahuatiani, huan amo nimopinahuas.
- 47** Na nimopaquilismacas ipan motlanahuatilhua pampa tlahuel niquinicnelía.
- 48** Nimomatlananas para nijnextis notlatlepanita-cayo por motlanahuatilhua, huan san nimonejnehuilijtinemis tlen nochi catli techyolmelajtoc ma tijchihuaca ipan tone-milis.
- 49** Amo quema xiquelcahua catli techtlajtolcahuilijtoc techchihuilis na, nimotequipanojca, pampa san ya nopa nijchixtoc.
- 50** Catli techtencahuilijtoc techchihuilis nechyoltlalía quema nimopantía ipan tlaijiyohuclistli.  
Quena, nochi catli tiquijtojtoc nechmaca yancuic chicahualistli ipan nonemilis.
- 51** Nopa masehualme catli mohueyimatij nechpinajtiaj pampa nimitzlepanita, Toteco, pero masque ya nopa, na amo nimohuejcatlalis tlen moley.
- 52** TOTECO, na niquelnamiqui motlamachtil catli huejcajya techmacac.  
Huan motlamachtil nochipa nechyoltlalía.
- 53** Nelía tlahuel nicualani ica nopa tlaixpanoca masehualme catli quitlahuelcahuaj moley.
- 54** Nochi catli techyolmelajtoc nechhualiquilijtoc paquelistli,  
huan nechchijtoc ma nihuica campa hueli campa niitzinentoc quen niseyoc tlali ejquetl.

- 55 Ica tlayohua nimitzelnamiqui, TOTECO,  
huan nijnequi nijchihuas catli quijtohua moley.
- 56 Nijseli tlahuel miyac tlatiochihualistli pampa  
nijchijqui catli quijtohuaj motlanahuatil-  
hua.
- 57 ¡TOTECO, san ta tinoaxca!  
Na niquijtojtoc para nijtlepanitas catli quijtohua  
mocamanal.
- 58 Ica nochí noyolo nijnequi motlatiochihualis.  
Techtlasojtlá senquistoc quen techtlajtolcahuilij-  
toc para tijchihuas.
- 59 Nimotlachili quenicatza nimonejnemilti  
huan nimantzi nimocuepqui para nijchihuas catli  
quijtohua motlajtol.
- 60 Quena, nimoisihiultía para nijchihuas catli qui-  
jtohuaj motlanahuatilhua.
- 61 Miyac tlaixpanoca masehualme nechyahualoj-  
toque para nojquiya ma nitlajtlacolchihua  
inihuaya,  
pero na amo niquelcajtoc moley.
- 62 Tlajco yohual nimehua para nimitztlascama-  
tis por motlamachtil catli senquistoc xit-  
lahuac.
- 63 Na niquinita quen nohuampoyohua nochí catli  
mitzimacasij huan mitztlepanitaj,  
huan nochí catli quichihuaj catli quijtohuaj mot-  
lanahuatilhua.
- 64 ¡TOTECO, nochí tlaltipactli temitoc ica motlaic-  
nelijcayo!  
Technextili nochí catli techyolmelajtoc ma nijchi-  
hua ipan nonemilis.
- 65 ¡TOTECO, tlahuel techchihuilijtoc catli cuali na,  
nimotequipanojca!

Techtiochijtoc senquistoc quen tiquijtojtoc para tijchihuas.

<sup>66</sup> NoTeco, techchihua ma nijmachili catli cuali huan techmaca tlalnamiquilistli, pampa na niquinneltocatoc motlanahuatilhua.

<sup>67</sup> Achtihuiya quema ayamo techechcapantlalij-toya para techtlatzacuiltis, san nimocuapolojtinenequi.

Pero ama senquistoc nijchihua catli quijtohua mocamanal.

<sup>68</sup> Ta nelía ticuali huan tijchihua san catli cuali. Huajca techmachti quenicatza ma nijchihua catli techyolmelajtoc para nijchihuas.

<sup>69</sup> Nopa masehualme catli mohueyimatij nechislacahujtoque, pero na ica nochí noyolo nijchijtinemis catli quijj-tohuaj motlanahuatilhua.

<sup>70</sup> Inijuanti huihuitique huan tzactoc inintlanamiquilis, pero na nochipa nimopaquilismaca ipan moley.

<sup>71</sup> Nelía cuali para techechcapantlali, pampa technextili para ma nijchihua nochí catli techyolmelajtoc ma tijchihuaca ipan tone-milis.

<sup>72</sup> Para na más ipati moleyes huan amo millones tlen oro huan plata.

<sup>73</sup> TOTECO, ta ica momax tijsencajqui notlacayo. Huajca ama techpalehui ma niquinmachili motlanahuatilhua huan niquintzontecomatis.

<sup>74</sup> Nochi catli mitztlepanitaj huan motemachíaj ipan ta,

paquise quema nechitase, pampa na nimotemachíaj ipan mocamanal.

<sup>75</sup> TOTECO, na nijmati para motlamachtil senquistoc xitlahuac.

Huan nopa tlatzacuiltili catli techmacatoc nojquia xitlahuac,

huan nechhualiquilis tlamantli catli cuali.

<sup>76</sup> Huajca ama techyoltlali ica moteicnelijcayo, senquistoc quen techilhuitjoc na, nimotequipanojca, para tijchihuas.

<sup>77</sup> Techyahualo ica motlaicnelijcayo para ma niyolto,

pampa san ipan moley nijpantía paquelistli.

<sup>78</sup> Ma huetzica ipan pinahualistli nopa masehualme catli mohueyimatij,

pampa tlahuel nechcocojtoque ica iniistlacatcayo.

Pero na san nimonejnehuilijtinemis catli quiijtohuaj motlanahuatilhua.

<sup>79</sup> Ma sempa mosentilica nohuaya nopa masehualme catli mitzimacasij huan mitztlepanitaj,

huan catli quiiximatij motlajtol.

<sup>80</sup> Xijchihua para noyolo ma monejnemilti xitlahuac ipan nochí catli techyolmelajtoc.

Huan quej nopa amo quemá nimopinahualtis.

<sup>81</sup> Na nitlapolosnequi pampa nijchiya para techmaquixtis tlen nocualancaitacahua,

pampa nimotemachijtoc ipan catli tiquijtojtoc para techchihuilis.

<sup>82</sup> Noixteyolhu siyahuij pampa quinequij quiitase ma pano nochí catli techtlajtolcahuilitjtoc para tijchihuas.

¿Hasta quemá techyoltlalis ica motlapalehuil?

- 83 Ya nihuehuentzi huan nitzocoyolijtoc quen se cuetlax bolsa catli quitlalijtoque campa poctli,  
pero amo niquelcajtoc catli techyolmelajtoc.
- 84 ¿Quesqui tonali monequi nijchiyas para tiquintlatzacuiltis catli nechtoquilijtinemij?
- 85 Nopa masehualme catli mohueyimatij huan catli quicualancaitaj moleyes quichijtoque se hueyi ostotl para ma nimasi.
- 86 Techpalehui, pampa motlanahuatilhua senquistoc xitlahuac,  
huan nechtepotztocatinemij masque amo tleno nijchijtoc.
- 87 San quentzi nechixpolihuiltáj,  
pero na amo niquinixpanotoc motlanahuatilhua niyon amo niquincajtoc.
- 88 Pampa hueyi moyolo, techcahuili ma niitzto.  
Huan quej nopa nijsenhuiquilis nijchihuas catli quiijtohua motlajtol.
- 89 TOTECO, mocamanal eltos temachtli para nochipa nepa ilhuicac.
- 90 Mojmostla ta titemachtli huan tiitztos temachtli ica nochí catli tlacajtiyase para nochipa.  
Cuali ta tijtlatzquilti ni tlali huan quej nopa eltoc.
- 91 Nochi tlamantli mocahua campa tiquinnahuati ma eltoca hasta ama ni tonal.  
Quena, nochí tlamantli catli tijchijqui mitznelto-caj huan mitztequipanohuaj.
- 92 Sintla amo nimopaquilismacatosquía ipan moley,  
huajca ya nimictosquía ica tequipacholi.
- 93 Amo quema niquinelcahuas motlanahuatilhua,

pampa ica motlanahuatilhua techmacatoc yan-  
cuic chicahualistli.

<sup>94</sup> Na nimoaxca, techmaquixti pampa nochipa ni-  
jchijtinentoc catli quiijtohuaj motlanahu-  
atilhua.

<sup>95</sup> Masque nopa tlaixpanoca tlacame motlatise  
ipan ojtli para nechtzontlamiltise,  
na san nimonejnehuilijtos tlen motlajtol.

<sup>96</sup> Nochi tlamanli catli más cuajcualtzi niquitztoc  
canque ontlami,  
pero motlanahuatilhua, amo quipiyaj  
inintlamiya.

<sup>97</sup> ¡Tlahuel niquicnelía moley!

San tlen ya nimonejnehuilijtinemi semilhuitl.

<sup>98</sup> Motlanahuatilhua nechchijtoque más nitlal-  
namiqui que nocualancaitacahua.

Pampa motlanahuatilhua nechyacantiyohuij mo-  
jmostla.

<sup>99</sup> Quena, achi más nitlalnamiqui hasta niquint-  
lani inijuanti catli notlamachtijcahua,  
pampa na nimonejnehuilijtinemi tlen motlajtol.

<sup>100</sup> Na más nijmachilía que nopa huehue tlacame,  
pampa nijchihua catli quiijtohuaj motlanahuatil-  
hua.

<sup>101</sup> Amo quema nijnectoc nijtoquilis se ojtli catli  
amo cuali,  
pampa senquistoc nijnequi nijchihuas catli quiij-  
tohua mocamanal.

<sup>102</sup> Amo nimohuejcatlalijtoc tlen motlamachtil,  
pampa ta technextilía quenicatza ma nimonejne-  
milti.

<sup>103</sup> Nijmati nelía ajhuiyac mocamanal.

Achi más tzopelic nijmati que sayolnectli.

- 104 Motlanahuatilhua      nechmacaj      tlal-namiquilistli.  
 Yeca amo nijnequi niqutas niyon se tlamatli istlacatili.
- 105 Mocamanal eltoc quen se tlahuili catli quitlahuilá noojhui campa ninejnemi para amo nimotepotlamis.
- 106 Se huelta nitlatestigojquetzqui, huan ama sempa nitlatestigojquetzas para njchihuas catli quiijtohuaj motlamachtilhua pampa nelía xitlahuac.
- 107 TOTECO, nechcatitoc para nimquis ininmaco nocualancaitacahua.  
 Techmaca yancuic chicahualistli quen tiquijtojtoc para tijchihuas.
- 108 TOTECO, nimitztlajtlanía xijseli nopa tlascamatili catli nimitzmaca quen se tlacajc-ahualistli.  
 Huan technextili motlamachtil.
- 109 Mojmostla nimopantía campa mahuilili para nonemilis,  
 pero amo niquelcajtoc moley.
- 110 Nopa tlaixpanoca masehualme quitlalíaj tlaquetzli para ma nimasi huan nihuetzis ipan tlajtlacoli,  
 pero na amo nimoiyocanequis tlen motlanahuatil.
- 111 Na san nimoaxcatijtoc motlajtol,  
 pampa san ipan motlajtol nijpantía paquelistli.
- 112 Ica nochí noyolo njchihuas catli quiijtohuaj motlanahuatilhua nochipa hasta nimquis.
- 113 Amo nijnequi niqunitas masehualme catli quichihuaj ome iniixayac.

Pero na niquicnelía moley.

**114** Ipan ta nimotlatía para amo nechcocose nocualancaitacahua huan ipan ta nimomanahuía.

Pampa nimotemachía san ipan mocamanal.

**115** Ma nechtalcahuica nopa masehualme catli fiero inintlalnamiquilis.

Ma amo nechcuatotonica pampa na nijnequi njchihuas catli quijjtohuaj motlanahuatilhua, Toteco Dios.

**116** Huajca noTeco, techmaca yancuic fuerza senquistoc quen techtlajtolcahuili.

Huan quej nopa sequinoc amo quema huelis quijjtose para san tlapic nijpixqui nechiyalistli ipan ta.

**117** Techfuerzajmaca para nimomaquixtis ininmaco nocualancaitacahua, huan nochipa nijpiyas paquelistli para njchihuas catli techyolmelajtoc.

**118** Ta tiquinhuejcamajcajtoc nochí catli quitlahuelcahuaj catli techyolmelajtoc.

Inijuanti quijjtohuaj tlalnamiquij, pero amo neli, san mocajcayahuaj.

**119** Nochi masehualme catli quinpactía tlajtla-colchihuaj ipan ni tlaltipactli tiquinita quen itetejtzo tepostli catli mocahua quema tij-molonía para tijtlapajpacchihuas.

Pero na niquicnelía huan njtlepanita motlajtol.

**120** Nochi notlacayo huihuipica pampa mitzimacasi huan mitztlepanita, Toteco.

Huan nojquiya niquimacasi motlatzacultil, huan yeca amo nijnequi nimitzixpanos.

- 121 Na nijchijtoc catli xitlahuac huan catli  
melahuac moixpa.  
Amo techtlahuelcahua ininmaco nocualancaitac-  
ahua,
- 122 Xitlatestigojquetza para techtiochihuas na, ni-  
motequipanojca.  
Amo xiquincahuili ma nechtlaijiyohuiltica nopa  
masehualme catli mohueyimatij.
- 123 Campa hueli nitlachixtoc pampa nijchixtoc  
techmaquixtiqui tlen nocualancaitacahua,  
hasta siyajtoque noixteyolhua.  
Nijchixtoc techmanahui senquistoc quen tiquijto-  
jtoc para tijchihuas.
- 124 TOTECO, ipan motlaicnelijcayo techchihuili  
catli cuali na, nimotequipanojca.  
Technextili quenicatza nijchihuas catli  
techyolmelajtoc ma tijchihuaca.
- 125 Na nimotequipanojca, techmaca tlal-  
namiquilistli,  
para niquiximatis motlajtol.
- 126 TOTECO, ya ajsic hora para timonextis huan  
tijchihuas catli tiquita para cuali.  
Pampa ni tlaixpanoca masehualme ayacmo  
quitlepanitaj moley.
- 127 Pero na más niquinicnelía motlanahuatilhua  
huan amo quen oro catli senquistoc cuali.
- 128 Pampa nochí motlanahuatilhua nelía  
xitlahuac.  
Yeca amo nijnequi niquitas niyon se tlamantli  
istlacatili.
- 129 Motlajtol nelía yejyectzi, TOTECO,  
yeca nijtoquilijtinemi ica nochí noalma.
- 130 Quema quiixtomaj mocamanal,

techtlahuilía huan techtlalnamictía nochí timase-hualme,  
hasta nojquiya masehualme catli san quentzi quimachilíaj.

<sup>131</sup> Yeca tlahuel nijnequi niquiximatis más catli quijtohuaj motlanahuatilhua,  
huan ya nopa nijtemohua.

<sup>132</sup> Techtlachili huan techtlasojtla,  
quen timomajtoc tiquinchihuilía catli mitzicnelíaj.

<sup>133</sup> Techyacana ipan se cuali ojtli ica mocamanal para amo nechtlanis niyon se tlaixpanoli.

<sup>134</sup> Techmanahui tlen nopa tlacame catli mosis-iníaj huan quinequij nechtlaijiyohuiltise.

Huan quej nopa nijchihuas catli quijtohuaj motlanahuatilhua.

<sup>135</sup> Ma monexti moteicnelijcayo ipan moixayac quema techtlachilía na, nimotequipanojca, huan techmachti nochí catli techyolmelajtoc para ma tijchihuaca.

<sup>136</sup> Tlahuel nichoca pampa miyac masehualme amo quitlepanitaj moley.

<sup>137</sup> TOTECO, ta nelía tixitlahuac huan nochí tlatzacultili catli titemaca nojquiya xitlahuac.

<sup>138</sup> Nochí motlajtol xitlahuac huan temachtli para ipan ma timotemachica.

<sup>139</sup> Nelía nimotequipachohua huan nicualani, pampa nocualancaitacahua amo quitlepanitz-toque catli ta tiquijtojtoc.

<sup>140</sup> Nochí moley nijyejyecojtoc huan niquitztoc para nelía tlatzejzeloltic.

Yeca niquicnelía.

<sup>141</sup> Nelía niteicneltzi huan miyac amo quinequij nechitase,

pero na amo niquinelcajtoc motlanahuatilhua.

<sup>142</sup> Ta tijchihua catli xitlahuac para nochipa huan moley senquistoc melahuac.

<sup>143</sup> Ipan na huetztoc tequipacholi huan tlaijy-ohuilistli,  
pero motlanahuatilhua san ya nopa nechyołchic-ahuaj.

<sup>144</sup> Motlajtol nochipa xitlahuac.

Techmaca tlalnamiquilistli para nijmachilis huan quej nopa huelis niitztos.

<sup>145</sup> Ica nochí noyolo nimitztzajtzilía.

Technanquili noTeco, huan nijchihuas catli techy-olmelajtoc.

<sup>146</sup> Na nimitztzajtzilía huan nimitzilhuía:

“Techmaquixti tlen nocualancaitacahua”,  
huan nijchihuas catli quijtohua motlajtol.

<sup>147</sup> Nimehua ica ijnaloc quema ayamo quisa tonati,

huan nimitztzajtzilía, TOTECO, pampa san ipan mocamanal nimotemachía.

<sup>148</sup> Ica tlayohua amo nicochi pampa san nimejnehuilía tlen nochí catli tiquijtojtoc techchihuilis.

<sup>149</sup> Techtlacaquili pampa titetlasojtla, TOTECO.

Techmaca yancuic chicahualistli quen quijtohua motlamachtil para tijchihuas.

<sup>150</sup> Nechca hualahuij nopa tlacame catli mosisiníaj huan nechtepotztocatinemij.

Inijuanti mohuejcatlalijtoque tlen moley.

<sup>151</sup> Pero ta tinoTeco tiitztoc nonechca.

Nochi motlanahuatilhua senquistoc melahuac.

<sup>152</sup> Hasta quema niitztoya nitziquitetzi niquiximatqui motlajtol,

huan nijmatqui para motlajtol amo quema  
mopatlas para nochipa.

<sup>153</sup> Xijtlachili notlaijiyohuilis huan techmanahui,  
pampa amo niquelcajtoc moley.

<sup>154</sup> Quena, techtenpalehui huan techmanahui  
quen techtlajtolcahuilijtoc para tijchihuas.

<sup>155</sup> Amo tiquinmaquixtis nopa masehualme catli  
amo mitzlepanitaj.

pampa inijuanti amo quichihuiláj cuenta catli  
techyolmelajtoc.

<sup>156</sup> TOTECO, ta tlahuel techtlasojtlá.

Techmaca yancuic chicahualistli quen quiijtohua  
motlamachtil para tijchihuas.

<sup>157</sup> Miyac nocualancaitacahua nechtepotzto-  
catinemij huan quichihuaj campica para  
ma nimitzixpano,

pero na amo nijcajtoc motlajtol.

<sup>158</sup> Na niquincualancaita nopa tlacajcayahuani,  
pampa inijuanti amo quichihuaj catli quiijtohua  
mocamanal.

<sup>159</sup> Xiquita TOTECO, na tlahuel niquinicnelía mot-  
lanahuatilhua.

Techmaca yancuic chicahualistli pampa ta nelía  
ticuali,

huan hueyi moyolo.

<sup>160</sup> Nochi mocamanal senquistoc melahuac.

Quena, nochi motlamachtil senquistoc xitlahuac  
huan huejahuas para nochipa.

<sup>161</sup> Tlacame catli quipiyaj tequiticayotl nemij  
notepotzco para nechcocose masque amo  
tleno niquinchihuilijtoc,

pero ipan noyolo san niquimacasi para niquix-  
panos mocamanal.

- 162 Na nimopaquilismaca ipan mocamanal quen  
se catli paqui miyac quema quipantijtoc  
catli tlahuel patiyo.
- 163 Nijcualancaita nochi tlamantli istlacatili,  
pero niquicnelía miyac moley.
- 164 Nimitzhueyimati chicome huelta ipan se tonal,  
huan nimitztlascamati pampa xitlahuac motla-  
machtil.
- 165 Nochi catli quiicnelíaj moley quipiyaj miyac  
tlasehuilistli ipan ininyolo,  
huan amo huetzise ipan tlajtlacoli.
- 166 TOTECO, tlahuel nimochixtoc para  
techmaquixtis  
huan yeca niquintlepanita motlanahuatilhua.
- 167 Na nijneltoca motlajtol huan niquicnelía ica  
nochi noyolo.
- 168 Na nijchihua catli quiijtohuaj motlanahuatil-  
hua huan motlajtol,  
pampa ta tiquiximati nochi catli nijchihua.
- 169 TOTECO, xijtlacaquili catli nimitztlajtlanía,  
techmaca tlalnamiquilistli senquistoc quen tiqui-  
jitojtoc para tijchihuas.
- 170 Xijtlacaquili catli nimitztlajtlanía quema ni-  
motlatlajtía,  
huan techmanahui quen tiquijtojtoc  
techchihuilis.
- 171 Na nimitzpaquilismacas,  
pampa ta technextilijtoc quenicatza nijchihuas  
nochi catli techyolmelajtoc ma tijchihuaca.
- 172 Nitepohuilis nochi catli tiquijtojtoc,  
pampa nochi motlanahuatilhua senquistoc xit-  
lahuac.
- 173 Ximocualtlali para techmanahuis,

pampa na nijtlapejpenijtoc nijchihuas catli quijj-tohuaj motlanahuatilhua.

<sup>174</sup> TOTECO, nijnequi techmaquixtiqui,  
pampa na san nimopaquilismaca ica moley.

<sup>175</sup> Techcahuili ma noja niitztos para nimitzhuey-imatis.

Xijcahuili para motlamachtil ma nechpalehui.

<sup>176</sup> Na nimocuapolojtoc quen se pilborregojtzi,  
yeca xihuala para techtemoqui,  
pampa na amo niquelcajtoc para niquintlepanitas  
motlanahuatilhua.

## 120

*Netlatlajtili para Toteco ma quimanahui tlen nopa istlacatini*

<sup>1</sup> Quema niitztoya ipan tlaijiyohuilistli,  
nijtzajtzili TOTECO huan yaya nechnanquili.  
Niquilhui:

<sup>2</sup> “TOTECO, techmanahui ininmaco nopa mase-hualme,  
catli nechistlacahuíaj huan nechejelnamiquij.”

<sup>3</sup> Ma moilhuica nopa istlacatini tlaque elis catli  
ininpantis por iniistlacaticayo.

<sup>4</sup> Quintlamicocoyotzase ica cuatlamintli huan  
quintlatise ipan tlcoli.

<sup>5</sup> Nelía niteicneltzi na catli niitztoc ininhuaya ni  
masehualme tlen tlali Mesec huan Cedar.

Nelía nitlaijiyohuía tlatlajco injuanti,  
pampa niyon se injuanti amo mitztlepanita,  
Toteco.

<sup>6</sup> Ya nisiyajqui para niitztoc ininhuaya ni mase-hualme catli amo quinequij ma onca tlase-huilistli.

<sup>7</sup> Quema niquincamanalhuía quenicatza hueli ti-  
itztose ica tlasehuilistli,  
injuanti quisencahuaj quenicatza tlahuilanase.

## 121

### *Toteco yaya mitzmocuitlahuis*

- <sup>1</sup> Quema nijtlanana noixayac,  
huan nitlachiyas ipan nopa tepeme, nimoilhuía:  
¿Canque huala notlapalehuil?  
<sup>2</sup> Notlapalehuil huala tlen TOTECO,  
yaya catli quichijchijqui ilhuicactli huan tlalti-  
pactli.  
<sup>3</sup> Yaya amo quema mitzcahuilis para timotepot-  
lamis o tiuetzis.  
Yaya mitzmocuitlahuis huan amo monequi  
cochis.  
<sup>4</sup> Quena, TOTECO catli quinmocuitlahuía israeli-  
tame amo ixijcopi,  
niyon amo cochi.  
<sup>5</sup> TOTECO yaya mitzmocuitlahuía.  
Yaya itztoc monechca para mitzmanahuis.  
<sup>6</sup> Yaya mitzmocuitlahuía tonaya huan tlayohua.  
<sup>7</sup> TOTECO mitzmocuitlahuis para amo mitzajsis  
niyon se tlamantli catli amo cuali.  
Quena, yaya quimocuitlahuis monemilis.  
<sup>8</sup> TOTECO yaya mitzmocuitlahuis campa hueli  
tiyas o tihualias,  
ama huan para nochipa.

## 122

### *Netlatlajtili para ma onca tlasehuilistli ipan al- tepetyl Jerusalén*

- <sup>1</sup> Na nipajqui quema nechilhuijque:

“Ma tiyacajya ichaj TOTECO.”

<sup>2</sup> Pero ama ya tiitztoque nica ipan altepetl Jerusalén.

Quena, ya ticalactoque campa ipuertas ipan itepa.

<sup>3</sup> Jerusalén quisencajtoque para nopona nochi ma mosentilica.

<sup>4</sup> Nuchi imasehualhua TOTECO tlen catli hueli hueyi familia tlen israelitame hualahuij nica sesen xihuitl, para quitlascamatise huan quipaquilismacase Toteco senquistoc quen quiijtohua itlajtol.

<sup>5</sup> Pampa nopona mosehuía para tetlajtolsencahuas nopa tlanahuatijquetl catli iixhui David.

<sup>6</sup> Ximotlatlajtica ica TOTECO para ma onca tlasehuilistli ipan altepetl Jerusalén.

Xijtiochihua Jerusalén ica ni camanali:

<sup>7</sup> “Ma itztoca cuali nochi catli quiicnelíaj ni altepetl Jerusalén.

Ma onca tlasehuilistli ica calijtic nopa tepamitl catli quiyahualohua.

Ma itztoca ica paquelistli ipan nochi tequicalme.”

<sup>8</sup> Pampa niquinicnelía noicnihua huan nohuampoyohua catli itztoque nica, niquijtohua:

“Ma quipiya tlasehuilistli ni altepetl.

<sup>9</sup> Pampa niquinicnelía ichaj TOTECO catli mocahua nica,

ma onca tlasehuilistli ipan ni altepetl.”

## 123

*Netlatlajtili para Toteco ma quitlasojtla*

<sup>1</sup> Na njtlananas noixayac para nimitzlachilis ta, TOTECO,

catli timosehuijtoc ipan ilhuicac.

<sup>2</sup> Tojuanti timitzlachilíaj ta,  
TOTECHO toDios, para ma techtlasojtla san se quen  
se tequipanojquetl quitlachilía iteco,  
o quen se sihua tequipanojquetl quitlachilía iteco  
isihua para ma quichihuili catli cuali.

<sup>3</sup> TOTECHO, techtlasojtla.

Quena, xijpiya hueyi moyolo tohuaya.

<sup>4</sup> Ya tisiyajtoque ica nopa masehualme catli techi-  
taj quen amo tleno topati.  
Inijuanti catli mohueyimati huan catli ricos  
tlahuel techpinajtaj,  
hasta ya techyolajsic.

## 124

*David quihueyimatqui Toteco pampa  
quimanahui tlen icualancaitacahua*

<sup>1</sup> Nochi israelitame ma quijjtoca tlaque tijchij-  
tosquíaj sintla TOTECHO amo itztosquía to-  
huaya huan amo techpalehuijtosquía.

<sup>2</sup> Sintla TOTECHO amo itztosquía tohuaya  
quema nopa tlacame motlananque para  
techhuilanase,

<sup>3</sup> techtolojtosquíaj tiyoltoque huan techtzont-  
lamiltijtosquíaj ica ininhueyi cualancayo.

<sup>4</sup> Inijuanti techhuahuatatztosquíaj quen atl tlati-  
lana,  
huan huajca eltosquía quen hueyatl panotosquía  
ipan tojuanti.

<sup>5</sup> Quena, eltosquía quen panotosquía miyac atl  
catli tetetztic,  
catli tehuahuatatztosquía huan titzontlantosquíaj.

- <sup>6</sup> Ma tijtlascamatica TOTECO pampa amo quinc-ahuili ma techcococa.
- <sup>7</sup> Quen se tototl cholohua tlen se tlaquetztlí,  
quej nopa nojquiya Toteco techchololti ininmaco  
tocualancaitacahua,  
catli quinequiyayaj techmasiltise.  
Nopa lazo cotonqui huan tojuanti timocajque  
timajcajtoque.
- <sup>8</sup> Tojuanti totlapalehuil huala tlen TOTECO,  
catli quichijchijqui ilhuicactli huan tlaltipactli.

## 125

### *Toteco quinmocuitlahuía imasehualhua*

- <sup>1</sup> Masehualme catli motemachíaj ipan TOTECO itz-toque neltemachme,  
quen nopa tepetl Sion catli amo mojmolinía,  
huan ijcatox cuali para nochipa.
- <sup>2</sup> Quen Jerusalén quiyahualojtoque miyac tepeme  
para quimanahuise,  
quej nopa nojquiya TOTECO quinyahualojtoc  
imasehualhua huan quinmanahuía.
- <sup>3</sup> Toteco amo quincahuilis ma tlanahuatica masehualme  
catli fiero inintlalnamiquilis,  
pampa huelis imasehualhua catli itztoque  
xitlahuaque nojquiya pehuasquíaj  
quichihuasquíaj tlamantli catli amo cuali.
- <sup>4</sup> TOTECO, xiquinchihuili catli cuali masehualme  
catli cuajcualme,  
huan catli xitlahuac ininyolo moiexpa.
- <sup>5</sup> Pero nopa masehualme catli moiycatlalíaj  
ica tlamantli catli amo cuali xiquinhuica  
campa tiquintlatzacuiltis.

Huan ma onca paquelistli huan tlasehuilistli ipan tlali Israel.

## 126

### *Toteco quicualtlalis itlal*

- 1 Quema TOTECO sempa quinhualicase ipan Jerusalén nochí imasehualhua catli tetequipanohuaj ipan sequinoc tlalme, elis quen tijtemiquij.
- 2 ¡Nelía tihuetzcase huan tihuicase ica paquelistli! Huan nopa masehualme tlen sequinoc tlalme quiijtose:  
“¡Dios quichijtoc huejhueyi tlamantli para nopa israelitame!”
- 3 Quena, nelía melahuac TOTECO techchihuilis huejhueyi tlamantli.  
¡Ma tipaquica!
- 4 TOTECO, sempa techmacas tlamantli catli cuali quen tijpixtoyaj achtiluiya.  
Quena, quen nopa hueyame catli ajsi ipan nopa huactoc tlali huan quiyancuila,  
quej nopa xijyancuili tonemilis, TOTECO.
- 5 Catli tocaj ica choquistli, ica paquelistli pixcase.
- 6 Quena, masque chocatiyase quema quitoctiyase ininxinach,  
pero quema pixcatij huicatihualase ica paquelistli pampa ya quihualicase catli quipixcatose.

## 127

### *Nochi catli cuali huala tlen Toteco*

- 1 Sintla TOTECO amo quitlanana se cali catli masehualme quichihuasnequij,

san tlapic inintequi catli nopona tequitij.  
 Sintla TOTECO amo quimocuitlahuía se altepetl,  
 san tlapic inintequi nopa masehualme catli no-  
 ponan tlamocuitlahuiáj.

<sup>2</sup> San tlapic anmehuase cualca para antequitise  
 chicahuac huan amo anmosiyajquetzase  
 hasta tlajco yohual.  
 San tlapic para ica miyac tequipacholi anquitemo-  
 jtinemise amotlacualis huan san ya nopa  
 anquimatise.

Pampa Toteco Dios quinequi ximotemachica ipan  
 ya huan xicochica cuali.  
 Yaya quinmacas nochí catli quinicnelía nochí catli  
 monequi.

<sup>3</sup> Toconehua itztoque se nemactli tlen TOTECO.  
 Quena, catli tlacatij tlen totlacayo eltoc quen se  
 tlatlancayotl.

<sup>4</sup> Nopa coneme catli se quinpiya quema noja se  
 telpoca tlacatl,  
 itztoque quen miyac cuatlamintli catli quintequi-  
 huía se soldado para ica momanahuis ipan  
 tlahuilancayotl.

<sup>5</sup> Cuali ipanti se tlacatl catli quinpiya miyac icone-  
 hua.  
 Nopa tlacatl amo mopinahuas sintla icualan-  
 caitacahua quitelhuíaj iixpa se juez,  
 pampa nochí quitlepanitase catli quinpiyas para  
 ica momanahuis.

## 128

*Cuali ipanti nopa masehuali catli quitlepanita  
 Toteco*

- <sup>1</sup> Nelía paqui nopa masehuali catli quiimacasi huan quitlepanita TOTECO.  
 Quena, paqui catli nemí xitlahuac ipan iojhui.  
<sup>2</sup> Quiselis itlaxtlahuil pampa tequiti cuali.  
 Yaya paquis miyac huan nochí catli quichihuas quisas cuali.  
<sup>3</sup> Isihua paquis ipan ichaj.  
 Yaya elis quen se cuali xocomeca tzontli catli achi más quimocuitlahuíaj huan catli temaca miyac itlajca.  
 Quinpiyas miyac ininconehua catli mosehuise campa imesa huan quipiyase miyac chicahualistli.  
 Quena, itztose quen olivo cuame catli nelía cuali.  
<sup>4</sup> Quej nopa TOTECO quitiochihuas nopa tlacatl catli quiimacasi huan quitlepanita.  
<sup>5</sup> TOTECO quitiochihuas tlen altepetl Sion.  
 Quicahuilis para quiitas para nochí eltoc cuali ipan Jerusalén nochí tonali tlen inemilis.  
<sup>6</sup> Quicahuilis para itztos hasta quinitas iixhuihua.  
 ¡Toteco quimacas tlasehuilistli nopa tlali Israel!

## 129

*Ma huetzica catli quincualancaitaj israelitame  
 huan altepetl Jerusalén*

- <sup>1</sup> Nochí israelitame hueli quiijtose para hasta quema pejqui itztose israelitame, huan pejqui timochihuaj se altepetl tlen san se toeso timasehualme, tocualancaitacahua techtepotztocatinentoque.  
<sup>2</sup> Techcuesolmacatoque hasta quema tiisraelita masehualme tionpejque timoscaltíaj quen se telpocatl.

Pero amo quema hueltoque techtzontlamiltíaj.

<sup>3</sup> Tocuitlapa techtlamicocojque quema techmaquiliyayaj hasta huejcajya.

<sup>4</sup> Pero TOTECO yaya nelía xitlahuac,  
quicotonqui nopa tepos cadenas catli ica techtata-  
catzohuayayaj nopa masehualme catli amo  
quitlepanitaj TOTECO.

<sup>5</sup> Ma huetzica ipan se hueyi pinahualistli nochí  
catli quicualancaitaj altepetl Jerusalén.

<sup>6</sup> Ma elica quen nopa xihuitl catli nimantzi pilini  
huan huaqui pampa ixhuatoc ipan tlali  
catli amo huejcatla.

<sup>7</sup> Quena, ma elica quen nopa xihuitl catli amo aquí  
quimehua,  
niyon amo aqui quipixca itlajca pampa amo tleno  
ipati.

<sup>8</sup> Nimitzlajtlanía para niyon se catli pano  
nopa fiero masehualme ma amo  
quintiochihuaca.

Amo aqui ma quijito:

“Ma TOTECO anmechtiochihua.”

Niyon ma amo quijjtoca:

“Tojuanti timechtiochihuaj ica itequiticayo  
TOTECO.”

## 130

*Ximotemachica ipan Toteco para anmech-  
manahuis*

<sup>1</sup> TOTECO, quema nimopantía ipan se hueyi tlao-  
huijcayotl,  
na nimitztzajtzilía para techtitlanilis motlapale-  
huil.

<sup>2</sup> Toteco, techtlacaquili quema nimitznojnotza.

Techchihuili cuenta catli nimitztlajtlanía huan  
techpalehui.

<sup>3</sup> TOTECO, sintla tiquelnamiquisquía nochitotlajt-  
lacolhua,  
amo aqui huelisquía moquetzas moixpa.

<sup>4</sup> Pero ta nelía titetlapojpolhuía,  
para nochimasehualme ma mitztlepanitaca.

<sup>5</sup> Na nimochiya ipan ta, TOTECO, para techpale-  
huis,  
Quena, ica nochinoyolo nimotemachía ipan  
nopa catli techtlajtolcahuilijtoc ipan  
mocamanal.

<sup>6</sup> Ipan noalma senquistoc nitlachixtoc para ta,  
TOTECO, xitequiti.  
Nitolachixtoc para techpalehuis,

quen nopa tlamocuitlahuiani quichiyaj ma  
tlanesi.

Quena, más nitlachixtoc huan amo quen tlam-  
ocuitlahuiani catli tlahuel quinequij ma  
tlanesi.

<sup>7</sup> Nochi anisraelitame, ximotemachica ipan  
TOTECO,  
pampa san yaya quiipyahueyi iyolo huan san  
yaya temaquixtía tlatoctzitzí.

<sup>8</sup> Yaya quinmaquixtis israelitame tlen nochiniint-  
lajtlacolhua.

## 131

### *Ximotemachica ipan Toteco*

<sup>1</sup> TOTECO, na amo nimohueyimati,  
niyon amo nimotlepanita.

Na amo nimoilhuía para achi más nicuali,

niyon amo nimoilhuía para más nijmati que se-  
quinoc.

<sup>2</sup> Na amo nimolinía iixpa Toteco.

Nimochijtoc quen se piloquichpiltzi catli sanoc  
quicajtoc chichi huan mosehuía imetzco  
inana.

Quena, ayacmo tlenó nimitztlajtlanijtoc.

<sup>3</sup> Huajca anisraelitame tlen ama huan para  
nochipa,  
san ximotemachica ipan TOTECO.

## 132

*Netlatlajtili para Toteco ma quitiochihua nopa  
tiopamitl*

<sup>1</sup> TOTECO, xiquelnamiqui David huan quenicatza  
tlaijiyohui.

<sup>2</sup> Xiquelnamiqui quenicatza David tlatestigojquet-  
zqui ica ta, TOTECO,  
catli tiiTeco Jacob, Catli Tijpiya Nochi Chicahual-  
istli.

<sup>3</sup> Quiijto:

“Amo nicalaquis nocalijtic,  
niyon amo nimotecas ipan notlapech para nic-  
ochis.

<sup>4</sup> Amo niixijcopis, niyon amo nicochis niyon se  
tlatoctzi,

<sup>5</sup> hasta nijpantis se lugar campa huelis nijchihuas  
ichaj TOTECO para ipan ma mocahua,  
yaya catli iTeco Jacob, Catli Quipiya Nochi Chic-  
ahualistli.”

<sup>6</sup> Tijcajque camanaltij ipan tlali Efrata para icaxa  
TOTECO eltoya nopona,

huan teipa tipantijque huejca tlen altepeme ipan  
cuatitlamitl.

<sup>7</sup> Huajca ama ma tiyaca ipan itiopa Toteco.

Ma tiyase timotlancuaquetzatij iixpa para ti-  
jhueyichihuase.

<sup>8</sup> TOTECO, ximotlanana huan xicalaqui ipan nopa  
tiopamitl campa eltoc mocaxa,  
catli quiixnextia mochicahualis.

<sup>9</sup> Nopa totajtzitzi catli tiquintlapejpenijtoc ma  
moquentica ininyoyo chipahuac catli  
quinixnextia para tlatzejtzeloltique,  
huan nochil masehualme catli tiquiniyocatlalijtoc  
ma tzajtzica ica paquilibrium.

<sup>10</sup> NoTeco, pampa tiquicnelia motequipanojca  
David,  
amo ximoicancuepa tlen nopa tlanahuatijquetl  
catli ta tijtlapejpeni,  
para quinnahuatis momasehualhua.

<sup>11</sup> Pampa ta, TOTECO, tijtlajtolcahuili David,  
huan amo quema tiquelcahua tijchihua catli tijt-  
lajtolcahua.

Huan ta tiquilhui para teipa tiquintlalis iixhuihua  
ipan isiya para tlanahuatise.

<sup>12</sup> Huan sintla iixhuihua quichihuase catli quijj-  
tohua nopa camanal sencahuali catli tijchi-  
jqui ica David huan sintla quitlepanitase  
motlajtol,

huajca inijuanti nojquiya mosehuise ipan isiya  
para tlanahuatise para nochipa.

<sup>13</sup> Pampa ta TOTECO, tijtlapejpenijtoc altepetl  
Jerusalén para tiitztos nopona.

<sup>14</sup> Tiquipijo:

“Ya ni elis nochaj campa niitztos para nochipa.  
Nopona nimocahuas pampa ya nopa catli ni-jnequi.

<sup>15</sup> Nijtiochihuas ni altepetl miyac huan niquintlamacas imasehualhua catli teicneltzitzti.

<sup>16</sup> Niquinmaquixtis itotajtzitzti tlen nochí catli quinequij quincocose,  
huan iflatzejzeloltijca masehualhua tzajtzise ica paquilibrium.

<sup>17</sup> Nopa chicahualistli catli David quipixqui sempa nijchihuas para monextis ipan icones,  
huan yaya catli nicaltijtoc para nijtequimacas quen tlanahuatijquetl elis quen se tlahuili para imasehualhua.

<sup>18</sup> Icualancaitacahua niquintlahuisos ipan se hueyi pinahualistli,  
pero yaya catli tlanahuatijquetl tlanahuatis cuali huan monextis nochí ihueyitilis.”

## 133

*Nelía yejyectzi nesi quema timosentilíaj ininhuaya toicnihua*

<sup>1</sup> Xiquitaca, nelía cuali huan yejyectzi nesi para icnime ma mocahuaca sentic ica san se ininyolo.

<sup>2</sup> Quema san se ininyolo masehualme, eltoc yejyectzi quen nopa aceite catli quitequilijke Aarón ipan itzonteco, huan temoc ipan itentzo huan yajqui hasta iteno iyoyo.

<sup>3</sup> Eltoc yejyectzi huan nesi quen nopa ajhuachtli catli huetzi ipan tepetl Hermón huan moxitohua ipan tepetl Sion.

Pampa campa itztoque sentic ica san se ininyolo  
masehualme,  
TOTECO nopona quititlani tlatiochihualistli huan  
nemilistli para nochipa.

## 134

*Ma quitlascamatica Toteco sesen tiotlac*

- <sup>1</sup> Ama xijhueyimatica TOTECO,  
nochi amojuanti anitequipanojcahua.  
Xijhueyimatica nochi amojuanti catli sesen tlay-  
ohua antlamocuitlahuiáj ipan ichaj.  
<sup>2</sup> Ximomatlananaca huan xijtlascamatica  
TOTECO.  
<sup>3</sup> Ma anmechtiochihua TOTECO tlen nopona ipan  
altepetl Sion,  
Quena, ma anmechtiochihua Toteco catli quichi-  
jchijqui ilhuicactli huan tlaltipactli.

## 135

*Toteco nelía hueyi, pero teteyome amo tleno in-  
inpati*

- <sup>1</sup> ¡Xijpaquilismacaca TOTECO!  
Quena, xijpaquilismacaca nochi amojuanti anite-  
quipanojcahua.  
<sup>2</sup> Xijpaquilismacaca nochi amojuanti catli anitz-  
toque ipan ichaj TOTECO huan catli annen-  
tinemij icalixpa.  
<sup>3</sup> Xijpaquilismacaca TOTECO pampa yaya nelía  
cuali.  
Xijhuicatica ica tiohuicatl pampa yaya hueyi iy-  
olo.  
<sup>4</sup> Pampa TOTECO quitlapejpenijtoc Jacob para qui-  
icnelis.

Quintlapejpeni nochí iixhuihua ma elica iaxcahuá.

<sup>5</sup> Na nijmati para TOTECO tlahuel hueyi.

Nijmati para yaya tlahuel más hueyi que nochí catli quintocaxtiaj “dioses”.

<sup>6</sup> TOTECO quichihua nochí catli quinequi quichihuas ipan ilhuicactli, tlaltipactli,

huan ipan hueyi atl huan campa más huejcatla.

<sup>7</sup> Quichihua para ipan nochí tlaltipactli ma motlanana mixtli,

huan nojquiya quititlani tlapetlanilotl huan quichihua ma tlaquiyahui.

Yaya quinahuatía ma quisa nopa ajacatl campa moa octoc.

<sup>8</sup> Quichijqui ma miqui nopa achtihui ejquetl ipan sesen familia tlen tlali Egipto,

huan nopa achtihui ejquetl tlen inintlapiyalhua.

<sup>9</sup> Quichijqui huejhueyi tiochicahual nextili ipan tlali Egipto iixpa Faraón huan itequipanojahuá.

<sup>10</sup> Quintzontlamilti miyac masehualme ipan miyac tlalme.

Quimicti tlanahuatiani catli quipiyayayaj miyac chicahualistli.

<sup>11</sup> Quimicti Sehón catli eliyaya inintlanahuatijca nopa amorreos.

Nojquiya quimicti Og tlanahuatijquetl tlen tlali Basán huan nochí nopa tlanahuatiani ipan tlali Canaán.

<sup>12</sup> Huan nochí nopa tlali catli quinahuatiyayaj nopa tlanahuatiani quincuili,

huan quinmacac nopa tlalme nopa israelitame  
quen elisquía se llamantli catli inintata  
quincahuilijtejqui.

<sup>13</sup> TOTECO, masehualme mitzelnamictose para  
nochipa.

Nochi masehualme catli tlacajtiyase mitziximaj-  
tose para tlahuel tihueyi.

<sup>14</sup> Pampa TOTECO quintlajtolsencahuas xitlahuac  
nochi imasehualhua,  
huan yaya quintlasojtas itequipanojcahua.

<sup>15</sup> Nopa masehualme catli itztoque ipan tlalme  
catli amo quiiximatiij Toteco,  
quinhueyichihuaj teteyome tlen oro huan plata  
catli quinchijchijtoque ica ininmax.

<sup>16</sup> Nopa teteyome quipiyaj inincamac, pero amo  
camanaltij,

quipiyaj iniixteyol, pero amo tlachiyaj.

<sup>17</sup> Quipiyaj ininnacas, pero amo tlacaquij,  
huan nojquiya amo hueli tlaijiyotilanaj.

<sup>18</sup> Nopa masehualme catli quinchijchihuaj nopa  
teteyome nelía huihuitique,  
san se quen nopa teteyome,  
huan san se huihuitique catli ininpan  
motemachíaj.

<sup>19</sup> ¡Anisraelitame, xijpaquilismacaca, TOTECO!

Amojuanti antotajtzitzí catli aniixhuihua Aarón,  
xijpaquilismacaca TOTECO.

<sup>20</sup> Aniixhuihua Leví, xijpaquilismacaca TOTECO.  
Huan nochí amojuanti catli anquiimacasij huan  
anquitlepanitaj TOTECO,

xijpaquilismacaca.

<sup>21</sup> Nochi masehualme ipan altepetl Jerusalén ma  
      quipaquilismacaca TOTECO pampa yaya  
      itztoc nica ipan altepetl Jerusalén.

¡Paquilstli!

## 136

### *Ma tijtlascamatica Toteco*

<sup>1</sup> Xijtlascamatica TOTECO pampa yaya nelía cuali,  
pampa itlaicnelijcayo amo quema tlami.

<sup>2</sup> Xijtlascamatica Toteco Dios catli más hueyi tlen  
      nochi sequinoc “dioses”,  
pampa itlaicnelijcayo amo quema tlami.

<sup>3</sup> Xijtlascamatica Toteco Dios catli ininteco nochit  
      tecojme,  
pampa itlaicnelijcayo amo quema tlami.

<sup>4</sup> Xijtlascamatica TOTECO pampa san ya hueli  
      quichihua huejhueyi tlamtli,  
pampa itlaicnelijcayo amo quema tlami.

<sup>5</sup> Xijtlascamatica yaya catli quichijchijqui  
      ilhuicactli ica miyac tlalnamiquilstli,  
pampa itlaicnelijcayo amo quema tlami.

<sup>6</sup> Xijtlascamatica yaya catli quitlali ni tlali ipani  
      atl,  
pampa itlaicnelijcayo amo quema tlami.

<sup>7</sup> Xijtlascamatica yaya catli quinchijchijqui nopa  
      tlahuilme catli onca nepa ilhuicac,  
pampa itlaicnelijcayo amo quema tlami.

<sup>8</sup> Quichijchijqui nopa tonati para ma tlahu  
      tonaya,  
pampa itlaicnelijcayo amo quema tlami.

<sup>9</sup> Huan quichijchijqui metztli huan sitlalime para  
      ma tlahuica tlayohua,

pampa itlaicnelijcayo amo quema tlami.

<sup>10</sup> Xijtlascamatica TOTECO catli quintzontlamilti  
nopa achtihiui ehuani tlen tlali Egipto,  
pampa itlaicnelijcayo amo quema tlami.

<sup>11</sup> Xijtlascamatica catli quinquixti israelitame  
ipan inintlal nopa egyptome,  
pampa itlaicnelijcayo amo quema tlami.

<sup>12</sup> Quena, quinquixti ica ihueyi chicahualis huan  
ica inejmac quinpalehui,  
pampa itlaicnelijcayo amo quema tlami.

<sup>13</sup> Xijtlascamatica yaya catli quixelo nopa Hueyi  
Atl Chichiltic para ma panoca imasehual-  
hua,

pampa itlaicnelijcayo amo quema tlami.

<sup>14</sup> Huan quinpanolti nopa israelitame ipan tlali  
huactoc tlatlajco nopa hueyi atl,  
pampa itlaicnelijcayo amo quema tlami.

<sup>15</sup> Pero quinatzonpolihuilti Faraón huan isoldados  
ipan nopa hueyi atl,

pampa itlaicnelijcayo amo quema tlami.

<sup>16</sup> Xijtlascamatica Toteco catli quinyacanqui  
imasehualhua ipan nopa huactoc tlali,  
pampa itlaicnelijcayo amo quema tlami.

<sup>17</sup> Xijtlascamatica yaya catli quinmanahui imase-  
hualhua ininmaco tlanahuatiani catli quip-  
ixque miyac chicahualistli,

pampa itlaicnelijcayo amo quema tlami.

<sup>18</sup> Yaya quintzontlamilti huejhueyi tlanahuatiani  
catli tlahuel quipiyayabaj chicahualistli,  
pampa itlaicnelijcayo amo quema tlami.

<sup>19</sup> Quitzontlamilti Sehón, inintlanahuatijca nopa  
amorreos,  
pampa itlaicnelijcayo amo quema tlami.

- <sup>20</sup> Nojquiya quimicti Og, tlanahuatijquetl tlen tlali  
Basán,  
pampa itlaicnelijcayo amo quema tlami.
- <sup>21</sup> Huan intitlal nopa tlanahuatiani,  
Toteco quinmacac imasehualhua quen se tla-  
mantli catli intintata quincahuilijtejqui,  
pampa itlaicnelijcayo amo quema tlami.
- <sup>22</sup> Quena, quimacac itequipanoja Israel para ma  
moaxcati nopa tlali para nochipa,  
pampa itlaicnelijcayo amo quema tlami.
- <sup>23</sup> Yaya catli techelnamijqui tiisraelitame quema  
ayacmo tijpiyayayaj chicahualistli,  
pampa itlaicnelijcayo amo quema tlami.
- <sup>24</sup> Yaya techmanahui ininmaco tocualancaitac-  
ahua,  
pampa itlaicnelijcayo amo quema tlami.
- <sup>25</sup> Yaya quinmaca tlacualistli nochí tlamantli catli  
yoltoque,  
pampa itlaicnelijcayo amo quema tlami.
- <sup>26</sup> Xijtlascamatica Toteco Dios catli quinahuatía  
ilhuicactli,  
pampa itlaicnelijcayo amo quema tlami.

## 137

*Inintequipachol israelitame catli itztoque ipan  
tlali Babilonia*

- <sup>1</sup> Ipan tlali Babilonia timosehuiyayaj iteno atemitl,  
huan timoccoquiliyayaj,  
pampa tiquelnamiquiyayaj altepetl Jerusalén,  
huan quenicatza onpano cuali elqui.
- <sup>2</sup> Tiquintlahuelcajtoyaj toarpas huan tiquincuapi-  
lojtoyaj ipan ininmacuayo nopa cuame.
- <sup>3</sup> Amo hueliyaya tihuicaj.

Pero inijuanti catli techhualicatoyaj ica fuerza  
 ipan inintlal,  
 techilhuijque ma tihuicaca ica paquelistli nopa  
 yejyectzitzi huicatl catli tihuicayayaj  
 quema tiitztoyaj ipan altepetl Jerusalén.

<sup>4</sup> Pero amo tihuelque.

Amo hueli tihuicase se huicatl para Toteco ipan  
 seyoc tlali ica masehualme catli amo  
 tiquiniximatij.

<sup>5</sup> Sintla niquelcahuasquía altepetl Jerusalén,  
 ma quipolo ichicahualis nonejmac,

huan ma ayacmo huelis quitzotzonas nopa arpa.

<sup>6</sup> Sintla ayacmo niquicnelisquía Jerusalén catli  
 techpaquilismaca,  
 xijcahua nonenepil ma tlatzqui ipan nocamachal  
 para ayacmo nihuicas.

<sup>7</sup> TOTECO, amo xiquelcahua catli nopa tlali Edom  
 ehuani quijtojque,  
 quema nopa soldados tlen tlali Babilonia  
 quisosolohuayayaj altepetl Jerusalén.

Inijuanti quijtohuayayaj:

“Xjsosoloca nopa altepetl hasta campa  
 tlatzquitoc.”

<sup>8</sup> Teicneltzi ni tlali Babilonia,  
 pampa nojquiya quisosolose.

Nelía paquis nopa tlacatl catli quitlamisolos  
 huan quintzontlamiltis imasehualhua.

<sup>9</sup> ¡Tlahuel paquis nopa tlacatl catli quinitzquis  
 coneme tlen Babilonia huan quinxaxam-  
 atzas ipan tetl,

por catli fiero quichijtoque inintatahua ipan alte-petl Jerusalén!

## 138

### *Tlascamatili por itlapalehuil Toteco*

- 1 Ica nochí noyolo nimitztlascamatis, TOTECO, huan nihuicas para ta iniixpa nopa motequihua-jahua.
- 2 Nimotlancuaquetza iixmelac motiopa catli tlatzejtzeloltic, huan nimitztlascamatis pampa nelía titetlasojtla huan titemachtli. Nochi catli techtlajtolcahuilijtoc para tijchihuas, tijtlamichihuas pampa mocamanal nelía temachtli quen ta titemachtli.
- 3 Quema nimitztzajtzilía, ta technanquilía huan techfuerzajmaca.
- 4 TOTECO, nochí tlanahuatiani catli itztoque ipan ni tlaltipactli mitztlascamatise, pampa nochí inijuanti quicaquise catli tijtlajtolca-jtoc.
- 5 Quena, huicase por nochí nopa huejhueyi tlamantli catli quichijtoc TOTECO, pampa ihueyitilis nelhueyi.
- 6 Masque TOTECO tlahuel hueyi, yaya quintlacaquilía catli moechcapanohuaj. Pero catli mohueyimatiij, monequi moquetzase huejca tlen Toteco, pampa yaya amo quinequi quinitas.
- 7 Sintla niitztoc ipan tlaijiyohuclistli, ta TOTECO, techmanahuía huan techmaquixtía.

Huan quema nechhuilanaj nocualancaitacahua,  
ta tijxitlahua momax huan techmaquixtía ica mo-  
hueyi chicahualis.

<sup>8</sup> TOTECO, ta tijchihuas nochí catli timoilhuijtoc  
para tijchihuas ipan na nonemilis.

Pampa nopa tlaicnelijcayotl catli tijpiya ica na,  
TOTECO,  
amo quema tlami.

Amo techtlahuelcahua pampa ta techchijchijqui.

## 139

### *Toteco itztoc campa hueli*

<sup>1</sup> TOTECO, ta techyoltlachilijtoc huan tijmati nochí  
tlen na.

<sup>2</sup> Ta cuali tijmati sintla nimosehuía o nimoquetza.  
Huan quema niitztoc huejca,  
ta tijmati tlaque nijpixtoc ipan notlalnamiquilis.

<sup>3</sup> Ta technextilía nopa ojtli catli monequi nijto-  
quilis,  
huan techilhuía canque nicalaquis huan canque  
nimosiyajquetzas.

Sesen tlatoctzi ta tijmati canque niitztoc.

<sup>4</sup> Ta TOTECO, tijmati tlaque niquijtos hasta quema  
ayamo nicamanalti.

<sup>5</sup> Ta techyahualojtoc pampa tiya ica noixpa huan  
ica noica,

huan tijtlália momax ipan na para techtiochihuas.

<sup>6</sup> Nochi ni tlamatli catli ta tijmati nelía yejyectzi,  
huan ohui para nijneltocas.

<sup>7</sup> Amo cana hueli nimotlatis tlen moTonaltzi.

Amo cana huelis nimotlatis huan amo tiitztos no-  
pona.

<sup>8</sup> Sintla nitlejcos hasta ilhuicac para nimotlatis,

ta nopona tiitztoc.

Huan sintla niyasquía ipan nopa hueyi ostotl  
campá itztoque mijcatzitzí,

ta nepa tiitztoc.

<sup>9</sup> Sintla nijpiyasquía noeltlapal huan  
nipatlanisquía,

huan niquixcotonasquía nopa hueyi atl,

<sup>10</sup> hasta nepa techyacanasquía ica mohueyi chic-  
ahualis.

<sup>11</sup> Sintla nijchihuasquía campica para nimotlatís  
ipan tzintlayohuilotl,

nopa tzintlayohuilotl mocuepasquía tlahuili  
yahualtic tlen na,

pampa ta tiitztos nopona.

<sup>12</sup> Pampa niyon nopa tzintlayohuilotl amo hueli  
techtlatis moixpa, Toteco.

Pampa para ta nopa yohuali tlahuila quen elisquía  
tonaya.

Nopa tzintlayohuilotl huan tlahuili ta tiquita san  
se.

<sup>13</sup> Ta tijsencajqui sesen tlamatli catli onca iijtic  
notlacayo.

Huan tijmotzquilti sesen tlamatli catli nijpiya,  
quema niitztoya iijtico nonana.

<sup>14</sup> Nimitztlascamati pampa techsencajqui ma nieli  
se tlamatli catli nelia cuajcualtzi.

Quena, nopa tequitl catli tijchijqui quema  
techsencajqui onpano yejyectzi.

San nijsentlachilía para nimoilhuis nochí catli ti-  
jchijtoc ipan notlacayo.

<sup>15</sup> Ta tijtlachiliyaya quema na nipejqui  
nimoscaltía nopona nel nimotlatijtoya tlen  
nochí sequinoc ipan iijtico nonana.

Quema amo aqui más quitlachiliyaya,  
ta techchijchijqui ica mohueyi yajatil,  
quen se catli cuali quimati tlaxinepalohua.

**16** Ta techitac quema ayamo nitlacatiyaya.  
Huan quema ayamo nitlaijiyotilanayaya, tiquix-  
quetzqui quesqui tonali niitztosquía.  
Huan sesen tonal catli niitztosquía huan tlaque  
nopantis,  
ta tiquijcuilo ipan molibro.

**17** Toteco Dios, nelía yejectzi quema nimomaca  
cuenta para ta tijsenhuiquilía timonejne-  
huilía tlen na.

**18** Hasta amo hueli nijpohua quesqui huelta timo-  
nejnehuilía tlen na ipan se tonali.

Huan ica ijnaloc quema niisa,  
ta noja timonejnehuilijtoc tlen na.

**19** Toteco Dios, nelía elisquía cuali sintla tiquint-  
zontlamiltisquía nochí masehualme catli  
amo mitzlepanitaj.

Xijchihua ma nechtalcahuica nopa temictiani,

**20** pampa inijuanti mitzlaijilhuíaj,  
huan san quiahuilmatij motoca.

**21** TOTECO, ¿atlac amo quinamiqui para  
niquincualancaitas inijuanti catli  
mitzcualancaitaj?

¿Atlac amo quinamiqui nicualanis ica mocualan-  
caitacahua?

**22** Quena, tlahuel niquincualancaita,  
pampa niquinita quen nojquiya elisquíaj  
nocualancaitacahua na.

**23** NoTeco Dios, xijtlachili noyolo huan xiquita  
nochí catli eltoc nopona.

Huan xijyejyeco notlalnamiquilis para tiquitas  
sintla xitlahuac catli nimoilhuía.

<sup>24</sup> Technextili sintla onca ipan notlanejnehuilis se  
tlalnamiquilistli catli amo mitzpactía,  
huan techyacantiya ipan nopa ojtli catli tehuica  
campa onca nemilistli para nochipa.

## 140

*TOTECO, techmanahui ininmaco amo cuajcualme*

<sup>1</sup> TOTECO, techmanahui ininmaco nopa tlaix-  
panoca masehualme.

Techmocuitlahui para tlahuilanca tlacame amo  
huelis nechcocose.

<sup>2</sup> Inijuanti nochí se tonal quisencahuaj quenicatza  
quichihuase tlamantli catli amo cuali.

Tlatoctzitzí quinequij quipehualtise cualantli.

<sup>3</sup> Inincamanal tecocohua quen itencococa se co-  
huatl o se colotl.

<sup>4</sup> TOTECO, techmocuitlahui para amo nihuetzis in-  
inmaco masehualme catli amo cuajcualme,  
huan catli tetlaijilhuíaj,  
pampa inijuanti moilhuijtoque quenicatza nech-  
huihuiitase.

<sup>5</sup> Nopa masehualme catli mohueyimatij quitlalij-  
toque se tlaquetztlí para ma nimasi.

Quitlalijtoque se lazo para ica nechcuapilose para  
ma nimohuisos ajacatipa.

Nechchiyaj ica se matlatl para nechmasiltise.

<sup>6</sup> Na nimitzilhuijtoc, TOTECO, para ta tinoDios.

Techtlacaquili quema nimitztzajtzilía.

<sup>7</sup> Ta tiTOTECO Dios, tinotemaquixtijca,  
ta tijpiya nochí chicahualistli para techmaquixtis.

Ta techmocuitlahuía quema onca tlahuilancayotl.  
<sup>8</sup> TOTECO, amo xiquincahua ma tlatlanica nopa masehualme catli amo mitztlepanitaj.  
 Amo xiquinpalehui para ma quisa cuali catli quinequij quichihuase para ma amo mohueyimatica.  
<sup>9</sup> Xijchihua para nochí tlamantli catli moilhuij-toque quichihuase ma huetzi ininpani.  
 Ma tzontlamica senquistoc quen quisencajtoyaj nechtzontlamiltise na.  
<sup>10</sup> Ipan inintzonco ma huetzi tlicoli,  
 o xiquinmajcahua ipan tlitl,  
 o ipan ostotl catli tlahuel huejcatla campa ayacmo huelise quisase.  
<sup>11</sup> Amo xiquincahuili ma tlatlanica ipan totlal nopa masehualme catli quinpectía istlactase.  
 Más cuali nimantzi xiquintlatzacuilti.  
<sup>12</sup> Pero na cuali nijmati para ta, TOTECO,  
 tiquinpalehuis nopa teicneltzitzti catli inijuanti quintepotztocatinemij.  
 Ta tiquinpalehuis catli teicneltzitzti para ma quisa cuali para inijuanti quen quinamiqui.  
<sup>13</sup> Huan masehualme catli itztoque xitlahuaque mitztlascamatise,  
 pampa quimatij para temachtli itztotij moixpa.

## 141

*Netlatlajtili para Toteco ma quimanahui*

<sup>1</sup> TOTECO, na nimitznotza.  
 Ximoisihuilty techpalehuiqui.  
 Techtlacaquili quema nimotlatlajtía ica ta.

<sup>2</sup> Xjseli nonetlatlajtilis quen elisquía copali catli  
quitlatíaj moixpa,  
huan quema nimomatlanana para nimitzhueyi-  
mati,  
xiquila quen se tlacajcahualistli catli nimitzmac-  
tilia ica tiotlac.

<sup>3</sup> TOTECO, techmocuitlahui para ma amo nica-  
manalti quej hueli.

Techpalehui para nimocamatzacuas.

<sup>4</sup> Amo techcahuili nijnequis tlamantli catli amo  
cuali.  
Amo techcahuili ma niquinpalehuis tlaixpanoca  
masehualme ica catli quichihuaj.

Ma amo niquixtoca nijcuas nopa cuali tlamantli  
catli quipiyaj.

<sup>5</sup> Quema monequi se nechtlanamictis,  
xijchihua para catli monejnemiltíaj xitlahuac  
moixpa ma nechtlatzacuiltyca.

Ya nopa niquitasquía quen se tlamantli cuali catli  
nechchihuilíaj.

Sintla masehualme catli cuajcualme nechtlac-  
ahaultise,

elis quen se pajtli para na.

Amo techcahuili para nijhuejcamajcahuas inon.  
Pero na tlatoctzitzí nimotlatlajtía para ma quisel-  
ica tlatzacuiltyli tlaixpanoca masehualme.

<sup>6</sup> Quema nijchihuas para mocuamimilose inint-  
layacanca ipan tepeixco,  
quicaquise nocamanal huan quipantise para nel-  
cuali.

<sup>7</sup> Nopa fiero masehualme quiselise tlatzacuiltyli  
huan iniomiyohua quitepehuase ipan  
campa hueli tlali.

<sup>8</sup> TOTECO, ta catli titoTeco, na san nimitzchiya para techpalehuis.

Ipan ta nimotemachía para techmocuitlahuis.

Amo xiquincahuili ma nechmictica.

<sup>9</sup> Techpalehui para amo nimasis ipan nopa tlaque-tztlí catli quitlalijtoque nopa fiero mase-hualme.

<sup>10</sup> Xijchihua para nopa amo cuajcualme ininseltz-itzi ma momasiltica ica nopa tlaquetztlí catli quisencajtoque para sequinoc.

Pero na ma nipano nimajcajtoc huan amo tlenó ma nopanti.

## 142

*David tlajtlanqui tlapalehuili quema itztoya ipan tlaohuijcayotl*

<sup>1</sup> Chicahuac nijtzajtzilis TOTECO huan nijtlajtlanis ma nechtlaosjtla.

<sup>2</sup> Iixpa ya nijpohuilía nochí catli nechtequipachol-maca.

<sup>3</sup> Quema eltoc quen nimisahuía ipan tlaohuijcay-otl, huan ayacmo nijmati tlaque nijchihuas, nijnognotza.

San ya quimati tlaque ojtlí monequi nijtoquilis para nimomanahuis tlen nopa tlaquetztlí, catli quitlalijtoque nocualancaitacahua.

Quena, campa hueli quitlatijtoque tlaquetztlí ipan noojhui.

<sup>4</sup> Nijtlachili campa hueli huan niquitac.

Amo aqui monejnehuilía tlen na.

Amo aqui quinequi nechpalehuis.

Amo aqui nechmocuitlahuía, niyon amo aqui quichihuilia cuenta nonemilis.

**5** Huajca na nimitztzajtzili, TOTECO, huan nimitzilhui:

“TOTECO, san ipan ta nimotemachía para techmocuitlahuis.

San ta hueli techmanahuis para amo tleno nopantlis.

**6** Xijtlacaquili catli nimitztlajtlanía,

pampa tlahuvel nechtlaijiyohuilitáj masehualme.

Techmanahui ininmaco catli nechtepotztocatine mij,

pampa injuanti achi más quipiyaj chicahualistli que na.

**7** Techquixti ipan ni tlatzactli campa niitztoc para nihuelis nimitztlascamatis.

Huan huajca nopa masehualme catli itztoque xitlahuaque,

nechyahualose huan paquise pampa tijpiyas hueyi moyolo nohuaya para nochipa.”

## 143

*Netlatlajtili para Toteco ma quimanahui huan ma quiyacana*

**1** ¡TOTECO, xijtlacaquili catli nimotlatlajtí ica ta!  
Technanquili pampa ta titemachtli huan san catli cuali tijchihua.

**2** Amo ximochihua quen se juez huan techtlajtolsencahua,  
pampa moixpa ta amo aqui se masehuali catli itztoc xitlahuac.

**3** Nocualancaitacahua nechtepotztocatoque huan nechitzquijque.

Nechtlahuiso que huan nechchihualtiaj ma nitzto ipan tzintlayohuilotl quen catli ya mitoque.

<sup>4</sup> Nelia senquistoc nimoyoltequipachohua,  
hasta ayacmo nijmati tlaque nijchihuas.

<sup>5</sup> Niquelnamiqui quenicatza eltoya ipan nopa tonali catli panoc.

Nimonejnehuilia tlen noch i huejhueyi tlamantli catli tijchijqui.

<sup>6</sup> Yeca nimomatlanana moixpa huan nimitztemohua.

Ipan noyolo tlahuel nimitznequi quen se tlali catli huactoc quinequi atl.

<sup>7</sup> TOTECO, nimantzi technanquili pampa tlahuel nitlaijiyohuia ipan noyolo.

Amo ximoicancuepa tlen na para amo nimquis.

<sup>8</sup> Ica ijnaloc, technextili motlaicnelijcayo,  
pampa ipan ta nimotemachijtoc para techmocuitlahuis.

Technextili nopa ojtli catli monequi nijtoquilis,  
pampa san ta nimitzilhuia catli eltoc ipan noyolo.

<sup>9</sup> TOTECO, techmanahui tlen nocualancaitacahua,  
pampa ipan ta nimotemachia para amo tleno nopantis.

<sup>10</sup> Techmachti ma nijchihua catli ta tijnequi  
pampa ta tinoTeco Dios.

MoTonaltzi ma nechyacana campa cuali nopa  
ojtli.

<sup>11</sup> TOTECO, techmaquixti para ma monextis  
hueyitisilis.

Techquixti tlen ni tlaijiyohuolistli pampa ta tijchihua catli xitlahuac.

**12** Pampa ta techicnelía, xiquinhuejhueto nochí  
nocualancaitacahua.  
Xiquintzontlamilti nochí catli quinequij nechchi-  
huilise catli amo cuali,  
pampa nimotequipanojca.

## 144

*Netlatlajtili para Toteco ma quipalehui para tlatlanis*

**1** Ma nochí quipaquilismacaca TOTECO  
catli nechtlatíaj para amo nechajsise  
nocualancaitacahua.

Yaya nechyacana huan nechnextilía quenicatza  
nitlahuilanas.

**2** Yaya nechtlasojtla huan yaya nechpixtoc campa  
temachtli.

Yaya nechpixtoc imaco huan nechchololtis tlen  
nocualancaitacahua.

Yaya notlamahanuijca huan ipan ya  
nimotemachijtoc.

Yaya quintlalijtoc nomaco miyac tlalme ica inin-  
masehualhua para ma niquinnaahuatis.

**3** TOTECO, ¿tlaque topati timasehualme para toca  
timocuatotonía?

¿Tlaque topati para tlahuel ta techpatiita?

**4** Pampa tonemilis san panotehua quen se ajacatl  
huan quen se ecahuilotl.

**5** TOTECO, xijcuelpacho nopa ilhuicactli huan  
xitemo techpaxaloqui.

Sintla tiquinpanajsis nopa tepeme, popocase.

**6** Xijtitlani tlapetlanilotl quen elisquíá cuatlam-  
intli,

huan xiquinsemana nochí mocualancaitacahua  
huan amo quimatisé tlaque quichihuase.

<sup>7</sup> Hasta tlen nepa ilhuicac xijxitlahua momax  
huan techmaquixti.

Techchololti ininmaco ni nocualancaitacahua  
catli sequinoc tlalme ehuaj huan tlahuél  
quipiyaj chicahualistli.

Na nijmati quen nimisahuisquía ipan se atl catli  
tlahuél huejcatla.

<sup>8</sup> Inijuanti san quinپactía istlacatise.

Tlatestigojquetzaj para quiijtose catli melahuac,  
huan nimantzi istlacatij.

<sup>9</sup> NoTeco Dios, na nihuicas huicatl catli yancuic,  
huan nitlatzotzonas ipan noarpa catli quipiya ma-  
jtlaclti cuerdas.

<sup>10</sup> Pampa ta catli tiquinchihua ma tlatlanica  
tlanahuatiani.

Ta catli techmaquixti na nimotequipanojca,  
David, para ma amo nechmictica ica  
machete.

<sup>11</sup> Nojquiya techmaquixti huan techmanahui in-  
inmaco nocualancaitacahua,  
pampa inijuanti san teistlacahuíaj huan tlacaj-  
cayahuaj.

<sup>12</sup> Xijchihua para totelpocahua ma elica tejte-  
tique huan huejcapantique quen cuame  
catli yejyectzi moscaltíaj.

Huan toichpocahua ma elica yejyectzitzi,  
quen nopa tlaquetzalme catli quinyejecchij-  
toque,

huan quinquetztoque ipan ininchajchaj tlanahu-  
atiani.

<sup>13</sup> Xijchihua para tocoxtalhua ma temica ica miyac tlamatli pixquistli.

Huan toborregojhua ma momiyaquilica hasta ma mochihuaca miles huan millones ipan topottero.

<sup>14</sup> Xijchihua totorojhua ma quipiyaca miyac chicahualistli para tequitise.

Amo xijcahuili niyon se tocualancaitaca ma quiyahualo totepa.

Techmaca san tlasehuilistli campa hueli.

Amo xijcahuili para niyon se tlen tomasehualhua monequi tetzajtzilis para tlapalehuili pampa quipanti catli fiero ipan tocalles.

<sup>15</sup> Quena, nelia paquij nopa masehualme ipan se altepetl catli quej ni eltoc,

huan amo quipiya catli fiero.

Quena, nelia paquij cuali masehualme catli quipiyaj TOTECO para ininDios,

huan ipan ya motemachíaj.

## 145

*Totecó nelia cuali huan quipiya nochí chicahualistli*

<sup>1</sup> Nochi nonemilis huan para nochipa nimitzhueyimatis tinoTeco huan tinotlanahuatijca.

<sup>2</sup> Mojmostla nimitzhueyichihuas.

Quena, ama huan para nochipa nimitzpaquilismacas.

<sup>3</sup> Nelia tihueyi, TOTECO, huan quinamiqui ma timitzhueyimatica nochí timasehualme.

Amo aqui quitlamimachilía nochí mohueyitilis.

<sup>4</sup> Nochi coneme catli moscaltijtiyase quielnamiquise catli tijchihua,

huan tepohuilise nopa tlamatli catli tijchijti-hualajtoc ica mohueyi chicahualis.

<sup>5</sup> Na san nimonejnehuilis tlen moyejyejca huan mohueyitilis,

huan nopa tlatlanextli catli mitzyahualohua.

Nimoilhuis tlen nopa huejhueyi tiochicahual nextili catli tijchijtoc.

<sup>6</sup> Masehualme camanaltise tlen nopa huejhueyi tlamatli catli tijchijtoc.

Huan na nitepohuilis tlen mohueyitilis.

<sup>7</sup> Nochi masehualme ipan tlaltipactli camanaltise para nelía ticuali huan hueyi moyolo.

Quiijtose para tijchihua san catli xitlahuac.

<sup>8</sup> TOTECO, hueyi moyolo huan tlahuatl titetlasoxtla.

Amo nimantzi ticualani huan titeicnelía miyac.

<sup>9</sup> TOTECO ta cuali moyolo ica nochi masehualme huan motlaicnelijcayo monextía ipan sesen tlamatli catli tijsencajtoc.

<sup>10</sup> TOTECO, nochi tojuanti catli ta techchijchijtoc timitztlascamatij.

Quena, nochi tojuanti catli timitztoquilláj timitz-paquilismacase.

<sup>11</sup> Tojuanti sentic timocamanalhuise tlen ihueyitilis motlanahuatilis campa ta titlanahuatía,

huan ticamanaltise quenicatza tijpiya hueyi chicahualistli.

<sup>12</sup> Titepohuilise tlen nopa huejhueyi tiochicahual nextili catli tijchijtoc,

huan tlen moyejyejca huan tlen ihueyitilis motlanahuatilis campa ta titlanahuatía.

<sup>13</sup> Pampa motlanahuatilis amo quema tlamis.

Ta tijpiyas tlanahuatili ica nochí masehualme  
catli tlacajtiyase para nochipa.

<sup>14</sup> Ta TOTECO tiquintlanana nochí catli huetzij,  
huan tiquinfuerzajmaca catli itztoque ipan  
tequipacholi.

<sup>15</sup> Nochi masehualme ipan tlaltipactli mitztemo-  
huaj,

huan mitzchiyaj para xiquinpalehui.

Ta tiquinmaca inintlacualis quen quinmonequili-  
jtihuala.

<sup>16</sup> Ta ica momax tiquintiochihua nochí catli  
yoltoque,

pampa tiquinmaca catli quicuase huan catli qui-  
ijise.

<sup>17</sup> TOTECO quichihua san catli xitlahuac,  
huan quinextía para hueyi iyolo ipan nochí catli  
quichihua.

<sup>18</sup> TOTECO itztoc ininnechca nochí catli quinotzaj.  
Quena, itztoc ininnechca nochí catli quitemohuaj  
ica nochí ininyolo.

<sup>19</sup> Yaya quinmaca catli quinequij nochí mase-  
hualme catli quiimacasij huan quitlepani-  
taj.

Quintlacaquilía quema quitzajtzilíaj ma quinpale-  
hui huan quinmaquixtía tlen catli amo  
cuali.

<sup>20</sup> TOTECO quinmocuitlahuía nochí catli quiic-  
nelíaj,

pero nochí catli amo quitlepanitaj,  
Toteco quintzontlamiltis.

<sup>21</sup> Nijpaquilismacas TOTECO ica nocamac.

Nochi masehualme catli itztoque campa hueli  
quipaquilismacase para nochipa huan amo  
quema tlamis.

## 146

### *San ma timotemachica ipan Toteco*

- 1 Na nijhueyimatis TOTECO ica nochि noyolo.
- 2 Nochि tonali ipan nonemilis nijpaquilismacas TOTECO.  
Nihuicas tiohuicatl para noTeco Dios hasta nimiquis.
- 3 Amo ximotemachica ipan huejhueyi tlacame catli quipiyaj tequiticayotl,  
niyon ipan se tlen hueli tlacatl pampa niyon se masehuali amo huelis mitzmaquixtis.
- 4 Pampa se tonal miquise nochि masehualme huan mocuepase tlali.  
Quena, tlamis inijiyo huan inninemilis,  
huan ica se tlatoctzi tlamis nochि catli moilhuijtoyaj quichihuase.
- 5 Pero nelía paqui nopa masehuali catli quipixtoc  
quen itlapalehuijca yaya catli iTeco Jacob,  
huan san ipan TOTECO iDios motemachía para quimocuitlahuis.
- 6 Yaya catli quichijchijqui ilhuicactli,  
tlaltipactli, hueyi atl huan nochि catli itztoque nopona.  
Yaya catli quichihua nochि catli quitlajtolcajtoc para quichihuas.
- 7 TOTECO quinchihuilía catli xitlahuac nochि teicneltzitzí catli sequinoc quintlaijiyohuiltzáj.  
Huan quintlamaca catli mayanaj.

Quinchihua ma yaca majcajtoque catli tzactoque  
masque amo tleno quichijtoque.

<sup>8</sup> TOTECO quintlachiyaltía popoyotzitzi.

Quintlanana catli nechca itztoque para huetzise.  
Huan quinicnelía catli monejnemiltíaj xitlahuac  
iixpa.

<sup>9</sup> TOTECO quinmocuitlahuía nopa seyoc tlali  
ehuani.

Yaya quinmocuitlahuía catli icnotzitzi huan catli  
cahual toahuihua.

Pero yaya quisosolohua catli quisencahuaj mase-  
hualme catli amo quitepanitaj.

<sup>10</sup> TOTECO tlanahuatis para nochipa.

Amojuanti ipan altepetl Jerusalén,  
amoTeco Dios elis nopa Tlanahuatijquetl,  
catli quinnahuatis nochí masehualme catli tlaca-  
jtiyase para nochipa.

¡Paquilstli!

## 147

*Ma tipaquilismacaca Toteco pampa quipale-  
huijtoc altepetl Jerusalén*

<sup>1</sup> Xijpaquilismacaca TOTECO pampa nelía cuali  
para tihuicase tiohuicatl para ya.

¡Nelía yejyectzi huan quinamiqui!

<sup>2</sup> TOTECO sempa quicualtlalis altepetl Jerusalén,  
huan quinsentilis nopa israelitame catli quinse-  
manqui,

huan itztoque ipan sequinoc tlalme quen seyoc  
tlali ehuani.

<sup>3</sup> Yaya quinyolchicahua catli quipiyaj  
yoltequipacholi huan quinpajtía campa  
mococojtoque.

- <sup>4</sup> Yaya quimati quesqui imiyaca sitlalime onca  
huan sesen quintocaxtlalijtoc.
- <sup>5</sup> Toteco nelía hueyi huan quipiya miyac chic-  
ahualistli.  
Itlalnamiquilis amo aqui hueli quitlamimachilía.  
<sup>6</sup> TOTECO quinhueyitlalía catli moechcapanohuaj,  
pero nochí amo cuajcualme quintlahuisos tlalchi.  
<sup>7</sup> Xihuicaca para anquitlascamatise TOTECO.  
Xihuicaca por nochí catli quichijtoc toDios huan  
xitlatzotzonaca ica arpa.
- <sup>8</sup> Toteco yaya quitzacua nepa ilhuicactli ica mixtli.  
Yaya quichihua ma huetzi atl ipan tlaltipactli.  
Quichihua ma moscalti xihuitl ipan cuatitlamitl.  
<sup>9</sup> Yaya quintlamaca nopa tecuanime catli nemij  
cuatitla.  
Ininpilconehua nopa cacalotl quintlamaca,  
quema pehuaj chocaj pampa mayanaj.
- <sup>10</sup> Quema Toteco quiita se cahuayo catli motlalo-  
hua chicahuac,  
o quema quiita se tlacatl catli quipiya miyac  
fuerza,  
amo quipantía miyac paquelistli ipan ininchic-  
ahualis.
- <sup>11</sup> Pero TOTECO quipantía miyac paquelistli ipan  
masehualme catli quitlepanitaj.  
Quipantía miyac paquelistli ipan catli mochiyaj  
ipan ya iteicnelilis.
- <sup>12</sup> Nochi amojuanti ipan ni altepetl Jerusalén,  
xijhueyimatica TOTECO.  
Quena, nochí catli itztoque ipan tepetl Sion,  
xijpaquilismaca amoDios.

**13** Pampa yaya cuali quitzactoc ipuertas amoaltepe para amo hueli quitlapos niyon se amocualancaitaca.

Huan yaya tlahuol quintiochijtoc amoconehua.

**14** Yaya quititlanis tlasehuilistli ipan nochi amotlal,

huan anmechmacas trigo catli más cuali para ica ximopanoltica.

**15** Yaya quintitlanis itlanahuatilhua ipan nochi tlaltipactli.

Huan quema yaya camanaltis,  
icamanal nimantzi ajsis hasta campa hueli techaj.

**16** Yaya quichihuas ma huetzi sitlal setl catli chipahuac quen nextli.

Huan quisemanas setl iixpa tlali hasta campa hueli.

**17** ¿Ajqueya hueli quiijiyohuis nopa tlasesecayotl?

**18** Pero teipa yaya quinahuatis ma huala tlatoitonilotl huan atiyas nopa setl.

Quichihuas ma pehua tlaajacas huan nopa atl catli mochijqui setl ipan atlajtli sempa motlalos.

**19** Yaya quinmacac israelitame itlanahuatilhua,  
huan quinilhuijtoc nochi catli cuali ma quichihuaca ipan inialtepe,

para tetlajtolsencahuase xitlahuac.

**20** TOTECO amo quinchihuilijtoc ni tlamatli masehualme ipan sequinoc tlalme.

Injuanti ayamo quiiximatiq itlanahuatilhua, pero tojuanti, quena.

¡Paquilitli!

# 148

*Ma quihueyimatica Toteco nochitlamantli catli  
yaya quisencajtoc*

<sup>1</sup> ¡Ma quipaquilismacaca TOTECO nochime catli  
itztoque ipan ilhuicactli!

Quena, tlen ajacatipa xijpaquilismacaca TOTECO.

<sup>2</sup> Nochi amojuanti anitequihuajcahua,  
xijpaquilismacaca TOTECO.

Quena, xijpaquilismacaca nochi amojuanti catli  
anquitequipanohuaj nepa ilhuicac.

<sup>3</sup> Ma quipaquilismacaca tonati huan metztli.

Ma quipaquilismacaca nochi nopa sitlalime catli  
yejyectzi tlahuíaj.

<sup>4</sup> Ma quipaquilismacaca nopa ilhuicactli catli eltoc  
más huejcapa,

huan nopa apostli catli mopantía ajacatipa.

<sup>5</sup> Xijpaquilismacaca TOTECO pampa yaya ca-  
manaltic huan mochijqui catli ama onca.

<sup>6</sup> Yaya quinchijqui para eltose para nochipa,  
huan quichijqui se tlanahuatili catli ica amo  
quema moyolcuepas.

<sup>7</sup> Ma quipaquilismacaca TOTECO nochitlamantli itz-  
toque ipan ni tlaltipactli.

Ma quipaquilismacaca nopa huejhueyi  
tlapiyalme catli itztoque tlatzintla hueyi  
atl.

<sup>8</sup> Ma quipaquilismacaca nopa tlitl, tesihuitl, setl,  
apostli,

huan nopa ajacatl catli quichihuaj ipaquilis.

<sup>9</sup> Ma quipaquilismacaca nochitlamantli tepeme,  
tlachiquilme,

huan nochí cuame catli temacaj inintlajca huan  
nochí tiocuame.

<sup>10</sup> Ma quipaquilismacaca TOTECO nochí tlamantli  
tlapiyalme,

huan nochí tecuanime, cohuame, huan totome.

<sup>11</sup> Ma quipaquilismacaca nochí tlanahuatiani catli  
itztoque ipan tlaltipactli,

huan nochí jueces,

huan nochí masehualme ipan nochí tlalme.

<sup>12</sup> Ma quipaquilismacaca telpocame, ichpocame,  
huehuentzitzi huan coneme.

<sup>13</sup> Ma quipaquilismacaca TOTECO pampa san  
yaya quinamiqui tihueyimatise.

Ihueyitisil nelhueyi hasta quipano ilhuicactli  
huan tlaltipactli.

<sup>14</sup> Yaya quinfuerzajmacatoc imasehualhua.

Ma quipaquilismacaca TOTECO nochí  
itlatzejzeloltijca masehualhua,

nochí tojuanti catli tiisraelitame catli yaya techiy-  
ocatlalijtoc para ma tiitztoca más inechca.

¡Xijpaquilismacaca TOTECO!

## 149

### *Nochime ma quipaquilismacaca Toteco*

<sup>1</sup> Xijpaquilismacaca TOTECO.

Xihuicaca para TOTECO se huicatl yancuic.

Nochi amojuanti animasehualhua,

xijhuicatica Toteco por nochí catli quichijtoc.

<sup>2</sup> Anisraelitame, ximopaquilismacaca ipan Toteco  
pampa yaya anmechchijchijqui.

Anmasehualme ipan altepetl Jerusalén,

ximopaquilismacaca ipan amotlanahuatijca.

<sup>3</sup> Xijpaquilismacaca TOTECO ica mijtotilistli.

Huan xihuicaca ica pandero huan ica arpa.

<sup>4</sup> Pampa Toteco quipantía paquilibrium ipan imase-hualhua,  
huan quinmaquixtía catli moechcapanohuaj iixpa.

<sup>5</sup> Nochi catli iaxcahua TOTECO ma paquica pampa  
yaya tlahuel hueyi ihueyitilis.

Huan hasta quema ya motectoque ipan inint-lapech noja ma quihiucatICA.

<sup>6</sup> Ma quihueyitlalica TOTECO nochi imasehual-hua.

Quipixtoc ipan imax se machete catli oncac tlatequi,

<sup>7</sup> para ica quincuepilis nopa sequinoc tlalme catli  
quinchihuilijque catli amo cuali,

huan para ica quintlatzacuilitis.

<sup>8</sup> Ma quinilpica inintlanahuatiyahua huan inint-layacancahua ica tepos cadena,

<sup>9</sup> para quiselise nopa tlatzacuilitili catli ya eltoc tlasencahualli.

Huan ica ni TOTECO quinhueyitlalis nochi itlatze-jtzeloltijca masehualhua.

¡Ma nochi quipaquilismacaca TOTECO!

## 150

*Xijpaquilismacaca Toteco ica miyac tlamantli  
tepos tlatzotzonali*

<sup>1</sup> ¡Xijpaquilismacaca TOTECO!

Xijpaquilismacaca TOTECO ipan itiopa.

Xijpaquilismacaca nepa ipan ilhuicac catli yaya  
quichijchijqui ica ihueyi chicahualis.

<sup>2</sup> Xijpaquilismacaca por nochi nopa huejhueyi tlamantli catli yaya quichihua.

Xijpaquilismacaca pampa tlahuel hueyi ichic-  
ahualis.

<sup>3</sup> Xijpaquilismacaca ica tlapitzali,

Xijpaquilismacaca ica guitarra huan ica arpa.

<sup>4</sup> Xijpaquilismacaca ica panderos huan ximijtot-  
ica.

Xijpaquilismacaca ica nochí tlamantli tlatzotzon-  
ali catli quipiyaj cuerdas,  
huan ica acatlapitzali.

<sup>5</sup> Xijpaquilismacaca ica platillos catli yejyectzi  
tzilinij.

<sup>6</sup> Nochi catli yoltoque ma quipaquilismacaca  
TOTEKO.

¡Xijpaquilismacaca!

**Icamanal toteco; Santa Bíblia  
Bible without Deuterocanon in Nahuatl, Huasteca  
Occidental (MX:nhw:Nahuatl, Huasteca Occidental)**

copyright © 2005 Wycliffe Bible Translators, Inc.

Language: Nahuatl, Huasteca Occidental

Translation by: Wycliffe Bible Translators, Inc.

Náhuatl, Huasteca Occidental [nhw], Mexico

**Copyright Information**

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Huasteca Occidental

**© 2005, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

